

МИХАИЛ ШОЛОХОВ

АСАРЛАР
ТҮПЛАМИ
САККИЗ ТОМДИК



ТИНЧ ДОН

ТҮРТ КИТОБЛИ
РОМАН



ЎзССР ДАВЛАТ БАДИЙӢ АДАБИӢТ НАШРИӢТИ

Тошкент — 1963.

МИХАИЛ ШОЛОХОВ

АСАРЛАР
ТҮПЛАМИ



ТОМ

ТИНЧ ДОН

ТҮРТИНЧИ КИТОБ



ЎзССР ДАВЛАТ БАДИЙ АДАБИЁТ НАШРИЁТИ

Ташкент - 1963

М. Шолохов «Тинч дон» романининг IV китобида Дон казакларининг 1919 йилги қўзғолони ҳамда контрреволюцион «Қўнгилли армия»нинг мағлубиятга учрагани ҳикоя қилинади. Оқ гвардиячиларнинг найрангига учиб, Совет ҳокимиятига қарши қурол кўтарган Юқори Дон казакларининг исёни тарих томонидан ҳало-катга маҳкум этилганлигини ёзувчи юксак бадиий маҳорат билан тасвирлаб беради.

ОДИЛӢ ШАРАПОВ

таржимаси

ЕТТИНЧИ ҚИСМ

I

Юқори Дон қўзғолони Жанубий фронтдаги Қизил Армиянинг кўп қисмини ўз гирдобига тортган эди. Дон армияси қўмондонлиги шу вазиятдан фойдаланиб, Но-вочеркасскни тўсиб турган ўз кучларини бемалол қайтадан тузиб олди, ҳатто Каменск билан Усть-Белокалитвен станицалари атрофига, аксарияти қалмоқ ва қуийи донликлардан иборат энг мустаҳкам ва жангда чиниқкан полкларни тўплаш имкониятига ҳам эга бўлди. Бу полклар олдига қўйилган вазифа — пайти келганда генерал Фицхалауровнинг қисмлари билан биргаликда, 8- Қизил Армиянинг 12-дивизиясини улоқтириб ташлаш ва Урал дивизияси билан 13-дивизиянинг орқа томонида жанг қилиб, шимол томон ўтиб олиш ва шу йўл билан қўзғолон кўтарган юқори донликлар билан бирлашишдан иборат эди.

Дон армиясининг қўмондони генерал Денисов билан штаб бошлиғи генерал Поляков бу полкларни бир жойга тўплаб, зарбдор группа тузиш тўғрисида план тузиб қўйишганди; май ойининг охирларида бу план батамом амалга оширилди деса бўлади. Каменск станицаси ёнига 16.000 отлиқ ва пиёда аскар, 36 тўп, 140 пулемёт келтирилди; 1918 йил ёзида ҳарбий ёшдаги казак йигитларидан тузилган «Ёш армия» деб аталувчи отлиқ аскарлар ва полкларнинг сўнгги қисмлари ҳам етиб келмоқда эди.

Айни шу пайтда, тўрт томондан қуршовга тушган қўзғолончилар қизил аскар жазо отрядларининг ҳу-

жумларини даф этиш билан овора эди. Жанубда, Доннинг чап қирғоғида эса, қўзголончиларнинг икки дивизияси траншеяларга маҳкам жойлашиб олган, қизилларнинг сону саноқсиз тўплари бутун фронт бўйлаб тўхтамасдан аёвсиз ўт очганига қарамай, уларни дарёдан ўтказмай қўйган эди; қолган уч дивизия қўзғолончиларни ғарб, шимол ва шарқ томондан ҳимоя қилиб турарди; бу дивизияларда, айниқса шарқи-шимолий участкада талафот ниҳоятда зўр эди, лекин шундай шароитда ҳам улар чекинмас, Ҳопер округи чегарасидан нари силжимасди.

Уз қишлоғи рўпарасига жойлашиб олгандан бери бекорчиликдан қўли бўшамаган татарскликлар сотняси, бир куни қизил аскарларга панд бериб кетди; бир тўда казак талабгор бўлиб, тун қоронғисида қайиқларга тушди-да, секингина дарёдан Доннинг нариги бетига ўтиб, қўққисдан қизил аскарлар пистирмасини босиб, тўрт кишини ўлдирди, бир пулемётни қўлга туширди. Эртасига қизиллар Вешенская ёнидан тўп келтиришиб, казаклар траншеяларини устма-уст ўққа тутди. Ўрмон тепасида шрапнель визиллаши билан казаклар шошапиша траншеяларни ташлаб Дон бўйидан нарироққа, ўрмон ичкарисига қочиб ўтишди. Бир кундан кейин қизиллар тўпни олиб кетишли, казаклар ўз траншеяларига яна қайтиб келишди. Тўпга тутиш вақтида яқиндагина сотняга келиб қўшилган казаклардан икки ўспирин ўқ парчаси тегиб ўлди, ўша куни Вешенскаядан келган чопар ярадор бўлди.

Шундан кейин теварак-атроф бир қадар тинчиб траншеяларда ҳаёт ўз изига тушди. Хотинлар эрларидан тез-тез хабар олиб туришар, кечалари нон билан самогон келтиришар, умуман, казаклар емоқ-ичмоқдан нолишмасди: улар адашиб юрган икки бузоқни сўйиб олишганди, ҳар куни кўлда балиқ ҳам тутишарди. Балиқ овига Христонядан устаси йўқ эди. Чекинган казаклардан аллаким ташлаб кетган ўн саржинли тўрни Христоняга бериб қўйишган эди. Балиқ овлагандан у доим тўрни чуқур томондан юриб судрарди ва: «Бу атрофда мен тўр сололмайдиган кўл йўқ» деб мақтаверарди. Бир ҳафта муттасил балиқ овлагандан кейин кўйлагу чоловорига шу қадар балиқ ҳиди сингиб

қолдики, Аникушка у билан бир ертўлада тура олмай, ахийри:

— Сендан ириган лаққабалиқ ҳиди келади! Сенминам яна бир кун шу ерда турадиган бўлсам, умрбод балиқни оғзимга ололмайман,— деди.

Ўша кундан бошлаб Аникушка, чивин талаганига қарамай, ертўладан чиқиб очиқ жойда ётадиган бўлди. Ётишдан олдин афтини буришириб, қум устида сочилиб ётган балиқ тангаларини, сасиган ичак-човоқларини супуриб ташларди, бироқ эрталаб Христоня балиқ овидан қайтиб келарди-ю, ҳеч кимга парво қилмай ертўла олдига ўтириб, тутиб келган карас балиқларни яна тозалашга тушарди. Унинг атрофида кўм-кўк гўнг пашшалар ғужғон ўйнар, сариқ чимолилар ёпирилиб келарди. Аникушка энтикиб келиб қоларди-да:

— Сенга бундан бошқа жой қуриб кетдими?!—деб бақиравди.— Кошкийди, томогингга қилтаноқ тиқилиб ўлсангу, мен қутулсам! Худо хайрингни берсин, нарироқ бор! Мен ётадиган жойда сен балиқларнинг ичак-човоғини чуватиб, ҳамма ёқни саситвординг, чумолини кўпайтирвординг.

Христоня балиқ тозалаётган темиртак пичоғини иштон почасига артарди-ю, кўса башара Аникушканинг ғазабнок юзига узоқ тикилиб ўйланиб қолар ва пинагини бузмасдан дерди:

— Бундан чиқди, Аникей, ичингда гижжа бор экан, балиқ исига тоқат қилолмаслигингга сабаб шу. Оч-на-ҳорга саримсоқ егин, тузукми?

Аникушка тупуринарди-да, сўкина-сўкина, ўрнидан туриб кетарди.

Иккисининг жанжал қилмаган куни йўқ эди. Уму маң, сотниядагилар тинч-тотув кун кечиришарди. Овқат мўл бўлгани учун Степан Астаховдан бўлак ҳамма казакларнинг кайфи чоғ эди.

Аксинъянинг Григорий билан Вешенскаяда учрашиб турганини Степан ҳамқишлоқ казаклардан эшитдими ёинки ўзи сезиб қолдими, тўсатдан феъли айниди-қолди; бекордан-бекорга взвод командири билан сўкишиб қоровул туришдан бош тортди.

У ертўладан чиқмас, кун бўйи қора шолча устида ҳўрсиниб ётаверар, ютоқиб қўлбола тамакини сўрарди.

Бир куни юзбоши Аникушкани патрон олиб келгани Вешенскаяга жўнаётганини эшитиб, икки сутқадан бери қорасини кўрсатмаган Степан биринчи марта ертўладан чиқди. Ўйқусизликдан шишиб ёшланиб турган кўзларини қисиб, чайқалган дараҳтларнинг кўз қамаштирувчи баргларини, шамол тўзитиб юборган паға-паға оқ булатларни нохушлик билан томоша қилди, шитирлаган ўрмоннинг ҳасратига қулоқ солиб турди-да, ертўлалар ёнидан ўтиб, Аникушкани ахтариб кетди.

Казаклар олдидагап очмай, Аникушкани бир четга тортди-да:— Вёшкига борганингда Аксиньяни қидириб топгин,— деди.— Айтгинки, бир келиб мендан хабар олсин. Битлаб кетди дегин, кўйлаги, шими кир-чир дегин, яна шуниям айтгинки,— Степан бир лаҳза жимиб қолди, хижолат чеккандай мийифида кулиб қўйди:— Жудаям сени соғинди, икки кўзи ўйлингда, дегин.

Кечаси Аникушка Вешенскаяга кириб борди, Аксинья турган уйни топди. Григорий билан аразлашиб қолгандан кейин у яна холасиникига қайтиб келган эди. У Степанинг гапларини оқизмай-томизмай, Аксиньяга айтди, сўнгра, юрагига ғулғула солиш учун: «Агар Аксинья сотняга келмаса, мен ўзим Вёшкига бораман деди», — деб қўшиб қўйди.

Аксинья бу гапни эшитиб, ўйл тараддудига тушди. Холаси наридан-бери хамир ошириб, бўғирсоқ пишириб берди; орадан икки соат ўтар-ўтмас, эрига итоат қилиб ўрганган Аксинья Аникушка билан бирга Татарск сотниси турган жойга жўнаб кетди.

Степан хотини билан учрашганда қаттиқ ҳаяжонга тушган бўлса-да, сир бой бермади. У Аксиньянинг озигин юзига синчиклаб тикилди, уни гапга солиб кўрди, лекин Григорий билан алоқаси тўғрисида бирон марта оғиз очмади. Лекин гап орасида юзини тескари ўгириб, ерга қараганича:

— Сен Вёшкига нега ў ёқдан ўтиб бординг! Қишлоқ рўпарасидан ўта қолсанг бўлмасмиди? — деб сўради, холос.

Аксинья совуққина қилиб, ёт кишилар билан дарёдан ўтишнинг иложи бўлмаганини, мелеховларга ялингиси қелмаганини айтди. Лекин гапириб бўлгандан кеинингина бу жавобидан, мелеховлар оиласи ёт эмас, де-

ган маъно чиқишини англаб қолди. «Степан ҳам худди шундай тушунган бўлса-я!»— деб ўйлаб хижолат тортиди. Қовоқлари пирпираб, юзлари бўзариб кетди.

Степан ердан кўзини олиб Аксиньяга савол назари билан қаради, хотини бу саволни тушунди-да, ўсал бўлиб, жиғибийрони чиққанидан тутақиб кетди.

Лекин Степан унга раҳм қилиб, ҳеч нарса сезмагандек гапни бошқа ёқقا бурди-да, рўзфоридаги буюмлардан нимани яширганини, қаерга ва қандай яширганини суриштира бошлади.

Аксинья эрининг тантлигига тан бериб, саволларига жавоб қайтарди-ю, бироқ изза тортиб ўнғайсизланаверарди; орада ҳеч гап ўтмаганига уни ишонтириш ҳамда ўз ҳаяжонини яшириш учун жўрттага шошмасдан, сипогарчиликни қўлдан бермай гапирав эди.

Иккиси ертўлада сўзлашиб ўтиришарди. Қазаклар кириб-чиқавериб, уларни безор қилишди. Христоня кириб, чўзилиб ётиб олди. Степан холи гаплашиб олишнинг иложи йўқлигини кўриб, суҳбатни тўхтатишга мажбур бўлди.

Аксинья суюниб ўрнидан турди-ю, шоша-пиша тугунини ечди, олиб келган бўғирсоқларини эрининг олдига қўйди, сўнgra, Степаннинг хуржунидан кир кўйлак-иштонларни олиб, ертўла ёнидаги кўлчада ювиб келгани чиқиб кетди.

Ўрмонни кўкимтири туман қоплаб, ҳамма ёқ субҳидам оғушида жимжит ухларди. Кўкатлар шабнамдан қадларини кўтаролмай, ерга салом бериб қолган, кўлдаги қурбақалар вақиллашарди; бирданига ертўлага яқин жойдан, сададай шохлаб кетган заранг дараҳтнинг орқа томонидан қизилоёқнинг чириллаб сайрагани эшитилди.

Аксинья заранг тагидан ўтди. Дараҳтнинг учидан тортиб қалин ўт орасида қолган танасигача ўргимчак ини босиб кетган эди. Ўргимчак инининг толаларига тушган шабнам зарралари марвариддай йилтиради. Қизилоёқ бир дам жимиб турди-да, Аксинья оёқлари остида эзилган кўкатлар қаддини кўтарар-кўтартмас, яна сайрай бошлади, унга жавобан кўлдан учган лойхўрак чийиллаб овоз берди.

Аксинъя кофтасини ва баданини қисиб турган лифчигини ечди-да, илиқ кўл сувига тизза бўйи кириб, кирюва бошлади. Унинг тепасида чивинлар гала-гала бўлиб учишар, пашшалар финифлашарди. Аксинъя тирсакларини букиб, тирсиллаган қорамағиз қўллари билан юзини талаган чивинларни ҳайдарди. Унинг хаёли фақат Григорийда эди, сотняга жўнашидан олдин айтишиб қолганларини ўйларди, холос.

«Борди-ю, у ҳозир мени қидириб юрган бўлса-чи? Шу кечасиёқ станицага қайтаман!»— деган қатъий қарорга келди Аксинъя, сўнгра, Григорий билан қандай учрашишини, бирпасдаёқ ярашиб олишини кўз олдига келтириб, жилмайиб қўйди.

Шуниси қизиқки, Аксинъя сўнгги вақтларда Григорий тўғрисида кўп ўйларди-ю, бироқ кўз олдидা унинг ҳозирги сиймоси эмас, кўпни кўрган, тим қора мўйлов учлари сарғайган, урушдан боши чиқмай, чакка соchlари бемаҳал оқарган, пешонасини ажин босиб кетган Григорийнинг ҳозирги мардона қиёфаси эмас, балки ўша қадимги Гришка Мелехов гавдаланаарди, унинг йигитлик чоғини, йигитларга хос қўполлигини, эркалатишдаги нўноқлигини кўз олдига келтираверар, ёшлигида қоматига ярашган ингичка бўйни-ю, доим кулиб турадиган лабларини сира унутолмасди.

Ана шунинг учун ҳам Аксинъя тобора Григорийга муҳаббати ортганини, оналар сингари унга меҳр қўйганини сезарди.

Мана ҳозир ҳам бутун хаёлини бир жойга тўплади-ю, ўша жондан азиз сиймони астойдил кўз олдига келтириб туриб, ўпкаси тўлиб кетди, сўнгра, ўзидан-ўзи жилмайиб қаддини ростлади-да, эрининг кўйлагини, чала ювилганича оёқ остига ташлади, ширин хаёллар таъсири остида томоғига бир нарса тиқилгандай бўлди, чинқириб юборишига сал қолди.

— Қалбимда ўрнашиб олгансан, лаънати, сени умрбод унутолмас эканман!— деб пичирлади.

Йиглаб-йиглаб юрагини бўшатиб олди, бироқ назарида, шундай шифобахш мовий тонг қўйнида яйраб турган олам ўз ҳуснини йўқотгандай бўлди. Аксинъя кафтининг орқаси билан кўз ёшларини артди, ҳўл пешонасига тушган соchlарини селпиб ташлади-ю, хира-

лашган кўзларини сузиб, сув бетида сузиб кетаётган кичкинтой кўкимтири балиқчи қушга, то шамол тўзитган пушки ранг туман орасида ғойиб бўлгунча анқайиб қараб қолди.

Ниҳоят Аксинья кирни ювиб, дараҳт шохларига илди-да, ертўлага қайтиб келди.

Христоня уйқусидан уйғонганди, бесўнақай оёқларининг эгри-буғри панжаларини қимирлатиб, эшик олдида ўтирас ва хирадлик қилиб Степани гапга солмоқчи бўларди, лекин у, шолча устида чўзилиб олиб индамай тамаки тортар, Христонянинг саволларига ҳаям, йўқ ҳам демасди.

— Сен хаёлингда, қизиллар дарёниг бу томонига ўтмайди, деб ўйлайсанми! Нега индамайсан? Индамасанг, сатқайи сар! Лекин менинг фикримча, улар кечувдан ўтишга уриниб кўради ҳали... Албатта кечувдан ўтишга ҳаракат қилишади. Бошқа йўл йўқ. Ёки сен, отларини сувга солиб сузиб ўтишади, дейсанми? Гапирсанг-чи, нега индамайсан, Степан? Бу ерда иш хуржун бўлай деб туриби-ю, сен бўлсанг ётибсан, амманинг бузоғидай!

Степан жаҳлига чидолмай ирғиб тушди.

— Үз ҳолимга қўясанми, йўқми? — деди аччиқланниб. — Одамларга бир бало бўлдими ўзи! Хотиним кўргани келғанда буларнинг хирадликини қаранг... Мазабемаза саволларминам бошимни қотиришади холос, хотинимминам икки оғиз гаплашиб олгани қўйишмайди-я!

Христоня ранжиб:

— Ҳўп гаплашадиган одамни топибсану, — деди-да, ўрнидан туриб, майишган чориқларини оёғига илди, эшик кесакисига бошини уриб олиб, ташқари чиқди.

— Бу ерда гаплашгани қўйишмайди, юр, ўрмонга бора қолайлик, — деди Степан ва хотинининг раъийига қарамасдан эшик томон юрди. Аксинья эрига бўйсуниб, кетидан эргашди...

Иккиси туш пайти ертўлага қайтиб келди. Ольха дараҳтининг соясида ётган иккинчи взвод казаклари уларни кўришлари билан карталарни йиғишириб жишиб қолишли. Гап нималигини фаҳмлагандек бир-бир

ларига кўз қисишар, мийиқларида қулишар, ёлғонда-ка хўрсиниб қўйишарди.

Аксинъя нафрат билан лабларини буриб, бошидаги ғижимланган оқ тўр рўмолини тузата-тузата, казаклар ёнидан ўтиб кетди. Ҳеч ким унга гап қотмади, бироқ хотини кетидан келаётган Степан, ёнбошлаб ётган казаклар олдига яқинлашиши биланоқ, Аникушка ўрнидан туриб олдига келди. У Степанга риёкорона икки букилиб салом берди:

— Байрамингиз муборак... Табриклаймиз!— деди шанғиллаб.

Степан мамнун бўлиб илжайди. Хотини билан ўрмондан келаётганини казаклар кўргани учун хуреанд бўлди. Чунки бу нарса: «Аксинъя билан ораси чатоқ» деган миш-миш гапларга хотима бериши мумкин эди. У ҳаттоқи, йигитлар сингари кифтларини ўйнатиб, тери қуrimаган кўйлак елкаларини кўрсатиб ҳам қўйди.

Ана шундан кейин казаклар баттар суюлишиб, кула-кула гап отишиди:

— Хотин эмас, хирс экан, биродарлар! Степанни роса терлатиби... Кўйлаги баданига ёпишиб қопти-я!

— Бечорани қўшга қўшгандан баттар қилибди, аъзойи бадани жиққа ҳўл.

Ертўлага етгунча Аксинъядан кўзларини узмай қараб турган йигитча эса:

— Үлай агар, оламни қидирсанг бундай соҳибжамолини тополмайсан!— деб хўрсиниб қўйди.

— Ўзинг ҳеч қидириб кўрганмисан?— деган савол билан Аникушка унинг оғзига бир урди.

Бу хил беҳаё гапларни эшитган Аксинъянинг ранги оқариб кетди, ҳалигина эрига яқинлашганлиги, унинг ўртоқларининг чапанича қочирмалари эсига тушди-ю, юзини буриштириб, жирканган ҳолда ертўлага кирди. Степан бир қараашдаёқ унинг таъби хиралигини пай-қади-да, тасалли бериш учун:

— Сен бу ҳангилардан хафа бўлма, Қсиша. Зерикканларидан ҳазиллашади...— деди.

— Нимасига хафа бўлай,— деди Аксинъя секингина; у бўз халтачасини кавлаб, эрига келтирган совғаларни шоша-пиша олди. Ниҳоят, овозини янада пасай-

тиб:— Ўзимдан хафа бўлишим лозим эди-ю, бироқ энди нафи йўқ...— деди.

Иккисининг гапи, негадир, сира қовушмади. Ўн минутча вақт ўтгандан кейин Аксинья ўрнидан турди. «Ҳозир Вёшкига жўнайман деб, ўзига айтаман-қўяман»,— деган хаёлга борди-ю, лекин ўша заҳотиёқ кирини йиғиб олмагани эсига тушиди.

Аксинья ертўла эшиги олдида, эрининг тердан ҳилвираб қолган кўйлак-иштонларини ямаб ўтирас, қиёмдан оғган қуёшга тез-тез қараб қўярди.

... Шундай қилиб, ўша куни у кетолмади. Кетишга юраги дов бермади. Лекин эртасига офтоб чиқиши биланоқ йўл тараффудига тушиб, йиғиширина бошлади. Степан қайтармоқчи бўлиб кўп уринди, «яна бир кун тур» деб ялиниб кўрди, бироқ Аксинья унинг илтимосларини қатъяян рад этгандан кейин ортиқ ялинмади; хайрлаша ётиб, фақат бир оғизгина гап сўради:

- Вёшкида турмоқчимисан?
- Ҳа, ҳозирчалик Вёшкида.
- Шу ерда тураверганинг яхшимасмиди?
- Бу ер менга тўғри келмайди, казакларингни кўр...
- Бу гапинг тўғри...— деб кўна қолди Степан, бироқ хотини билан совуққина хайрлашиди.

Шарқи-жанубдан кучли шамол турди. Туни билан олис йўл босган гармсел шаштидан қайтган эди; бироқ, шунга қарамай, Ҳазар денгизи ортидаги чўлларинг иссиқ нафасини келтирди, бир ҳамлада чап қирғоқдаги пичанзорга тушган шабнамни ялаб, туманларни тўзитиб юборди, сўнгра, Дон бўйидаги бўр тоғларининг устини қизғиши парда сингари қоплаб олди.

Аксинья чориқларини ечди, чап қўли билан юбка этагини тутамлаб ушлаб олди-ю (ҳали ўрмонда шабнам кўтарилимаганди), ҳеч ким юрмаган эски йўлдан шипиллаб кетаверди. Ернинг нами оёқларига муздай тегар, яланғоч бўйинини ва тирсиллаган болдириларини гармсел қитиқлаб ўпарди.

Ялангликка чиққач, бир туп гуллаган наъматак ёнида ўтириб дам олди. Яқин жойдан, суви қуrimаган қамишзордан ёввойи ўрдакларинг овози келар, эркак ўрдакнинг хириллаб ғафиллагани эшитиларди. Дон-

нинг нариги бетида пулемётлар тўхтовсиз тариллар, аҳён-аҳёнда гумбурлаб тўп отиларди. Тўп ўқи бу томонга тушиб портлаганда, товуши акс садо сингари, анчагина эшитилиб турарди.

Ниҳоят, отишма ҳам тўхтади, ажойиб оҳангларга тўлган табиат ўшанда ўз сирларини Аксинъяга очиб ташлади: шумтол дарахтининг сирти оқ яшил барглари, четлари жимжимадор ва йилтироқ эман барглари шамолда липиллаб шилдиради; ҳали вояга етмаган сандипзор бир меёрда гувилларди; жуда-жуда олислардан каккунинг овози келар, гўёки бу қуш аллакимнинг қолган умрини санаётгандай, ҳасрат билан каккулар эди; кўл устида учиб юрган сўфитўрғай: «ким-ким, ким-ким» деб устма-уст савол берадигандай бидирларди; зифирдаккина кул ранг бир қушча Аксинъядан иккни қадам нарироқда бошини кўтариб, кайф билан кўзларини юмганича арава изидаги кўлобчадан сув ичарди; ола-була духоба либос кийган қовоқарилар тинмай ғўнғиллашарди; қорамтири тусли ёввойи асаларилар дала чечакларининг гулбаргларига қўниб чайқалишарди. Улар бирданига ҳавога кўтарилиб, хушбўй асални соя-салқин жойларга, дарахт кавакларига ташишарди. Терак шохларидан шира томчилар, дўланда дарахти тагида чириб ётган бултурги баргларнинг ачиған ҳиди тарқаларди.

Аксинъя қимиirlамай ўтирган жойида ўрмоннинг хилма-хил муаттар ҳидларини исказ тўймасди. Турли-туман садоларга, энг гўзал оҳангларга тўлган ўрмонда азалий қудратли ҳаёт барқ уради. Баҳор тошқинларидан роса тўлиб-тошган дарё бўйидаги захкаш ерларда шу қадар ранг-бараңг ўтлар мавжланиб ўсган эдикি, бу нафис гуллар билан алвон-алвон кўкатлар Аксинъянинг кўзларини қамаштиради.

Аксинъя лабларини қимиirlатиб кулимсирад, алла-қандай номаъум, ҳаво ранг гулларни бандларидан ушлаб, бирма-бир кўздан кечираради; сўнгра у, йўғонлашган гавдасини букиб эгилар, гулларни исказ кўрарди. Бирданига марваридгулнинг маст қилувчи ўт-кир ва ширали ҳиди димоғига келиб урилди. Аксинъя қўли билан пайпаслаб уни топди. Бу гул ёнгинасида, соя-салқин дарахт тагида ўсган эди. Яқиндагина ям-

яшил бўлган шапалоқ-шапалоқ барглари ҳозир сарғайган, шабнам билан шира тушиб, хазон бўлаётганди, лекин калтагина эгри бандининг учидаги очилган оппоқ-оппоқ ангишвонасимон сўлғин гулларни ҳали ҳам қуёшдан ҳимоя қиласади, бироқ гулнинг ўзидан ҳам ажал ҳиди келиб қолган эди: пастки икки ангишвонаси қовжираб-қорайиб, фақат уч томонигина шабнамдан йилтиради; бирданига қуёш шуъласи тушиб, марваридгул оппоқ қор сингари ялтираб кетди.

Аксинья шу бир лаҳзалик вақт ичидаги, кўз ёшлари орасидан бу гулларни томоша қилиб, ҳазин ҳидларини искаётганида, негадир, унинг ўз ёшлиги, ғамдан боши чиқмаган узоқ умри эснга тушди. Демак, Аксинья қарибди-да... Йўқса, хотин киши қаримай туриб, тасодифий хотиралар таъсиридан кўзига ёш олармиди?

Аксинья кўз ёшидан жиққа ҳўл бўлган юзини кафтларига қўйиб, шишиб кетган бетларига мижигланган дастрўмолини босиб, мукка тушганича уйқуга кетди.

Шамол зўрайиб, толу терак учларини ғарб томонга эга бошлади. Шумтол дарахтининг оқиш танаси у ёқдан-бу ёққа чайқалар, оппоқ барглари тўлқин синғари мавжланарди. Шамол пастлаб келиб, гули хазон бўла бошлаган наъматакни силкитар, ўшандаги, ҳуркиб учган бир гала қушга ўхшаш яшил барглари ваҳми ичидаги шитирлашиб пушти ранг гулбаргларини тўкарди. Наъматак тагида сўлғин гулбаргларга кўмилиб ётган Аксинья уйқудан бош кўтармас, ўрмоннинг гувиллашини ҳам, Доннинг нарёғида бошланган қасира-қусур ўқ товушларини ҳам эшитмасди, ҳатточи у, офтоб найза бўйи келиб, рўмолсиз бошини куйдираётганини ҳам сезмасди. Тепасидан аллакимнинг овози келганини, ёт пишқирганини эшитиб Аксинья уйғонди-да, шоша-пичша бошини кўтарди.

Унинг ёнида эгарлоғлик оқ тумшуқ отнинг жило-видан ушлаб турган тишлари оппоқ, оқ-сариқдан келган казак йигит туради. Унинг оғзи қулогида, кифтларини қоқиб ўйин тушар, бир оз хириллаган, лекин ёқимли ингичка овоз билан шўх-шўх ашула айттарди:

Қоқилиб кетиб йиқилдим,
Тўрт томонга тикилдим.
У ёғимга қарадим,
Бу ёғимга қарадим:
Турғизиб қўядиган
Бирон киши топмадим.
Ўгирилиб қарасам,
Турибди битта казак.

— Ўзим тураман!— Аксинья жилмайди, чаққонлик билан ўрнидан турди-да, фижимланган юбкасини ту-зата бошлади.

— Салом бердик, жонгинам! Оёғинг оғридими ё эринчоқлигинг тутиб қолдими?— деб сўрашди шўх казак.

— Уйқу элтибди,— деди Аксинья хижолат бўлиб.

— Вёшкига кетяпсанми?

— Ҳа.

— Обориб қўяйми?

— Қандай қилиб оборасан?

— Сен отга минасан, мен пиёда кетавераман. Хизмат ҳақи бир гап бўлар...— Йигит тагдор қилиб кўз қисиб қўйди.

— Йўлингдан қолма, мен бир амаллаб ўзим етиб оларман.

Бироқ у, хотин кишини қўрганда бўш келмайдиган шилқим йигит эди. Аксинья рўмол ўраш билан овора бўлиб турганда, пайт пойлаб туриб калтабақай қўлла-ри билан маҳкам қучоқлаб олди-да, бағрига тортиб ўпмоқчи бўлди.

— Жиннилик қилма!— деб бақириб юборди Аксинья ва унинг қаншарига тирсаги билан солиб юборди.

— Қўлингни кўп югуртаверма, ойимтилла! Атрофга бир қарагин: Ҳамма ёқ ниҳоятда гўзал... Тамомий жонивор жуфт-жуфт бўлиб роҳатланяпти... Кел энди, биз ҳам гуноҳга ботсак ботибмиз-да!...— деб шивирлади казак кўзларини сузиб, Аксиньянинг бўйини мўйлови билан қитиқлаб.

Аксинья қўлларини чўзиб, терлаб-бўриқиб кетган казакнинг юзига кафтларини қаттиқ тираб, ўзини

халос этмоқчи бўлди, бироқ у маҳкам қучоқлаб олган эди.

Аксинья нафаси қисилган ҳолда:

— Аҳмоқ! Мен ёмон касалга мубталоман... Қўйвор! — деб ялинди. Шундай баҳона билан бу шилқимдан қутуламан деб калта ўйларди.

— Менинг касалим олдида сеники ип эшолмайди!.. — деб ғўлдираб, казак Аксинъяни даст кўтариб олди.

Казакка ҳеч қандай важ кор қилмаслигини, иш чатоқ бўлишини Аксинья дарҳол фаҳмлади-да, офтоб олган жигар ранг бурнига жон-жаҳди билан мушт солди-ю, унинг чанглайдай қўлларидан ўзини халос этди.

— Биласанми, мен Григорий Мелеховнинг хотини бўламан-а! Қани, яқинимга кел-чи, итдан тарқаган!.. Айтсам, у худди сени...

Гапи бу қадар таъсир этишига ишонмаган Аксинья йўғон таёқни қўлига олволди. Бироқ казак сувга тушган мушукдай бўшашиб қолганди. Бурнининг икки катагидан тирқираб оқиб мўйловига қўйилаётган қонларни мosh ранг кўйлагининг енги билан артиб, аламига чидолмай бақирди:

— Аҳмоқ! Вой эси йўқ хотин! Нега шуни олдинроқ айтмадинг! Буни қара, оғиз-бурнимни қоп-қора қон қиядинг... Душман шунча қонимизни тўkkани озлик қилгандай, энди унинг ёнига ўз хотинларимиз ҳам қўшилдими!

Казакнинг башараси бирданига ўзгариб тумтайди-қолди. У йўл ёқасидаги кўлобчада ювинаётган маҳалда, Аксинья шоша-пиша йўлдан бурилди-да, пичанзор ораси билан жўнаб қолди. Орадан беш минут ўтар-ўтмас казак унинг кетидан етиб келди. У Аксинъяга илжайиб бир қаради-ю, лекин индамай, кўқсидаги ўқдонини сполик билан тўғрилаб олди; отини чоптирганича кетди.

II

Уша куни кечаси қизил аскарлар полкӣ хода ва таҳтадан ясалган солларда Малий Громчонка қишлоғи ёнида Дондан ўтишди.

Громкилийк сотня бутунлай гафлатда қолди, чунки

кўп казаклар ўша кечаси маст-аласт эди. Сотня турган жой, кечқурунданоқ хотин-халаж билан тўлган эди. Улар эрларига озиқ-овқат, кўза ва чеълакларда самогон келтиришганди. Яrim кечага бориб ҳамманинг кайфи ошиб қолди. Ертўлаларда ашула янгради, маст-аласт қийқирган аёллар товуши, эркакларнинг хохолагани ва ҳуштаклари осмонга кўтарили... Пистирмада ётган йигирмата казак бўлса, пулемёт ёнида икки пулемётчи билан бир чеълак самогон қолдириб, базмга кетишиди.

Қизил аскарлар солларга тушиб, Доннинг ўнг қирғоғидан шарпасиз жўнадилар. Дарёнинг чап томонига ўтиб олгач, улар цепь бўлдилар-да, Дондан эллик саржин нарироқдаги ертўлалар устига чурқ этмай бостириб боравердилар.

Солларни ясаган сапёрлар, нарёқда кутиб турган бошқа қизил аскарларни дарёдан ўтказишга шошилиб, тез-тез эшкак солишарди.

Беш минутгача чап қирғоқда казакларнинг поймапой ашулаларидан бошқа ҳеч нарса эшитилмади, ниҳоят, гранаталарнинг гумбурлаб портлагани, пулемётнинг тариллагани эшитилиб, бирданига палапартиш отилган милтиқ ўқларининг қасира-қусури орасидан: «Ура-ра-а! Ур-ра-а! Ура-а-а-а!» содалари узоқларга янграб кетди.

Громкилик сотня улоқтириб ташланди, фақат зимзиё тун қоронғусида орқаларидан қувиши мумкин бўлмаганлиги учунгина бутунлай қирилишдан қутулиб қолди.

Громкилик казаклар арзимаган талафотдан кейин хотин-халажлари билан пичанзорма-пичанзор Вешенс-каяга қараб тумтарақай қочдилар; шу пайт соллар дарёнинг ўнг қирғоғидан қизил аскарларни устма-уст ўтказиб турди. Сал орада 111-полкнинг биринчи батальонига қарашли яrim рота аскар иккита қўл пулемёти билан қўзғолончиларнинг базқилик сотнясига қарши ёнбошдан жанг бошлаб юборди.

Очилиб қолган оралиққа янги келган мададчи кучлар бостириб киришди. Лекин қизил аскарлардан биронтаси бу ерларнинг баланд-пастини билмагани, қисмларда йўл кўрсатувчи киши бўлмагани сабабли

зўр машаққат билан олға силжишарди, қоронғуда пай-
паслаб юриб гоҳ кўлга, гоҳ сув тошган чуқур жилға-
ларга рўпара келиб, кечиб ўтолмай сарсон бўлишарди.

Хужумга раҳбарлик қилган бригада командири
тонг ёришгунча душманни таъқиб этишни тўхтатиб ту-
ришга қарор қилди, эрталабгача резервларни келти-
риб, Вешенская остонасида куч тўпламоқчи, қаттиқ
тўпга тутгандан кейин ҳужумни давом эттирмоқчи
бўлди.

Лекин рўй берган ўпирилишни тугатиш учун Ве-
шенскаяда шошилинч чора кўрилмоқда эди. Штабдаги
навбатчи офицер: «қизиллар дарёдан ўтди» деган ха-
барни чопардан эшитган заҳотиёқ Кудинов билан Ме-
леховга одам юборди. Чёрний, Гороховка ва Дубровка
қишлоқларидан Каргин полканинг отлиқ сотнялари ча-
қиртирилди. Умумий раҳбарликни Григорий Мелехов
ўз зиммасига олди. У чап қанотни мустаҳкамлаш ния-
тида Еринский қишлоғига уч юз аскар юборди, бу куч,
мабодо қизиллар шарқ томондан айланиб ўтиб, Ве-
шенскаяга ташланадиган бўлса, унинг ҳамласига бар-
дош бериб тўхтатиб туриши, шу билан Татарск ва Ле-
бяжен сотняларига ёрдам қилиши керак эди; Фардан,
Вешенскаяга кўчиб келганлар дружинасини базкилик
сотняга ёрдам учун дарё бўйлаб пастга томон жўнатди;
хавфли участкаларга саккизта пулемёт ўрнатиб қўйди,
ўзи эса кечаси соат иккига яқин икки сотня отлиқ
аскар билан Горелий ўрмони ёқасига жойлашиб, тонг
ёришгандан қизил аскарларга ҳужум қилмоқчи бўлиб
кутиб турди.

Ҳали Ҳулкар юлдузи ботмаган эди, ўрмон бўйлаб
Базки томонга кетаётган вёшенлик келгиндилар дру-
жинаси чекинаётган базкиликларга дуч келди, уларни
душман гумон қилиб, бирпас отишди-да, қоча бошла-
ди. Улар азбаройи ҳовлиқанларидан уст-бош ва оёқ-
кийимларини кўл бўйига ташлаб, Вешенская билан
ўрмон ўртасидаги катта кўлдан сузиб ўтишди. Сал
вақт ўтмай, янгишганликлари маълум бўлди, бироқ
«қизиллар Вёшкига яқинлашиб қолибди» деган хабар
яшин тезлигига ёйилмоқда эди. Ертўлаларда ётган
қочоқлар Вешенскаядан шимолга қараб дув-дув қо-
чиши ва ҳамма ёққа: «қизиллар Дондан ўтибди,

фронтни ёриб ўтиб. Вешенскаяяга ҳужум бошлабди» деган овоза тарқатиши.

Тонг ёришар маҳалда Григорий келгиндилар дружинасининг қочганлиги тўғрисида маълумот олиши биланоқ, отини чоптириб Дон бўйига етиб келди. Дружиначилар ўз хатоларини англаб, шанғиллашиб, окопларига қайтишмоқчи эди. Григорий бир тўда дружиначилар ёнига яқинроқ бориб:

— Кўлдан сузиб ўтаётганингда қанчанг чўкиб ўлдинг?— деб масхара қилиб сўради.

Жиққа ҳўл кўйлагини йўл-йўлакай сиқиб келаётган йигит уялинқираб жавоб қайтарди:

— Балиқдай сузиб ўтдик! Чўкиб бўппиз...

— Фалокат босса, катта-кичикка қарамас экан,— деб сиполик билан гапга аралашди иштонидан бошқа уст-бошини ечиб ташлаган дружиначи.— Сал бўлса взвод командиримиз чўкиб кетаёзувди. Обмоткасини ечишдан эриниб, ботинкаси билан сузаверди, бироқ обмотка сувдачувалиб кетиб, оёқларига ўралиб қолди денг... Роза додлади-я! Овозини Еландагилар эшитган бўлса керак.

Григорий дружина командири Крамсковни қидириб топди, ўз одамларингни ўрмон четига бошлаб бориб, пайт пойлаб тур. қизиллар цепини ёнбошдан ўққа тутиш учун қулайроқ жой топиб яширин, деб тайнинлади-да, ўзи сотнялари ёнига кетди.

Ярим йўлга етганда штаб ординарини учратди. Ординар чарчаган отини шартта тўхтатиб, эркин нафас олди:

— Сизниям топиб бўларкан-а!

— Нима гап?

— Татарсклик сотня окопларни ташлаб қочибди, штабдагилар шуни сизга маълум қилишни менга буюрди. Улар қумга чекинмоқда, қизиллар қуршаб олмасайди деб хавотир бўлишяпти... Тезроқ ўша ерга етиб борармишсиз. Кудинов шуни оғзаки айтиб қўй, деб тайнинлади.

Григорий учқур от мингандан казаклардан ярим взводини бошлаб ўрмон ичидан катта йўлга олиб чиқди. Йигирма минут чамаси от чоптиришиб, Голий Ильмен кўлига етишиди. Вахимага тушган татарсклик-

лар, улардан чапроқда, пичанзор оралаб подадай түзб қочмоқда эди. Фронтда чиниқан ва кўпни кўрган казаклар кўлга яқинроқ жойдан, кўл бўйидаги қўғазор орасидан шошмасдан олға силжишар, кўпчилик эса ора-сира пулемёт ўт очиб турганига қарамай, тезроқ ўрмонга етиб олиш учун рўй-рост югуришарди.

Григорийнинг ғазаби қўзиганидан кўзлари ғилай бўлиб кетди.

— От сол! Савала қамчи билан!.. — деб бақирди-да, ўзи биринчи бўлиб ҳамқишлоқлари устига от қўйди.

Ҳаммадан кейинда лапанглаб, оқсай-оқсай Христоня йўргалаб бораради. Бир кун аввал балиқ овиде товонини қамиш тилиб кетгани учун у ҳозир қадимгидай югуrolmas эди.

Григорий қамчисини ўқталганича унга етиб олди. От туёқларининг тапир-тупурини эшишиб, Христоня кетига бир қаради-да, чопишини тезлатди.

— Тўхта! Қаёққа? Тўхта деяпман сенга!.. — деб бақириб кўрди Григорий, бироқ унга кор қилмади.

Қани энди Христоня тўхтаса! У қайтага қадамини янада тезлатиб, ҳурккан тую сингари лўкиллаб чопа бошлади.

Григорийнинг тоқати тоқ бўлиб, болоханадор қилиб сўкинди, отини бир ниқтаб Христонянинг тепасига етди-да, тердан жиққа ҳўл бўлган яфринига қамчи билан аямай солиб қолди. Қамчининг зарбидан Христоня илондай буралиб тушди, жон-жаҳди билан қуёндай ёндамасига бир сакраш қилди-ю, ўтириб қолди, дарҳол пайпаслаб елкасини силай бошлади.

Григорий билан келган казаклар қочоқларни олдидан тўсиб чиқишар, уларни тўхтатишар, лекин ургани қўллари бормасди.

— Савала! Савала ҳаммасини!.. — деб бўғилиб бақираварди Григорий чиройли қамчисини бош устида ўйнатиб.

Остидаги оти турган жойида гир айланар, осмонга сапчир, олға юрмай бўйинтолик қиларди. Григорий бир амаллаб отини жойидан қўзғатди-да, олдинда чопиб кетаётганлар кетидан қувиб кетди. У отда кетаётib, бута тагида тўхтаб индамай кулиб турган Степан Астаховни кўрди; кулавериб силласи қуриган

Аникушкани ҳам кўрди; у икки кафтини карнай қилиб хотинчасига чийиллаб:

— Биродарлар! Эсинг борида қочиб қол! Қизиллар келяпти!.. Ол, киш!.. — деб чинқирарди.

Григорий пахтали куртка кийган, ғизиллаганича чопиб кетаётган яна бир ҳамқишлоғига етиб олди. Букчайган қад-қоматига қараб бу одамни танигандай бўлди-ю, бироқ кимлигини пайқай олмади.

— Тўхта, итвачча!.. Тўхта дейман сенга! Худди чопиб ташлайман!.. — деб олисдан ҳайқириб келарди Григорий.

Пахтали куртка кийган одам чопишини секинлатиб тўхтади, сўнгра кетига бурилаётib ниҳоятда ҳаяжонланганини билдирувчи ғалати ҳаракат билан Григорийни ҳайратда қолдирди: Григорий унинг афтини кўрмасданоқ отаси эканини таниди.

Пантелей Прокофьевичнинг бети липиллаб учиб турарди.

— Уз отангни итвачча деяпсанми, ҳароми?! Уз отангни чопиб ўлдирмоқчимисан ҳали?! — деб чинқирар эди чийиллаб.

Унинг кўзлари қинидан чиққудай бўлиб шу қадар олайиб кетган эдики, бу таниш кўзларни кўриши билан Григорий бирпасда шахтидан тушиб, отини шартта тўхтатди.

— Орқангдан танимадим-да! Мунча бақирасан, дада?

— Нега танимайсан! Ҳали сен отангни танимайдиган бўй қолдингми?

Чолнинг беҳудага бу қадар жizzакилик қилишини кутмаган Григорий жилмайиб унинг олдига борди-да, ярашиш мақсадида:

— Хафа бўлма, дада! — деди. — Эгнингдаги бу сюруткни мен биринчи кўришим, бундан ташқари, ўзинг худди пойгачи отдай учиб кетяпсан, оқсоқлигингдан асар йўқ! Қандай қилиб танийман ахир?

Пантелей Прокофьевич қадимгидай бирпасда ҳовуридан тушди; у ҳали ҳам энтикиб нафас олар, лекин мулойимлик билан гапираварди:

— Рост айтасан, эгнимдаги сюруткни янги олдим, пўстинимга айрибошлаб олдим, — пўстини қурғур

оғирлик қилди, — чўлоқликни қўявлур... Қоч-қочга келганда чўлоқлик қоладими? Бу ерда чўлоқлигинг кўзга кўринадими, биродари азиз? Орқадан ажал тикилиб турибди-ю, сен оёғимнинг соғми-чўлоқлигини суриштирасан.

— Ажални қўёвер, ҳали-бери келмайди. Изингга қайт, дада! Ишқилиб, патронларни ташлаб қочмаган бўлсанг бўпти!

Чолнинг жаҳли чиқиб:

— Қаёққа қайтаман? — деди.

Шундан кейин Григорий ҳам овозини баландлатиб, ҳар бир сўзини дона-дона қилиб буюрди:

— Изингга қайт! Ҳарбий шароитда командир буйруғини бажармаган кишига устав бўйича қандай жазо берилади, биласанми?

Бу гап Пантелеј Прокофьевичга таъсир қилди: дарҳол елкасидаги милтиғини тўғрилади-да, ноилож орқасига бурилиб секин-аста юриб кетди. Ундан ҳам секинроқ кетаётган бир чолга етиб олди-да, ҳасратга тушди:

— Эндиги болалардан келадигани шу-да! Отам хурсанд бўлсин ёки масалан, шу бечорани жангдан озод қила қолай, деган нарса хаёлига ҳам келмайди, ўзиникини ўзи ажалга рўпара қилмаса, кўнгли жойига тушмайди... Ҳе-е-ей... Жойинг жаннатда бўлгур раҳматли Петром бундан ўн чандон ортиқ эди! Жудаям беозор, кўнгилчан бола эди, бу шумтака Гришкам, ўзи дивизия командири, кўпни кўрган, оқ-қорани ажратадиган бўлсаям Петрога сира ўхшамайди. Худди кирпитиконнинг ўзгинаси — қўл тегизиб бўлмайди. Шу феъл-авори бўладиган бўлса, қариганимда менга кўп ҳунар кўрсатса керак ҳали!

Татарскликларни бирпасда тинчтиб олишди.

Бир оздан кейин Григорий ўз сотнясини гўплаб, пана жойга олиб ўтди; от устида туриб воқеани ҳаммага тушунтириди:

— Қизиллар дарёдан ўтишди, Вёшкини босиб олишга уринишяпти. Ҳозир Дон бўйида жанг бошланди. Аҳвол ниҳоятда жиддий, бўлар-бўлмасга қочаверманглар. Яна бир марта қочганларингни кўрсам, Еринскда турган отлиқ аскарларга буюраман: хоин-

лар қатори ҳаммангни қириб ташлайди! — Григорий хилма-хил кийимли ҳамқишлоқларини бир бошдан қараб чиқди-да, нафратланганини яшиrolмай: — Сотнингизда аблаҳлар кўпайиб кетибди, ҳаммага ваҳима solaётган шулар. Қочаман деб иштонларингизни ҳўл қилдингиз, балли сиздақа аскарларга! Тағин номингиз казак-а! Айниқса сиз, боболар, кўзларингни каттароқ очинглар! Урушга чиқдингизми, вассалом! Қавакка яширинаман деб овора бўлманг! Ҳозир взвод-взвод бўлиб чопқиллаганингизча ҳув анови маррадан бутазор оралаб тўғри Донга борасиз ва ўшанақаси Доннинг усти билан Семёнов сотнясига етиб оласиз. Улар билан биргалашиб, қизилларга ёнбошдан ҳужум қиласиз. Марш! Тез! — деб гапини тамомлади.

Татарскликлар чурқ этмай унинг гапларини тинглаши ва шу индамаганларича бутазорга жўнашди. Қариялар азбаройи ўсал бўлганларидан инқиллаб, отда ўқдай учиб кетаётган Григорийга ва унинг ҳамроҳларига қараб-қараб қўйишарди. Пантелей Прокофьевич билан ёнма-ён бораётган Обнизов бобо завқланиб:

— Худовандай карим сенга мард ўғил берган-да! Бургутнинг нақ ўзгинаси! Христонянинг елкасига шундай боплаб урдики! Бирпасда ҳаммасини тартибга солди-қўйди! — деди.

Бу мақтовдан Пантелей Прокофьевичнинг боши осмонга етиб, дарҳол унинг гапини маъқуллади:

— Нимасини айтасан! Бундай бола оламда йўқ! Кўкси тўла крест, бу ҳазилакам гапми? Жойинг жаннатда бўлғур, раҳматли Петро ҳам ўз ўғлим, бош болам эди-ю, аммо лекин бунақа эмасди. Бирам ювош, бирам шалвиллаган эдики, нималигини билиб бўлмасди. Изми хотинида, хотинининг пинжидан чиқмасди. Буниси менга тортган! Шаддодликда мендан ҳам ошиб кетди.

* * *

Григорий ўзининг ярим взвод казаклари билан Қалмоқ кечувга қараб бормоқда эди. Казаклар ўрмонга етиб, энди хавф-хатардан қутулдик деганда, Доннинг нариги бетидаги кузатиш пунктидаги турган қизиллар уларни кўриб қолишли. Тўпчилар взводи ўт очди.

Биринчи ўқ толзор тепасидан учиб ўтиб, аллақайси бир ботқоқликка чалпиллаб тушди, лекин портламади. Иккинчи ўқ йўл ёқасидаги каттакон бақатеракнинг очилиб қолган илдизларига тегди, лоп этиб алангalandи-ю, гумбурлаб, казаклар устига лой-тупроқ ара-лаш чириган дарахтнинг чиринди чўп-чорларини ёғдирди.

Қулоғи битиб қолган Григорий беихтиёр кўзларини қўли билан тўсиб, эгар қошига энгашди, назарида, отининг сағрисига бир нарса чалп этиб ёпишгандай бўлди.

Ҳамма ёққа ларза солган портлашнинг ваҳмидан казаклар остидаги отлар, гўё команда берилгандай, кейинги оёқларини букиб, олдинга толпинди. Григо-рийнинг оти олдинги оёқларини кўтарди-да, тисланиб бориб ёнбошига қулади. Григорий эгардан сакраб тушиб, отининг жиловидан ушлади. Яна икки тўп ўқи тепадан учиб ўтди-да, кейин ўрмон атрофи сув қуйган-дай жимжит бўлди-қолди. Кўкатлар устини порох ту-туни қоплади; ҳамма ёқни титифи чиққан нам тупроқ-нинг, пайраҳа билан пўк дарахт чириндиларининг ҳиди босиб кетди; чакалакзорнинг бир бурчагида зағизғон-лар безовталаниб чағиллай бошлади.

Григорийнинг оти қалтираган кетинги оёқларини букиб тўхтовсиз пишқиравди. Жон аччиғида унинг сап-сариқ тишлари иржайиб, бўйни чўзилиб қолганди. Кул ранг духобага ўҳшаш тумшуғида қизғишиш кўпик йилтиравди. Аъзойи бадани дағ-дағ титрар, тўриқ жунли терисининг остлари дириллаб турарди.

Казаклардан бири от чоптириб келди-да:

— Жонивор ўлдими, а?— деб сўради шангиллаб.

Григорий жавоб бермади, отининг тобора хирала-шаётган кўзларига тикилганича қотиб қолди. У ҳатто жароҳатига ҳам қарамади, от типиричилаганда ўзини четга олди: жонивор қаддини кўтарди-ю, гўё эгасидан узр сўрагандай бошини қуий солганича бирданига чўккалаб йиқилди. Сўнгра ингранди-ю, ёнбошига чў-зилди, бошини кўтармоқчи бўлиб ҳаракат қилди, бироқ мажоли келмади: қалтироги тобора заифлашиб, кўзларининг нури сўнмоқда, бўйини тер босмоқда эди, сўнгги нафас олаётгани кўриниб турарди.

Фақат туғанинг устгинасида сўнгги томирлари аста уриб турарди. Устидаги эгарнинг қирилган қаноти билинار-билинмас дирилларди.

Григорий отнинг чап биқинига кўз ташлаб, чуқур жароҳатдан булоқдай қайнаб чиқаётган қоп-қора қонни кўрди; кўз ёшларини артмасдан, дудуқланадудуқлана, отдан тушган казакка:

— Бир ўқ билан саранжом қил! — деб ўз маузерини унга тутқизди.

Ўзи казакнинг отига миниб олди-да, шу ҳайдаганича ўз сотнялари ёнига кетди. У ерда жанг қизиган эди.

Тонг отгандада қизил аскарлар ҳужумга ўтишиди. Уларнинг цеплари қуюқ туман ичидаги жойларидан қўзғалиб, Вешенская томон чурқ этмай силжимоқда эди. Ўнг томонда, сув босган сойлик жойга етганларида қизил аскарлар бирпас ҳаяллаб туришиди-да, сўнгра ўқдон ва милтиқларини баланд кўтаришиб, кўкракларигача сувга кириб кечиб ўтаверишиди. Бир оздан кейин Дон устидаги тоғдан тўрт батарея бараварига гумбурлатиб ўт очди. Тўп ўқлари ўрмон устига ёғила бошлагач, қўзғолончилар ўт очишиди. Қизил аскарлар энди қадамларини тезлатиб, милтиқларини қўлларига олволиб чопиб келмоқда эдилар. Улардан ярим чақирим олдинроқда шрапнель ўқлари портлар, дараҳтлар қулаб тушар, оппоқ булууга ўхшаб ердан тутун кўтарилиларди. Казакларнинг икки пулемёти калта-калта қилиб, сидирғасига ўқ узиб турарди. Олдинги цепдаги қизил аскарлардан баъзилари қулай бошлади. Цепларнинг гоҳ у ерида, гоҳ бу ерида шинелларини ўраб бўйинларига осиб олган одамларга ўқ тегиб қулата-верар, улар мукласига ёки чалқанчасига тушиб қола-верарди, бироқ қолганлари тап тортмай олға интилишар, тобора ўрмонга яқинлашиб келишарди.

Иккинчи цепнинг олдида новчадан келган бошяланг командир бир оз энгашиб, катта-катта қадамлар билан қушдай учиб келарди. Цепдагилар бирлаҳза чопишни секинлатди, бироқ командир кетига бурилиб бир нима деб бақирди, шундан кейин одамлар яна астойдил чопа бошлади; хирилдоқ овозларнинг мудҳиш «Ура-а-!»си янада янграб авжига чиқди.

Ана шундан кейин казакларнинг ҳамма пулемёти баравар ишга тушди, ўрмон четидан туриб отилган милтиқлар овози қулоқларни қоматга келтирди... Ўрмон ёқасида турган Григорийнинг орқа томонида жойлашган Базки сотнясининг станок пулемёти сидирғасига ўт очди. Цеплар саросимага тушди, ётиб олиб отиша бошлади. Бир ярим соат чамаси жанг давом этди, бироқ қўзғолончилар мўлжални топиб олиб, кўз очгани қўймадилар, шундан кейин иккинчи цепдагилар ўринларидан туриб чекинди ва орқаларидан келаётган учинчи цепь одамлари билан аралашиб кетди... Салгина вақтдан кейин пичанзорни бетартиб ҳолда қочиб кетаётган қизил аскарлар босиб кетди. Ана шундан кейин Григорий ўз сотняларини ўрмондан чиқариб, сафларни ростлади-да, қувлашга тушди. Бир сотняси қуюндай от солиб, чекинаётганларнинг солга борадиган йўлини тўсиб қўйди. Донга туташган ўрмон ёқасида, қирғоққа яқин жойда, қўл жангни бошланди. Қизил аскарларнинг фақат бир қисмигина ўз солларига етиб ололди. Улар тиқилишиб солларга тушиши-ю, жўнаб қолишли. Қолганлари тисланана-тисланана Донга тақалиб қолди-ю, жон-жаҳдлари билан жанг қила бошлади.

Григорий ўз сотняларини отдан туширди, жиловдорларга ўрмондан қўзғалманг, деб тайинлади-да, казакларни дарё бўйига бошлади. Казаклар у дарахт тагидан бу дарахт тагига чопиб ўтишар ва шу йўсинда борган сари Донга яқинлашарди.

Юз элликка яқин қизил аскар бостириб келаётган пиёда казакларни қўл граната ва пулемётдан ўт очиб улоқтириб ташлади. Соллар яна чап қирғоқ томон сузиб келаётганда базкиликлар ўқ узиб, ҳамма эшкакчиларни деярли қириб ташлашди. Бу ёқда қолганларни тақдири ҳал бўлган эди. Ўзини тута билмаганлар милтиқларини улоқтириб, сувга ташлаб қочмоқчи бўлишди, бироқ жар бўйида биқиниб ётган қўзғолончилар уларни отиб ўлдираверди. Кўпгина қизил аскар Доннинг тез оқар жойидан ўтолмай, сувга чўкиб ўлди. Фақат икки киши эсон-омон қутулди: биттаси, ўйл-йўл матросча кўйлакли одам, ўзи сузишга уста бўлса керак, жар тепасидан туриб боши билан

дарёга ташлади-да, сувга шўнғиганича Доннинг ўртасидан чиқди.

Шохлари тарвақайлаган тол панасида турган Григорий, матроснинг катта-катта қулоч отиб сузишини ва нариги қирғоққа яқинлашишини томоша қиласди. Яна бир киши эсон-омон ўтиб олди. У кўкрагигача сувда туриб, бор ўқини отиб тамомлади; сўнгра казаклар томонга мушт дўлайтиб, алланима деб бақирдида, қиялаб сузив кетди. Уқлар унинг атрофига визиллаб сувга чалпиллаб тушар, лекин биронтаси тегмасди. Бу толеи баланд одам бир вақтлар подахона бўлган жойнинг рўпарасига бориб сувдан чиқди-да, силкиниб олди, сўнгра шошмасдан жар бўйлаб қўралар томон кетди.

Доннинг бу ёғида қўлганлар қумтепа орқасига бинкиниб олишди. Уларнинг пулемёти то кожухидаги сув қайнагунча тўхтовсиз ўт очиб турди.

Пулемётнинг овози ўчиши билан Григорий:

— Кетимдан!— деб команда берди-ю, қиличини қинидан суфуриб, дўнг томон югурди.

Казаклар ҳаллослаб унинг орқасидан эргашди.

Қизил аскарлар билан казаклар орасида эллик саржин келар-келмас масофа қолган эди. Уч карра бараварига ўқ узгандаридан кейин новча бўйли, қорақачадан келган, қора мўйловли командир қумтепа орқасидан гоз кўтарилди. Чарм куртка кийган бир аёл унинг қўлтифидан сяяб турарди. Командир жароҳатланган эди. Ярадор оёғини судраб дўнгдан тушди, найза қадалган милтигини ўнглаб олди-да, бўғиқ овоз билан команда берди:

— Ўртоқлар! Олға! Оқларга ўлим!

Бир тўда мардлар «Интернационал» айтиб, ўлимни писанд қилмай, ҳужумга ташланди.

Дон бўйида ҳалок бўлган бир юз ўн олти кишининг ҳаммаси «Интернационал рота»даги коммунистлар ёди.

III

Кечаси алламаҳалда Григорий штабдан қўшхонасига қайтди. Прохор Зиков кўча эшикда кутиб турарди.

Григорий ўзини бепарволикка солиб:

— Аксинъядан дарак йўқми?— деб сўради.

Прохор эснаб:

— Йўқ. Бирор ёқقا кетгандир-да,— деб жавоб қилди, лекин ўша заҳоти: «Худо кўрсатмасин: яна қидиртирмаса гўргайди... Илиқишмай ўлинглар, мазамаза шуларники, ташвиши менинг бошимга!» деб ўйлаб, хавотирлана бошлади.

— Сув обкел, ювиниб олай. Терлаб кетдим. Тез бўл!— деди Григорий зарда билан.

Прохор уйдан сув олиб чиқди, Григорийнинг ҳову-чига анчагача кружкалаб қуиб турди. У маза қилиб ювинарди. Тердан бижиб кетган гимнастёркасини ечиб:

— Елкамдан қуй,— деди.

Сув терлаган елкаларига муздек текканидан Григорий сесканиб ҳув-ҳуввлар, отдай пишқирар эди; у тасма қавартирган елкаларини, жун босган кўкраги-ни анчагача қаттиқ-қаттиқ ишқалади. Топ-тоза от ёп-қичи билан артинаётисб, очиқ чеҳра билан Прохорга тайинлади:

— Эрталаб менга от беришади, ўзинг қабул қилиб олиб, тозалагин, ем топиб кўйгин. Ўзим турмагунимча мени уйғотма. Лекин штабдан биронтаси келадиган бўлса, уйғотарсан. Тушундингми?

Григорий бостирма тагига бориб ўзини аравага ташлади-ю, ўша заҳотиёқ данг қотиб қолди. Тонгга яқин совқотиб оёқларини йигиштириб олди, шудрингда намиқдан шинелини устига ёпди, қуёш чиққандан кейин яна мудраб уйқуга кетди, фақат соат еттиларга яқин гумбурлаган тўп овозидан уйғонди. Станицанинг қоқ тепасида, кўм-кўк булутсиз осмон қўйнида сутдай өппоқ аэроплан айланиб юрганди. Доннинг нариги бетидаги тўп ва пулемётлар уни ўқقا тутмоқда эди.

— Бу аҳволда уни уриб туширишлари мумкин!— деди Прохор қозиқча боғланган бўйдор тўриқ айғирни қашлаётисб.— Муни қара, Пантелейевич, сенга жуда-ям ғалатисини юборишибди-да!

Григорий арғумоқни наридан-бери кўздан кечиргач, қаноатланиб:

— Ёши нечадалагини ажратолмадим. Олтига борганикин-а? — деб сўради.

— Олтида.

— Яхши экан! Оёқлари силлиқ, сийроқлари бинт билан ўралгандай оппоқ. Чиройли от экан... Қани, эгарла, бориб кўрай-чи, ким учиб келибди экан?

— Яхшилигига шубҳам йўқ. Чопиши қандай экан? Кўринишига қараганда жудаям учқур бўлса керак,— деб валақларди Прохор тизгинни тўғрилаётуб.

Осмондаги аэроплан ёнида оппоқ булатуга ўхшаб яна битта шрапнель ўқи ёрилди.

Учувчи қўнадиган жойни аниқлаб олгандан кейин, аэроплан тез пастлаб кетди. Григорий дарвозадан чиқиб, станица отхонаси томон от қўйди; аэроплан унинг нарёғига қўнган эди.

Станица айғирларини сақлаш учун станицанинг бир четига харсангдан солинган узун отхонанинг ичи саккиз юздан ортиқ асир қизил аскарлар билан лиқ тўлган эди. Қоровуллар ҳеч кимни ёзилгани чиқармас, ичкарида эса ҳожатхона йўқ эди. Отхона атрофи шиптири ҳиди бўлганидан, яқинига йўлаб бўлмасди. Эшик тагларидан сийдик оқиб чиқиб чалчиқ бўлиб кетган, устида гала-гала ялтироқ пашшалар учарди...

Шу турмада ўлимга маҳкум бўлганларнинг кеча-ю кундуз инграган овози эшитиларди. Юзларча асирлар очликдан, авж олган терлама ва ичкетар касалидан вафот этарди. Баъзан ўликлар суткалаб қолиб кетарди.

Григорий отхонани айланиб ўтиб, энди отдан тушмоқчи бўлиб турганда, Доннинг нариги ёғидан яна тўп отилди. Қалдираган овоз тобора яқинлашиб келаверди, ниҳоят гумбурлаб портлади.

Учувчи билан унга ҳамроҳ бўлиб келган офицер кабинадан чиқар-чиқмас, казаклар уларни ўраб олишди. Шу онда тоғдаги ҳамма замбарак бараварига ўт очди. Тўп ўқлари мўлжалдан адашмай тўппа-тўғри отхона атрофига келиб тушаверди.

Учувчи дарҳол кабинага қайтди, бироқ мотор ишламай қолди.

— Судранглар! — деб Доннинг нариги томонидан

келган офицер буйруқ берди-да, ўзи биринчи бўлиб аэроплан қанотига ёпиши.

Аэроплан лапанглай-лапанглай қарағайзор томон филдираб кетди. Орқасидан батарея беомон ўт очди. Бир ўқ асиrlар тўла отхонага келиб тушди. Қуюқ ту-тун билан ҳавога чанг кўтарили, отхонанинг бир чети ўпирилиб тушди. Ваҳим босган қизил аскарлар-нинг фарёдидан отхона ларзага келди. Ўпирилган жойдан уч асиr чопиб чиқди, бироқ казаклар учовини яқиндан ўққа тутиб илма-тешик қилиб ташлаши.

Григорий отини сакратиб ўзини бир четга олди.

Қапалаги учиb, кўзлари қинидан чиқаёзган бир казак унинг ёнидан чопиб кетаётib:

— Ўлдиришади! Қарағайзорга қоч! — деб бақирди.

«Чиндан ҳам қулатишлари мумкин. Ўт билан ўйнашиб бўладими», деб ўйлади-да, Григорий секинаста отини буриб қўшхонасига жўнади.

Уша куни Кудинов Мелеховга билдиrmасдан штабда ниҳоятда махфий мажлис чақирган эди. Аэропланда учиb келган Дон армиясининг офицери, Каменск станицаси ёнига тўпланган зарбдор қисмлар шу яқин кунларда қизиллар фронтини ёриб ўтади, Дон армиясининг отлиқ дивизияси генерал Секретовнинг командаси остида қўзголончилар билан бирлашмоқ учун келяпти, деб хабар берди. Генерал Секретовнинг дивизияси билан бирлашгандан кейин қўзголончиларнинг отлиқ полкларини дарҳол Доннинг ўнг томонига ўtkазиш мақсадида ҳозирдан бошлаб паром ва солларни тайёрлаб қўйишини таклиф этди; резерв қисмларни Донга яқинроқ жойга келтиришини маслаҳат берди; дарёдан ўтиш режаси ишлаб чиқилиб, қизилларни таъқиб этадиган қисмларнинг маршрутларини аниқлангандан кейин мажлис тугай деганда, офицер:

— Нима учун сиз асиrlарни Вешенскаяда сақлаётibсиз? — деб сўраб қолди.

— Сақлайдиган бошқа жойимиз йўқ, қишлоқларда бино топилмайди, — деб жавоб берди штаб ходимларидан биттаси.

Офицер сочи тақир қилиб олинган бошининг терини дастрўмоли билан яхшилаб артди, мош ранг кителининг ёқасини очиb чуқур нафас олиб:

— Уларни Казанскаяга юборинг,— деди.
Кудинов ҳайрон бўлиб қошини чимирди:
— Ундан кейин-чи?

— Ундан кейин яна Вешенскаяга қайтарасиз... —
деб такаббурлик билан тушунтириб берди офицер кўк
кўзларини қисиб. Сўнгра, лабларини қимтиб, қатъият
билан гапини тамомлади:— Мен тушунолмадим, жа-
ноблар, нимасига ийманасиз? Ҳозирги шароит буни
кўтармаса керак дейман. Ҳамма жисмоний ва ижти-
моий мараз шулардан тарқалади, бу абраҳларни қи-
риб ташлаш керак. Шунгаям бош қотириб ўтирибсиз-
ми? Сизларнинг ўринларингда мен бўлсан, шундай
қилардим-қўярдим.

Эртасига асиirlардан дастлаб икки юз кишини
қумлоққа олиб чиқишиди. Қизил аскарларнинг ўзи
эмас, сояси қолганди: ҳаммаси чўпдай озиб, рангида
қон қолмаган, оёқларини аранг қимирлатишарди. Тар-
тибсиз ҳолда одимини судраб босаётган бир тўда
асирни отлиқ соқчилар зич ўраб олган эди... Вешенская
билан Дубровка орасидаги ўн чақиримлик йўл устида
уларни ёппасига қиличдан ўтказишиди. Кечга томон
иккинчи тўдани ҳайдаб чиқишиди. Соқчиларга: кейин-
да қолганларни фақат қилич билан чопиб ўлдириинг,
фавқулодда ҳодиса рўй бергандагина отинг, деб
буйруқ берилган эди Юз эллик кишидан фақат ўн
саккизтаси Қазанскаяга етиб борди... Шулардан битта-
си, лўли бащара қизил аскар йўлда жинни бўлиб қол-
ди. Йўл-йўлакай у ашула айтиб ўйин тушар ва ердан
юслиб олган бир тутам хушбўй чўл ялпизини кўксига
босиб йиғларди. Дам-бадам қайноқ қум устига юзи
билан йиқилиб тушарди; шамол жулдур-жулдур бўз
кўйлагини ҳилпиратганда қуруқ елкалари билан
чиллакдек оёқларининг қоп-қора товонлари соқчи-
ларга кўриниб кетарди. Уни турғизиб қўйишар, сув-
дондан сув сепиб ҳушига келтиришарди. Ўшанда у
ола-кула бўлиб кетган қора кўзларини очиб, пиқирлаб
кулар ва гандираклай-гандираклай, яна йўлга ту-
шарди.

Бир қишлоқда раҳмдил аёллар соқчиларни ўраб
олишиди, орадан савлатли бир кампир чиқиб, соқчилар
бошлиғига:

— Сен анови қора болани қўйвор. Ақлдан озибди, худога яқинлашибди, буни қийнаб ўлдирсанглар, гуноҳкор бўласизлар,— деди.

Соқчилар бошлиғи — малла мўйловли олифта подхорунжий масхара қилиб кулди:

— Бувижон, ўзимиз гуноҳга ботган одамлармиз, унча-мунча гуноҳдан қўрқмаймиз. Барибир, биз авлиё бўлолмаймиз!

— Сен уни бўшатиб юбор, гапимни қайтарма,— деб ялинарди кампир.— Ажал тепаларингда қанот қоқиб айланиб юрибди...

Аёллар ёппасига унга қўшилиб ялинганларидан сўнг подхорунжий кўнди.

— Менга барибир, ола қолинглар. Энди унинг зара-ри тегмайди. Яхшилигимиз учун ҳаммамизга бир хурмачадан қаймоғи олинмаган сут берасиз.

Кампир жиннини уйга олиб бориб, қорнини тўй-ғазди, меҳмонхонага жой солиб берди. У сурункасига бир сутка ухлади, сўнgra уйғониб ўрнидан турди-ю, деразага орқасини ўғириб олиб, оҳиста қўшиқ айта бошлади. Кампир меҳмонхонага кириб сандиқ устига ўтириди, кафтини жағига тираб олди-ю, йигитнинг озғин юзига тикилганича қотиб қолди, ниҳоят:

— Сизникилар шу яқин орада эмиш...— деди эр-какча йўғон овоз билан.

Йигит бир дам жимиб қолди, лекин ўша заҳотиёқ эшитилар-эшитилмас қилиб яна ашуласини бошлади.

Кампир жиддий гапирди:

— Айлана қолай, ашулангни қўй, ўзингни жинниликка солиб бошимни қотирма. Ёшим анчага борган, мени алдолмайсан, сен айтган тентаклардан эмасман, болам! Қўриб турибманки, эс-ҳушинг жойида... Тушингда кўп гапирдинг, ҳаммасини эшитдим: ақлдан озган одам бундай бамаъни гапиролмайди!

Қизил аскар ҳамон ашула айтишини қўймас, бироқ овози тобора секинлашарди. Кампир гапида давом этди:

— Мендан хавотир бўлма, мен сенга ёмонликни раво қўрмайман, болам. Герман урушида икки ўғлимдан ажрадим, кичигим шу урушда Черкасск шаҳ-

рида нобуд бўлди. Ахир учаласиниям қорнимда тўқ-қиз ой кўтариб юрганман... Кечалари мижжа қоқмай аллалаб, эмизиб катта қилганман... Ана шунинг учун мен, аскарликда, урушда қон кечиб юрган ёш йигитларга раҳмим келади, юрагим ачишади...— деди-да, бирпас жимиб қолди.

Йигит ҳам жим бўлди. У кўзларини юмди, икки бетига билинар-билинмас қон югурди, қилтириқ бўйининг кўм-кўк томири тез-тез ура бошлади.

У пайт пойлагандек чурқ этмасдан бирпас туриб қолди, сўнгра қоп-қора кўзларини очди. Унинг қарашлари маъноли сабрсизликдан кўзлари шу қадар чақнار эдики, кампир буни кўриб жилмайиб қўйди.

— Шумилинга борадиган йўлни биласанми?

— Билмайман, бувижон,— деди қизил аскар лабларини сал-пал қимирилатиб.

— Энди қандай қилиб кетасан?

— Билмадим...

— Билмаганинг чатоқ! Сени нима қилишимга ҳайронман, нима қилсан экан?

Кампир анчагача жавоб кутиб турди-да, ниҳоят:

— Ўзинг юра оласанми?— деб сўради.

— Бир амаллаб юраман-да.

— Бир амаллаб юриш билан иш битмайди. Кечалари юришга тўғри келади, тез юриш, жудаям тез юриш керак. Яна бир кун тургин, мен сенга йўлда ейишга овқат бераман, неварамни ёнингга қўшаман, у сенга йўл кўрсатади, ана иннайкейин йўлинг очиқ! Қизилларинг ҳозир Шумилиннинг нарёғида, мен буни аниқ биламан. Эсон-омон ўртоқларинг ёнига етиб оласан. Катта йўлдан юра кўрманглар, даштма-дашт, жарма-жар, ўрмон ичи билан йўлсиз жойлардан юринглар, йўқса казакларга дуч келиб, балога гирифтор бўласизлар. Шундай бўлсин, айланай!

Эртасига қош қорайиши билан кампир йўлга шайланган ўн икки яшар невараси билан казакча чакмон кийиб олган қизил аскарни чўқинтириди-да, совуққина хайрлашибди:

— Боринглар, худога топширдим! Ҳушёр бўлинглар, бизнинг казаклар кўриб қолишмасин тағин... Керак эмас, қоқиндиқ менга қуллуқ қилишнинг ҳожати

йўқ. Яхшиси, худога қуллуқ қилгин! Биргина мен шунақа эмас, дунёдати оналарнинг ҳаммаси раҳмдил... Сизларга ачинамиз, шумтакалар, эрта-ю кеч сизларни деймиз, холос! Қани энди, боринглар, худойим ўз паноҳида асрасин!— деди-ю, сариқ тупроққа бўялган қийшайган эшикни шартта ёпди.

IV

Ильинична ҳар куни тонг ёришган маҳалда уйғониб сигирини соғар, овқатга уринар эди. Уйдаги печни ёқмасдан ҳовлисидаги ўчоққа ўт қалаб овқат пиширас, кейин яна уйга кириб невараларига қарарди.

Наталья терлама касалидан кейин аста-секин дармонга кирмоқда эди. Троица байрамининг эртаси у биринчи марта ўрнидан туриб, чўпдай озиб кетган оёқларини аранг судраб уйда у ёқдан-бу ёққа юриб кўрди, анчагача болаларининг соchlарини қаради, ҳаттоки табуреткага ўтириб, болаларининг уст-бошини ювмоқчи ҳам бўлди.

Унинг озиб кетган юзидан табассум аrimас, ичичига кириб кетган икки бети лоладай қизариб, касалдан кейин киртайиб қолган кўзлари янги кўз ёрган хотинларнидай, меҳр-муҳаббат билан нурланиб турарди.

— Полюшка, жажжи қизим! Мен касал бўлиб ётганимда сени Мишатка хафа қилмадими?— деб сўради секин; у ҳар бир сўзни чўзиб, қийналиб гапирав, қора соч қизчасининг бошини силарди.

— Йўқ, ойижон! Мишка мени бир маттагина урди холос, бошқа вақтларда икковимиз уришмасдан яхши ўйнадик,— деб жавоб берди қизалоқ ва онасининг тиззаларига юзини қўйиб, маҳкам қучоқлаб олди.

— Бувинг сизларни суядими?

— Жудаям суяди.

— Бегона кишилар, қизил солдатлар сизларни безовта қилмадими?

— Бузоғимизни сўйиб кетишди, лаънатилар!— деди айнан дадасига тортган Мишатка овозини йўғон қилиб.

— Сўкиш мумкинмас, Мишатка. Вой сендақа хўжайинни қара-ю! Катталарга тил тегизиб бўлмайди!— деб насиҳат қилди Наталья қовоғини солиб.

— Уларга бувим шунақа от қўйған, ишонмасанг, Полькадан сўра,— деб ўзини оқламоқчи бўларди жинқарча Мелехов.

— Рост гап, ойижон, улар товуқларимизният битта қўймай сўйиб ейишди.

Полюшка қизишиб кетди: қора кўзларини ялтюлт ўйнатиб, қизил аскарларнинг қўрага қандай кириб келганини, товуқ ва ўрдакларни қандай қилиб тутганини, бувиси Ильинична, тожини совуқ ўрган сариқ хўрозни насл учун қолдиринглар, деб қандай ялинганини, бироқ асқиябоз қизил аскар хўрозни пеш қилиб: «Бу хўроз Совет ҳокимиятига қарши қичқирган, бувижон, шунинг учун биз уни ўлимга ҳукм қилдик! Минг ялинсанг ҳам биз буни шўрва қиласиз, ўрнига бир жуфт эски пийма берамиз» деганини бирмабир сўзлаб берди.

— Мана бундай каттакон пиймани бизга қолдирди!— деди Полюшка қулочини ёйиб.— Жудаям каттакон, лекин ҳамма ёғи тешик экан!

Наталья болаларини эркалатиб туриб гоҳ кулар, гоҳ йиғларди, кўзларини қизчасидан ололмас, суюнчини ичига сиғдиролмай шивирлаб гапиради:

— Онанг садағанг кетсин, Григорьевна! Бу ўзи асл Григорьевна! Дадасининг худди ўзгинаси: қошу кўзи дадасига ўхшайди!

— Мен ҳам ўхшайманми?— деб сўради Мишатка файирлик қилиб, онасига суйкалар экан.

— Сен ҳам ўхшайсан. Лекин сен катта бўлганингда зинҳор даданг сингари саёқ бўлмагин...

— Дадам саёқми? Нимаси саёқ?— қизиқсиниб сўради Полюшка.

Наталья хафа бўлиб, ранги ўзгариб кетди, индамай ўрнидан турди.

Шу гапларни эшитиб турган Ильинична хафа бўлиб, юзини тескари ўгириб олди. Наталья бўлса, болаларнинг чуғурлашганига қулоқ солмай, дераза олдида, Астаховлар уйининг ёпиқ дераза қопқоғига тикилганча узоқ туриб қолди; у ранги ўчган эски

кофтасининг бурмаларини ҳаяжон ичидага ҳадеб тит-килар эди...

Эртасига у тонг отиши билан уйғонди-да, болаларни безовта қилмаслик учун секин-аста ўрнидан туриб ювинди, сүнгра сандиқдан тоза юбкаси билан кофтасини ҳамда оқ рўмолини олди. Натальянинг ҳаяжон-ланаетгани юзидан билиниб турарди; унинг кийинишига ва маъюслигига Ильинична разм солиб туриб, келини Гришак бобонинг мозорига бормоқчи бўлганини фаҳмлади.

— Қаёқقا отланяпсан? — деб сўради Ильинична анигини билмоқчи бўлиб.

Наталья ўзини тутолмай йиғлаб юборишдан қўрқиб, бошини қўтармасдан:

— Бувамни зиёрат қилиб келай, — деди зўрга.

Наталья буваси вафот этганини ҳам, Кошевой уларнинг уй ва ҳовлисига ўт қўйганини ҳам биларди.

— Дармонинг йўқ, етиб боролмассан.

— Дам олиб, дам олиб бориб келаман. Болаларга ўзингиз овқат беринг, ойижон, балки мен қабристонда кўп туриб қоларман.

— У ерда узоқ юрадиган нимаям ишинг бор? Фалокат босиб тағин анови шайтонларга дуч келмасанг гўргайди. Бормай қўя қол, Натальюшка!

— Йўқ, бормасам бўлмайди. — Наталья қовоғини солиб эшик тутқичини ушлади.

— Шошмай тур, оч-наҳор кетасанми ахир? Қатиқ обекелиб берайми?

— Йўқ, ойижон, худо ҳақи, кўнглим тиламаяпти... Қайтиб келгандан кейин ичарман.

Ильинична келинининг қабристонга боришга астойдил бел боғлаганини кўриб шундай маслаҳат берди:

— Доннинг усти ёғидан, полизлар ичи билан юргин. У ёқда сени ҳеч ким кўрмайди.

Дон устини қуюқ туман қоплаган эди. Ҳали қуёш кўтарилемаган бўлса-да, осмоннинг тераклар тўсиб турган шарқ томони шафақдан қип-қизил бўлиб яллиғланар, булутлар остидан муздай тонг шабадаси эсарди.

Наталья чирмовуқ ўраб қулаб ётган четан девор-

дан ҳатлаб, ўз бөгига кирди. Қўлларини кўксига маҳкам босганича, янги қабр ёнига бориб тўхтади.

Боғни бошдан-оёқ қичитқи ўт билан бурган ўт босиб кетганди. Шабнамда ивиган отқулоқ ҳиди, нам тупроқ билан туман ҳиди келарди. Кўрага ўт кетганда қуриб қолган олманинг шохида яккаю ягона чуфурчиқ шумшайиб ўтиарди. Қабрнинг тупроғи чўккан эди. Кесаклар орасидан унда-мунда битта-яримта кўкат ниш уриб чиққанди.

Эски хотиралар эсига тушиб, Наталья ҳасрат ичилда индамай тиз чўқди ва азалдан мурда ҳидига тўлган бемеҳр тупроққа юзини қўйди...

Бир соатдан сўнг у биқина-биқина боғдан чиқдида, ёшлиқ даври ўтган шу жойларга юрак-бағри эзилган ҳолда сўнгги марта назар ташлади: бўм-бўш, ҳувиллаб қолган ҳовли, синчлари қоп-қора кўмирга айланган омборхона, печлар ва пойдеворлар харобаларидан бошқа ҳеч нарса кўзга кўринмасди...

Наталья тор кўча бўйлаб аста юриб кетди.

* * *

Наталья кундан-кунга қувватга кириб тузалмоқда эди. Оёқларига дармон кириб, елкалари тўлишиб, тобора семирмоқда эди. Кўп ўтмай қайнанаси ёнига кириб қозон-товоққа қараша бошлади. Иккиси пеъ ёнида бўлганларида гаплари сира тамом бўлмасди.

Бир куни эрталаб Наталья хафа бўлиб:

— Бу уруш қачон тамом бўлади, а? Юрак-бағрим эзилиб кетди-ку,— деб нолиди.

— Мана кўрасан, яқинда бизникилар Доннинг нарёғидан қайтиб келишади,— деди Ильинична дадиллик билан.

— Сиз буни қаёқдан биласиз, ойижон?

— Кўнглим сезяпти.

— Ишқилиб, бизнинг казаклар соғ-саломат қайтишсин. Балойи қазодан, ярадор бўлишдан худо асрасин-да... Гришангиз ўтданам тоймайди, сувданам...— деб хўрсинди Наталья.

— Худо асраса ҳеч нима қилмайди, худойим ўзи меҳрибон. Чолимиз дарёдан ўтиб келиб бизлардан ҳабар олмоқчи эди, билмадим, келишга қўрқди шекилли.

У келгандаку, сени бирга ола кетармиди, ҳар ҳолда балонинг оғзидан нарироқда бўлардинг. Бизнинг ҳам-қишлоқларимиз қишлоқнинг рўпарасига жойлашиб олган, дарёнинг бу бетини кўриб ётишибди. У куни мен тонг маҳалида Дон бўйига тушдим, сен ўшанда ўзингни билмасдан беҳуш ётувдинг, сув оляпсам, Доннинг нарёғида Аникушканинг овози келди: «Салом, бувижон! Чолингдан салом!»— деб бақирди.

— Гриша қаерда эмиш?— деб сўради Наталья тортиниб.

— У олисдан туриб ҳаммасига командирлик қи-лармиш,— деди Ильинична соддадиллик билан.

— Қаердан туриб командирлик қиласмиш деди-нгиз?

— Вёшкидандирда. Бошқа қаердан бўларди?

Наталья анчагача жим бўлиб қолди. Ильинична унга бир қаради-ю, қўрқиб кетди:

— Сенга нима бўлди ўзи? Нега йиглайсан?

Наталья жавоб бермас, кир этагини юзига босганича секин-секин пиқирлаб йиғларди.

— Йиғлама, Натальюшка. Кўз ёши дардингга мал-ҳам бўлолмайди. Худо хоҳласа, омон-эсон дийдор кўришамиз. Сен, болам, ўзингга эҳтиёт бўл, бўлар-бўлмасга қўрадан ташқари чиқаверма, худо кўр-сатмасин, анови худобезорилар кўриб қолса борми...

Ошхона ичи қоронғулашгандай бўлди. Аллаким-нинг гавдаси сирт ёқдан деразани тўси. Ильинична деразага бурилиб қаради-ю, «воҳ!» деб юборди.

— Ановилар! Қизиллар! Натальюшка! Тез бўл, ўзингни касалликка солиб, каравотда ётавергин... Манови шолчани устингга ёпиб олгин! Бирор фалокат бўлмасайди...

Наталья қўрққанидан дағ-дағ титраб, каравотга ётиши билан эшикнинг лўқидони шарақ этиб очилди, новча бир қизил аскар ошхонага энгашиб кириб келди. Болалар ранги оқариб кетган Ильиничнанинг этагига ёпишиб олишиди. Печь ёнида турган кампир курсига ўтириб қолди, бир хурмача пишган сутни бехосдан ағдариб юборди.

Қизил аскар ошхона ичига наридан-бери кўз таш-лаб чиқди-да:

— Қўрқманглар! Сизларни еб қўймайман. Салом!— деди.

Наталья бошини шолча билан буркаб олиб, ёлғондакасига инграради. Мишатка келган одамга ер остидан қаради-да, бирданига суюниб кетди:

— Бувижон! Бизнинг хўрозимизни худди шу киши сўйган! Эсингдами?

Қизил аскар мosh ранг фуражкасини бошидан олди, тилини тақиллатди:

— Оббо валат-эй, танидинг-а! Ҳалиям ўша хўрзни эсингдан чиқармадингми?— деб кулиб қўйди.— Гап бундай, онажон: бизга нон ёпиб беролмайсизми? Унимиз бор.

Ильинична курсига тўкилган сутни артаркан, йигитга қарамасдан:

— Майли... Бемалол... Ёпиб бераман, — деди шошиб.

Қизил аскар эшик олдига ўтирди, чўнтағидан халтасини олди, тамаки ўраб туриб гапга тушиб кетди:

— Кечгача ёпиб берасизми?

— Шошаётган бўлсанг, кечгача ёпиб берай.

— Урушда доим шошилади. Лекин хўрозингизни сўйганим учун хафа бўлманг, онажон.

— Нега хафа бўлайлик?— Ильинична қўрқиб кетди.— Боласи тушмагур гапирди-қўйди-да... Арзимаган нарсани эсга солганини қара!

Йигит эзмалик қилиб Мишаткани гапга соларди:

— Аммо лекин жудаям зиқна экансан,— деб мулоиймугина илжаярди.— Менга кўзларингни мунча олайтириб қарамасанг! Қани, берироқ кел-чи, хўрз масаласини яхшилаб гаплашиб олайлик.

— Бора қол, қўзичноғим!— деб ялинарди Ильинична, неварасини тиззаси билан туртиб.

Бироқ Мишатка бувисининг этагини қўйворгандан кейин ёни билан сурила-сурила эшик олдига бориб, ошхонадан қочиб чиқишни мўлжаллаб қолди. Қизил аскар қўл чўзиб уни ёнига тортди.

— Хафа бўлдингми?— деб сўради у.

— Йўқ,— деди Мишатка шивирлаб.

— Ана энди оғайни бўлдик. Гап хўрозда эмас. Даданг қаерда? Доннинг нарёғидами?

— Ҳа.

— Демак, бизга қарши экан-да?

Ширин гапга учган Мишатка оғзи бўшлиқ қилиб:

— Дадам ҳамма казаклар устидан турган командир!— деб мақтанди.

— Ёлғонният қойил қилдинг, ука!

— Ишонмасанг бувимдан сўра.

Неварасининг гапдонлигидан куйган кампир нима қилишини билмай, қарс уриб уҳ тортиб қўйди.

— Ростдан ҳаммага командирлик қиласдими?— деб сўради қизил аскар таажжубланиб.

Бувисининг хўмрайиб тикилаверганидан гангид қолган Мишатка:

— Билмадим, ҳаммасига эмасдир...— деди иккиланиб.

Қизил аскар индамай ўтиради, кейин кўз қирида Натальяга қараб-қараб қўйиб:

— Бу жувон бетобми?— деб сўради.

— Терлама касалига чалинган,— деб жавоб берди Ильинична истар-истамас.

Икки қизил аскар ошхонага бир қоп ун обкириб, остона тагига қўйишиди.

— Қампир, печга ўт қалайвер!— деди биттаси.— Кечқурун нонни обкетгани келамиз. Ҳушёр бўл, тағин оби камайиб кетмасин, худди балога қоласан-а!

— Билганимча ёпиб бераман,— деди Ильинична, азбаройи суюнганидан неварасининг чиқиб кетганини кўриб; икки қизил аскар эшикдан кириб келиши билан қалтис савол-жавоблар тўхтаб қолган эди.

Қизил аскарлардан бири боши билан имлаб Натальяни кўрсатиб:

— Терламами?— деб сўради.

— Ҳа.

Қизил аскарлар ўзаро пицирлашиб алланимани гаплашишди-да, ошхонадан чиқиб кетишиди. Орқароқда кетаётгани муюлишга етмай туриб, Дённинг нариги ёғидан қасир-қусур қилиб милтиқ овозлари чиқди.

Қизил аскарлар энгашган ҳолда чопқиллаганлари-ча, ярми қулаган тош девор тагига бориб ётиб олиниди ва милтиқ затворларини шарақлатиб бараварига ўт очишиди.

Капалаги учган Ильинична Мишаткани топмоқчи бўлиб, ҳовлига югуриб чиқди. Девор орқасида ётган қизил аскар:

— Ҳой, кампир! Уйга кир! Худди ўлдиришади!— деб бақирди.

— Неварам ҳовлида эди! Мишатка-а-а! Қўзичноғим!— деб чақиравди Ильинична йифламсираб.

Кампир юрганича ҳовлининг ўртасига борди, ўша заҳотиёқ нариги бетдагилар ўқ отишни тўхтатиши. Доннинг нариги қирғоғидаги казаклар уни кўриб қолган бўлсалар керак. Кампир югуриб келган Мишатканинг қўлидан судраб уйга кириб кетгандан кейин отишма яна бошланди ва қизил аскарлар қўрадан чиқиб кетгунларича давом этди.

Ильинична Наталья билан шивирлаб гаплашарди; у хамирни қориб ошгани қўйди-ю, бироқ қорған хамири шундайлигича қолаверди.

Тушга яқин қишлоқда турган пулемёт заставасига қарашли қизил аскарлар шошилинч суратда қўралардан чиқиб, пулемётларини судраганларича, жар ичи билан тоқقا чиқиб кетишиди.

Тоғдаги окопларда ётган бир рота қизил аскар дарҳол саф бўлиб, шитоб билан юриб Гетман йўлига тушди.

Бутун Дон атрофи бирпасда сув қўйгандай жимжит бўлди-қолди. Тўп ва пулемётларнинг овози ўчди. Ҳамма йўллар, ўт босган сўқмоқлар қишлоқлардан чиқиб Гетман йўли томон узлуксиз кетаётган арава-ю, тўплар билан тўлди; колонна-колонна бўлиб отлиқ ва пиёда аскарлар жўнади.

Кейин қолган қизил аскарларнинг бўр тоғи чўққилиари орасидан тармашиб чиқишини деразадан томоша қилаётган Ильинична қўлларини этагига артиб астайдил чўқинди:

— Худонинг меҳрибонлигини қара, Натальюшка! Қизиллар кетишияпти!

— Йўқ, ойижон, улар қишлоқдан чиқиб, тоғдаги окопларга боришияпти, кечқурун яна қайтиб келишади.

— Бўлмаса, нега мунчалик тез чопишади? Бизникилар ҳайдади! Чекинишияпти, лаънатилар! Қочишияпти, худобезорилар!— деб ёш боладай суюнарди

Ильинична. У яна бошқатдан хамир қоришига киришди.

Наталья даҳлиздан чиқиб остона ёнида тўхтади, кафтини пешонасига қўйиб, қуёш нурига чўмган бўр тоғига, жизгинаги чиқсан қўнғир ранг тизмаларга узоқ тикилиб қолди.

Улуғвор сукунатга чўмган ҳайбатли паға-паға булутлар тоғ орқасидан кўтарилар, момақалдироқ бўлишидан дарак берарди. Ер юзи тушки офтоб ҳароратида ўртанарди. Яйловда сувурлар чийиллашар, уларнинг чий-чийлаган мунгли ва майнин овози тўрғайларнинг шодиёна сайдишига ғалати жўр бўлиб тушган эди. Тўпларнинг ваҳимали садоларидан кейин орага чўккан сукунат шу қадар оромбахш эдики, Наталья қимир этмасдан тўрғайларнинг чулдураб сайдишига, қудуқ ҳавозасининг ғижирлашига, тахир шувоқ ҳиди тарқатган шамолнинг шитир-шитирига астойдил қулоқ солар, кўнгли яйради.

Шарқдан эсган бу аччиқ дашт шамоли хилма-хил ўткир ҳилларни учирив юарди. Ундан қизиган қора тупроқнинг ҳовури, қуёш ҳароратида сўлган кўкатларнинг масти қилувчи бўйи анқирди, лекин шу билан бирга, ёмғир ҳиди ҳам келарди: ҳаво намиқиб Дондан муздай шабада турган эди, қалдирғочлар айри қанотларини ёйиб, ер бағирлаб учишар, мовий осмон қўйнида, жуда-жуда баландларда парвоз этиб юрган қарчифай момақалдироқ яқинлашганини сезиб тобора узоқлашарди.

Наталья ҳовлини айланди. Тош деворнинг нариги ёғида, топталган кўкат устида отилган гильзалар олтиндай сарғайиб уйилиб ётарди. Оқланган деворнинг ўқ теккан жойлари кавак бўлиб қолган, ойналар тешилган эди. Омон қолган товуқлардан бири Натальяни кўриб қочди ва қақиллаганича омборхона томига учиб чиқди.

Оромбахш сукунат узоқ давом этмади. Шамол туриб, эгасиз қолган уйларнинг дераза, қопқоқ ва эшикларини тарақлатса бошлиди. Оппоқ қорга ўхшаш булат қуёшини ўраб олди-да, фарб томон сузид кетди.

Наталья шамол тўзитган соchlарини маҳкам ушлаганича ёзги ўчоқ ёнига борди-да, шу ердан туриб яна

тоққа қаради. Уфқда — бўзарган чанг-тўзон булути ичидагизиллаб кетаётган икки филдиракли аравалар, от чоптирган битта-яримта суворийнинг қораси кўринарди. Наталья эркин нафас олиб: «Бундан чиқди, кетаётгандар рост экан!» деб ўйлади.

У даҳлизга кирар-кирмас тоғ орқасида, жуда-жуда олисларда отилган тўпларнинг гумбурлаши эши билди, гўё унга жавобан, Вешенскаядаги икки черков қўнғироқларининг даранглаган шодиёна садоси бутун Дон атрофига ёйилди.

Казаклар Доннинг нариги бетидаги ўрмондан ёпирлиб чиқаверишди. Улар қайиқларни арқон билан судрашиб, кўтар-кўтар қилишиб Дон бўйига келтиришар ва сувга туширишарди. Эшкакчилар қайиқнинг орқа томонида тикка туриб олиб эпчилик билан эшкак солишарди. Ўттизга яқин қайиқ бири биридан ўзиб қишлоққа томон сузиб келмоқда эди.

Ошхонадан чопиб чиққан Ильинична:

— Натальюшка! Жонгинам! Ана, бизникилар келишяпти!..— деб ҳўнграб йиғларди.

Наталья Мишатканни қўлига олиб баланд кўтарди. Унинг кўзлары ўтдай ёнар, нафаси тиқилиб, тутилиб тутилиб гапиради:

— Жон болам, яхшилаб қара, сенинг кўзларинг ўткир... Яхшилаб қара-чи, казаклар ичидаги даданг... бормикин... кўринмайдими? Олдинги қайиқдаги ҳув анови дадангмасми? У ёққа эмас, бу ёққа қара...

Пристанда ёлғиз Пантелеем Прокофьевични кутиб олишди. У озиб-тўзиб кетган эди. Чол дабдурустдан ҳўқизларини, мол-мулкини, дон-дунини суриншира бошлади, сўнгра невараларини қучоқлаб бир оз кўз ёши қилди. Оқсоқлана-оқсоқлана, қўрасига кирди-ю, ўзини ташлаб тиз чўқди-да, астойдил чўқинди, сўнгра шарққа қараб сажда қилди, оппоқ бошини қақраган қайноқ ерга эгиб узоқ сукутга кетди.

V

Генерал Секретов командаси остидаги Дон армиясининг уч минг кишидан иборат суворий аскари от қўшилган олти замбарак, отга юкландиган ўн саккизта

пулемёт билан қизилларга қақшатқич зарба бергандан кейин 10 июнда Усть-Белокалитвень станицаси ёнида фронтни ёриб ўтди-да, темир йўл бўйлаб Казанская станицаси томон юрди.

Учинчи куни эрталаб 9-Дон полкига қарашли офицерлар разведкаси Донга яқин жойда қўғолончиларнинг соқчилариға дуч келиб қолди. Казаклар отлиқ отрядни кўрган ҳамоно жарга уриб кетдилар, бироқ разведка командири — ясовул казак қўзғолончиларни кийимидан таниб қолди, дастрўмолини қилич учига илиб қимирлата бошлиди:

— Бегона эмасмиз!.. Казак оғайнилар, қочманглар!.. — деб овози борича бақирди.

Разведкачилар хавотирланмасдан тўғри жар ёқасига от чоптириб келдилар. Соқчиларнинг бошлиғи ёши анчага борган кекса вахмистр эди; у шабнамда ивиган щинелини йўл-йўлакай тугмалаб, яқироқ келди. Саккизта офицер отдан тушди, ясовул вахмистр ёнига келиб, ялтироқ офицерча кокардалиқ пистоқи ранг фуражкасини бошидан олди-да, кулиб сўрашди:

— Салом, станицаликлар! Қани, келинг, казакларнинг қадимги одатини қилиб, ўпишайлик,— деди-да, вахмистрни ўнг-чап томондан икки марта ўпди, дастрўмоли билан оғиз ва бурнини артди, сўнgra ўз ҳамроҳларининг тикилиб турганини пайқаб, тагдор қилиб илжайди.

— Хўш, қалай, кўзларинг очилдими? Ўз одамларинг большевиклардан кўра яхши эканми? — деб сўради чертиб-чертиб.

— Шундоқ, жаноби олийлари! Гуноҳимизни ювиб ташладик... Уч ойдан бери жанг қиласмиз... Сизлар билан кўришишдан умидимизни узувлар!

— Яхшики, эсларинг борида әтакларингни ёпиб олдинглар. Ҳа, майли, ўтган ишга салавот. Қайси станицадан бўласиз?

— Казанскаядан, жаноб олийлари!

— Сизнинг қисмингиз Доннинг нариги бетидами?

— Ҳа, нариги бетида.

— Қизиллар қайси ёқса кетишди?

— Дон бўйлаб юқори томонга, Донец слободасига боришса керак.

- Отлиқ аскарларинг дарёдан ўтмадими?
- Утгани йўқ.
- Нега?
- Билмадим, жаноб олийлари. Ҳаммадан олдин бизни бу ёққа ўтказиб қўйишиди.
- Бу ерда қизилларнинг тўплари бормиди?
- Иккита батареяси бор эди.
- Қачон жўнашди?
- Кечаке кечқурун.
- Кетидан қувишиларинг керак эди! Ҳей лапашанглар! — деб ясовул гинахонлик қилди-да, отининг ёнига бориб ҳарбий сумкасидан блокнот билан харита олди.

Вахмистр қўлларини ёнга қилиб таёқдай қотиб туради. Ундан икки қадам орқароқда казаклар тўпланиб олган эди: улар гоҳ севиниб, гоҳ беихтиёр хавотир бўлишиб офицерларни, эгар-жабдуқларни, олис йўл юриб озиб кетган зотли аргумоқларни томоша қилишарди.

Инглизча ихчам френч, кенгина бриж кийган, поғон тақсан офицерлар оёқларининг чигилини ёзиб отлари атрофида у ёқдан-бу ёққа юриб туришар, кўз қирида казакларга қараб қўйишаарди. Ҳозир биронтасида ҳам 1918 йилдагидай, сиёҳ билан бўялган ясама погон кўринмасди. Пойафзаллари, эгарлари, ўқдону дурбинлари, эгарга танғилган карабинлари — тамоми нарсалари янги ва чет элдан келтирилган эди. Лекин ҳаммасидан кексароқ кўринган ёлғиз бир офицернинг уст-боши бошқача эди: у асл кўк мовутдан тикилган кавказча чакмон, тилла ранг бухорий қорақўл кубанка, тоғлик жойларда расм бўлган пошнасиз этик кийган эди. У оҳиста-оҳиста юриб ҳаммадан олдин казаклар ёнига келди, Бельгия короли Альбертнинг сурати солинган бир пачка папиросни планшеткасидан чиқариб ҳаммага тутди:

- Олиб чекаверинглар, биродарлар!

Казаклар очкўзлик қилиб папиросга қўл чўзишиди. Офицерлар ҳам келиб қўшилишиди.

— Ҳўш, большевиклар қўл остида турмушларинг қалай ўтди? — деб сўради яғрини кенг, хумкалла хорунниний.

Эски чакмон кийган казак папиросини устма-уст сўриб:

— Ҳаловатсиз...— деб жавоб берди. У хорунжийнинг семиз болдириларидаги тиззагача тасмаланган гетрлардан қўзларини олмасди.

Казакнинг майишган йиртиқ чориқлари эса оёғида зўрға туради. Чалвор почалари остидан қирқ ямоқ оқ пайпоқларининг йиртиқлари кўринарди; шунинг учун ҳам у умрбод тўзимайдиган инглизча ботинканинг қалин таг чармига, ялтираган мис пистонларига маҳлиё бўлиб қолганди. Ниҳоят, тили қичиб, соддалик билан ҳаваси келганини билдириб қўйди:

— Оёғингиздаги ботинка жудаям антиқа экан-да!

Лекин хорунжийнинг дўстона суҳбатга тоби йўқ эди. У қўрслик қилиб казакни узиб-узиб олди:

— Чет эл уст-бошини қўйиб, Москванинг чипта чорифига учдинглар, энди бирорвнинг буюмига кўз олайтирасизми?

Казак ўсал бўлиб:

— Хато қилдик. Айб бизда...— дерди ва биронтаси жонга оро киравмикин деган хаёлда шерикларига аланглаб қарапарди.

Лекин хорунжий уни масхара қилишини қўймасди:

— Аҳмоқнинг ақли тушдан кейин киради. Хато қилдик эмиш! Кузда фронтни очиб берганларингда нимани ўйловдинглар? Комиссар бўлгингиз келган-да! Балли сиздақа ватан ҳимоячиларига!..

Жиғибийрон бўлиб гапираётган хорунжийнинг ёнига ёшгина юзбоши келиб қулофига: «Қўйсанг-чи, бўлди-да, энди!» деб шивирлади. Шундан кейин у папиросини оёғи билан янчиб тупуринди-да, лапанглаб оти ёнига кетди.

Ясовул унга хат топшириб, бир нима деб пичирлади.

Хорунжий семизлигига қарамай, лип этиб отга минди-ю, жиловини буриб ғарб томон чоптирганича кетди.

Казаклар ранжиганлари учун чурқ этишмасди. Ясовул уларнинг ёнига келди-да, жўрттага овозини ҳар мақомга солиб, хушчақчақлик билан:

— Бу ердан Варварингача неча чақирим бор?— деб сўради.

— Ўттиз беш чақирим,— деб жавоб берди бир неча киши бараварига.

— Жуда соз. Гап бундай, станицалик оғайнилар, ҳозир бориб бошлиқларингга айтингки, отлиқ қисмлар бир минут ҳам кечикмасдан, дарҳол дарёдан ўтишсин. Бизнинг офицерларимиз сизга ҳамроҳ бўлиб дарё бўйигача боради, суворийларга ўзи бош бўлади. Пиёда аскарлар поход тартибида тўғри Қазанскаяга бораверсин. Тушунарлими? Гап шу. Йўлларинг бехатар бўлсин, марш!

Қазаклар галалашиб тоғ этаги билан кетиши. Ҳаммаси оғзига сув олгандай, чурқ этмасдан юз саржин чамаси йўл босди, ниҳоят, боя хорунжийдан дакки еган чакмонли кўримсиз казак аламзадалик билан бош чайқатиб:

— Бирлашиши орзу қилувдик, мана бирлашиш...— деб хўрсинди.

Иккинчи казак дарҳол унга қўшимча қилиб:

— Ҳаммаси бир гўр—оқ ит, қора ит, бари бир ит!— деди-да, болохонадор қилиб сўкинди.

VI

Қизилларининг шошилинч суратда чекинганлиги тўғрисида Вешенскаяга хабар келиши биланоқ, Григорий Мелехов икки суворий полк билан Дондан кечиб ўтди, атрофга кучли разведка юбориб, жануб томон от солдириб кетди.

Дон яқинидаги тепа орқасида жанг кетаётган эди. Тўп ўқларининг товуши бир-бирига уланиб, худди ер остида отилгандай гувиллаб эшитиларди.

Командирлардан бири Григорийнинг ёнига келиб:

— Кадетлар тўп ўқини аямайди дейман! Тўхтовсиз ўт очишини қара!— деди завқланиб.

Григорий индамади. У колоннанинг олдида, теварак-атрофга зеҳн солиб келарди. Дон билан Базки қишлоғининг орасидаги уч чақиримлик йўлда қўзғончилар ташлаб кетган мингларча арава ётарди. Синган сандиқлар, стуллар, кийим-кечак, от абзали,

идиш-товоқ, тикув машина, қоп-қоп дон ва умуман қоч-қочда очкўзлик билан уйдан ола чиқилган буюмлар ўрмоннинг ҳамма ёғида сочилиб ётарди. Йўлнинг баъзи жойларига тизза бўйи қип-қизил тилладай буфдой тўкилиб қолган эди. Ўнинг ёнгинасида ўлган от ва ҳўқизларнинг шишиб, сасиб кетган жасадлари кўринарди.

— Мана очкўзликнинг оқибати! — деб нидо қилди Григорий. Ў фуражкасини бошидан олди-да, нафасини ичига ютиб, уйилиб ётган буфдойни эҳтиёткорлик билан айланаб ўтди; буфдой устида чакмони қонга беланганд, казакча фуражка кийган чолнинг ўлиги ётарди.

Казаклардан бири:

— Мол-мол, деб ахiri мол бошига етибди. Бу ерларга уни шайтон бошлаб келган,— деди ачиниб.

— Буфдойдан ажрагиси келмаган-да...

— Қани, ҳайда тезроқ! Бирам сасиб кетибдик, худо ўзи юзини тескари қилсин. Ҳой, ҳайдасанг-чи ахир!...—деб бақирди кейинги сафдагилардан аллаким.

Сотня от чоптириб кетди. Гаплар тўхтади. Фақат бир тўда от туёқларининг дўпир-дўпирни шайлланган казакча от абзалларининг жаранг-журунги ўрмонда эшитилиб турди.

... Листницкийнинг қўргонига яқин жойда жанг қизиган эди. Ягодноедан четроқдаги тақир ерда қизил аскарлар ғуж-ғуж бўлиб қочишмоқда эди. Уларнинг тепаларида шрапнель портлар, орқаларидан пулемётлар ўқ узар, дўнг томондан эса, Қалмоқ полки чекина-диган ўйлни кесиб, қуюндай ёпирилиб келарди.

Жанг тамом бўлгандан кейин Григорий ўз полклири билан етиб келди. Вешенская довони бўйлаб чекинаётган тарқоқ қисмлар билан 14-дивизия обозларини орқадан ҳимоя қилиб турган икки рота қизил аскарни З-Қалмоқ полки бутунлай қириб ташлади. Григорий дўнгдан тушмай туриб командирликни Ермаковга топширди:

— Бизсизоқ саранжом қилишибди. Сен улар билан бирлашиш ҳаракатини қиласавер, мен бироров қўргонга кириб чиқаман,— деди.

— Шу топда зарур ишинг борми? — деб сўради Ермаков таажжубланиб.

— Нима десам экан, ёшлигимда шу ерда қарол эдим, ҳозир, негадир, ўша жойларни кўргим келиб қолди...

Григорий Прохорни чақириб, Ягодное томонга кетди; ярим чақиримча йўл юргандан кейин бурилиб қаради-ю, олдинги сотнянинг тепасида казаклардан бири эҳтиёт шарт учун ола келган оқ байроқнинг шамолда ҳилпираганини кўрди.

Дўнгдан тушиб келаётган казакларнинг бўйнидан бирор судрагандай имиллашини ва уларнинг рўпарасидан Секретов командасидаги бир группа суворийларнинг кўкаламзор ичидан от солдириб келишини кўргач, Григорийни ваҳим босиб: «Худди таслим бўладиган одамларга ўхшайдилар-а!» деб ўйлади.

Григорий қулаб ётган дарвозадан ўтиб, шўра босиб кетган қўрғон ичкарисига кириши билан бурнига ҳувиллаган вайронга ҳиди урилгандек бўлди. Ягодное таниб бўлмайдиган аҳволга тушган эди. Эгасизлик, вайронагарчиликдан бошқа кўзга ҳеч нарса чалинмасди. Бир вақтлар жудаям чиройли бўлган уй путурдан кетиб, чўкканга ўхшаб қолган эди. Том тунукаси кўпдан бери мойланмагани учун занглаб, сарфайиб кетганди. Тарновлари синиб зинапоя ёнида қулаб ётарди, дераза қопқоzlари ошиқ-мошиғидан чиқиб қийшайганича осилиб қолганди, синган ойналаридан шамол ҳуштак чалиб кирар ва у ердан эгасиз қолган бўлмаларнинг қўлланса ҳидини ҳар ёққа тарқатарди.

Уйнинг шарқ томондаги бурчаги билан зинапоясига уч дюймалик тўп ўқи тушиб вайрон бўлганди. Коридордаги венецианча деразанинг ўпирилган жойига тўп ўқи қулатган заранг дараҳтининг учи кириб қолган, танаси бўлса, пойдевордан чиқсан бир тўда ғишт парчаларига илдиз томони билан қадалганича чўзилиб ётарди. Унинг сўлган шохларини тез ўсадиган ёввойи чирмовуқ ўраб олган, бутун қолган дераза кўзларига чирмashiб, ундан пирамонга қараб ўса бошлаган эди.

Иил ўн икки ой ёғингарчиликда очиқ-сочиқ ётавергандан кейин аҳвол нима бўларди!.. Қўрадаги иморат-

лар умр бўйи уста қўли тегмагандек шураб қолган эди. Отхонанинг тош девори баҳор ёғингарчилигида захлаб қулаб тушганди, файтон турадиган бостиurmанинг томини бўрон очиб ташлаган эди, фақат сўррайиб қолган старапил ва тўсинлари устида онда-сонда бир тутам чириган похол кўринарди, холос.

Хизматкорлар турадиган йўнинг зинапояси устида ёввойилашиб кетган уч този ётарди. Одамларни кўриши билан учови ўрнидан туриб, ириллаганича даҳлизга кириб кетди. Григорий ёнбошдаги ҳужранинг очиқ деразаси ёнига бориб, эгардан энгашиб туриб:

— Тирик жон борми?— деб сўради.

Анчагача ҳужрадан тиқ этган товуш чиқмади, ниҳоят, овози хастароқ бир аёл жавоб берди:

— Шошмай туринг, барака топкур! Мен ҳозир чиқаман.

Қариб адойи тамом бўлган Лукеръя, оёқларини шапиллатиб, яланг оёқ ҳолда зинапояга чиқди-да офтобдан кўзларини қисиб Григорийга узоқ тикилиб қолди.

— Танимаяпсанми, Лукеръя хола?— деб сўради Григорий отдан тушаётib.

Ана шундан кейингина Лукеръянинг чўтири юзи бирданига ўзгариб, бепарво чеҳрасида ҳаяжонланиш аломати пайдо бўлди. Қампир йиғлаб юборди ва анчагача гапга келмади.

Григорий отини боғлади-да, сабр қилиб тураверди.

— Не-не кунларни кўрдим. Ҳеч банданинг бошига мунақасини солмасин...— деб ҳасрат қила бошлади Лукеръя, кир бўз этакка юзини артаётib.— Мен ўзлари қайтиб кептимикин деб ўйлабман... Вай, Гришенька, бу ерга бир бало бўлди... Гапирсам тамом бўлмайди!.. Ёлғиз ўзим қолдим, холос...

— Сашка бува қани? У ҳам панларга қўшилиб чекиндими?

— Кошкийди чекинган бўлса, балки тирик қолармиди...

— Ўлдими?

— Отиб ўлдиришди... Уч кундан бери ўлиги ертўлада ётибди... Кўмиш керак эди, бироқ касал бўп қол-

дим. Аранг ўрнимдан турдим... Ёнига борай десам, ўлик кўриб ўрганмаганман, қўрқаман...

Григорий ерга тикилганича, бошини кўтармасдан:

— Нега отишди? — деб сўради бўғиқ овоз билан.

— Биянинг касрига... Панлар бўлса наридан-бери йиғишириниб жўнаб кетишган эди. Пулларини өлишди-ю, бошқа ҳамма буюмларини менга қолдириб кетишди.— Лукеръя шивирлаб гапира бошлади:— Ипидан игнасигача асраб ўтирибман. Кўмилган жойида турибди. Йилқидан фақат учта наслдор айғирни өла кетишди, қолганларини Сашка бувага қолдиришиб. Кўзғолон бошлангандан кейин казаклар ҳам келиб от олаверди, қизиллар ҳам. Вихоръ деган қора айғир эсингдами? Эрта кўкламда уни қизиллар олиб кетишди. Зўрғатдан эгарлашди. Нега десанг, Вихоръ умрида эгар бетини кўрганмас. Барибир уни минган өдам, ҳузур қилолмади. Бир ҳафтадан кейин каргинлик казаклар келиб, нима бўлганини гапириб беришибди. Улар дўнгда қизилларга дуч келиб бир-бирларига ўқ отишити. Жанг қизиган маҳалда казаклар томонда аллақандай бир бия кишнаб юборибди. Биянинг кишнашини эшитгандан кейин Вихоръ туролармиди? Бир юлқинади-ю, бия томон тўрт оёқлаб, чопади, устидаги ҳалиги «чавандоз» бўлса уни тўхтатолмайди. Айғирни эпломаслигига кўзи етгандан кейин, ўқдай учеб кетаётган отдан ўзини ташламоқчи бўлади. Ташлашга ташлайди-ю, бироқ оёғи узангида қолади. Шундай қилиб, Вихоръ уни тўғри казаклар қўлига топширади.

— Қойилман! — деди Прохор, завқланиб.

— Ҳозир ўша айғирни каргинлик подхорунжий миниб юрибди,— деб Лукеръя ҳикоясини шошмай давом эттириди.— Пан қайтган заҳоти Вихорни қайтариб бераман, депти. Шундай қилиб, отларни ҳар ким олиб кетавергандан кейин Пример билан Суженаядан тарқаган ёлғиз пойгачи бия Стрелка қолди. Ӯзи бўғоз эди, шунинг учун ҳеч ким унга тегмасди. Яқинда қулунлади, Сашка бува қулунини аяб шундай паҳ-паҳлар эдики, асти қўяверасиз! Доим уни қўлдан қўймас, илиги тўлсин деб эмизук билан сут ичирар, аллақан-

дай кўкатни қайнатиб шарбатини берарди. Фалокат босиб, ўзоги куни кечқурун уч отлиқ кириб келди. Чол боғда пичан ўраётувди. «Хой, бу ёққа кел, фалону пиставон!»— деб бақириб-чақиришди. У чалгини ташлади-ю, яқин келиб салом берди, бироқ улар чолга қарамади ҳам, сут ичаётиб: «От борми?» деб сўрашди. У бўлса: «Битта от бору, бироқ урушга ярамайди, ўзи бия, эмадиган қулуни ҳам бор»,—деди. Учовининг ичида энг баттоли бақириб: «Бу масалада ақлинг калталик қилади! Бияни обчиқ, шайтон! Отим яғир бўлиб қолибди, алмашӣ олишим керак!»—деди. Чоли тушмагур бияга ачинмасдан «хўп» деб қўя қолсаку бўлади-я! Қаёғда! Биласан-ку ўзинг, қайсарлигини... Гоҳо панниям жеркиб ташларди. Эсингда бордир, а?

— Шундай қилиб, бияни бермадими?— деб Проктор гапга аралашди.

— Ҳей, бермасликнинг иложи борми? У фақат: «Сиздан олдин не-не одамлар келиб ҳамма отни олиб кетишиди, лекин биронтаси ҳам бияни минишга кўзи қиймади, сиз бўлсангиз...» дейиши билан ҳалигилар ўринларидан туриб: «Ҳаҳ, панинг малайи, бияни панга асраб қолдирмоқчимисан?» деб ўшқириб чолни судрашди. Бечора бияни обчиқиб эгарлайверишиди, жонивор қулуни бўлса елинига тармашарди, холос. Чол бўлса. «Раҳм қилинг, бияни обкетманг! Қулунини қаёққа қўямиз ахир?»— деб ялинди. «Мана бу ёққа!»— деб иккинчиси қулунни онаси ёнидан ҳайдадида, елкасидан милтигини олиб шартта отиб ташлади. Шундай йиғладимки... югуриб бориб уларга ялиниб ёлвордим, чолни маҳкам ушладиму бир фалокат бўлмасин деб, судраб кўрдим, бироқ у қулунга мундоқ қаради-ю, соқоли титраб ранги девордай оқариб кетдй: «Ундай бўлса, мениям от, итвачча!» деди-ю. Юлқиниб бориб уларга тармашди, бияни эгарлатмай туриб олди. Улар қизишиб, жаҳл устида чолни ҳам отиб ташлашди. Үнга ўқ текканини кўриб ҳушимдан кетиб қолибман... Мана энди нима қилишимни билмай ҳайронман. Тобут қилиш зариз эди, бироқ аёл кишининг қўлидан нима келади?

— Иккита белкурак билан бўз олиб кел,— деди Григорий

— Сен уни кўммоқчимисан? — деб сўради Прохор.

— Ҳа.

— Сенга зарил кептими, Григорий Пантелеевич! Яхшиси мен казакларни чақириб кела қолай. Тобутнинг ўшалар қиласди, бопта қилиб гўр ҳам қазиб беришади...

Аллақандай бир чолни кўмаман деб овора бўлишга Прохорнинг тоби йўқлиги кўриниб турарди; Григорий унинг таклифини қатъяян рад этди.

— Ўзимиз гўр қазлаб, ўзимиз кўмамиз. Бу чол яхши одам эди. Сен боқقا кириб, ҳовуз ёнида кутиб тур, мен ўликни кўриб чиқаман...

Уша қадимги сербутоқ бақатеракнинг тагига, йўсин босган ҳовузнинг яқинига, Григорий билан Аксиньянинг қизалогини ўз қўли билан кўмган жойнинг ёнгинасига Саша бобо ҳам дафн қилинди. Хушбўй бўз кафанга ўралган қотма жасадини лахадга қўйишиди, устидан тупроқ тортишди. Дўппайган кичкина эски гўр ёнида этик билан текисланган яп-янги қабр пайдо бўлди.

Эски хотиралар кўз олдидан бирма-бир ўтавериб хаёл дарёсига чўмган Григорий, калбига энг яқин бўлган шу кичкина қабристон ёнидаги кўкатга ёнбошлиди-да, серсавлат чодирини ёйган кўм-кўк осмонга узоқ тикилиб қолди. Бепоён осмон қўйнида, жуда-жуда баланд жойларда шамол сайр этар, қуёш нурига чўмган булатлар сузиб юришарди. Лекин ҳозиргина қувноқ табиат, ароқхўр Сашка бобонинг жасади кўмилган ерда ҳаёт қадимгидай қайнардиз кўм-кўк кўкаламзор бўлиб бир ёғи боқقا туташган даштда, эски ғарам панжаралари ёнида чакалак бўлиб ётган ёввойи наша орасида беданалар устма-уст битбилдиқ отишар, юмронқозиқлар чийиллашар, қовоқарилар гўнғиллашар, кўкатлар шамолда эркаланиб шитирлашар, тўрғайлар жимираган ҳавода муаллақ туриб сайрашар эди; бирданига қақирип ернинг аллақайси томонида, жуда-жуда олисларда пулемёт шитоб билан, ғазаб билан тариллаб, табиатда одамзоддан кучли нарса йўқлигини исбот қилди.

Ўз штаб офицерлари ва бир сотня шахсий соқчилари билан Вешенскаяга келган генерал Секретовни черков жомларининг садолари остида нону туз билан кутиб олишди. Икки черков қўнғироқларининг овози худди пасхадагидай кун бўйи тинмади. Қўйи донлик казаклар узоқ йўл босиб дармони қуриган дон наслли ориқ отларида кўча-кўйни айланиб юришарди. Уларнинг елкаларидаги погонлар кўзга ғалати кўринарди. Генерал Секретов учун ажратилган майдондаги ҳашаматли уй ёнида ординарлар тўпланиб туришарди. Улар семечка чақишиб, ёнларидан ясаниб-тусаниб ўтган станица қизларига гап отишарди.

Туш пайти отлиқ қалмоқ ўн бештacha асир қизил аскарни генерал қўшхонаси ёнига ҳайдаб келди. Духовой оркестр асбоблари ортилган қўш отлиқ арава орқада келарди. Қизил аскарларнинг кийимлари бошқача эди: шимлари кўк мовутдан, қизил баҳали қайтарма енгли курткалари ҳам кўк мовутдан тикилганди. Ёши анчага бориб қолган қалмоқ, дарвоза олдида бекор турган ординарлар ёнига келиб отдан тушди, сопол трубкасини чўнтағига солди.

— Бизникилар қизил карнайчиларни юборишли. Тушундингми?

Бақалоқ ординарец семечка пўчогини қалмоқнинг чанг босган этигига туфлаб:

— Шуниям тушунмайдими, тентак! — деди.

— Гапни чўзма, асирларни ол. Ўлгудай семирибсан, валақлай берсанг, озиб қоласан!

— Бас! Оғзингга қараб гапир, ирkit! — деди ординарец ва жаҳли чиққанига қарамай, асирлар келганини маълум қилгани ичкарига кириб кетди.

Хипча бел жигар ранғ камзул кийган хомсемиз ясовул дарвоздадан чиқди. Йўғон оёқларини кериб, олифтагарчилик билан икки қўлини биқининг қилиб, руж бўлиб турган қизил аскарларга назар солди.

— Хўш, музика билан комиссарларнинг димофини чоғ қилган тамбовлик ирkitлар! Ким берди сизга бу мунидирларни? Ёки немислардан шилиб олдингларми?

Ҳамма қизил аскарлардан олдинроқда турган бир йигит киприкларини пирпиратиб:

— Йўқ,— деб жавоб берди-да, лаби лабига тегмасдан тушунтира бошлади:— Бизнинг музикачилар командасига бу формани Керенский даврида, июнь хужумидан сал олдинроқ тикиб беришувди... Ўшандан бери шуни кийиб юрибмиз...

— Кийиб юрасан-а! Кийиб бўпсан! Мен сизларга кийишни кўрсатиб қўяман ҳали! — Ясовул кичкина кубанкасини энсасига суриб қўйган эди, сочи олинган бошида қизғиши бўлиб битиб қолган жароҳат ўрни кўринди, таги ейилган баланд пошнада кескин бурилиб қалмоққа бетма-бет бўлди:— Буларни нега ҳайдаб келдинг, чўқинмаган чулчит? Бошимга ураманми энди? Ўлда ҳаммасини саранжом қила қолсанг ўлармидинг?

Қалмоқ кўз очиб юмгунча ўзини ўнглаб олди, эпчиллик билан қийшиқ оёқларини жуфтлади-да, қўлинни мош ранг фуражкасининг козирёгидан олмасдан жавоб берди:

— Сотня командири буюрди: шатга ҳайдаш керак, деб.

— «Шатга ҳайдаш керак!» — деб уни мазах қилди олифта ясовул юпقا лабларини буриштириб, сўнгра у увишган оёқларини аранг босиб, семиз думбасини ликиллатиб қизил аскарларни айланиб чиқди, асб жаллоб сингари тикилиб ҳар бир асирини кўздан кечирди.

Ординарлар секин-аста пиқирлаб кулишар, соқчи қалмоқлар эса парвойи фалак, миқ этмай туришарди.

— Дарвозани оч! Ҳаммасини қўрага ҳайда!— деб буюрди ясовул.

Қизил аскарлар ҳамда музика асбоблари ортилған арава зинапоя олдида тўхтади.

— Қапельмейстер ким?— деб сўради ясовул папиррос тутатаётуб.

— У йўқ!— бир неча киши баравар жавоб берди.

— Қани у? Қочдими?

— Йўқ, ўлдиришди.

— Ажаб бўпти. Усиз ҳам чалаверасиз. Қани, асбобларни олинг-чи!

Қизил аскарлар арава ёнига бориши. Черков қўнгиришларининг кишини безор қилувчи жангир-жунгурига мис трубаларнинг фат-фути қўшилиб кетди.

— Тайёр бўл! «Э бор худоё, подшойи аъзам...»ни бошланглар!

Музикачилар ҳайрон бўлиб бир-бирларига қараб қўйиши. Ҳеч ким бошламади. Орага оғир сукунат чўмди, бир минутчадан кейин, яланг оёқ, лекин обмоткалари яхшилаб ўралган бир йигит чиқиб:

— Эски гимнни биронтамиз ҳам билмаймиз...— деди.

— Билмайсизми? Қизиқ... Ҳой, ким бор у ёқда? Ярим взвод ординарецлар милтиқларини олиб ёнимга келсин!

Ясовул этигининг тумшуғини бир мақомда ерга уриб туради. Ординарецлар каабинларини шиқирлатиб, коридорда саф тортмоқда эди. Уй олдидағи боғчанинг орқасида, шохлаб кетган акацияларда чумчуклар чирқиллашарди. Тунука томларнинг тафтидан ҳовли ичи ўтдай ёнар, одамларнинг аччиқ тер ҳидлари димоққа уриларди. Ясовул ўзини сояга олди, ана шундан кейин яланг оёқ музикачи ҳасрат билан ўртоқларига боқди-да, ясовулга секин деди:

— Жаноб олийлари, бу ердагиларнинг ҳаммаси ёш музыкантлар. Эски машқларни сира чалмаганлар... Кўпинча революцион маршлар чалар эдик... Жаноб олийлари!

Ясовул хаёл сурини, камарининг шокиласини ўйнарди. Ординарлар зинапоя олдида саф тортиб, унинг буйруғини кутиб туришарди.

Бир кўзига оқ тушган ўрта яшар музыкант қизил аскарлар орасини ёриб, орқадаги сафдан чиқиб келдида, йўталиб:

— Рухсат этинг? Мен чаламан,— деди-да, ясовулнинг ижозатини кутмасдан, офтобда қизиб кетган фактни қалтироқ лабларига қўйди.

Ёлғиз асбобнинг қулоққа ёқмайдиган носоз овози ясовулнинг ғашини келтирди, афти бужмайиб кетди. У қўл силтаб:

— Бас қил! Мунча чўзасан, отанг темирчи ўтганми! Шуям музика бўлтими?— деб бақирди.

Деразадан мўралаб турган штаб офицерлари ва адъютантларнинг башаралари кўринди. Деразадан бошини чиқариб, ярим белигача осилиб турган ёшги на юзбоши ингичка овоз билан:

— Сиз уларга мотам маршини чалдиринг! — деб асия қиласарди.

Черков қўнғироқларининг жонга теккан овози бирпас ўчди, ясовул қошларини учирниб тилёғламалик билан гапирди.

— Менимча «Интернационал»ни билсангиз керак. Қани, бошланг-чи! Сира қўрқманг! Мен буюргандан кейин чалаверинг!

Орага сукунат чўқди, мисдек қизиган ҳавода «Интернационал» маршининг жангга чорловчи улуғвор садолари янгради.

Ясовул худди ҳурккан ҳўқиздай бошини эгиб, оёқларини керганича турган жойида қотиб қолган қимири этмай қулоқ соларди. Гўштдор бўйни-ю, қисиқ кўзларининг кўкиштоб соққалари тобора қонга тўларди.

— Бас қил! — деб ҳайқирди у ғазабига чидолмасдан.

Оркестр бирданига жим бўлди, фақат валторна кечикди, унинг эҳтиросли овози жазирама ҳавога кўтарилиб, гўё хитоб қилаётгандай анчагача эшитилиб турди.

Музикачилар қақраган лабларини ялашар, енглари ва кир кафтлари билан артишарди. Улар бепарво, қаттиқ чарчаганлиги юзларидан кўриниб турарди. Ёлғиз биттасининг кўз ёши оқиб, чаңг босган юзида из қолдирган эди.

Бу вақтда генерал Секретов, рус — япон урушида бирга хизмат этган бир оғайнисининг отасиникида овқатланаётган эди, у кайфи ошган адъютантининг қўлига суюниб майдонга чиқди. Ҳавонинг иссиқлиги, самогоннинг кайфи уни лоҳас қилган эди. Гимназиянинг ғишин биноси рўпарасидаги бурчакка етганда, генерал қоқилиб кетиб қайноқ қумга муккаси билан ийқилди. Дөвдираган адъютант уни турғизмоқчи бўлиб уринди, лекин эплаёлмади. Сал нарида турган одамлардан баъзилари ёрдамга келишди. Икки кекса казэк генералнинг икки қўлтиғига кириб иззату икром билан

турғизиб қўйишди, шу пайт генерал халойиқ олдида қайт қилиб юборди. Шу аҳволда у тагин муштини ўдайлаб, алланима деб бақирмоқчи ҳам бўларди. Генерални бир амаллаб тинчтишида, сую-сую қилиб қўшхонасига олиб кетишиди.

Нарироқда турган казаклар унинг кетидан тикилиб секин-аста шивирлашар эди:

— Роза мазаси қочиби! Ўзини тутолмайди, яна бу генералмиш.

— Самогон амалини суриштирмайди.

— Қўйиб берганини ичаверадими ахир? Ҳолига қарасин-да...

— Эй, биродар, кўнгил тортгандан кейин ичмай туруладими! Баъзи одамлар мастилигида шундай шарманда бўладики, бинойи умр оғзига олмасликка қасам ичади... Лекин бу тўғрида ғалати гап бор: «Хўроз минбад гўнг титмайман деб тавба қилганда, аксига олдидан бир арава гўнг чиқиб қолибди...»

— Ҳа-я, оқибати шу-да! Ҳой, болаларга айт, нарироқ кетишин! Умларида маст кўрмагандай, кўзларини чақчайтириб тикилишади, ҳаромилар...

Кечгача қўнғироқ овозлари тинмади, одамлар бўйса самогондан бош кўтартмади. Офицерлар учун ажратилган уйда кечқурун қўзғолончилар қўмондонлиги келганлар шарафинга зиёфат берди.

Қад-қомати келишган новча генерал Секретов Краснокут станицасига қарашли қишлоқда туғилиб, шу ерда катта бўлган казак эди. Ў отга ниҳоят ишқибоз, ўтқир чавандоз ва энг абжир суворий генерал эди. Бироқ галга ўлгудай нўноқ эди. Унинг зиёфатда масталаст ҳолда сўзлаган нутқи бошдан-оёқ мақтанчоқликдан иборат эди; сўзини очиқдан-очиқ гинахонлик ва юқоридонникларга дўқ қилиш билан тугатди.

Зиёфатда иштирок этган Григорий Секретовнинг ҳар бир сўзини жаҳл аралаш диққат билан тингларди. Кайфи тарқамаган генерал бўлса, панжасини столга тираб оёқда аранг турар, стакандаги бадбўй самогонни чайқалтириб юборарди, ҳар бир жумлани ҳаддан ташқари бўрттириб гапиради:

—... Йўқ, биз сизларга эмас, сиз бизга раҳмат дейишингиз керак! Ҳа, ҳа, сиз! Үғил болача гап шу!

Биз бўлмасак, қизиллар сизни аллақачон қириб ташларди. Буни ўзингиз ҳам яхши тушунасиз. Лекин биз сизсиз ҳам бу абраҳамларни енга олардик. Мана енгяппиз, бундан бу ёқ ҳам енгаверамиз, бутун Россияни озод этгунча урушамиз. Сиз кузакда фронтни ташлаб, большевикларга йўл очиб бергансиз, уларни казаклар ютига киргизгансиз... Сиз улар билан апоқ-чазпоқ бўлиб, тинчгина яшамоқчи эдингиз, бироқ ниятингиз пучга чиқди! Ана шундан кейин сиз ўз молмулкингизни, ўз ҳаётингизни сақламоқ учун қўзғолон кўтардингиз. Тўғрисини айтганда, сиз эчкига ўхшаб, жон қайғусига тушиб қолган эдингиз. Мен ўтган гапни қўзғатиб хатоларингизни юзингизга солмоқчи эмасман... Бунинг учун хафа бўлмасангиз ҳам бўлади. Ҳақиқат гапнинг очиғини айтган яхши. Сиз хиёнат қилдингиз, лекин биз кечирдик. Биз қонқардош, биродарлик қилиб, бошингизга оғир кун тушгандада сизга ёрдамга келдик. Энди сиз ўтмишда қилган жиноятингизни келажакда ювиб ташлашингиз керак. Тушунарлими, жаноби офицерлар? Сиз жангда мардонаворлик билан, тинч Донга ҳалол хизмат қилиш йўли билан ўзингизни оқлаб олмоғингиз лозим. Тушунарлими?

Григорийнинг рўпарасида ўтирган, ёши қайтган лашкар старшинаси сал-пал илжайди, ўзича стаканни кўтариб:

— Қани, ўзимизни оқлаб олиш учун,— деди-ю, бошқаларни кутмасдан ичиб бўлди.

Унинг юзи сал-пал чўтири, лекин мардонавор эди, сарғиш кўзлари кулиб турарди. Секретов гапираётган пайтда у ора-сира лабларини буриштириб, истеҳзо билан кулгандай бўлар, кўзлари қорайиб, чаросга ўхшаб кетар эди. Разм солиб ўтирган Григорий, лашкар старшинасининг Секретов билан сансираб гаплашганини ва ундан ҳеч ҳайиқмаганини пайқади, лекин бошқа офицерлар олдида ўзини ниҳоятда сипо тутар, совуқ муомала қиларди. Зиёфатдаги одамлардан ёлғиз угина енгига зар уقا қадалган мosh ранг кителига погон тақиб олганди. «Аллақандай маслакпараст кўнгиллилардан бўлса керак», деб ўйлади Григорий. Лашкар старшинаси самогонни

Чўчқадай шимиради. Тамаддисиз ичса ҳам сира маст бўлмас, аҳён-аҳёнда камарини бўшатиб қўярди, холос.

— Рўпарамда ўтирган анови чўтири ким?—шивирлаб сўради Григорий ёнидаги Богатиревдан.

— Ким билсин,— деб қўл силтади қайфи ошиб қолган Богатирев.

Кудинов меҳмонлардан самогонни аямасди. Алла-қаёқдан спирт пайдо бўлиб столга қўйилди, Секретов бир амаллаб нутқини тамомлади-ю, сюртук тумалари-ни ечиб стулга ўтиреди. Мўгулга ўхшашиб ёшгина юзбоши энганиш, унинг қулоғига алланима деб пичирлади.

Секретов шолғомдай қизариб кетди:

— Даф бўлсин!— деди-да, Кудинов лаганбардорлик билан кулиб қўйган бир рюмка спиртни бир кўта-ришда шимириди.

— Бу қийиқ кўз йигит ким? Адъютантими?—деб сўради Григорий Богатиревдан.

У оғзига кафтини қўйиб туриб жавоб қилди:

— Йўқ, асрандиси. Генерал япон урушида уни Манчжуриядан олиб келган: кичкина бола эди. Тарбия қилиб, юнкерлар мактабига берган. Хитой бола туппатузук одам бўлди. Жудаям абжир! Кеча Макеевка ёнида қизилларнинг бир яшик пулини қўлга тушириди. Икки миллион ақчалик бўлди... Уни қара, чўнтакларидан даста-даста пул чиқиб турибди! Лаънатининг ёмади келган-да! Нуқул червон! Ичсанг-чи, ахир, уларга мунча тикилмасанг!

Кудинов жавоб нутқи сўзлади, бироқ ҳеч ким унга қулоқ солмади. Ичкиликбозлик тобора авжига чиқмоқда эди. Секретов сюртугини ечиб ташлаб, ёлғиз ич кўйлакда ўтиради. Сочи устарада тақир қилиб олинганилиги учун боши тердан йилтирас, оппоқ сурп кўйлаги эса қип-қизил юзи билан жигар ранг бўйнига янада ўзгачароқ тус берарди. Кудинов шивирлаб алланима демоқчи бўлар, бироқ Секретов унга қаралмасдан қайта-қайта такрорлар эди:

— Йў-ў-ўқ, кечирасан! Кечирасан, ундан эмас! Биз сизларга мумкин бўлганича ишонишимиз мумкин... Сизнинг хоинлигингиз ҳаливери эсдан чиқмайди.

Кузакда қизиллар томонига қочиб ўтганлар, буни ўнг қулоғи билан ҳам эшитиб олсин, чап қулоғи билан ҳам...

Кайфи ошиб қолган Григорий, ғазаби қайнаса ҳам ўзини босиб: «Биз ҳам сизга мумкин бўлганича хизмат қиласмиш» деб ўйлади-да, ўрнидан турди. Фурражкасини киймасдан зинапояга чиқди-ю, муздай тун ҳавосидан енгил тортиб, эркинлик билан тўйиб-тўйиб нафас олди.

Дон бўйида қурбақалар ёмғир ҳидини сезгандай, вақиллашар, сув қўнғизлари ғўнғиллашарди. Қумлоқ томонда бир-бирини чақирган лойхўракларнинг мунгли овози эшитиларди. Сойликнинг аллақайси бир бурчагида онасидан адашган қулун ингичка товуш билан ҳиҳилаб кишинарди. Григорий зинапоядан тушиб, хаёлга чўмған ҳолда кўча эшик томон пайпаслаб юра бошлиди. «Тўппи тор келгани учун ноилож сенлар билан бирлашишга мажбур бўлдик-да, йўғасам, сенлар билан нону қатиқ ейишга тобимиз йўқ эди. Падар лаънати, аплаҳ! Ўзини бирор бир пулга олмайди-ку, нозига ўлайми... Тағин гинахонлиги ортиқча, бир ҳафтадан кейин бўйнимизга миниб олмасайди ҳали... Жудаям ғалати замон бўлди-да! Бошингни қайга урсанг, тақ этиб деворга тегади. Худди ўзим ўйлаган кун келди... Шундай бўлиши аввалданоқ маълум эди. Мана энди казаклар мишигини тортаверсинг! Жаноб олийлари ҳузурида таёқдай қотиб честь бериш эсдан чиққан бўлса, яна эсларига солиб қўйишади» деган гаплар миясидан ўтарди.

Спирт унга ҳам таъсир этганди: боши айланар, оёқлари зилдай оғирлашиб, пойинтар-сойинтар қадам ташларди. Эшикдан чиқаётганда гандираклаб кетди, фурражкасини бостириб кийди-да, оёғини судраганича кўчадан кетаверди.

Аксинъянинг холасининг уйи олдида у хаёл суриб тўхтаб қолди, сўнгра таваккал қилиб зинапояга қадам қўйди. Даҳлиз эшиги очиқ эди. Григорий эшикни тиқирлатмасдан гўппа-тўғри меҳмонхонага кириб бора-верди, бирданига стол ёнида ўтирган Степан Астаховга рўпара келиб қолди. Печь ёнида Аксинъянинг холаси ивирсиб юарди. Топ-тоза дастурхон солинган

столда оз-моз самогон қолган шиша, тарелкага тўғраб қўйилган қоқбалиқ кўринарди.

Степан эндиғина стаканни бўшатиб, тамадди қилмоқчи бўлиб турган пайтда Григорийни кўриб қолдида, тарелкани нари суреб деворга суюнди.

Григорий шунчалик мастилиги билан Степаннинг ранги мурдадай оқариб кетганини, кўзлари бўриникидай чақнаганини пайқади. Тасодифий учрашувдан эсанкираганлигига қарамай, ўзини дадил тутиб, хириллоқ овоз билан:

— Яхши ўтирибсизми?— деб сўрашди.

— Худога шукур,— деди уй бекаси ҳадиксираб. Кампир Григорий билан Аксинья орасида қандай алоқа борлигини яхши билгани учун эр билан ўйнашнинг учрашувидан яхшилик чиқмаслигини тушунарди.

Степан индамасдан ҳадеб чап қўли билан мўйловини силар, ўтдай ёнган кўзларини Григорийдан олмасди.

Григорий бўлса, оёқларини керганича оstonада туриб, лабларини қийшайтириб илжаярди.

— Шундай, ўзим кўриб чиқай деб кирувдим... Ке-чирасиз,— деди.

Степан чурқ этмади. Учови ҳам нима қилишини билмай, ўнғайсизланиб қолганди, ниҳоят кампир Григорийни дастурхонга таклиф этишга журъат қилди.

— Қани, яқинроқ келиб ўтиринг.

Энди сир яширишнинг нафи йўқлигига Григорийнинг кўзи етган эди. Унинг бу уйга тўғридан-тўғри кириб келиши Степанга ҳамма гапни англатган эди. Григорий дангал:

— Хотининг қани?— деб сўради.

Степан секин, лекин аниқ қилиб:

— Сен ҳам Аксиньяни кўргани келдингми?— деб сўради-ю, киприклари пирпираган кўзларини аста юмиб олди.

— Да,— деб иқрор бўлди Григорий хўрсиниб.

Степаннинг шу онда ҳеч нарсадан тоймаслигичи сезган Григорий ҳушёр тортиб, ўзини ҳимоя қилишга тайёрланди. Бироқ рақиби кўзини очиб (ҳалигина ўтдай чақнаб турган кўзлари сузилиб қолган эди):

— Мен уни ароққа юбордим, ҳозир келиб қолар.
Үтири,— деди.

Ү ҳатто ўрнидан туриб стулни Григорийга яқинроқ суреб қўйди, сўнгра кампирга қарамасдан:

— Хола, битта тоза стакан беринг,— деб илтимос қилди ва Григорийга бурилиб: — Ичасанми? — деб сўради.

— Озгина ичишим мумкин.

— Қани, ўтири.

Григорий стол ёнига ўтириди. Шиша тагида қолган ароқни Степан баб-баравар бўлиб, икки стаканга қўйди-да, туман босган кўзлари билан Григорийга боқди.

— Яхши ниятлар учун!

— Соғ бўлайлик!

Иккиси уриштириб ичишиди. Кейин жим бўлаёт қолишиди. Кампир эпчил келинлардай югуриб-елиб, меҳмон олдига тарелка билан дастаси майишган вилка қўйди.

— Балиқдан олинг! Шўр эмас.

— Раҳмат!

— Тарелкага солиб, бемалол олаверинг! — деб манзират қиларди у суюниб.

Кампир орада жанжал чиқиб идиш-товоқлар синмаганига, ур-иყитсиз, тўполонсиз тинчгина ўтиришганига ниҳоятда хурсанд эди. Энди қўзғалиб келаётган қалтис гаплар ҳам тўхтаб, эр билан ўйнаш дастурхон устида тинч-тотув ўтиришарди. Улар бир-бирларига қарамай, индамасдан овқат ейишарди. Ҳар балога ақли етадиган кампир сандиқдан тоза сочиқ олди-да, икки рақибни бир-бирига яраштиromoқчи бўлгандек, сочиқнинг бир учини Григорийнинг, бир учини Степанинг тиззасига қўйди.

— Сен нега сотняни ташлаб келдинг? — деб сўради Григорий балиқ устиконини тозалаётib.

Степан ўйланиб туриб:

— Мен ҳам хотинимни кўргани келдим,— деди, бироқ унинг овозидан на жиддий гапирганини ва на қочирим қилганини билиб бўлмасди.

— Сотнядагилар ўйларига тарқаб кетишгандир?

— Қишлоқда маза қилиб юришибди. Қани, ичиб тутгатамизми?

- Ол бўлмаса.
- Саломат бўлайлик!
- Яхши ниятлар учун!

Даҳлизда эшик лўқидони шарақлади. Кайфи бутунлай тарқаган Григорий ер тагидан Степанга қаради, унинг ранги яна докадай оқариб кетганини кўрди.

Шол рўмолга бурканган Аксинья Григорийни танимасдан стол ёнига келиб ёнбошдан унга қаради-ю, қоп-қора кўзлари қинидан чиқиб кетаёзди. Нафаси тиқилиб, тили зўрға калимага келди:

- Салом, Григорий Пантелеевич!

Степаннинг стол устидаги сербўғин қўллари бирданига қалтирай бошлади, буни кўриб турган Григорий индамасдан Аксинъяга таъзим қилди, нафаси ичига тушиб кетди.

Аксинья икки шиша самогонни столга қўяётib вахим аралаш севинч билан яна Григорийга бир марта қараб қўйди-да, орқасига бурилиб, меҳмонхонанинг қоронги бурчагидаги сандиққа бориб ўтири, қалтираган қўллари билан соchlарини тузатди. Степан ўзини босиб олгандан кейин нафасини бўғиб турган кўйлак ёқасини ечди-да, хотинига қараб:

— Стакан олиб дастурхонга яқинроқ келиб ўтири,— деди.

- Мен ичмайман.
- Ўтири деяпман!
- Ичмаслигимни биласан-ку, Стёпа!
- Ҳадеб такрорлайверишим шартми?— Степаннинг овози ўзгариб кетди.

Григорий Аксинъяга далда бериш учун:

- Кела қол, ҳамсоя!— деб жилмайди.

Аксинья хумор кўзлари билан унга бир қаради-ю, шоша-пиша ўрнидан туриб жавон ёнига борди. Битта тарелка жавондан ерга тушиб, жаранглаб синди.

— Вой, фалокат-эй!— деб қарс урди кампир ачиниб.

Аксинья чурқ этмасдан синиқ парчаларни йиғишириарди.

Степан хотинига ҳам стаканни тўлдириб қўйди, унинг кўзларида ҳасрат ва адоват ўтлари ёна бошлади.

— Қани, ичайлик...— деди-ю, дами ичига тушиб кетди.

Үй ичи сув қўйғандай жимжит эди, стол ёнига келиб ўтирган Аксинъянинг энтикиб нафас олиши бемалол эштиларди.

— Қани, хотин, жудолик учун ичайлик. Ичкинг келмаяптими? Ичмайсанми?

— Ўзинг биласан-ку, ахир...

— Мен ҳаммасини биламан... Жудолик учун ичишни истамасанг, азиз меҳмон Григорий Пантелеевичнинг соғлиги учун кўтар!

— Унинг соғлиги учун ичганим бўлсин!— деб, Аксинъя бир кўтаришда стаканни бўшатди.

Кампир ошхонага югуриб чиқиб кетаётиб:

— Пешонанг қурсин!— деб шивирлади.

Кампир бир бурчакка суқилиб олиб, икки қўлини кўксига босган ҳолда, ана энди стол ағдарилиб, уй ичи остин-устун бўлади, қарсиллатиб бир-бирига ўқ отишади, деб ўйларди. Бироқ меҳмонхона жимжит, тиқ этган товуш чиқмасди. Фақат шифтга қўнгган пашшаларнинг чироқда безовта бўлиб ғўнфиллашгани-ю, ярим кечада уйғонган станица хўроздарининг қичқиришгани эштиларди, холос.

VIII

Донда июнь тунлари ниҳоятда қоронғи бўлади. Юракни орзиқтирувчи сукунатга чўмган зим-зиё осмон қўйнида ялт этиб олтиндай чақмоқ чақади, юлдузлар учади ва уларнинг шуъласи жимиirlаб оққан Донда акс этади. Даشتдан илиқ шамол эсиб, гулга кирган чўл ялпизининг муаттар ҳидларини қишлоқ томон учирив келади, сойлик ичини шабнамга чўмилган кўкатларнинг ҳиди, балчиқ билан рутубат ҳиди босиб кетади, қизилоёқлар тўхтовсиз чийиллашади, дарё бўйидаги ўрмонни эса, туман худди эртакдаги сингари, ўзининг кумуш ранг чодири билан буркаб олади.

Прохор ярим кечада уйғониб, уй эгасидан:

— Бизнинг хўжайин келмадими?— деб сўради.

— Йўқ. Генераллар билан кайф-сафо қиляпти.

Прохор эснади ва кўнгли сус кетиб:

— Ароқниам беармон ичишаётган бўлса керак!— деб хўрсинди-да, кийина бошлади.

— Шу топда қаёққа бормоқчисан?

— Отларни сугориб, емини берай. Григорий Пантелеевич: тонг отган заҳоти Татарскка жўнаймиз, деган эди. Ўша ерда бир кун турамизу, ўз қисмимизга етиб олиш учун яна йўлга чиқамиз.

— Тонг отишига ҳали анча бор. Уйқунгни олаверсанг бўларди.

Прохор чолни жеркиб ташлади.

— Авзойингдан кўриб турибман, ёшлигингда сафга ярамай, чиқитга чиқиб қолганлардан бўлгансан. Ҳарбий хизматда юрган одам агар отига қарамаса, парвариш қилмаса, тирик қолишдан умидини узаверсин. Ориқ отда қайга бороласан? Отинг қанчалик яхши бўлса, душмандан шунчалик тезроқ қочиб қутулласач. Менинг одатим шу: душман кетидан қувлаб юрмайман, лекин тўппи тор келадиган бўлса, отни қамчилаб қочиб қоламан! Шунча йилдан бери ўққа қўксимни қалқон қилиб келаман, энди зарил келгани йўқ... Бува, чироқни ёқ, пайтавамни тополмаяпман. Раҳмат, буважон! Шундай, крест учун, амал учун, жонини жабборга берадиган бизнинг Григорий Пантелеевич, мен у хил аҳмоқлардан эмасман, менга унақаси кетмайди. Ана, ўзи ҳам келаётганга ўхшайди, итдай маст бўлса керак.

Эшикни бирор секин тиқирлатди.

— Қираверинг!— деб бақирди Прохор.

Эшик очилиб, мosh ранг гимнастёрка, кокардалик фурожка кийган, младший урядник погонини таққан нотаниш бир казак кирди.

— Мен генерал Секретов штабининг ординарециман. Мелехов жаноби олийларини кўрсам мумкинми?— деб сўради у оstonадан честь бериб.

Унинг ҳарбийларча қотиб туриши ва ўргатилган тўтидай сайраб гапиришига Прохор қойил қолиб:

— Уйда йўқ,— деди.— Мунча қаққаясан ахир? Мен ҳам ёшлигимда сенга ўхшаб шунақа аҳмоқчиликни қилганман, бемалол туравер. Мен унинг адъютантиман. Хўш, нима хизмат?

— Генерал Секретовнинг буйруғи билан мен жаноби Мелеховни чақиргани келувдим. У киши дарҳол офицерлар уйига боришилари керак экан.

— У қош қорайгандәёқ ўша ёққа кетган эди-ку.

— Борди, лекин у ердан чиқиб кетди.

Прохор секин ҳуштак чалиб қўйиб, каравотда ўтирган уй эгасига кўз қисди.

— Тушундингми, бува? Демак, жононникига қараб қийшайибди... Сен боравер, аскар бола, мен уни қидириб топаману, иссиғида қўлларингга топшираман.

Прохор отларни суғориш ва емини бериб қўйиши чолга топшириб, ўзи Аксинъянинг холасиникига кетди.

Бутун станица қоп-қоронғи тун оғушида ухлар эди. Доннинг нариги бетида булбуллар бир-бирини чақириб сайрашарди. Прохор секин-аста юриб, таниш уйга етди-да, даҳлизга кириб, энди эшик тутқичидан ушлаганда, Степаннинг йўғон товушини эшишиб қолди. «Буниси ғалати бўлди-ю! — ўйланиб қолди Прохор.— Нега келдинг деб сўраса, нима дейман? Кел, бўлганича бўлди, бошга тушгандан кейин илож йўқ! Самогон қидириб юрувдим, қўшнилар шу уйни кўрсатишиди дейман-да».

Прохор шу қарорга келиб, дадиллик билан меҳмонхонага қадам қўйди-ю ҳанг-манг бўлиб, оғзи очилганича қотиб қолди: дастурхон тепасида Астахов билан Григорий, орада ҳеч гап ўтмагандай, ёнма-ён ўтиришиб кўкимтири лойқа самогонни бемалол шимиришарди.

Степан Прохорни кўриб зўрма-зўраки илжайди:

— Сўрашмай-нетмай, нега оғзингни очиб қаққаниб турибсан? Е кўзингга жин-пин кўринидими?

— Жин ҳам гапми...— деди ҳали ҳам ўзига келмаган Прохор бир оёғини қўйиб, иккинчисини босиб.

— Қани, кўрқмасдан келавер, ўтиришиб деб таклиф этди Степан.

— Кошки ўтиришга вақтим бўлса... Мен сени обкетгани келдим, Григорий Пантелеевич. Ҳозир генерал Секретов ёнига боришинг керак.

Григорий Прохор келмасдан олдин ўзи ҳам бир неча марта кетишига ҳаракат қилиб кўрган эди. У стакан-

ни нари суриб, ўрнидан турди, бироқ шу топда кетадиган бўлса, Степан, қўрқоқлик қилиб кетиб қолди, дейиши мумкинлигини ўйлаб яна ўтириди. Орияти кучлилик қилиб Аксинъяни Степанга қолдириб кетишга бўйни ёр бермасди. У устма-уст ичар, бироқ самогон сира кор қилмасди. У ҳушёрлик билан ақл югуртириб кўриб, аросатда қолганлигини тушунар, охири нима бўлишини кутарди. Боя Аксинъя унинг соғлифи учун ичганда, назарида, Степан хотинини урворадигандай бўлиб кўринган эди. Бироқ Степан қўлини кўтариб, ғадир-будур кафти билан офтоб олган пешонасини силаб қўя қолганди, бирпастдан сўнг Аксинъяга завқ билан тикилиб: «Баракалла, хотин! Мардлигинг учун сени севаман-да!» деган эди.

Сўнгра Прохор кириб қолди.

Григорий ўйланиб, туриб кетмасликка аҳд қилди, Степаннинг гапини охиригача эшишмоқчи бўлди.

— Сен ўша ерга бориб: «тополмадим» деб қўя қол. Тушундингми?— деди Прохорга.

— Тушунишга тушундиму, лекин ўзинг борсанг яхши бўларди, Григорий Пантелеевич.

— Гап қайтарма! Қани, бор.

Прохор энди эшик томон қадам қўйганда бирданига Аксинъя орага тушди. У Григорийга қарамасдан совуққина қилиб:

— Йўқ, Григорий Пантелеевич, яхши эмас, сиз ҳам бирга бора қолинг!— деди.— Бизни ўйқлаб келганингиз, борини баҳам кўриб биз билан шунчалик ўтирганингиз учун раҳмат... Кошки, вақт эрта бўлса: хўроз икки чақирди. Ҳадемай тонг отади, Степан билан эрта тонгда туриб уйга жўнашимиз керак... Ароқниям беармон ичдиларинг. Етар энди!

Григорий ўрнидан турди, Степан «ўтири-ўтири» ҳам демади. У хайрлашаётуб, кетар жафосига бир нима демоқчи бўлгандай, Григорийнинг қўлини муздай кафтида бирпас ушлаб турди-ю, бироқ гапиролмади, Григорий эшикка етгунча кетидан индамай тикилиб турди-да, тагида қитдай ароқ қолган шишага секингина қўл чўзди...

Кўчага чиқар-чиқмас, Григорийнинг бутун вужуди зилдай оғирлашиб кетди. Оёқларини зўрба-зўр босиб,

биринчи чорраҳага аранг етиб олди-да, соядай изма-из келаётган Прохордан илтимос қилди:

— Сен бориб отларни әгарлагину, дарров олиб келгин. Мен бу аҳволда етолмайман...

— Келяпти, деб уларга хабар берсаммикин?

— Йўқ.

— Бўлмаса, кутиб тур, мен оёқни қўлга олиб дарров келаман!

Ҳамиша имиллаб юрадиган Прохор бу гал отдай югуриб қўшхонага кетди.

Григорий четан девор тагига ўтириб папирос тутатди. Степан билан учрашиш тафсилотини кўз олдига келтириб, пинагини бузмай: «Мана энди ҳамма сир унга ошкор бўлди. Ишқилиб, Аксинъяни урмаса гўргайди» деб ўйлади. Ниҳоят, бир ёқдан чарчаганлиги, бир ёқдан қаттиқ ҳаяжонланганлиги кор қилиб, ёнбошлишга мажбур бўлди. Уни мудроқ босди.

Кўп ўтмай Прохор отларни олиб келди.

Паром билан Дондан ўтиб олгандан кейин отларни қаттиқ чоптириб кетишиди.

Тонг ёришган маҳалда иккиси Татарекка киришди. Үз дарвозаси олдида Григорий отдан тушиб, тизгинни Прохорга тутқизганича, ҳаяжонланиб, шоша-пиша уйга кирди.

Наталья ич кўйлакда, нимагадир, даҳлизга чиқди. Григорийни кўрган заҳоти қўзлари шу қадар севинчга тўлиб чарақлаб кетдики, буни кўрган Григорийнинг юраги шиф этиб, бирданига қўзлари жиққа ёшга тўлди. Наталья ўзининг яккаю ягона умр йўлдошини маҳкам қучоқлар, бутун вужуди билан унга ёпишар эди. Унинг кифтлари қалт-қалт этганидан Григорий хотини йиғлаётганини пайқади.

У уйга кириб, чол билан кампирни ҳамда ухлаб ётган болаларини бир бошдан ўпиди чиққандан кейин емакхонанинг ўртасида тўхтади.

— Қалай, бир амаллаб чидадингларми? Ҳеч гап бўлгани йўқми?— деб сўради Григорий азбаройи ҳаяжонланганидан энтикиб.

— Худога шукур, болам. Қўрқишига қўрқдик-ку, лекин унчалик жабр-зулм кўрмадик.— Ильинична шоша-пиша жавоб берди-да, қўзлари қизарган На-

тальяга хўмрайиб қараб:— Суюниш керак, эси паст, сен бўлса йиглаб юрибсан!— деб бақирди.— Бекордан-бекор тураверасанми ахир! Ўтин обкелиб печни ёқиш керак....

Кампир билан Наталья шошилишиб нонушта тайёрлашга киришдилар, Пантелей Прокофьевич ўғли учун тоза сочиқ олиб чиқди.

— Мен сув қуйиб турай, сен ювиниб ол, болам. Бошинг муздай бўлиб, анча енгил тортасан... Оғзингдан ароқ ҳиди келяпти. Кеча хурсандчиликка роса ичгандирсан, а?

— Ичганим рост. Фақат хурсандчиликками ё хафачиликками, у ёфи маълуммас...

— Нега ундаи дейсан?— деб сўради чол ҳайрон бўлиб.

— Секретов бутун ғазабини бизга сочяпти.

— Хафа бўлма, ҳеч бокиси йўқ. Айтгандай, у ҳам сенминам ичишдими, а?

— Ҳа.

— Вой тавия-эй! Иззатинг жойида-ку, Гришка? Ҳақиқий генералминам ёнма-ён ўтирибсан-да! Ошиғинг олчи, болам?— Пантелей Прокофьевич кўзларини жавдиратиб ўғлига тикилар, кўнгли ийиб кетганлигидан завқ билан тилини тақиллатарди.

Григорий илжайди. Бечора чолнинг лақмалигига, бекорга ҳовлиққанига энсаси қотарди.

Григорий шошилмай, мол-жон омонми, қанча дон қўлдан кетди, деб суринтираётиб, дадасининг рўзгор ишларига илгаригидай қизиқмаганини пайқади. Чолнинг мияси аллақандай бир муҳим нарса билан банд, кўнгли хижил эди.

Пантелей Прокофьевич дардини яшира олмасдан:

— Бу ёфи нима бўлади энди, Гришенька? Яна хизматга бориладими, а?— деб сўраб қолди.

— Ким тўғрисида сўраяпсан ўзинг?

— Қариялар тўғрисида. Масалан, мен...

— Ҳозирча маълуммас.

— Мундан чиқди, қутулиш йўқ, дегин?

— Сен бормасанг ҳам бўлади.

— Ростданми?— деб суюнганидан қичқириб

юборди Пантелей Прокофьевич. У емакхонада у ёқдан бу ёққа диканглаб юра бошлади.

— Жимгина ўтиранг-чи ахир, маймоқ! Уйни чангитиб юбординг-ку!— деб бақирди Ильинична.— Ўзингдан-ўзинг худди кучук боладай суюниб ирғишлайсан холос!

Лекин чол хотинининг бақирганига парво қилмасдан стол билан пеъя орасида мокидай бориб келар, қўлларини ишқалаб илжаярди, холос. Бирданига шубҳаланиб:

— Мени хизматдан озод қилишга ҳақинг борми ўзи?— деб сўраб қолди.

— Албатта, ҳақим бор.

— Қоғоз ёзиб берасанми?

— Бўлмаса-чи.

Чол бирпас иккиланиб турди-да, ниҳоят:

— Печатсиз қофоз қалай бўларкин? Ёнингда печатинг йўқ... Ёки печатсиз ҳам ўтаверармикин?— деб сўради.

— Печатсиз ўтаверади!— деб кулди Григорий.

— Ундей бўлса, масала ҳал!— чолнинг чеҳраси яна очилиб кетди.— Илойим парвардиғор умрингни узоқ қилсин! Хўш, ўзинг қачон жўнамоқчисан?

— Эртага.

— Сенинг қисмларинг олдин кетгандир? Усть-Медведицага борасанми?

— Ҳа. Сен кўп хавотир бўлаверма, дада. Сенга ўхаш қарияларга яқинда бутунлай жавоб берамиз. Қариялар ўз бурчини адo этди, ҳаммаси уй-уйига кетади.

— Илойим айтганинг келсин!— Пантелей Прокофьевич чўқиниб олди. Энди у бутунлай хотиржам бўлган эди.

Болалар уйғонди. Григорий уларни тиззасига ўтқазиб, гоҳ унисини, гоҳ бунисини ўпар, териларига сифмай бидир-бидир қилиб гапиришларига кулимсираб қулоқ солар, соchlарини ҳидларди.

Соч ҳам шу қадар хушбўй бўладими! Бу соchlардан офтоб билан кўкат, илимиқ ёстиқ ҳиди, кўнглига жуда-жуда ёқадиган яна аллақандай бир нарсанинг ҳиди келади. Ўз пушткамаридан бўлган шу гўдаклар

эса, худди даштда энди учирма бўлган паррандаларга ўхшайди. Қоп-қора дағал қўллар бу жўжаларни қу-чоқлагани сира қовушмасди. Тинчгина оиласда бу ҳарбий киши, отда тушган бир кунлик қўноқ, етти ёт бегонадай қўринарди: унинг аъзойи баданига солдатларга хос бадбўй ис, олис йўл босган отнинг қўланса тер ҳиди, қайиш-абзалларнинг сассифи уриб қолган эди.

Григорийнинг кўзлари ёшланиб, парда босгандай хиралашди, лаблари қалт-қалт қилиб титрай бошлиди... Дадаси уч марта гап сўраганда ҳам у чурқ этмади, фақат Наталья енгидан тортгандан кейингина стол ёнига борди.

Йўқ, йўқ, Григорий бутунлай ўзгариб кетган эди. Илгари у бу қадар кўнгли бўш, нозик табиат эмасди, ҳатто болалик чоғида ҳам, аҳён-аҳёнда бир йифламаса, йиғи нималигини билмасди. Ҳозир эса кўзидан тирқираб ёш келар, юраги дукиллаб тез-тез урар ва назарида, томогига гўё бир нарса тиқилиб қолгандай эди... Сабаби нима экан? Бугун кечаси у кўп ичиб, тонг отгунча ухлай олмаган эди, ким билсин, балки шунинг учундир...

Сигирни подага ҳайдаб кетган Дарья ҳам қайтиб келди. У илжайган лабини Григорийга тутди, Григорий ҳазил аралаш хушомад билан мўйловини силаб ўпмоқчи бўлганда, у кўзларини юмиб олди. Григорий Дарьянинг киприклари худди шамол ўйнатгандай пир-пираб кетганини кўрди, гуллаб турган бетларига сурилган мой-упанинг чучмал ҳиди ўша заҳоти димоғига урилди.

Аммо Дарья боягисидай эди. Кўринишига қаралса: уни ҳеч қандай ғам буқолмайди, бир мўйини хам қилмайди, деб ўйлаш мумкин эди. Оламни сув босса, тўпифига чиқмасди; хипча бел, чиройли эди.

— Гулдай очилибсанми?— деб сўради Григорий.

— Йўл бўйидаги мингдевонадай!— деди Дарья ўт чақнаган кўзларини қисиб, тўлган ойдай жилмайиб. Рўмол тагидан чиқиб қолган соchlарини тузатиб, пардоз қилиб олиш учун дарҳол ойна ёнига кетди.

Дарьянинг бўлган-тургани шу, уни йўлга соламан, деган одам бекорга овора бўларди. Худди Петронинг

ўлишини кутиб тургандай, азадан боши чиқар-чиқмас, ҳаётга ҳирс қўйиб, ўзига баттар зеб берадиган бўлиб олган эди.

Омборхонада ухлаб ётган Дуняшкани уйғотишди. Бутун оила жам бўлиб чўқинди-да, стол ёнига ўтирди.

— Вой, акажон, анча қариб қопсану!— деди Дуняшка ачиниб.— Ёввойи одамга ўхшаб, бирам хуннинг чиқибдик!

Григорий стол оша унга индамасдан безрайиб қараб турди-да, ниҳоят:

— Одам қариса хунуги чиқади, қиз етилса, эрга тегади...—деди.—Лекин қулогингда бўлсин: бугундан бошлаб Мишка Кошевойнинг номини тилга олмайсан. Шунча гапдан кейин яна ўшани деб куйиб-пишадиган бўлсанг, бир оёғингни босиб туриб, бир оёғингдан ушлаб, бутингни йириб ташлайман. Тушундингми?

Дуняшка лоладай қизариб кетди, ўртаниб, кўз ёшлиари орасидан акасига боқди.

Бироқ Григорий ғазабнок кўзларини синглисидан олмасди: мўйлов остидан иржайиб турган тишлари-ю, қисиқ кўзлари ва умуман, сержаҳл башарасида Мелеховлар зотига ота мерос бўлган ваҳшийлик акс этарди.

Лекин Дуняшка ҳам шу жинсдан эди, хижолатдан ўзини ўнглаб олгандан кейин дангалига жавоб қайтарди:

— Юракка амр қилиб бўлмайди! Шуни биласизми, акажон?

— Амрингга бўйсунмайдиган юракни суғуриб олиб ташлаш керак,— деди Григорий совуққина қилиб.

«Эй, болам, ҳамма гапирсаям бу тўғрида сен гапир масанг бўларди...»— деди Ильинична ўзича хаёл суриб.

Бироқ гап шу ерга етганда Пантелеј Прокофьевич, томдан тараша тушгандай қилиб, столни уриб бақирди:

— Тилингни тий, ҳой қизалоқ! Бошингга солиб қоламан шу, юрагинг тугул, соchlарингдан битта қолмайди. Вой, манжалақи-е! Ҳозир бориб чилвири обке-лайми шу...

Дарья содда муғомбирлик билан чолнинг гапини бўлди:

— Дадажон! Қўрада биронта чилвир қолгани йўқ. Ҳаммасини обкетишиди!

Пантелей Прокофьевич келинига ўқрайиб қўйдида, кекирдагини чўзиб, заҳрини сочди:

— ...Айилни олволганимдан кейин ҳамма ёғингни моматалоқ қилиб ташлайман шу...

— Айилларни ҳам қизиллар обкетишиди!— Овозини баландроқ чиқариб яна аралашди Дарья; у ҳали ҳам қайнатасидан кўзини олмай соддадиллик билан тикилиб турарди.

Дарьянинг бу гапи Пантелей Прокофьевичга ханжардай қадалди. Чол ғазаби қайнаганидан қизариб бўзариб, сувдан чиқсан балиқдай оғзини каппа-каппа очиб, келинига бирпас индамай тикилганича қотиб қолди, сўнгра овози борича хириллаб:

— Овозингни ўчир, лаънати, тилингга куйдирги чиққур!— деб бақирди.— Оғиз очгани қўйишмайди-я! Бу қандай гап ахир? Сен-чи, Дунька, хомтама бўлма: бу ишга ҳеч қачон йўл қўймаймиз! Отангнинг гапи битта! Григорий тўғри айтади: шундай абраҳими ўйлайдиган бўлсанг, сени ўлдирамизу қутуламиз-қўямиз. Иssiқ-совуқ қилиб бошингни айлантириб қўйибди. Қелиб-келиб бир абраҳима ишқи тушибди-я! Ахир унинг нимаси одам? Шундай худодан қайтган иблисни куёв қиласманми, а? Кўзимга кўринса, ўз қўлим билан бўғиб ўлдираман! Қани, яна оғзингни очиб кўр-чи, таёқни олволиб дабдалангни...

— Қўрада таёқ тугул қоққани қозиқ ҳам қолгани йўқ,— деб хўрсинди Ильинична!— Қўрани бошдан оёқ айланиб чиқсанг, лоақал тутантириққа арзийдиган биронта чўп тополмайсан. Ёмон кунга қолдик, шўри-миз қурсин!

Бироқ Пантелей Прокофьевич бу оддий гапни ҳам тескари тушунди. Қўзларини чақчайтириб хотинига бир қаради-ю, худди жинни бўлган одамдай, юргурганича уйдан чиқиб кетди.

Григорий қўлидаги қошиқни ташлаб, юзини сочиқ билан тўсганича ўзини тўхтатолмай, қотиб-қотиб кулди. У энди жаҳлидан тушиб шу қадар яйраб куларди-

ки, яқин-орада унинг бунчалик кулганини ҳеч ким кўрмаган эди. Дуняшкадан бошқа ҳамма куларди. Ўй ичи шодликка тўлган эди. Бироқ зинапоядан Пантелей Прокофьевичнинг оёқ товуши эшитилиши билан ҳаммаси бирданига жиддийлашиб қолди. Чол узун бир таёқни судраганича қуюндай бостириб уйга кирди.

— Мана! Мана! Ҳаммангга шу таёқ кифоя, тили бурро лаънатилар! Сочи узун алвастилар!.. Таёқ йўқми? Манави нима? Сениям соғ қўймасман, жодугар кампир! Ҳаммангга кўрсатиб қўяман ҳали!..

Таёқ узунлик қилиб емакхонага сиғмади, қозонга тегиб кетиб, уни ағдариб юборди, чол таёқни даҳлизга улоқтириди-да, энтика-энтика, стол ёнига келиб ўтирди.

Пантелей Прокофьевичнинг таъби хира бўлган эди. У чурқ этмас, пишиллаб овқат тушира кетди. Дарья бўлса, кулиб юборишидан қўрқиб, столдан бошини кўтармасди. Ильинична уҳ тортар ва эшитилар-эшитилмас: «Ё парвардигор! Тавба қилдим! Гуноҳкор бандангиз, ўзинг кечиргайсан!» деб пичирларди. Ёлғиз Дуняшканинг кўнглига кулги сиғмас, Наталья ҳали чол йўқлигига зўрма-эўраки жилмайган бўлса-да, ҳозир яна хаёлга чўмиб, қовогини солиб олган эди.

Пантелей Прокофьевич аҳён-аҳёнда:

— Туз обкл! Нон! — деб ўшқирап, кўзларини ўқрайтириб, ҳаммага бир бошдан қараб чиқарди.

Оилада рўй берган харҳаша тўсатдан тугади-қолди. Ҳамма сукутга кетганда Мишатка бобосини гап билан боплади. Ўйда жанжал чиқадиган бўлса, кўпинча бувиси бобосини қарғаб, ҳар хил ёмон сўзлар билан сўкар ва буни бола эшитарди; бугун ҳам у бобосининг уйни бошига кўтариб бақиргани ва ҳаммани урмоқчи бўлиб юргурганига жаҳли чиқиб, бурни чимирилиб кетди-да, жингиллаб чинқириди:

— Яна тўполон қиляпсанми, чўлоқ ўлгур? Бoshингга сўйилминам солиб қоламан, шу менминам бувимни асти қўрқитмайдиган бўласан!...

— Ҳали сен ўз бувангни урмоқчимисан... мени-я?

— Сени!— қўрқмасдан жавоб қайтарди, Мишатка.

— Бу қанақаси... Ўз бувасига шундай дейиш мумкинми?

— Буваман деб бақираверасанми ахир?

— Шумтаканинг гапини эшитяпсизми?— Пантелей Прокофьевич соқолини силаб, ҳаммага бирма-бир қараб чиқди.— Бу гаплар сендан чиқади, жодугар кампир, сендан эшитган! Сен ўргатгансан!

— Оббо, ким ўргатарди? Неваранг нақ ўзингга ўхшаган, дадасига тортган!— деб ўзини оқламоқчи бўларди Ильинична аччиғланиб.

Наталья тура солиб:

— Бувангга ундаи дема! Ундаи дема!— деб Мишаткани тарсакилади.

Мишатка Григорийнинг тиззасига юзини қўйиб ҳўнграб юборди. Невара деганда жонини аямайдиган Пантелей Прокофьевич кўзлари ёшга тўлиб, иргиб ўрнидан турди-ю соқолидан томчилаб оққан кўз ёшлигини артмасдан, севинчини ичига сиғдиролмай:

— Гришка! Ўғлим! Қампир рост айтди! Ўзимизга тортибди!— деб бақирди.— Томирида Мелеховлар қони бор!.. Зоти Мелеховлардан эканини ҳозир исбот қилди! Бу бола ҳеч кимдан тап тортмайдиган бўлади, мана кўрасиз!.. Қўзичофим! Эркатойим!.. Мана, мени ур, йўқ, чолни ур! Нимаминар ургинг келса, уравур, майлига!.. Соқолимдан торт!..— Чол неварасини Григорийнинг қўлидан олиб, бош устида баланд кўтарди.

Нонушта қилиб бўлгач, ҳаммаси турди. Аёллар идиш-товоқ ювишга тутинди, Пантелей Прокофьевич тамаки тутатди, сўнгра Григорийга мурожаат қилиб:

— Бир ҳисобда сен меҳмонимизсан, озиб-ёзиб бир келганингда сени ишга селиш тўғри эмас, бироқ илож йўқ,— деди.— Қарашиб юборсанг, четанларни тиклаб, ғарам жойни ўраб олардим, ҳаммаси қулаб ётибди, қўшнилардан бирортасини чақира қолай десам, ё келади, ё йўқ. Ҳамманики қулаган, синган, бир-биридан баттар...

Григорий бажону дил унинг гапига кўнди; отабола тушгача қўрада четан деворнинг шикаст-рехтини тузатиш билан овора бўлишди.

Боғчада поя қадаётib чол сўради:

— Яқинда пичан ўриш бошланади, қўшимча пичан сотиб олсаммикан ё керакмасми, ҳайронман. Сен

нимадейсан? Шунга ҳаракат қилсам тузук бўлармикин? Бир ойдан кейин тағин қизиллар қайтиб келиб, ҳаммасини ҳаромга чиқарса-я?

— Мен билолмадим, дада,— деб Григорий ростини айтди-қўйди.— Кети нима бўлишини, ким кимни енгишини билмайман. Борига қаноат қилавер; қўрада ҳам, омборхонада ҳам ортиқча нарса бўлмасин. Ҳозирги замонда дунё орттиришнинг ҳеч кераги йўқ. Қудангни кўрдинг-ку: умр бўйи ўзи ҳам тинмади, бошқаларни ҳам тинч қўймади: ундан юлиб, мундан юлиб ит азобида йиққан дунёсидан нима қолди? Куйган тўсинлари, холос!

Пантелей Прокофьевич хўрсинди ва ўғлининг гапига қўшилиб:

— Мен ҳам шу ёгини ўйлайман, болам, — деди.

Шундан кейин чол рўзғор тўғрисида оғиз очмади. Фақат чоштгоҳдан кейин Григорийнинг ғарам дарвозасини астойдил маҳкамлаётганини кўриб ўғлига ғаши келиб, алам қилгандай гапирди:

— Нимасига мунча уринасан? Бир амаллаб илинса бўлди-да. Барибир умрбод турмайди-

Чол, турмушни қадимги изга солмоқчи бўлиб шу вақтгача қилган ҳаракатлари зое кетганини энди тушунганди...

Кун ботар маҳалида Григорий ишни йиғиштириб уйга кирди. Меҳмонхонада Натальядан бошқа хеч ким йўқ эди. У байрамдагидай ясаниб олганди. Жундан тўқилган кўк юбка билан енгига тўр тутилган ва кўксига гул тикилган ҳаво ранг поплин кофтаси ўзига ниҳоятда ярашарди. Икки бети олмадай қизариб турар, совунлаб ювингани учун йилтиради. У сандиқни титиб, алланима қидиради, бироқ Григорийни қўриши билан сандиқ қопқоғини ёпди-да, жилмайиб қаддини ростлади.

Григорий сандиқ устига ўтириб:

— Бирпас ёнимда ўтиргин, эртага жўнаб кетсам, гаплашолмаймиз ҳам,—деди.

Наталья итоаткорлик билан эрининг ёнига келиб ўтиради, қўрқа-писа, унга кўз қирини ташлади. Григорий дабдурустдан хотинининг қўлини қўлига олиб силай бошлади, эркалатиб:

— Бирам силлиқсанки, касал бўлганинг сира билинмайди,— деб қўйди.

— Анча тузалиб қолдим... Хотин кишининг жони мушукникиданам қаттиқ бўлади,—деди-да, Наталья билинар-билинмас жилмайиб бошини энгаштириди.

Унинг майин тук босган қулоқ солинчоғига, сочлари срасидан сарғайиб кўринган гарданига Григорийнинг кўзи тушиб қолди.

— Сочинг тўкиляптими?— деб сўради.

— Ҳаммаси тўкилиб тушяпти. Туллаяпман, яқинда тепакал бўламан шекилли.

— Сочингни устара билан қириб ташлайми?— тўсатдан таклиф этди Григорий.

— Йўғ-е!— Наталья чўчиб тушди.— Биратўла кал бўлиб қолмайин тағин!

— Сочингни олдириш керак, олдирмасанг ўсмайди.

Наталья уялинқираб илжайди:

— Ойим қайчиминам обқўймоқчи эди,— деди-да, синкаланган оппоқ қордай рўмолини эпчиллик билан бошига солди.

Мана, кўз очиб кўрган хотини, Мишатка билан Полюшанинг онаси пинжига кириб ўтирибди. Шу эрнинг кўнгли учун ювениб-таранганд, ясанган. Қасалдан кейин сочи тўкилиб хунуги чиққанлигини яшириш учун рўмолга ўраниб, бошини сал-пал ёнига этиб, мусоғирлар сингари жимгина ўтирибди; сиртдан хунук кўринса ҳам аслида ниҳоятда хушрў, руҳан гўзал ва покиза. Бўйнидаги тиртигини яшириш учун у доим баланд ёқалик кўйлак кияди. Ҳаммасига шу эр сабаб... Бирданига Григорийнинг ҳислари жўш уриб, Натальяга юраги ачиб кетди. Уни эркалатиш, кўнглини кўтариш учун бир нима демоқчи бўлди-ю, бироқ шунга лойиқ сўз тополмади-да, индамай хотинини бағрига босиб, оппоқ пешонасидан, фамгин кўзларидан ўпди.

Йўқ, илгари уни сира эркалатган эмасди. Натальяниг ўрнини Аксинья эгаллаб олган эди.

Эрининг бу қадар меҳрибонлигидан қаттиқ таъсирланган Наталья унинг қўлини оҳиста лабларига олиб борди.

Иккиси чурқ этмай ўтиради. Ботаётган қуёш қипқизил нурларини меҳмонхонага сочган эди. Зинапоя

томонда болалар чуғурлашарди. Дарьянинг тарақтуруқ қилиб қиздирилган сопол кўзачаларни пеҷдан олаётгани ва қайнанасига зарда билан: «Ойи дейман, сигирларни вақтида соғмабсиз ҳам. Қари сигирнинг сути камайиб кетибди...»— деб пўнғиллагани эшитирларди.

Даладан пода қайтди. Сигирлар маърашар, болалар қилдан ўрилган қамчиларини қарсллатишарди. Буқа хирилдоқ товуш билан калта-калта бўкирарди. Унинг баҳмалсимон тўшини, тирсиллаган сағрисини сўна чақиб қонатиб юборган эди. Буқа даҳшат билан бош чайқатарди; кета туриб тарвайған қалта шохига Астаховнинг четанини илиб олиб, ағдариб ташлади-да, яна кетаверди. Наталья деразадан қараб:

— Буқа ҳам Доннинг нариги бетига қочиб кетган эди. Ойимдан эшиздим: қишлоқда қасира-қусур бошланишиминам у оғилхонадан чиқибди-ю, Дондан сузуб ўтиб, ўша ёқда жон сақлаб юраверибди,— деди.

Григорий хаёл сурар, индамасди. Натальянинг кўзлари нега мунчалик ғамгин? Кўзлари аллақандай бир сирни яшираётганга ўхшайди: ялт этади-ю, дарҳол сўнади. Кўзларигина эмас, ўзи ҳам ғамгин, ҳатто шодлик пайтларида ҳам чеҳраси очилмас, нималигини билиб бўлмасди... Балки у эрининг Аксинья билан Вешенскаяда учрашганини эшифтандир? Григорий:

— Бугун нега мунчалик қовоғинг солиқ? Юрагингда нима дардинг бор, Наташа? Бундоқ ёрилиб айта қолсанг бўлмайдими, а?— деб сўраб қолди.

У энди кўз ёши, гинахонлик бошланади деб кутган эди.... Бироқ Наталья чўчиб тушиб:

— Йўқ, йўқ, сенга шундай кўрингандир, ҳеч гап йўқ...— деди.— Ҳали унчалик тузалганим ҳам йўқ. Бошним айланади, энгашсам ё бир нима кўтарсам, кўзим тинади.

Григорий синчиклаб тикилди-да, яна сўради:

— Мен йўғимда қийналмадингми?.. Биронтаси сенга қўл теккизмадими?

— Йўқ, худо сақласин! Мен ахир касалдан бош кўтармай ётган эдим-ку.— Бу гал у Григорийнинг кўзига рўй-рост тикилди, ҳатто сал-пал жилмайиб ҳам

қўйди. Бир оз ўйланиб туриб сўради:—Эртага барвақт жўнайсанми?

— Тонг ёришганда.

— Кечгача турсанг бўлмайдими?— Наталья ҳали ҳам умидини узолмасдан, юраги дов бермай сўради.

Григорий бош чайқади, Наталья хўрсиниб:

— Айтгандай... погон тақишинг керакми? — деб сўради.

— Тақмасам бўлмас.

— Ундай бўлса, кўйлагингни еч, қоронғи тушмасдан қадаб берайин.

Григорий инқиллаб гимнастёркасини ечди. Кўйлаги ҳали қуримаган эди: орқаси жиққа ҳўл, доғ тушиб қолганди, елкага тақиладиган қайиш ишқалайвериб тақирқилиб қўйган жойлари ҳам тердан йилтираб турарди.

Наталья сандиқдан икки допа ранги ўнгиб кетган кўк погон олиб, Григорийдан сўради.

— Шуми?

— Худди шу. Яшириб қўйганмидинг?

Наталья игнага ип ўтқазаётуб:

— Сандиқминам ерга кўмиб ташловдик,— дедида, чанг босган гимнастёркани яширинча юзига яқин обориб, шўртанг тер ҳидини тўйиб-тўйиб искади...

— Бу нима қилганинг?—деб сўради Григорий ҳайрон бўлиб. Наталья кўзларини ўйнатиб:

— Сени ҳидлаяпман...— деди-ю, юzlари қизарганини яшириш учун ерга қараб олиб, чеварлик билан погонни қадай бошлади.

Григорий гимнастёркасини кийди, қовоғини солиб, кифтларини қимирлатиб кўрди.

— Сенга жудаям ярашди!— деди Наталья эрига завқ билан тикилиб.

Бироқ у бошини чап томонга буриб кифтидаги погонга кўз қирини ташлади-ю, хўрсиниб қўйди:

— Кўзимга балодай кўринади. Сен барибир тушунмайсан!

Эру хотин меҳмонхонада қўл ушлашиб, ҳар қайсиси ўз ўйи билан банд бўлган ҳолда, сандиқ устида узоқ ўтиришди.

Сўнгра, қош қорайиб иморатларнинг бинафашсимон сояси муздай ер юзига ёйила бошлаганда

ўринларидан туриб овқатлангани емакхонага чиқишиди.

Шундай қилиб, тун ҳам ўтди-кетди. Оппоқ тоңг отгунча осмонда чақмоқ чақнади, олчазорда булбуллар тинмай сайраб чиқди. Григорий уйғонди, анчагача кўзларини очмасдан хушшовоз булбуллар таронасини тинглаб ётди, сўнгра, Натальяни уйғотиб юбормаслик учун оҳиста ўрнидан турди-да, кийиниб қўрага чиқди.

Пантелей Прокофьевич Григорийнинг отига ем еди-раётган эди:

— Донга обтушиб чўмилтириб келайми? — деди чол итоатгўйлик билан.

— Керак эмас, — деди Григорий эрталабки муздай ҳаводан жунжикиб.

— Уйқуга қондингми?

— Қотиб қопман! Булбулларнинг овозидан уйғондим. Кечаси билан сайраб безор қилишиди!

Пантелей Прокофьевич от бошидан тўрвани олиб илжайди:

— Ҳеј, болам, уларнинг сайрашдан бўлак иши йўқ. Баъзан шу паррандачаларга ҳавасим келади... На урушни билишади, на вайронгарчиликни...

Дарвоза олдига Прохор келиб тўхтади. У соқолмўйловини олдирган, қадимги димоги чоғ ва сергап эди. Отини харига боғлаб, Григорийнинг ёнига борди. Эгнидаги сурп кўйлаги яхшилаб дазмолланган, кифтларига яп-яңги погон тақилган эди.

— Сен ҳам погон тақиб олдингми, Григорий Пантелеевич! — деб бақирди у. — Бу зормонда сандиқда ётиб чириб кетмабди ҳам! Минг йил тақсанг ҳам тўзимайди! Ўла-ўлгунингча тақиб юраверасан энди! Ҳали мен хотинимга: «Унча маҳкам тикма, эси паст, сал-пал илинса бас, шамол учирив кетмаса бўлгани!» — дедим. Ҳолимиз ўзингга маълум: асир тушадиган бўлсанг, кимлигингни погондан дарров билиб олишади; ҳарқалай, офицер бўлмасам ҳам старший урядник деган номим бор. «Хўш, фалону пистовон амалдорликни билганингдан кейин, каллангни мундоғ тутиб беришни ҳам билишинг керак!» дейишса нима қиласман? Ўзијам сал-пал илиниб турибди холос, кўрдингми? Кўз кўрсинга!

Ҳақиқатам ҳам Прохорнинг погонлари ингичка ип билан омонатгина тикиб қўйилган эди.

Пантелей Прокофьевич хохолаб кулди. Мош-гуруч соқоллари орасидан бут-бутун оппоқ тишлари йилтираб кўринди.

— Ўлма шоввоз! Бундан чиқди, тўппи тор келганда погонни шартта олиб ташлайман дегин?

— Бўлмаса-чи?— деб кулди Прохор.

Григорий кулимсираб, дадасига қаради:

— Қалай, дада, мен топган вестовой жойидами? Бундай йигит билан қўлга тушмайсан, қўлга тушсанг ҳам дард қолмайсан!

— Ҳей, нимасини айтай, Григорий Пантелеевич... Бугун сен ўлсанг, эртага кетингдан мен бораман,— деб лофт урди Прохор, сўнгра погонини кифтларидан юлиб олди-да, тахламасданоқ чўнтағига солиб қўйди.— Фронтга яқинлашганимизда яна тақиб олиш қочмайди.

Григорий наридан-бери нонушта қилиб, ота-она, бола-чақалари билан хайрлашди.

Ильинична ўғлини ўпиб, астойдил дуо қилди:

— Илоҳо, Биби Марям ўз паноҳида асрасин! Сен-дан бошқа ҳеч киммиз йўқ...

Григорийнинг ўпкаси тўлиб:

— Кузатганда кўз ёши қутлуғ бўлармиш... Хайр энди!— деди-да, от ёнига кетди.

Наталья қайнанасининг қора дуррачасини бошига ташлаб дарвозага чиқди. Болалар унинг этагига ёпишиб олишган эди. Полюшкага хўнграб йиғлар, энтикиб-энтикиб онасига ялинарди:

— Дадам кетмасин! Уни юборма, ойижон! Урушда ҳаммани ўлдиришади! Дадажон, у ёқса борма!

Мишатканинг лаблари қалтирап, лекин йиғламасди. Бола ўзини мардонавор тутиб, синглисини койир эди:

— Ёлғон гапирма, эси паст! Урушда ҳаммаям ўлавермайди!

У бувасининг: «Казаклар ҳеч вақт йиғламайди, казак йиғласа уят бўлади»,— деган гапини сира унумасди. Бироқ, дадаси отига миниб, уни эгар устига олгандан кейин, дадасининг киприклари ёшланганли-

ғини кўриб ҳайрон қолди. Бу гал Мишатка ўзини тутолмади: кўзларидан тирқираб ёш оқа бошлади. Бола юзини дадасининг қайиш тортилган кўксига яшириб, бақириди:

— Керак бўлса бувам бориб урушсин! Бизга зарил қолгани йўқ!.. Сен борма, керакмас!..

Григорий ўғлини оҳиста ерга қўйди-да, кафтининг ёрқаси билан кўзларини артиб, чурқ этмай отга қамчи босди.

Ҳар гал остидаги от шу қадрдон зинапоя олдида туёқлари билан ер ўйиб шартта буриларди-ю, катта-ю кичик йўллардан, из тушмаган йўлсиз даштлардан ўтиб, уни тўғри фронтга, казаклар қўшиғида: «Бир кунда минг фалокат, ҳар қадамда ҳалокат» деб аталган ажал бозорига олиб кетаверарди, бироқ ҳеч қачон Григорий шу ёқимли эрталабки пайтдагидай юраги эзилиб жўнамаган эди.

Григорий от жиловини эгар қошига илиб хомуш борафди: кўнгли ғаш бўлиб, бир нарсани сезаётгандай юраги сиқилар, алланимадан хавотирланарди. Дўнгга етгуңча орқасига қарамади ҳам. Чорраҳада, чанг босган йўл шамол тегирмон томонга бурилган жойда у кетига қаради. Дарвоза олдида ёлғиз Наталья туарарди: унинг қўлидаги қора дуррачани шамол учириб кетгудай бўлиб ҳилпиллатарди.

* * *

Кўм-кўк тубсиз осмон қўйнида сузиб юрган булутларни шамол оппоқ қўпикка ўхшатиб ҳайдаб юарди. Тарам-тарам уфқ чизиги устида ҳаво жимир-жимир қилиб туарарди. Отлар секин-аста йўл босишаарди. Прохор эгар устида чайқалиб мудраб борар эди. Григорий тишини тишига қўйганича, дам-бадам кетига бурилиб қаарарди. Ям-яшил толларнинг учи, илондай буралиб оққан Доннинг кумушдай суви, имиллаб айланяётган шамол тегирмон парраклари анчагача кўриниб турди. Кейин, йўл жанубга бурилди-ю, сойликдаги пайҳоинланган экинзор ортида Дон ҳам, шамол тегирмон ҳам кўринмай қолиб кетди... Григорий саман отнинг маржондай терлаган йилтироқ бўйнига

қаттиқ тикилганича, аллақандай бир күйни ҳуштақ қилиб чалар ва кетига қайрилиб ҳам қарамасди. «Қуриб кетсин, бу уруш! Чир бўйлаб жанглар бўлди, Дон бўйида ҳам, бундан бу ёқ Хоперда, Медведица ва Бузулук томонларда жанг қизийди. Бир ҳисобда қаерда ўқ еб, қаерда отдан қуласанг барибир эмасми?»— деб ўйлар эди у.

IX

Усть-Медведица станицасининг остонасида жанг қизиган эди. Григорий сўқмоқдан Гётман йўлига чиққандан кейин, замбараклар овози барала эшитила бошлади.

Йўлда қолиб кетган нарсалар қизилларнинг шошилинч суратда чекинганидан далолат берарди. Ҳар қадамда икки филдиракли ва тўрт филдиракли аравалар учради. Матвеево қишлоғининг орқасидаги жарда ўқи синган, люлькаси мажақланган тўп ётарди. Олдинги постромкалари ёндамасига чўрт кесилган эди. Жардан яrim чақирим наридаги шўрхок жойда, қуёшда қовжираган қўкатзор ичида аллақанча жангчиларнинг ўлиги ётарди; ҳаммасининг эгнида мош ранг кўйлагу шим, оёқларила нағал пошнали ботинка-ю обмоткалар. Ҳаммаси отлиқ казаклар қиличидан ҳалок бўлган қизил аскарлар эди.

Григорий ўликлар ёнидан ўтаётиб, уларнинг кўйлаклари бутунлай қонга беланиб қотиб қолганига ҳамда ётишига қараб бу ишни казаклардан бошқа ҳеч кўм қўлмаганига ақли етди. Мурдалар ўрилган пичандай қаторлашиб ётарди. Казаклар ёв кетидан қувиб кетгани учунми, негадир, ўликларнинг кийимларини шилиб олишга улгурмаган эдилар.

Дўлана тагида бир казак чалқанчасига тушиб ўлиб ётарди. Унинг оёқлари керилиб қолган, чалворининг икки ёнидаги узун ҳошиялари қизариб кўринарди. Ундан сал нарироқда жигар ранг эски эгар урилган саман отнинг ўлиги ётарди.

Григорий билан Прохорнинг остидаги отлар бир оз чарчади. Отларни ўтлатиб олиш зарур бўлса-да, яқинда жанг майдони бўлган бу ерда Григорийнинг

тўхтагиси келмади. У яна бир чақиримча юриб, чуқурликка тушгандан кейин отини тўхтатди. Сал нарида, тўғонини сув олиб кетган ҳовуз кўринарди. Сувсизликдан қақраб, четлари ёрилиб кетган бу ҳовуз ёнига Прохор етар-етмас, изига қайтди.

— Нима гап?— деб сўради Григорий.

— Борсанг кўрасан.

Григорий отини «чу» деб тўғонга бурди. Сув ўйиб кетган чуқурда бир хотиннинг ўлиги кўринарди. Қўк юбкасининг этаги юзига ёпилган, оёқлари йирилган ҳолда шармандаларча ётарди; сонлари йўғон, болдири офтобда қорайган, тиззаларининг чуқурчаси кўриниб тураг эди. Чап қўли орқасига қайрилиб қолганди.

Григорий шошиб отдан тушди, фуражкасини олдида, энгашиб унинг юбкасини тўғрилаб қўйди. Қорачадан келган бу ёш аёл ўлгандан кейин ҳам чиройини йўқотмаганди. Азоб остида чимирилган қоп-қора қайрилма қошлари тагидан чала юмуқ кўзлари фира-шира йилтиради. Билинار-билинмас иржайган нозик лаблари орасида айқашиб қолган зич тишлари садафдай товланарди. Бир тутам сочи кўкатга қадалиб қолган бетини тўсиб тураг, ажал ўз тамғасини босиб кетган ана шу сап-сариқ бет устида чумолилар ўрмаларди.

— Шундай жононни нобуд қилишибди-я, итдан тарқаганлар!— деди Прохор, секин.

У бирпае индамай қараб турди-да, ғазаб билан тупуринди.

— Мен мунақа... мунақанги абллаҳларни мен шартта отиб ташлардим! Қўй, худо хайр берсин, шу ердан кетайлик! Қараган сари юрагим эзиляпти. Тезроқ кета қолайлик!

— Кўммасдан кетсак, қалай бўларкин,— деб сўради Григорий.

Прохорнинг жаҳли чиқди:

— Биз нима, ҳамма ўликни кўмишнинг кафилини олганмизми? У куни Ягодноеда аллақандай бир чолни кўмдик, бу ерда аёл... Учраган ўликни кўмаман десанг, қўлингда қўл қоладими? Гўрни нимаминам қазийсан? Ерни қиличминан қазиб бўпсан, иссиқдан бир газ жойгача қуриб метинга айланган.

Прохор шу қадар шошардики, узангига оёғини аранг сүқди.

Иккиси яна дўнгга чиқишиди, алланимани ўйлаб келаётган Прохор тўсатдан савол берди:

— Бу дейман, Пантелеевич, қон тўкилаверганминам ер тўярмикин?

— Тўймас.

— Сенинг билишингча, бу уруш яқин орада тугармикин?

— Қачон думимизни туғиши, ўшандаги тугайди.

— Бундай ғалати замонни кўрганмасман, шайтоннинг ови юрадиган бўлди! Бундан кўра тезроқ туғиб қўя қолишиша яхши бўларди. Герман урушида одамлар жўрттага ўз бармоғини ўқса тутиб, яроқсиз бўлволоварди-да, уйига кетаверарди; ҳозир бармоқ тугул қўлинигни тагидан кесиб ташласанг ҳам уйга жавоб беришмайди. Қўли майибларниям аскарликка олишади, чўлоқниям, филайнинам, даббаниям — ҳаммасиниям олишаверади, ишқилиб, оёқда турса бас. Бу аҳволда уруш тугайдими? Буларнинг ҳаммасини қириб таомлаб бўпсан! — деди Прохор умидсизланиб ва ўша заҳоти йўлдан четга чиқиб отдан тушди-ю, ўзидан-ўзи минифиллаб от айилини бўшата бошлади.

* * *

Григорий Усть-Медведицанинг ёнидаги Хованский қишлоғига кечаси кириб борди. З-полк томонидан қўйилган соқчилар қишлоқ четида уни тўхтатишиди, лекин ўз дивизияларининг командирини овозидан таниб қолишиди; Григорийнинг саволига жавобан, дивизия штаби шу қишлоқда эканини, штаб бошлиғи Копилев уни сабрсизланиб кутаётганини гапириб беришиди. Ниҳоятда сергап одам бўлган соқчилар бошлиғи Григорийнинг ёнига бир казакни қўшиб, штабгача кузатиб қўйишни топширди ва пировардида:

— Қизиллар маҳкам ўрнашиб олибди, Григорий Пантелеевич, яқин-орада Усть-Медведицани ололмайдиганга ўхшаймиз,— деди.— У ёғи нима бўлишини билиш қийин... Биздаги кучлар ҳам ҳазилакаммас.

Морозовская томонидан инглиз аскарлари келяпти деган гап бор. Эшитганингиз йўқми?

Григорий отини ҳайдаб:

— Йўқ,— деди.

Штаб жойлашган уйнинг дераза қопқоқлари маҳкам ёпилган эди. Григорий олдин, уйда ҳеч ким бўлмаса керак, деб ўйлади, бироқ коридорга кириши билан ғовур-ғувур овозларни эшитди. Қоронғи тунда келиб бирдан ёруқقا киргани учун кўзлари қамашди, димогига аччиқ маҳорка тутуни урди.

Стол устини қоплаб олган кўкмак тутун орасидан Копилев чиқиб келди-да, суюнганлигидан:

— Бормисан ўзинг? Сени кутавериб кўзимиз тешилди, биродар!— деди.

Григорий ҳамма билан кўришди, шинелу фуражкасини ечиб, стол ёнига борди.

— Роса тутатибсиз! Нафас олиб бўлмайди. Лоакал битта ойнани очиб қўйинглар, мунча қамалиб олмасаларинг?— деди юзларини буриштириб.

Копилевнинг ёнида ўтирган Харлампий Ермаков кулиб:

— Димогимиз битиб қопти, ҳеч нарсани сезмаймиз,— деди-да, тирсаги билан деразанинг бир кўзини синдириб, қопқоқни ланг очиб юборди.

Муздай тун ҳавоси уйга оқиб кирди, чироқ лоп этди-ю, ўчиб қолди.

— Сендақа чаққонга балли! Ойнани нега синдирасан, ахир?— деб ўшқирди Копилев столни тимиристилаб.— Кимда гугурт бор? Эҳтиёт бўл, харита ёнида сиёҳ турибди!

Лампа ёқилди, деразанинг бир табақасини ёпишиди, Копилев шоша-пиша сўзлай бошлади.

— Ҳозирги пайтда, ўртоқ Мелехов, фронтдаги аҳвол қуидагича: қизиллар Усть-Медведицани маҳкам ушлаб туришибди, тахминан тўрт мингга яқин аскар билан уни уч томондан ҳимоя қилишмоқда. Уларда етарли миқдорда тўп ва пулемётлар бор. Монастир ёнида, яна бирмунча жойларда траншеялар қазиб олишган. Дон бўйидаги тепаликлар уларнинг қўлида. Хуллас, мен уларнинг позицияларини жуда мустаҳкам деб мақтамоқчи эмасману, лекин, ҳар ҳол-

да, осонлик билан ишғол этолмасак керак. Биз томонда эса, генерал Фицхалауровнинг дивизияси ҳамда иккита штурмчи офицерлар отряди бор, бундан ташқари, Богатиревнинг Олтинчи бригадаси билан бизнинг Биринчи дивизиямиз етиб келди. Бироқ дивизиямиз состави бутмас; пиёда полк ҳали ҳам йўқ. Усть-Хопер ёнида бўлса керак, отлиқ қисмлар ҳаммаси етиб келди-ю, лекин сотняларда одам сони камайиб кетган.

— Масалан, менинг полкимдаги учинчи сотняда фақат ўттиз саккизта казак қолди,— деди 4-полк командири подхорунжий Дударев.

— Илгари қанча эди?— деб сўради Ермаков.

— Илгари тўқсон битта эди.

— Сотнянинг тарқалиб кетишига нега йўл қўйдинг? Командир ҳам шундай бўладими?— деб сўради Григорий столни чертар экан, хўмрайиб.

— Кошки уларни тўхтатиб бўлса? Ҳеч балодан қўрқишмайди. Уй-уйларидан хабар олгани кетишиди. Энди тўпланишяпти. Мана бугун уч киши келди.

Копилев харитани Григорийнинг олдига суриб, қисмлар жойлашган нуқталарни жимжилоги билан кўрсатди:

— Биз ҳали ҳужумга аралашганимиз йўқ. Фақат кеча Иккинчи полкимиз пиёда саф тортиб, манави участкада ҳужум қилди-ю, бироқ муваффақиятсизликка учради.

— Талафот каттами?

— Полк командирининг рапортига қараганда, кечаги кунда ўлган ва ярадор бўлганлар сони йигирма олтида. Агар кучларни солиштириб кўрадиган бўлсанк, сон жиҳатидан биз устунмиз, бироқ пиёда аскарларимизга ёрдамлашиш, ҳужумни кучайтириш учун пулемёт етишмайди, тўп ўқи танқис. Анавиларнинг таъминот бошлиғи: ўқ-дори келган заҳоти тўрт юз тўп ўқи, бир ярим минг патрон бераман, деб ваъда қилган эди. Қачон кёлади деб кутиб ўтирамизми! Биз ахир эртага ҳужум бошлашимиз керак, генерал Фицхалауровнинг буйруғи шундай. Штурмчиларга мадад бериш учун бир полк аскар ажратасиз, деб талаб этияпти. Улар кеча тўрт марта ҳужумга киришди, лекин кўп

одамлари қирилди. Жон-жаҳдлари билан бирар қаттиқ жанг қилишдик! Шундай қилиб, Фицхалауров ўнг қанотни кучайтириб, бутун кучни бир жойга тўплаб, мана бу ёқдан зарба беришни таклиф этмоқда, кўрдингми? Бу ернинг баланд-пастлигидан фойдаланиб, душман окопларига юз-юз эллик саржин яқинроқ бориб олишимиз мумкин. Айтгандай, унинг адъютанти ҳозиргина жўнаб кетди. У генералнинг оғзаки буйруғини обкелди: сен билан мен жанг планларини мувофиқлаштириш учун чақирилган мажлисга эрталаб соат олтида етиб боришимиз керак. Генерал Фицхалауров ва унинг штаби ҳозир Большой Сенин қишлоғида. Умуман ҳозирги вазифа: Себряково станциясидан қизилларга мадад келгунча, уларни улоқтираб ташлашдан иборат. Доннинг нариги бетида одамларимиз жудаям ивирсиб қолиши... Тўртинчи дивизия Хопер дарёсидан ўтган бўлса ҳам, қизиллар унга қарши кучли отряд чиқариб, темир йўлга ўтказмай маҳкам тўсиб турибди. Ҳозирча улар Донга понтон кўприк қуриб, яроғ-аслача ва ўқ-дориларини шошилинч суратда Усть-Медведицадан ташияпти.

— Қазаклар орасида «иттифоқчилар аскари келяпти» деган гап юрибди, ростми шу?

— Инглизлар бир неча батарея ва танклар юборибди, деб эшитдим, Чернишевскаядан йўлга чиққан эмиш. Бироқ бу ёғи чатоқ: бу танклар Дондан қандай қилиб ўта олади? Менимча, ҳаммаси бекорчи гап? Илгари ҳам шунаقا миш-мишлар кўп бўлган...

Меҳмонхонадагилар узоқ сукутга кетишли.

Коғилев офицерча жигар ранг френчининг тугмаларини ечди, тикандай сариқ жун босган лўппи бетини кафтларига қўйиб хаёлга чўмди-ю, ўчиб қолган патиросини анчагача чайнаб ўтириди. Унинг тугмачага ўхшаш қора кўзлари чарчаганликдан сузилган, тунларни уйқусиз ўтказган учун чиройли юзи латтага ўхшаб қолган эди.

Бир вақтлар у черков қошидаги ибтидоий мактабда муаллимлик қилган эди, якшанба кунларни станицадаги купецларницида меҳмон бўлиб, бойвуччалар билан мушткетди, купецлар билан ҳоли бир пулданга преферанс ўйнарди; гитара чалса ҳаммани

эритарди. Узиям хушчақчақ ва дилкаш йигит эди. Сўнгра ёшгина муаллимага уйланди, замона тинч бўлганда то қаригунича станицада хизмат қилиб бемалол пенсияга чиқарди, бироқ уруш бошланиб, уни ҳарбий хизматга чақиришди. Юнкерлик мактабини тамом қилгандан кейин, Фарбий фронтдаги казаклар полкидан бирига тайинланди. Уруш Қопилевнинг характеристери ва қиёфасини ўзгартиrolмади. Тўладан келган пастак гавдаси, ёқимтой чеҳраси, қилич тақиши, кичик даражадаги кишиларга муомаласидан унинг беозор одамлиги билиниб турар, оддий гражданлардан сира фарқ қилмасди. Ҳатто овозида ҳам командирларга хос кескинлик йўқ, ҳарбийлар сингари ўз фикрини қисқа қилиб ифодалай олмасди; офицерча форма ҳам эгнига ярашмасди, уч йил фронтда юрганига қарамай, ҳарбийча ихчамликка, қаддини тўғри тутишга ўрганолмаган эди. Ўзи урушга адашиб келиб қолган одамга ўхшар, чунки у ҳақиқий офицерга эмас, балки, офицерча форма кийиб олган анчайин обивателга ўхшарди, лекин шунга қарамай, казаклар уни ҳурмат қилишар, штаб мажлисларида унинг сўзини зўр эътибор билан тинглашарди. Қўзғолончиларнинг командир состави эса, зийраклиги, юмшоқ табиатлиги учун, жангда кўп марта ботирлик кўрсатгани учун уни доим қадрлар эди.

Копилевдан илгари Григорийнинг штаб бошлиғи Кружилин эди: у ақли ниҳоятда калта ва саводсиз бир киши эди. Чир бўйидаги жанглардан бирида у ҳалок бўлди, шундан кейин Копилев штабни қабул қилиб олиб, ишни ақл-идрок, устомонлик билан йўлга солиб юбёрди. Бир вақтлар ўқувчиларнинг дафтаридаги хатоларни тузатиш учун узоқ ўтириб ўрганган муаллим энди жанг операцияларини ишлаб чиқиши учун астойдил қадалиб ўтирас, кечалари билан штабда қолиб кетарди; лекин шароит талаб этганда, Григорийнинг бир оғиз гапи билан штабни ташларди-ю, отга минарди, полк командирлигини қабул қилиб, уни жангга бошлар эди.

Григорий олдин янги штаб бошлиғига унчалик инонмаганди, лекин икки ой мобайнида у билан синаяшта бўлиб олди. Бир куни жангдан кейин очишини

айтди: «Илгари мен сенинг тўғрингда ёмон фикрда эдим, Копилев, энди билсам, адашган эканман, мени кечирасан, биродар!»— деди. Копилев кулди, лекин индамади; Григорий узрини қўпол шаклда айтган бўлса-да, унинг боши осмонга етган эди.

Шуҳратпастлик нималигини билмаган, мустаҳкам сиёсий маслакка эга бўлмаган Копилев урушни, юртга келган офат деб тушунар ва унинг тезроқ тугашини кутарди. Мана ҳозир ҳам у Усть-Медведицани эгаллаш операцияси тўғрисида мутлақо бөш қотирмасди, унинг фикри хаёли уйда эди, ўз станицасини, бола-чақасини ўйлар, бир ярим ойлик отпуска олиб уйга жўнасам чаки бўлмасди, деб орзу қиласарди...

Григорий анчагача Копилевга тикилиб қолди, ниҳоят ўрнидан туриб:

— Қани, атаманлик азаматлар, тарқалинг энди, ухлаш керак. Усть-Медведицани қандай оламиз, деб бөш қотирганимизнинг нафи йўқ. Бундан буён биз учун генераллар ўзи ўйлаб ҳал қилаверади. Эртага Фицхалауров олдига борамиз, ақлимиз етмаган жой бўлса ақл ўргатсин, бизга барибир... Иккинчи полк масаласига келганда, менинг фикрим бундай: амалдан тушмай туриб биз ҳозирнинг ўзида полк командири Дударевни бўшатиб, ҳамма даража ва орденларидан маҳрум....

— Бўтқадан ҳам маҳрум қилинсин,— деб гап қотди Ермаков.

— Йўқ, ҳазил кетмайди,— Григорий сўзида давом этди,— шу бугундан эътиборан уни юзбошиликка ўтказиб, ўрнига Харлампийни командир қилиб тайинлаш керак. Ҳозир ўша ёққа жўнайсан, Ермаков, тўғри полкка бориб кутгин, эрталаб бизнинг фармонимиз қўлингга тегади. Дударевни бўшатиш тўғрисида Копилев ҳозир буйруқ ёзиб беради, бирга ола кетасан. Қўриб турибман: Дударев полкни эплолмайди. Ҳеч балога ақли етмайди, яна бир марта казакларни қирғинга рўпара қилмасайди, деб қўрқаман. Пиёда жанг шундай қалтис нарсаки... командир ношуд бўлса, одамлар тутдай тўкилиши ҳеч гапмас.

— Тўғри. Мен ҳам Дударевни бўшатиш тарафдориман,— деб маъқуллади, Копилев.

— Сен нима, Ермаков, қаршимисан? — деб сўради Григорий Ермаковнинг юзи буришганини кўриб.

— Йўқ, менга барибир. Шунчаки қошимни бир чимириб қўйдим, холос!

— Ундаи бўлса, жуда соз. Демак, Ермаков қарши эмас. Унинг суворий полкини Рябчиков олади. Қани, Михайло Григорич, буйруқни ёз, кейин ётиб дамингни ол. Соат олтида йўлга тайёр бўл. Генерал олдига борамиз. Ёнимга тўртта ординарец олволаман.

Копилев ҳайрон бўлиб қошини чимириди:

— Мунча ординарецни нима қиласан?

— Дабдабалироқ бўлади. Биз ҳам ахир, биродар, ҳазилакам одаммасмиз, бутун бошлиқ дивизияга қўмондонлик қиласмиз. Билиб қўйсин-да! — Григорий кулиб кифтларини қимиirlatди, шинелини елкасига ташлаб уйдан чиқди.

У остига от ёпигини тўшаб, бостирма тагида ечин-масданоқ ухлагани ётди. Не вақтгача ординарецларнинг қўрада чукурлашгани, отларнинг пишқиргани, кусирлатиб хашак чайнагани эшитилиб турди. Кундузи қизиган ердан ҳали ҳам иссиқ ҳовур кўтарилар, ҳамма ёқдан қуриган тезак ҳиди келарди. Григорий мудроқ аралаш ординарецларнинг хохолашганини ва шанғиллаб гапиришганларини эшилди: овозига қараганда ёшгина бир йигит от эгарлаётib, уҳ тортиб пўнгилларди:

— Эй, биродарлар, ўлгудай жонимга тегди-да! Яrim кечада пакет оборасан дейди, на ухлагани қўйишади, на дам олгани... Так эй, ҳаром ўлгур! Оёғингни ол деяпман сенга!..

Иккинчи бир казак шамоллаган йўғон овоз билан:

— «Аскарлик хизмати ҳаммани безор қилди, от мингандан йигитлар хор-зор бўлди...» деб хиргойи қилиб туриб бирданига жиддийлик билан тамаки сўраб қолди: — Бир чеким тамакидан чўз, Прошка! Ўзинг ҳам ўлгудай зиқна бўпсан! Белавинда қизил аскарча ботинка берганим эсингдан чиқдими? Сендан бошқа одам бўлганда бу яхшилигимни умрбод унутмасди. Сен абраҳсан! Бир чеким тамаки сўраса, жонинг ҳал-қумингга келади!

Юган сувлиғи шарақлади, от уни тишлари орасига

олиб чайнай бошлади. Отнинг пишиллаб оғир нафас олгани, сўнгра туёқларини шиқиллатиб, тошдай қотиб қолган ерни тарақлатиб жўнагани эшитилди. Григорий кулди, хаёлан: «Ҳамманинг оғзида шу гап... Аскарлик хизмати ҳаммани безор қилди...»,— деган сўзларни такрорлаб туриб, уйқуга кетди. Уйқуга кетиши биланоқ ғалати туш кўрди, (илгари ҳам шу тушни кўрган эди): Ана, экини ўрилган сап-сариқ анғиз бўйлаб қизил аскар цеплари келяпти. Олдинги саф шу қадар кенг ёйилганки, унинг на у чеккасини кўриб бўлади, на бу чеккасини. Унинг кетидан яна олти ё етти саф аскар келяпти. Юракни эзадиган оғир сукунат ичидаги ҳужумчилар тёбора яқинлашмоқда. Орадаги масофа камайган сари одамларнинг қоралари катталашиб, гавдалар аниқ кўринмоқда. Мана энди улар қоқилиб-суқулиб, юришини тезлатиб, мўлжа оладиган жойгача келиб қолишиди; милитиqlарини олға қарата қия ушлаган, қулоқчин кийган одамлар оғизлари очилганича чурқ этмай келишяпти. Григорий саёзгина бир окопча ичидаги ётибди, қўли қалтираб, милитиқ затворини аранг қўмирлатади, устма-уст ўқ узади; қизил аскарларни чалқанчасига қулатаверади. Милитиқка яна бир обойма ўқ жойлаганида ёнидаги окоплардан казаклар сакраб-сакраб чиқаётганини кўради. Казаклар орқага бурилиб қочишади; азбаройи ваҳима босганидан ранглари оқариб кетган. Григорий ўз юрагининг дукуллаб уришини эшигади ва: «Отинглар! Аблаҳлар! Қаёққа?! Тўхта ахир! Қочма!..» деб бақиради. Овози борича чинқириб бақираётган бўлса-да, товуши аранг чиқади. Бирданига ваҳим босади. У ҳам иргиб туради-ю, ўзига қараб тўғри чопиб келаётган ўрта ёшли, қораҷадан келган қизил аскарга ўқ отади бироқ ўқи хато кетади. Қизил аскарнинг ҳаяжонланиб келаётгани, ҳеч нарсадан қайтмаслиги юзидан билиниб туради. Гўёки у, оёғини ерга теккизмасдан, худди қушдай учиб келаётганга ўхшайди; қошлари чимирилган, шинель барлари белига қистирилган, шапкаси энсасига суриб қўйилган. Григорий яқин келиб қолган душманига бир лаҳза тикилиб қолади-да, унинг чақнаган кўзини, оқарган юзини, ўсиб келаётган жингалак соқолини, калта қўнжли кенг этигини,

сал-пал учи энгашган милтиқнинг қорайған учини ва тиғига қадалгаң наиззанинг қадами билан баравар лопиллашини кўради. Григорий даҳшатли аҳволга тушиди; милтиқ затворини тортади, бироқ затвор жойидан қўзғалмайди. Григорий затворни тиззасига уриб кўради, барибир натижага чиқмайди! Қизил аскар бўлса, беш қадам жойда. Григорий кетига бурилади-ю, қочишга туради. Унинг олдидаги шипшийдам далада казаклар подадай тўзиб қочишлоқда. Григорий кетидан қувиб келаётган қизил аскарнинг ҳарсиллаб нафас олишини, тапиллаган оёқ товушини bemalol эшилади, бироқ тез чопомлайди. Мадори қуриган оёқларини илдамроқ босиш учун сўнгги кучини тўплайди. Ниҳоят, аллақандай мудҳиш, ярми вайронга қабристонга етади, қулаган четан деворидан сакраб ўтади, чўкиб қолган гўрлар, қийшайган крест ва сағаналар оралаб чопаверади. Яна бир ҳаракат қилса, қутулгандай бўлади. Лекин кетидан яна тапир-тупур эшитилиб қолади. Ҳаттоқи, қувиб келаётган одамнинг иссиқ нафаси Григорийнинг бўйини куйдираёзади, шу онда душман қўлини чўзиб, шинелининг орқа боғичидан ва этагидан маҳкам ушлаганини сезиб қолади-да, хирилдоқ овоз билан бақириб юборади-ю, уйғониб кетади: У чалқанчасига ётиб қолган эди. Оёқларини этик кисиб, увшутириб қўйганди, пешонасини муздай тер босиб, аъзойи бадани, калтаклангандай, зирқираб оғририди. «Вой касофат-эй!..» деди Григорий хириллаган овоз билан ўз товушидан ўзи суюниб; у шу кўрган-кечиргандарининг ҳаммаси туш эканига ҳали ҳам ишонмасди. Сўнгра, ёнбошига ағдарилди, бошини шинелга буркаб, хаёлан: «У яқинроқ келгунча пойлаб тек туравериш керак эди, яқин келиб, ураман деганда, чап бериб қўндоқ билан уриб ағдариб, иннайкейин, қочсам бўларди...» деб пушаймон еди. Григорий шу тушни иккинчи марта кўрганлигига таажжубланиб, бирпас ўланиб қолди, лекин бунинг ҳаммаси оғир туш эканини, ҳақиқатда эса, ҳозирчалик ўзи учун ҳеч қандай хавф йўқлигини билгач, ниҳоятда суюнди. Григорий яна уйқуга кетаётibi:—«Қизиқ, ўнгимда писанд қилмайдиган нарсадан тушимда нега мунчалик қаттиқ қўрқдим экан? Энг мушқул, энг мудҳиш пайтларни

бошдан кечирганман, бироқ умримда мунчалик қўрқ-
қан эмасдим!» — деб хаёл сурар ва роҳатланиб увш-
ган оёқларини чўзарди.

X

Тонг ёришган маҳалда Копилев уни ўйғотди.

— Тур, жўнайдиган вақт бўлди, ахир! Соат ол-
тига етиб келинг, деб буюрилган.

Штаб бошлиғи ҳозиргина соқолини олиб, этигини
мойлаб, ғижимланган бўлса-да, тоза френчини кийиб
чиққан эди. Шошилганидан бўлса керак, юзини уста-
ра билан икки жойидан кесиб олган эди. Унинг қиё-
фаси ҳам ўзгариб, кўпроқ ихчамликка, совлатига
зеб бергани кўриниб турарди.

Григорий уни бошдан-оёқ синчковлаб қараб чиқиб:
«Жудаям олифта бўп кетибди-ку! Генерал олдига
жўрттага озода бўлиб боряпти..» деган фикрни хаё-
лидан ўтказиб қўйди.

Копилев ҳам унинг фикрини тушунгандай:

— Генерал олдига исқиরтга ўхшаб борсак, уят
бўлар. Сен ҳам у ёқ-бу ёғингни тузатиб ол, мас-
лаҳат шу.

— Шундаям бўлаверади! — деб пўнғиллади Гри-
горий керишиб.— Соат олтига етиб келинсин деб бую-
рилган, дедингми? Сен билан менга ҳалитдан буйруқ
бера бошладими?

Копилев кулиб кифтларини қисди:

— Эски ҳаммом — эски тос. Даражага қаралганда
биз бўйсунишга мажбурмиз. Фицхалауров — генерал,
у бизнинг олдимизга келмайди. Шундай эмасми?

— Шундайликка шундай-ку, бироқ кўра-била
туриб шу аҳволга тушганимизга ҳайронман,— деб,
Григорий ювингани қудуқ томон кетди.

Бека юргурганича уйга кириб тутилмаган сочиқ
олиб чиқди-да, таъзим билан меҳмонга тутди. Григо-
рий муздай сувдан кейин ловиллай бошлаган қизил-
мағиз юзини сочиқ учи билан ишқалаб артди-ю, ёнига
борган Копилевга:

— Шундайликка шундай-ю, бироқ жаноби генерал-
ларимиз ҳам мияни ишлатиб, чуқурроқ ўйлаб кўриши

керак,— деди.— Революциядан бери халқ бутунлай ўзгариб кетди, худди онадан янги туғилгандай ҳис қиласи! Лекин улар ҳалиям эски газ билан ўлчашади. Савил қолгур газлари ҳадемай синиб кетади... Бу генералларинг жудаям оғир карвон. Мияла-рига пича арава мойи қўйиб қўйилса, тузукроқ ўйлай-диган бўларди-да!

Қопилев енгига ёпишган хасни пулаб туширди-да, паришонҳол бўлиб.

— Нима деяпсан ўзинг?— деб сўради.

— Улар бутунлай эски йўлга қайтди, демоқчиман. Масалан мен герман урушида офицерлик даражаси-ни олганман. Мен бу номга қонимни тўкиб эришганман, биродар! Лекин офицерлар орасига аралашиб қолсам борми, худди қишида кўйлакчан кўчага чиққан одамдай шумшайб туравераман. Назаримда, улар-дан совуқ келаётганга ўхшаб аъзойи баданим жунжи-киб кетаверади,— Григорийнинг кўзлари ола-кула бў-либ чақнаб кетди, ўзи сезмасдан қаттиқ гапира бошлади.

Қопилев ранжигандай бўлиб у ёқ-бу ёғига қара-ниб шивирлади:

— Секинроқ гапир, ординарецлар қулоқ солиш-япти.

— Қани айт-чи, сабаби нима?— деб сўради Григорий овозини пасайтириб.— Сабаби шуки, мен қора қарғалар орасида адашиб юрган оқ қарғаман. Уларнинг қўли қўлга ўхшайди, менини эса қадоқ бўлавериб туёққа айланган! Улар оёқларини шипил-латиб юради, мен қаёққа бурилмайин, бирор нарсага илинмасдан илож йўқ. Улардан атир совун, хотинлар сурадиган ҳар хил упа-элик ҳиди келади, мендан бўлса отнинг шиптири тер иси келади. Улар ҳаммаси олим, мен шўрлик бошланғич мактабни аранг тамом-лаганман. Улар мени етти ёт бегона деб билишади. Буларнинг ҳаммасига сабаб нима? Уларнинг олдидан чиқсан, назаримда, юзимга ўргимчак ини ёпишгандай бўлиб, ғашим келади, тезроқ ювингим келиб, ўзим-дан-ўзим жирканаман.— Григорий сочиқни қудук тахтаси устига ташлади-да, бир парча синиқ тароқ билан сочини таради. Офтоб тегмаган оппоқ пешонаси

қизил мағиз юзидан ажралиб турарди. У энди шивирлаб гапира бошлади:— Улар эскилик тамом бўлгани, эски замон яна қайтиб келмаслигини тушунишини исташмайди. Гўёки улар одаму, биз одам эмас, авом халқдан чиққан илмсиз кишини улар ҳайвон қатори кўради. Улар мен ва менга ўхшаш одамларни, ҳарбий ишда ҳеч балони билмайдига чиқариб қўйишган. Хўш, қизилларда кимлар командир? Будённий офицерми? Эски армияда анчайин бир вахмистр бўлган одам. Бош штабдаги генералларнинг адабини берган ўша эмасми? Мақталган офицер полклари унга бардош беролмай, думини хода қилиб қочгани эсингдами? Казак генераллари орасида Гусельшиковдай ботир, донги кетган генерал йўқ, лекин бу йил қишида Усть-Хопердан кўйлакчан қочган ким эди? Биласанми, ким уни шу аҳволга солди? Аллақандай бир москвалик слесарь — анчайин полк командири. Асиrlар аниfinи айтиб беришди. Буни тушуниш керак! Майли, биз илмсиз офицермиз, хўш, қўзголонда казакларга ким бош бўлди, ким уларни йўлга солди? Генераллардан бизга нима ёрдам тегди?

— Анча ёрдам тегди,— тагдор қилиб жавоб берди Копилев.

— Кудинозга ёрдамлари теккан бўлса, эҳтимол, аммо, лекин мен улардан ёрдамсизоқ, ҳеч кимдан маслаҳат сўрамаёқ, қизилларга зарба берганман.

— Бундан чиқди, сен ҳарбий ишда фаннинг ролини тан олмас экансан-да?

— Йўқ, фанни тан оламан. Лекин урушда энг муҳим нарса фан эмас.

— Бўлмаса нима?

— Мақсад. Нима мақсадда урушаётганингни олдиндан билиб олишинг керак.

— Бу бошка масала...— Копилев ўйланиб қолиб жилмайди:— Бу ўз-ўзидан маълум... Албатта, бу ишда идея муҳим ўрин тутади. Қимики, нима мақсадда жанг қилаётганини аниқ билса ва ўз ишига қаттиқ ишонса, ўша енгади. Бу алмисоқдан қолган эски бир ҳақиқат, мен кашф этдим, деб мақтанмай қўя қол. Мен эски давр, қадимги ажойиб даврнинг тарафдориман. Менда шу мақсад бўлмаганда, бу ёқларда сан-

қиб, номаълум нарса учун аллакимлар билан жанг қилиб юрмасдим. Биз билан бирлашганинг ҳаммаси қурол кучи билан қадимги имтиёзларим учун курашаман, қутурган ҳалқни тинчитаман, деган одамлардан иборат. Сен билан мен ҳам ана шу тинчитувчилар қаторига кирамиз. Мен кўпдан бери сенга разм солиб юрибману, Григорий Пантелеевич, лекин нималигингни тушунолмайман...

— Кейин тушунасан. Қани, жўнайлик,— деди-да, Григорий бостирма томон юрди.

Ундан кўзини олмай пойлаб турган уй бекаси манзират қилиб:

— Айналай, сут ичиб кетмайсизми?— деб сўради.

— Раҳмат, ойижон, сут ичишга вақтимиз йўқ. Насиб қилса, кейин ичармиз,— деди Григорий.

* * *

Прохор Зиков бостирма ёнида ютоқиб, энтика-энтика қатиқ ичаётган эди. Григорийнинг от ечаётганини кўриб турса ҳам пинагини бузмади. Кўйлагининг этаги билан лабларини артиб бўлиб:

— Қаёққа жўнамоқчисан? Мен ҳам бораманми?— деб сўради.

Григорий тувақиб, жаҳлига чидолмай уни койишга тушди:

— Қорнинг ёрилгур, сен нима, вазифангни билмайсанми? Нима учун отга юган урмадинг? Менга ким от келтириши керак? Ҳаҳ, шайтон! Еганинг еган, сира тўймайсан! Қошиқни ташла! Интизомни унуддингми!.. Вой шайтоннинг урғочиси!

Прохор эгарга ўрнашиб олиб, ўпкалагандай мин-филлай бошлади:

— Нега бунчалик тувақишиласан ахир? Бақирасан холос, кошки нафи бўлса... Катталигини қара-ю! Йўлда очиқмай деб бир оз тамадди қилсан, гуноҳкор бўлдимми? Нега мунча кекирдагингни чўзасан?

— Дастингдан ўлиб бўлдим, шунинг учун бақираман, тўнғиз! Командирга шундай муомала қиласанми-а? Аттанг, генерал олдига кетяпмиз-да, ҳали қарабтур, сени!.. Аясам, ҳаддингдан ошиб кетяпсан!.. Била-

санми, мен сенга ким бўламан? Беш қадам орқароқ юр, марш!— деб буюрди Григорий, дарвозадан чиқаётиб.

Прохор билан уч ординарец кейин қолишиди, Копилев билан ёнма-ён кетаётган Григорий чала қолган гапни яна бошлади:

— Қани айт-чи, нимани тушунолмаяпсан? Ё үзим тушунтириб бера қолайми?

Копилев Григорийнинг калака қилаётганини овозидан ҳам, саволидан ҳам фаҳмламасдан:

— Бу ишда тутган йўлинг ғалати, шуни тушунмайман!— деди.— Бир томондан, сен эски давр тарафдорисан, иккинчи томондан, кескин гапирганим учун мени кечирасан, биродар, сал-пал большевикларга ўхшаб кетасан.

Григорий қовоғини солиб, эгарда бир қимиirlаб қўйиб:

— Хўш, менинг нимам большевик?— деб сўради.

— Большевик деганим йўқ, большевикларга сал-пал ўхшайсан дедим.

— Бари бир гўр. Нимам ўхшайди? Гапир!

— Масалан, офицерлар тўғрисидаги ҳалиги гапларинг, уларнинг сенга муносабати тўғрисидаги мулоҳазаларинг... Сен бу офицерлардан нимани талаб этмоқчисан? Умуман, ўзинг нима истайсан?— Копилев қамчисини ўйнатиб, мулойимлик билан суриштиарди. У кетига бурилиб ординарецларга қаради ва уларнинг ўзаро баҳслашаётганини кўриб, қаттиқроқ гапира бошлади:— Улар сени менсимай, ораларига аралаشتирмаганига, ўзларини катта олганларига хафа бўласанми? Лекин офицерлар нуқтаи назаридан қаралса, улар шундай қилишга ҳақли, буни тушунмоғинг лозим. Тўғри, сен ҳам офицерсан, бироқ офицерлар орасига тасодифан аралашиб қолган офицерсан. Мени кечирасану, лекин кифтингда офицерча погонинг бўлса ҳам, барибир, ўша қўпол казаклардан фарқинг йўқ. Сен одоб билан, мулойим муомала қилишни билмайсан, сўзларни нотўғри ишлатасан, гапларинг қўпол, сенда тарбияли кишиларда бўладиган одатларнинг биронтаси ҳам йўқ. Масалан, маданиятли кишилар доим дастрўмол тутишади, сен бўлса, икки

бармоқ билан бурун қоқишига одатлангансан, овқат вақтида қўлингни гоҳ этигинг қўнжига, гоҳ сочингга артасан, ювиниб бўлиб юзингни жирканмасдан от ёпиғига артиб кетаверасан, тирноқ оладиган бўлсанг, ё тишингни ишлатасан, ё қилични... Баъзан жудаям чегарадан чиқиб кетасан: Қаргин станциясида қиш куни казаклар эрини қамоққа олган бир интелигент хотин билан қай аҳволда гаплашганинг эсингдами? Аёл кишининг олдида шимингни тугмалаб олдинг...

— Бундан чиқди, шимимнинг олди очиқ тураверса тузук бўларкан-да! — деб зарда аралаш кулиб сўради Григорий.

Иккисининг отлари ёнма-ён борарди. Григорий кўз қирида соддадил Копилевнинг очиқ чехрасига қараб-қараб қўяр, лекин унинг гаплари кўнглини ранжитарди.

— Ундаи демоқчимасман! — деди Копилев хуноб бўлиб. — Сен ўзинг қанақасан: умуман хотин кишини шим кия туриб, яланг оёқ ҳолда қабул қилиш мумкинми? Сен, лоақал, кителингни елкангга ташлаб олмадинг, қай алпоздалигинг ҳозиргача кўз олдимдан кетгани йўқ! Булар арзимас гап-ку, лекин ҳаммаси йиғилиб-йиғилиб, сенинг қандай одамлигингни... Нима десам экан...

— Кўрқмасдан очигини айтавер!

— Масалан, бутунлай тарбия кўрмаган нодон эканнингни кўрсатади. Гапларинг қанақалигини ўзинг биласанми? Квартирани фатера дейсан, эвакуация ўрнига экуация, билан ўрнига минам, артиллерия ўрнига антилерия деб гапирасан. Орзуга айб йўқ дегандай, сен ҳам бошқа саводсизлар сингари, ажна-бий сўзларга ишқибозсан, керакми, керак эмасми, жойига қарамасдан ишлатаверасан, лекин шундай бузиб гапирасанки, асти қўявер! Агар штаб мажлислирида қулоғингга маҳсус ҳарбий терминлардан: дислокация, диспозиция, концентрация ва бошқа шу сингари оҳангдор сўзлар кириб қолса борми, гапираётган одамга завқланиб тикилиб қоласан. Менимча, ўлгудай ҳавасинг келса керак.

— Йўқ, бу гапинг ёлғон! — деб пўнфиллади Григорий, лекин оғзининг таноби қочиб, юзи бутунлай

тиржайиб кетди. Отининг қулоқларини силаб, ёл ос-тидаги ипакдай силлиқ ва илиқ терисини қашлаб:— Қани, давом эт, ўз командирингни аяма, адабини беравер!— деди.

— Мен сенинг адабингни бераётганим йўқ, дарров ачишиб кетдими, а? Бусиз ҳам ўз камчилигингни ўзинг билишииң керак эди. Шунчалик нуқсоңларингни кўра-била туриб, офицерлар сени яна назарига илсинми? Одоб ва савод масаласида заррача вазнинг йўқ: сен нима-ю пробка нима!— Копилев бехосдан оғзидан шундай ёмон сўз чиқиб кетгани учун чўчиб тушди. У Григорийнинг қизиққонлигини, ғазабланганда ўзини тутолмаслигини яхши билганлиги учун иш чатоққа айланишидан қўрқарди, бироқ унга кўз ташлаши билан кўнгли жойига тушди. Григорий ўзи-ни орқага ташлаб, қотиб-қотиб кулар, садафдай тишлари мўйлов остидан ярқираб кўринарди. Гапла-ри бундай таъсир кўрсатишини кутмаган Копилев, Григорийнинг бу қадар роҳатланиб кулишидан завқ-ланиб, ўзи ҳам кулиб юборди:— Мана кўрдингми, сендан бошқа одам бўлса, шунча гаплардан кейин йиғларди, сен хохолайсан холос... Бу тентаклик эмасми ахир?

— Шундай дегин, ҳали мен сизларга пробка ҳам бўлдимми? Зарари йўқ!— деди Григорий кулгисини босиб.— Лекин барибир сизлар айтган йўлга юрмайман, сизларнинг сертакаллуф одатларингизни ўрга-нишни истамайман ҳам. Қўш ҳайдаганимда барибир кераги бўлмайди, худо хоҳласа, ўлмасам, мен ҳўқиз-лар ёнида бўламан, ишим шулар билан битади. Мен нима, уларга: «Жаноби тулаган ҳўқиз бир оз сури-линг! Кечирасиз, жаноби қўтири! Рухсат этинг, бўйин-туруғингизни тўғрилаб қўяй! Олий ҳазрат буқа жаноблари, сиздан ўтиниб сўрайман, омочни синдири-манг!» дермидим. Уларга бунаقا гап кетмайди. «Хўш, ҳаром ўлгур!» десанг дарров тушунади: ҳўқиз-ларнинг дисклокацияси шу.

— Дисклокация эмас, дислокация!— деб тузатди Копилев.

— Ҳа, ҳўп, дислокация бўла қолсин. Лекин битта фикрингга қўшилмайман.

— Қайси бирига?

— Мени пробка деганингга. Мен бу ерда сизларга пробка бўлсам, ҳали шошмай тур, вақти келсин, қизилларга ўтай, кўрасан пробкани, қўрғошиндан ҳам оғир бўлиб қоларман. Ана ўшанда зинҳор менга рўпара бўла кўрманглар, боодоб ва билимдон текинхўрлар! Ичак-чавоқларингни суғуриб оламан!— деди Григорий ярми ҳазил, ярми жиддий тарзда; сўнgra, отига қамчи босди-да, бирданига чоптириб кетди.

Дон атрофи шу қадар роҳатбахш сукунат қўйнида уйғондики, тиқ этган энг нозик товуш ҳам унга халақит бергандай бўлиб эшитиларди. Фақат тўрғайлар билан беданалар даштни обод этиб сайрашарди. Лекин бир-бирига туташган қишлоқлар томондан ғовур-ғувур аралаш гувиллаган товушлар келиб, йирик ҳарбий қисмлар ўтаётганини билдириб турарди. Ўнқир-чўнқир жойдан ўтганда тўп ғилдираклари ва ўқ яшиклари шалдирар, қудуқ ёнида отлар кишинашарди, пластунчи сотняларнинг бир хилда қадам ташлагани, фронтга яроғ-аслача ва ўқ-дори ташиётган араваларнинг шалдирагани эшитиларди; кўчма ошхоналар атрофини димлама сўк бўтқанинг, дафна барги солинган гўшт консерванинг, янги ёпилган ноннинг ҳидлари босиб кетганди.

Усть-Медведицанинг ёнгинасида милтиқлар қасир-қусурига олиб тўхтовсиз ўқ узишар, аҳён-аҳёнда гумбурулаб тўплардан ўқ отилгани эшитиларди. Жанг энди бошланмоқда эди.

Генерал Фицхалауров нонушта қилаётган пайтда, афти бужмайган ўрта яшар адъютант кириб хабар қилди:

— Қўзғолончилар Биринчи дивизиясининг командири Мелехов билан штаб бошлиғи Копилев келишиди.

— Менинг бўлмамга таклиф эт,— деди Фицхалауров; серпай қўли билан тухум пўчоғи солинган тарелкани суриб, бир стакан янги соғилган сутни шошмасдан шимириди, сўнgra сочиқни тахлаб, жойига қўйгандан кейин, ўрнидан турди.

Эшик кесакиси қийшайган, деразалари хира шу кичкина меҳмнхонада бўйи жуда новча, гавдаси

йўғон, лекин қарилликдан хомсемиз бўлиб қолган генерал наҳоятда катта, ваҳнмали кўринарди. У чиройли қилиб тикилган мундирининг тиккайган ёқасини йўл-йўлакай тузатиб, йўтала-йўтала иккинчи хонага ўтди, эшик олдида турган Копилев билан Григорийга қўл бермасдан, бошини сал-пал қимирлатиб саломлашди-да, уларни имлаб, стол ёнига таклиф этди.

Григорий қиличини авайлаб, секингина табуретканинг бир четига ўтириди ва кўз қирида Копилевга қаради.

Фицхалауров ўтираётиб стулни қисирлатиб юборди, болдирлари узун оёқларини йифиб, бесўнақай дастпанжаларини тиззасига қўйди-да, фўнгиллаган йўғон овоз билан гапга ўтди:

— Жаноби офицерлар, мен сизни бу ерга баъзи бир масалаларни ўзаро келишиб олиш мақсадида чақирганман. Қўзғолончиларнинг партизанчилигига ортиқ йўл қўйилмайди! Шу вақтгача бир бутун деб ҳисобланган, ҳақиқатда эса тарқоқ ҳолда юрган сизларнинг қисмларингиз бундан буёқ мустақил қисм бўлмайди. Ҳаммаси Дон армиясига қўшилади. Биз энди план асосида мунтазам ҳужум бошлаймиз. шунинг учун ҳар бир киши буни яхшилаб тушунмоғи ва берилган буйруқларни сўзсиз бажармоғи шарт. Нима учун куни кеча пиёда полкингиз бизнинг штурмчи батальоннинг ҳужумини қўлламади? Нега полк менинг буйруғимга итоат этмади, ҳужум қилишдан бош тортид? Номига дивизия деб юраверибсиз, ким дивизия командири?

Григорий секингина қилиб:

— Мен,— деди.

— Саволимга жавоб беринг!

— Үзим кечагина дивизияга қайтиб келдим.

— Қаерда эдингиз?

— Ўйимга бориб келдим.

— Дивизия командири жанг пайтида уйида ётадими? Дивизиянгизда ит эгасини танимайди! Интизомсизлик! Расвогарчилик! — Торгина меҳмонхонада генералнинг йўғон товуши тобора авжига чиқарди; адъютантлар эшик орқасида оёқ учидаги юриб шивирлашар, кулишарди. Копилевнинг тобора ранги оқарар,

Григорий бўлса, шолғомдай қизариб кетган генерал-нинг юзига, кўкариб кетган муштларига қараб ўзининг ҳам ғазаби қайнаб келаётганини сезиб турарди

Фицхалауров лип этиб ўрнидан турди-да, стул суюнчиғини ушлаб бақира бошлади.

— Бу ҳарбий қисм эмас, қаланғи-қасанғилар йиғиндиси!.. Сизлар казак эмас, саёқ одамларсиз! Сиз денщикликдан бошқага ярамайсиз, жаноб Мелехов, сизга ким қўйибди дивизия командирлигини?.. Сизнинг вазифангиз — этик тозалаш! Эшиттингизми? Нега буйруғим бажарилмади?! Митинг ўтказилмадими? Мұҳокама қилинмадими? Шуни икки қулоғингиз билан эшишиб олингки: бу ерда ўртоқ-пўртоқ деган гап кетмайди, большевикча тартибларга биз йўл қўймаймиз!.. Йўл қўй-май-миз!..

— Илтимос қиласман: менга кўп бақираверманг!— деб ўшқирди-да, Григорий ўрнидан туриб, оёғи билан табуреткани суреб қўйди.

— Нима-нима, нима дедингиз?!— хириллаб сўради Фицхалауров стол оша энгашиб, ғазабланганидан нафаси тиқилиб.

— Илтимос қиласман: менга кўп бақираверманг!— деди Григорий овозини янада баландроқ чиқариб:— Сиз бизни бу ерга бაъзи бир масалаларни ҳал қилгани... — Григорий бир лаҳза жимиб қолди, сўнгра Фицхалауровнинг қўлига тикилганича, овозини бутунлай пасайтириб гапида давом этди:— Шуни билиб қўйингки, жаноби олийлари, агар менга жимжилотингизни теккизсангиз икки нимта қилиб қараб туравераман!

Уй ичи шу қадар жимжит бўлиб қолгандики, ҳатто Фицхалауровнинг ўқтин-ўқтин нафас олгани бемалол эшитиларди. Бирпаслик сукунатдан кейин эшик секин ғичирлади. Эшик тирқишидан қўрқа-писа мўралаган адъютантнинг башараси кўринди. Эшик яна астагина ёпилди. Григорий қилич дастасидан қўлини олмай қотиб турарди. Копилевнинг тиззалари қалтирас, кўзлари аланглаб, тўрт деворнинг қаёғига қарашини билмасди.

Ниҳоят, Фицхалауров гурс этиб стулга ўтириди-да, қарияларча инқиллаб:

— Жудаям ғалати гап! — деб пўнғиллади ва Григорийга қарамасдан, хотиржамлик билан: — Ўтилинглар, — деб таклиф этди. — Шунча қизишганимиз етар. Энди марҳамат қилиб буйруғимни эшитинг: ҳамма отлиқ қисмларни дарҳол... Ўтилинглар, ахир!..

Григорий ўтирди ва тўсатдан тер босган юзини енги билан артиб олди.

— ...Шундай, ҳамма отлиқ қисмларни дарҳол жаңуби-ғарбий участкага олиб ўтасиз ва ўша заҳотиёқ ҳужум бошлайсиз. Ўнг қанотингиз лашкар старшинаси Чумаковнинг иккинчи батальони билан ёнма-ён бормоги керак...

Григорий ҳорғин овозда:

— Дивизияни мен у ёққа обормайман, — деди-да, дастрўмолини олмоқчи бўлиб, чалвор чўнтағига қўлини суқди. Наталья берган чеги тўрли дастрўмол билан пешона терларини бошқатдан артиб чиқдида: — Дивизияни у ёққа обормайман, — деб яна так-рорлади.

— Сабаб?

— Олди-кетини йиғиб, қисмларни тартибга солгунча анча вақт ўтади...

— Бунинг сизга алоқаси йўқ. Мен жавобгарман.

— Йўқ, алоқаси бор. Ёлғиз сизгина жавобгар эмас...

— Сиз нима, буйруғимни бажаришдан бош тортмоқчимисиз? — хириллаб сўради Фицхалауров, ўзини зўрғатдан босиб.

— Ҳа, — деди Григорий.

— Үндай бўлса, марҳамат қилиб, дарҳол дивизияни топширинг! Кечаги буйруғим нега бажарилмагани менга энди очиқ маълум...

— Нима десангиз деяверинг, лекин дивизияни мен топширмайман.

— Бу жавобингизни нима деб тушунишим мумкин?

— Нима деган бўлсан, ўшандай тушунишингиз мумкин, — деб билинар-билинмас кулиб қўйди Григорий.

— Мен сизни командирликдан бўшатдим! — деб бақирди Фицхалауров, Григорий сапчиб ўрнидан турди.

— Мен сизга итоат этмайман, жаноби олийлари!
— Умуман сиз бирор кимсага итоат этасизми, ўзи?
— Ҳа, қўзголончи кучлар қўмондони Кудиновга итоат этаман. Боядан бери зўр бериб бақирганингизга ҳайронман... Ҳозирчалик икковимизнинг ҳам ҳуқуқимиз баравар. Сиз дивизия командири, мен ҳам. Шунинг учун менга ўдағайламанг кўп... Олдин мени юзбошилик даражасига туширишсин, кейин марҳамат, бақиришингиз мумкин. Лекин ўшанда ҳам мен...— Григорий кир босган кўрсаткич бармоғини баланд кўтарди, ҳам илжайиб, ҳам кўзларини ола-кула қилиб: —... Ўшанда ҳам қўл тақизишга йўл қўймайман!— деб гапини тамомлади.

Фицхалауров ўрнидан турди, бўйини қисган ёқасини тузатиб, ярим-ёрти таъзим қилди:

— Сиз билан гаплашадиган гапим қолмади,— деди.— Энди билганингизни қилаверинг. Бу қилиқларингизни мен дарҳол армия штабига маълум қиласман. Ҳарбий-сайёр суд бизда ҳозир тўхтовсиз ишламоқда, амин бўлинг: тезда натижасини кўрасиз.

Григорий, Қопилевнинг жон қўйдириб имлаганига эътибор бермай, шапкасини бостириб кийди-ю, эшик томон юрди. Остонада тўхтаб:

— Қаерга маълум қилсангиз қилаверинг, лекин мени қўрқитаман деб овора бўлманг, мен сиз айтган қўрқоқлардан эмасман... Ҳозирча мени безовта қила кўрманг,— деди-ю Григорий ўйланиб қолди: — Йўқса, казакларим сизни бир балога гирифтор қилиши мумкин...— деб, эшикни тепиб очди-ю, қиличини шарақлатиб, катта-катта қадам ташлаб даҳлизга чиқди.

Ҳаяжондан энтиккан Қопилев зинапояда унга етиб олди.

— Сен эсингни еб қўйибсан, Пантелеевич!— деди у шивирлаб. У ҳовлиққанидан нима қилишини билмай, қўлларини сиқимларди.

— Отларни келтиринг!— деб бақирди Григорий қўлидаги қамчини ғижимлаб.

Прохор зинапоя олдига қуондай етиб келди.

Григорий дарвозадан чиққандан кейин кетига қаради: уч ординарец қўлтиғидан суяб генерал Фицхала-

уровни серҳашам эгар урилган бўйдор отга мингизмоқда эди...

Ярим чақирим жойгача чурқ этмай отларини чоптириб бораверишди. Копилев шу топда Григорийга гап ёқмаслигини тушунар, баҳслашишдан фойда чиқмаслигини билар, шунинг учун индамасди. Ниҳоят, Григорийнинг тоқати тоқ бўлиб, тўсатдан:

— Нега индамайсан? — деб сўради.— Сен нима мақсадда келувдинг? Гувоҳ бўлиш учунми? Тилингга куйдирги чиқдими, нега гапирмадинг?

— Э, биродар, жудаям қаттиқ кетдинг-да!

— У-чи?

— Албатта, ундан ҳам ўтди. Биз билан бу хилда гаплашиши мутлақо одобдан эмас!

— У биз билан гаплашибдими? Дабдурустданоқ бақиришга тушди-ку, худди арпасини бирор хом ўргандай!

— Ўзинг ҳам беш кетвординг! Ҳарбий шароитда генералга итоат этмаслик... биласанми бу...

— Бунисидан қўрқмайман! Аттангки, менга қўлини тегизмади-да! Қилич билан пешонасига солворардим — калласи икки палла бўларди!

Копилов норози бўлиб:

— Усиз ҳам сени тинч қўйишмас энди,— деди-да, отини секин юргизди.— Улар интизом масаласига қаттиқ киришадиганга ўхшаб қолди, ҳушёр бўл, биродар!

Иккисининг отлари, дам-бадам пишқириб, думлари билан сўналарни ҳайдаб ёнма-ён борарди. Григорий масхара қилгандай кулиб, Копилевга қаради-да:

— Сен нега мунчалик ясаниб-тусандинг, а? — деб сўради.— Чойга таклиф этишади деб ўйлагансан-да! Даструрхонга таклиф қилишини кутганимидинг? Вой бечора-эй! Соқолини олиб, френчини тозалаб, этигини мойлаб юрибди... Боя дастрўмолингни тупуклаб тиззангдаги доғни ишқалаётганингни мен кўриб турувдим!

— Кўй энди, бўлди-да, ахир! — дерди Копилев қизарип.

— Шунчалик меҳнатларинг зое кетди, аттанг! — деб масхара қилди Григорий.— Зиёфат у ёқда турсин, сенга қўлини ҳам бермади-ку!

— Сен билан юрган одам бундан ҳам беобрў бўлиши ҳеч гап эмас,— деди бидирлаб Копилев ва кўзларини қисиб рўпарасига тикилиб қолди-да, суюнганидан бақириб юборди:— Уни қара! Булар биздан эмас. Иттифоқчилар!

Уларнинг қаршисида, тор кўчадан олти жуфт хачир инглиз тўпини судраб келмоқда эди. Тўп ёнида калта дум саман от минган инглиз офицери кўринарди. Олдинги тўпни ҳайдаган одам ҳам инглизча форма кийганди, бироқ фуражкасида рус офицерлари тақадиган кокардаси, елкасида поручиклик погонлари бор эди.

Григорийга бир неча саржин қолганда офицер икки бармоғини пробка шлёмига қилиб Григорийга салом берди-да, бошини қимирлатиб унинг четроқ чиқишини илтимос қилди. Чунки, кўча шу қадар тор эдики, отларни тош деворга тақаб йўл берилмаса, ўтиб олишнинг иложи йўқ эди.

Григорийнинг лунжалари қимирлай бошлади. У тишини тишига босиб, офицерга бетма-бет бўлиб бора-верди, лекин у таажжубланиб, қошини чимириб йўл бўшатди. Иккиси бир амаллаб икки ёқса ўтиб олишди, лекин инглиз йўл бермаганда, болдири гётр билан сирилган ўнг оёғини остидаги биянинг йилтироқ сағрисига қўйиб турмаганда деворга тақалиб қолишлари муқаррап эди.

Тўпчилардан бири, сиртқи кўринишидан рус офицери, Григорийга хўмрайиб қаради.

— Сал йўл берсангиз, амалдан тушиб қолмасдингиз-ку! Шу ерда ҳам нодонлигингизни кўрсатишингиз шартми?

— Сен индамай йўлингда кетавер, итдан тарқаган! Йўқса, йўл бериш қанақалигини кўрсатиб қўяман!..— деди Григорий эшитилар-эшитилмас қилиб.

Офицер тўп тегарчи устида оёқса босиб турди-да, кетига бурилиб:

— Жаноблар! Манави сурбетни тутинглар!— деб бақирди.

Григорий қамчисини ўйнатиб, унга таҳдид қилди-да, бемалол тор кўчадан кетаверди. Чарчаган, чангга беланган, ҳали мўйлови чиқмаган ёш-ёш офицер йи-

гитлар Григорийга хўмрайиб қаравашар, лекин бирон-таси уни тутишга ҳаракат қилмасди. Олти тўпдан иборат батарея муюлишда бурилиб, кўздан ғойиб бўлгач, Копилев лабларини тишлаб, Григорийнинг ёнига яқин келди.

— Жиннилик ҳам эви билан-да, Григорий Пантелеевич! Ёш боланинг қилигини қиласан-а!

— Менга тарбия бермоқ учун юборишганми сени?— деб узиб олди Григорий.

— Фицхалауровга зарда қилганинг тўғри, унинг учун ҳеч нарса демайман.— Копилев кифтларини қисиб гапиради,— лекин бу инглизда нима айб? Ёки бошидаги шлёми ёқмадими сенга?

— Дарвоқе, шу ерда, негадир, унинг шлёми менга ёқмади... Усть-Медведицадаң нарироқда, бошқа бир жойда кийса-кияверсин... «Икки ит талашганда учинчиси аралашмасин!» — деган гапни эшитганмисан?

— Ие! Сен ҳали, ажнабийларнинг аралашишига қарши экансан-да? Лекин менинг фикримча, ёв ёқангага ёпишганда ким ёрдам берса ҳам хурсанд бўласан.

— Сен хурсанд бўла қол, мен уларни юртимизга қадам қўйдирмасдим!

— Қизиллар орасидаги хитойларни кўрганмисан ўзинг?

— Нимайди?

— Барибир эмасми? бу ҳам ажнабийлар ёрдами-ку!

— Бекор айтибсан! Хитойлар ўз ихтиёри билан қизилларга қўшилган.

— Хўш, анавиларни бирор мажбур қилиб бу ерга обкелдими?

Григорий нима жавоб қилишини билмай, анчагача ўйланиб қолди. Ўйлай-ўйлай, ниҳоят ўқинч билан шундай деди:

— Сизлар олим одам, сизларга бас келиш қиин.. Қорда изини чалғитган қуён сингари чалғитишига жуда устасиз! Бу масалада сен ҳақли эмаслигингни сезиб турибману, бироқ сени мот қиладиган жавобни тополмаяпман... Кел энди, бас қилайлик бу гапни.

Калавамнинг учини йўқотиб қўйганман, мени қўп чалғитаверма!

Копилев ранжигансимон жим бўлиб қолди, иккиси қўшхонага етгунча оғиз очишмади. Лекин ҳар нарсага қизиқаверадиган Прохор сабр қилолмай, уларнинг кетидан етиб келди-да:

— Григорий Пантелеевич, жаноб олийлари, марҳамат қилиб бизга тушунтириб беринг-чи, ҳалиги кадетлар тўпга қўшган маҳлуқ қанақа ҳайвон ўзи? — деб сўради.— Қулоғи худди эшакникига ўхшайди, бошқа ёғи отдан фарқи йўқ! Бунақа ҳайвонни биринчи кўришимиз.. Бу нима бало ўзи, қанақа маҳлуқ? Шуни сиз ечиб берсангиз... биз пулдан гаров ўйнаганмиз...

Прохор беш минут чамаси орқаларидан эргашиб борди, бироқ ҳеч қандай жавоб бўлмагандан сўнг, жиловни тортиб кейинда қолди, бошқа ординарецлар билан бараварлашгач, шивирлаб деди:

— Чамамда, улар ҳам ҳеч балони билмайди. Ёруғ дунёда шунақа маҳлуқ борлигига улар ҳам ҳайрон бўлиб, индамай кетишаپти...

XI

Казаклар тўртинчи марта саёз окопларидан туриб кўришди, бироқ қизилларнинг қақшатғич пулемёт ўқларига бардош беролмай, яна ётиб олишга мажбур бўлишди. Чап қирғоқдаги ўрмон ичига яширинган батареялар казаклар позициясини, жарлар орасида тўпланаётган резерв қисмларни эрта тонгдан туриб кун бўйи тўхтовсиз ўққа тутарди.

Дон атрофидаги чўққиларнинг қоқ тепасида кетма-кет шрапнель портлар, сутдай оппоқ тутуни булат сингари секин-аста тарқалиб кетарди. Пулемёт ва милтиқ ўқлари, казаклар ётган эгри-буғри окопларнинг олдидаги ва орқа томонидаги тупроққа тушиб чанг тўзитмоқда эди.

Тушга яқин жанг қизиб кетди, фарбдан турган шамол тўпларнинг гумбурлаган овозини Дон бўйидаги узоқ жойларгача етказди.

Григорий кўзига дурбин тутиб, қўзғолончилар батареяси жойлашган ердаги назорат пунктидан жанг-

ни кузатиб турарди. Офицер роталари ўлганига қарамай, беш-ён қадамдан олга югуриб, ётиб олгани унга bemalol кўриниб турарди. Ўқ кучайганда улар ерни қазиб, писиб ётишарди, сўнgra яна ўринларидан туриб янги маррага чопиб ўтишарди; улардан сал чапроқда, монастиръ томонда эса, қўзғолончиларнинг пиёда аскарлари бошларини кўтаролмай тек ётишарди. Григорий Ермаков номига хат ёзиб, алоқачи орқали жўнатди.

Яrim соатдан кейин бўриқиб кетган Ермаков от чоптириб етиб келди. У батарея отлари турган гов ёнида отдан тушди-да, оғир-оғир нафас олиб, назоратчи турган окопга чиқди.

— Қазакларни турғизолмаяпман! Қўзғалишмайди, вассалом!— у олисдан бақириб, қўлларини ёйиб келарди.— Бизда ҳалитдан йигирма уч киши асфала-софилинга кетди! Қизилларнинг пулемёт билан қиришини кўрдингми?

Григорий тишларини фижирлатиб:

— Офицерлар қўрқмасдан кетяпти-ю, сен ўз одамларингни турғизолмайсанми?— деб ўшқириди.

— Бир қарагин, уларнинг ҳар бир взводида биттадан қўл пулемёти бор, ўқи ошиб-тошиб ётибди, бизда нима бор?

— Бас, кўп гап сотма! Дарҳол одамларингни ҳужумга бошла, йўқса, каллангни оламан!

Ермаков болохонадор қилиб сўкинди-да, тепадан чопиб тушди. Григорий ҳам унинг кетидан эргашди. У энди 2-пиёда полкига ўзи бош бўлиб ҳужум бошлашга аҳд қилган эди.

Дўлана шохлари билан тўсиљган энг четки тўп ёнида уни батарея командири тўхтатди:

— Григорий Пантелеевич, инглизлар ясаган қуролнинг ишини томоша қилинг. Ҳозир улар кўприкни тўпга тутишади. Юринг, тепага чиқиб қарамаймизми?

Қизил сапёрлар Дон устига солган понтон кўприк дурбинда ингичка лентага ўшаб кўринарди. Кўприк устидан кетма-кет тизилишиб аравалар ўтарди.

Ўн минутча ўтгач, чуқурдаги харсанглар ортига жойлашган инглиз батареяси ўт очди. Тўртинчи ўқ кўприкнинг қок ўртасига тушиб емириб юборди. Ара-

ва қатнови тўхтаб қолди. Қизил аскарларнинг у ёқдан-бу ёққа юргани, мажақланган араваларни, ўлган отларни Донга ташлагани кўриниб туарди.

Уша заҳотиёқ, сапёрлар тўртта қайиққа тушиб, ўнг қирғоқдан жўнашди. Бироқ, улар тўп ўқи вайрон қилган тахталарни тузатиб бўлар-бўлмас, инглиз батареяси яна бир неча ўқ узди; ўқнинг бири чап қирғоқдаги кўприкка чиқиладиган кўтарманинг титифини чиқарди, иккинчиси кўприкнинг ёнгинасига тушди, сув кўм-кўк устун каби ҳавога кўтарилиди. Энди бошланган арава қатнови яна тўхтаб қолди.

— Мўлжал олишга уста экан, итваччалар!— завқланиб тан берди батарея командири.— Энди улар кечгача дарёдан ўтишолмайди, кўприк қуришолмайди!

Григорий дурбинни кўзидан олмасдан:

— Хўш, сен нега отмайсан?— деб сўради.— Ўз пиёда аскарларингга ёрдам беришинг керак. Ҳув ана, пулемёт уялари, от!

— Жоним билан отардиму, лекин биронта ўқим йўқ! Сўнгги ўқни отганимга ярим соат бўлди, ўшандан бери рўза оғизман.

— Ундай бўлса бу ерда нима қилиб турибсан, отларингни қўшгин-да, тўпингни судраб қол!

— Кадетлардан ўқ сўрагани одам юбордим.

— Бермайди,— деди Григорий қатъий қилиби.

— Бир марта қуруқ қайтиб келди, яна юбордим. Балки бу гал раҳм қилишар. Лоақал, йигирматача ўқимиз бўлганда, анави пулемётларнинг овозини ўчирадик. Йигирма уч кишининг ёстигини қуритишид-я, ҳазилакам гапмас бу. Яна қанчани қиаркин ҳали? Тариллатиб отишини қара!..

Григорий дурбинни 2-полк казаклари томон бурди: окоплар ёнидаги дўнгларга ҳали ҳам боягидай ўқ ёғилиб, қақраган ернинг титифини ўйнатмоқда эди. Пулемёт ўқи сидирғасига тушган жойдан, худди бироров окоплар ёнидан узунасига чизиқ тортгандай, кул ранг лентага ўхшаб чанг кўтарилилар ва секин-аста тарқалиб кетарди. Казаклар окопларини чанг-тўзон қоплаб, олисдан тутаётганга ўхшаб кўринарди.

Энди Григорий инглиз батареясини томоша қилишини йиғиштирганди. У бирпас тўп ва пулемётлар ово-

зига қулоқ солиб турди-да, тепадан тушиб, Ермаковга етиб олди.

— Мендан буйруқ бўлмагунча ҳужумга ўтма. Артиллерия мадад бермаса, барибир биз уларни жойидан қўзғатолмаймиз.

Ермаков, ўқ товушидан ҳурқиб, питирлаб турган отига минаётиб:

— Боя мен сенга айтмовдимми? — деб гинахонлик қилди.

Визиллаган ўқлар орасидан қўрқмай от чоптириб кетаётган Ермаковнинг кетидан Григорий тикилиб қолди. «Нега бу тентак тиккасига от солдийкин, а? Пулемёт соғ қўймайди! Жарга тушиб, сой ичи билан кетса-ку, дўнг орқасидан чиқарди, у ёғи бехатар, ўз одамлари ёнига етиб оларди», — деб хавотирланарди. Ермаков отини ола-тасир учирни жар ёқасига етди-да, шўнғигандай, кўздан ғойиб бўлди. «Ақли жойида! Энди бемалол етиб олади», — Григорий эркин нафас олиб, тепа ёнига ёнбошлади-да, шошмасдан тамаки ўрай бошлади.

Ҳамма нарсадан кўнгли совуб, у ўзича хаёл сурарди. Йўқ, ўз казакларини пулемётга рўпара қилмайди энди. Ҳеч кераги йўқ. Керак бўлса, офицерлар штурмчи роталари ҳужум қиласин. Майли, Усть-Медведицани шулар ишғол эта қолсин... Григорий тепа остида ёнбошлаб ётиб, умрида биринчи марта, жангда бевосита қатнашишдан бош тортди. Шу тобда у қўрқоқлигидан ёки ўлимдан қочганлигидан, ё эса бекорга талафот кўриш мулоҳазасига борганлигидан шундай қарорга келгани йўқ эди. Яқиндагина у, на ўз жонини ва на қўл остидаги казакларни аямай, жанг қиласар эди. Лекин ҳозир, мурвати синган соатга ўхшаб қолганди... Бу ур-йиқит, сур-сурларнинг мутлақо кераксизлигини ҳозир ҳар қачонгисидан ҳам очиқ-оидин тушуниб олган эди. Унинг тўсатдан бундай кайфиятга тушишига Копилев билан тортишиб қолганими, ёки Фицхалауров билан айтишиб қолганими сабаб бўлди, ё эса иккиси баравар таъсир этдими, ишқилиб, энди ўзини ўққа тутиб берадиган аҳмоқ йўқ деган фикрга келган эди. У казаклар билан большивиклар ярашиб, апоқ-чапоқ бўлиб кета олишини

аниқ тасаввур этмас, ўзи ҳам бу фикрни ҳазм қилол-масди, лекин шу билан бирга, том маъноси билан унга ёт бўлган, унга ёв кўзи билан қараган жами Фицхалауровларнинг манфаати учун ортиқ қон тўкишни мутлақо истамасди, чунки улар Григорийдан ҳазар қилишар, Григорий ҳам улардан қаттиқ ҳазар қиласарди. Шу равишча яна илгариғи қарама-қаршилик, ечилмаган муаммо яна кўндаланг бўлди: «Улар урушаверсин. Мен четдан томоша қилиб юравераман. Дивизияни мендан олишгандан кейин ариза бериб истеъфога чиқаман. Шуям менга етар!»— ўйланиб туриб, хаёли Копилев билан бўлган мунозараага яна қайтганини, қизилларни оқлаш учун важ қидираётганини сезиб қолди: «Хитойлар қурол-яроғсиз қизилларга келиб қўшиляпти, арзимаган маошга қаноатланиб, ўлим хавфи остида хизмат қилишяпти. Очифини айтганда, бунга маошнинг ҳеч қандай алоқаси ўйқ. Кошки унга бирор буюм сотиб олиб бўлса! Картада ўйнаб, бирпас эрмак қилишга ярайди, холос... Демак, бу ерда тамагарлик ўйқ, масала бошқа ёқда... Иттифоқчиларимиз-чи! Офицерлар юборишаپти, танклар, тўп-замбараклар юборишаپти, ҳатто хачирлар ҳам қолмабди! Пировардига келиб: «пулини чўзинглар!» дейди, албатта. Мана, фарқи бу ёқда экан! Бу тўғрида у билан тортишиб кўраман ҳали! Штабга борганимдан кейин уни бир четга чақириб оламану: «Сен миямни ачитма, Копилев, фарқи манави, манави деб бетига шартта-шартта айтаман».

Бироқ у билан баҳсласиши Григорийга ёнасиб бўлмади. Туш қайтган маҳалда Копилев, резёrvда турган 4-полкка кетаётганда, унга дайди ўқ тегиб, ўлган эди. Григорий бу хабарни икки соатдан сўнг эшилди..

Эртасига эрталаб генерал Фицхалауровнинг 5-дивизияси Усть-Медведицани жанг билан ишғол этди.

XII

Григорий жўнагандан кейин уч кун ўтгач, Татарск қишлоғига Митъка Коршунов кириб келди. У ёлғиз ўзи эмас, жазо отрядида хизмат этувчи яна икки кишини

эргаштириб келган эди. Бири, Маничнинг аллақаеридан туғилган ўрта яшар қалмоқ бўлиб, иккинчиси, Располинская станицалик афти, хунук бир казак эди. Митъка қалмоқни майна қилиб, «ходя» деб чақира, лекин распопинлик ароқхўр безорига — Силантий Петрович,— деб мурожаат қиласди.

Жазо отрядида хизмат этган Мишканинг дон лашкарига кўп фойдаси текканини билиш қийин эмасди: бир қишида вахмистр бўлиб, ундан кейин подхорунжийлик даражасига кўтарилган, мана энди яп-янги офицерча формада қишлоққа кириб келганди. Доннинг нариги ёғига чекингандан бери егани олдида, емагани кетида экани, роҳатда умр кечиргани кўриниб турарди: мош ранг енгил френч Митъканинг ҳар бирiga одам ўтиrsa сифадиган елкаларини қисиб қўйганди, қотирма ёқаси тор келганидан, бўйин гўштлари қатлам-қатлам бўлиб осилиб тушганди, кўк диагоналдан тикилган ҳошияли чалворининг орқаси эса тирсиллаб, чоклари сўкилай деб турарди. Агар мана шу дардисар революция бўлмагандан-ю, Митъка демаганинг мана шу совлатиминан, албатта лейб-гвардиялик атаманлардан бўларди-я! Иннайкейин, подшо саройида маза қилиб, император ҳазрат олий зот-бо баракотни қўриқлаб юраверарди... Лекин Митъка шундоф ҳам ўз турмушидан нолимасди. Мана, у ҳам офицер, лекин бу даражага Григорий Мелехов сингари жонини жабборга бериб, мардлик кўрсатиб етишгани йўқ. Жазо отрядида мартаба қозонмоқ учун бошқача ҳунарлари бўлиши шарт эди... Митъканинг бунаقا ҳунарлари кўп эди: казакларга унчалик ишонмасдан, большевик деб гумон қилинган кишини ўз қўли билан отарди, дезертирларни қамчи ва шомпол билан савалашни яхши кўрарди, қамоққа олингандарни сўроқ қилишда-ку, бутун отрядда унга тенг келадигани йўқ эди, ҳатто лашкар старшинаси Прянишниковдай одам ҳам кифтларини қисиб: «Йўқ, жаноблар, нима дессангиз денг, лекин бу бобда Коршуновнинг олдига тушадиган одам йўқ! Бу одам эмас — аждар!» деган эди. Яна бир ғалати вазифани Митъкадан бошқа ҳеч ким бажаролмасди: маҳбусни бирор сабаб билан отиш мумкин бўлмаса-ю, лекин тириклайин қўйиб юборги-

лари келмаса, уни калтаклашга ҳукм қилиб, Митъка-нинг қўлига топширишарди. Митъка бу ҳукмни шундай бажаардики, эллик таёқдан кейин маҳбус тўхтосиз қон қусар, юз таёқдан кейин ўлмаса ҳам, ўлдига чиқариб, чиптага ўраб ташлашарди... Ҳали шу вақтгача Митъканинг калтагини еганлардан биронтаси тирик қолган эмасди. Кўпинча у ўз оғзи билан мақтаниб: «Қўлимга тушган қизилларнинг шимларини ва юбкаларини ечиб олганимда бутун Татарск аҳолисига етиб ортарди!»— деб кериларди.

Болалик чоғидан раҳмсизлик сүяк-сுягиға сингиб кетган Митъка, жазо отрядидан ўзига муносиб иш топди ва ҳеч ким тергамагандан кейин биратўла тош юрак баттол бўлиб олди. Жазо отрядига ҳар ёқдан келиб қўшилган хилма-хил палид офицерлар — бангилар, босқинчилар, ўғрилар ва шу сингари муттаҳам интеллигентлар орасида юравериб, Митъка расвойи жаҳон бўлди: қизилларни жон-жаҳди билан ёмон кўрган бу абраҳлар нима таълим берса, у астойдил ҳаракат қилиб шуни ўрганди, ҳаттоки устозларини ҳам йўлда қолдириб кетди. Ҳаттоқи, асаблари бўшашиб қолган офицерлар маҳбуснинг дод-войига тоқат қиолмай, ортиқ азоблашга қўллари бормай қолган пайтларда, дарҳол Митъка етиб келиб, бирпасда ишни саранжом қиласди.

Митъка казаклар қисмидан лашкар старшинаси Прянишниковнинг жазо отрядига ўтиб олгандан кейин енгил хизмат, текин томоқ уни қутуртирган эди.

У қишлоққа кириши билан кеккайиб олди, ҳамқишлоқ аёлларнинг таъзимларига аранг бош қимирлатиб, ўз уйи томон секин-аста кетди. Ярми куйиб, турутундан қорайган дарвоза олдида отдан тушиб, тизгинни қалмоққа берди-да, катта-катта қадамлар билан қўрага кирди. Силантийни ёнига олиб, уйининг пойдеворини айланиб чиқди, ёнғин вақтида эриб тушиб, юмалоқ бўлиб қотиб қолган йилтироқ кўкиш ойна шишиасини қамчи учи билан туртиб кўрди.

— Ўт қўйиб юборишид-я....— деди ҳаяжонланганидан хириллаб.— Жудаям ҳашаматли бино эди! Қишлоқнинг олди уйи шу эди. Ўз ҳамқишлоғим ўт қўйди — Мишка Кошевой... Бувамни ҳам шу ўлдирди. Мана,

Силантий Петрович, уйимни кўраман, деб қулини томоша қиляпман.

— Бу Қошевойлардан биронтаси уйида йўқмикин?— ҳовлиқиб сўради Силантий.

— Бўлиши керак. Қўявур, ҳали кўрамиз... Ҳозир қуда бувамниги борамиз.

Митъка Мелеховларникига кетаётиб, йўлда Богатиревнинг келинини учратди:

— Менинг онам Доннинг нариги ёғидан қайтмадими?— деб сўради ундан.

— Қайтмаган бўлса керак, Митрий Миронич.

— Қудамиз Мелехов уйдами!

— Чолми?

— Ҳа.

— Чол уйда, Григорийдан бошқаси, ҳаммаси уйда. Петрони қишда ўлдиришди, эшитгандирсан?

Митъка «ҳа» дегандай бош қимирлатиб, отига қамчи босди.

У ҳувиллаган кўчадан от чоптириб борарди, лекин мушукникига ўхшаш сарғиш, хунук кўзларида бояги ҳаяжондан асар қолмаганди. Мелеховлар қўрасига яқинлашаёттиб, Митъка шериклари эмас, ўзи-ўзи билан гапиришаётгандай:

— Жонажон қишлоғим шундай кутиб олар деб ўйламагандим,— деди.— Қорин қайғусида қуданикига боришга мажбурсан... Ким зўрлигини кўрамиз ҳали?..— деб қўйди.

Пантелей Прокофьевич бостирма тагида ўроқ машина тузатмоқда эди. Олислан отлиқларга кўзи тушди, улар орасида Коршуновни таниб, дарвоза ёнига югуриб борди.

— Марҳамат қилинглар,— деди у мамнуният билан дарвозани очиб.— Қелганингиз учун жуда хурсандман, меҳмонлар! Қадамлари муборак!

— Салом, қуда бува! Соғ-саломат юрибсизми?

— Худога шукур, ҳозирча юрибмиз. Ие, офицер бўпсанми?

— Бўлмаса-чи! Сенинг ўғилларингдан бошқага оқ иғон немуносиб деб ўйловдингми?— деб мақтанди Митъка ва пайдор узун қўлинни чолга узатиб кўришди.

Пантелей Прокофьевич кулиб жавоб қайтарди.

— Бизнинг авлод бунақа нарсага унчалик ўч эмас,— деди-да, отларни боғлаш учун жой кўрсатгани йўл бошлади.

Меҳмондўст Ильинична меҳмонларга тушли овқат қўйиб тўйғизганидан сўнг суҳбат бошланди. Митъка уй ичи, ўз оиласи тўғрисида устма-уст савол бериб кўп суриштириди, лекин на фазабланганини ва на хафалигини сездирмай, тилини тишлаб ўтириди. Гап орасида Мишса Кошевой оиласидан биронтаси қишлоқда борми деб сўради, сўнгра унинг онаси гўдаклар билан уйда эканини эшитиб, ҳеч кимга сездирмай, Си-лантийга секин кўз қисиб қўйди.

Меҳмонлар кетишига тараддуланишди. Пантелей Прокофьевич уларни кузатаётib:

- Қишлоқда кўп турасизми?— деб сўради.
- Икки-уч кун турсак керак.
- Онангдан хабар олмайсанми?
- Қўлим тегармикин, билмадим.
- Ҳозир қаёққа бормоқчисан ўзинг?
- Шундай... Ҳамқишлоқларимдан баъзисига учрашмоқчиман. Биз тез қайтамиз.

Митъка ўз ҳамроҳлари билан Мелеховлар қўрасига қайтиб келмасданоқ қишлоққа: «Коршунов қалмоқлар билан кириб, Кошевойнинг бутун оиласини қиличдан ўтказибди?» деган овоза тарқалди.

Ҳеч гапдан хабари йўқ Пантелей Прокофьевич темирчилик устахонасидан косогон¹ келтириб, энди ўроқ машинани тузатмоқчи бўлганда, уни Ильинична чақириб қолди:

— Прокофич, бу ёққа кел! Тезроқ қимиirlасангчи; ахир!

Кампирнинг ваҳимага тушиб бу қадар ҳовлиқишидан ҳайрон бўлган Пантелей Прокофьевич дарҳол уйга қараб югурди:

Печь ёнида йиғлайвериб юzlари шишиб кетган Наталья турарди. Ильинична имо билан чолга Аникушканинг хотинини кўрсатиб:

— Янги гапни эшилтингми?— деб сўради ғўлдирраб.

¹ Косогон — ўроқ машинанинг чалғи юргизадиган қисми.

Пантелей Прокофьевич:

«Воҳ, Григорийга бир гап бўпти.. Худоё ўзинг асра!» деб ўйлади-ю, юраги шифиллаб кетди. Ранги оқариб, ваҳимага тушиб қолди, хотинларнинг оғиз очмай, тикилиб турганига жаҳли чиқиб:

— Тезроқ гапиринглар-чи, лаънатилар!..— Нима гап? Григорийми?..— деб бақириб юборди-ю, ўз овозидан ўзи қўрқиб кетгандай силласи қуриб қалтираган тиззаларни силағанича курсига ўтириб қолди.

Дуняшка дадасининг, Григорий тўғрисида қора хат келди, деган хаёлга борганлигини ҳаммадан олдин фаҳмлаб, дарҳол:

— Йўқ, дадажон, Григорий тинч, Митрий, Кошевойларни сўйибди,— деди.

— Нима, сўйибди?— Пантелей Прокофьевичнинг юрак ўйноғи дарҳол босилди, бироқ у Дуняшканинг нима деганини ҳали ҳам тушунолмай, қайта савол берди:— Кошевойларни? Митрий?..

Бу янгиликни топиб келган Аникушканинг хотини, тутила-тутила бир бошдан гапиришга тушди:

— Вой амакижон, мен бузоқ қидириб юриб, Кошевойнинг уйи ёнидан ўтиб кетяпсан, Митрийминам яна иккита отлиқ қўра олдига келиб, уйига киришди. Бузоқ барибир шамол тегирмондан нари кетмас дедиму, бузоқларни боқиш менинг навбатим бўлсамки...

— Бузоғингни бошимга урайми, бу ёғини гапир!— жеркиб ташлади Пантелей Прокофьевич.

— ... Шундай қилиб, учови уйга кирди дeng,— энтика-энтика давом этди аёл,— мен қараб турдим. «Булардан яхшилик чиқмайди-ку» деб кутиб туравердим. Бирданига қий-чув бошланди, бировни дўппослашаётгани эшитилди. Жон-поним чиқиб, қочмоқчи бўлдиму, энди четан девордан узоқлашганимда кетимдан тапиртупур овоз келди; бурилиб қарасам, худоё тавба,— Митрийнинг жувонмарг, кампирнинг бўйнига арқон солиб, итни судрагандай судраб кетяпти. Шу аҳволда уни бостирмага довур судраб борди, кампир бечоранинг овозиям чиқмайди, ҳушидан кетган бўлса керак; ёнидаги қалмоқ бир сакраб тўсин устига чиқди... Қараб турсам, Митъка арқоннинг бир учини унга узатиб:

«Тўсинга ил, учини сиртмоқ қилиб боғла!» деб буюрди. Вой қарамай ўлай, жон-поним чиқиб кетди-я! Кўз олдимда кампир шўрликни осиб ўлдиришди, кейин яна отга минишиб, тор кўча билан кетишиди, чамамда идорага боришиди чофи. Уйига киришга юрагим бўлмади... Лекин даҳлизидан, нақ эшик тагидан қон оқиб, зинага тушаётганини кўзимминам кўрдим. Ҳудойим бунаقا даҳшатни қайта кўрсатмасин-да!

Ильинична чолга ер тагидан қараб:

— Ҳудойим яхши меҳмонларни бизга юборган экан!— деб қўйди.

Пантелей Прокофьевич зўр ҳаяжон ичиди воқеани охиригача тинглади-да, индамасдан, ўша ондаёқ даҳлизга чиқди.

Сал вақтдан кейин дарвоза олдида ўз шериклари билан Митъка кўринди. Пантелей Прокофьевич оқсоқ-ланга-оқсоқланга уларнинг олдидан тўсиб чиқди.

— Тўхта!— деб бақирди чол олисдан.— Отларингни қўрага киргиза кўрма!

— Нима гап, қуда бува?— ҳайрон бўлиб сўради Митъка.

— Изингга қайтавер!— Пантелей Прокофьевич Митъканинг олдига яқинроқ бориб милтиллаб турган саң-сариқ кўзларига тикилди-да, қатъий қилиб:— Жаҳлинг чиқмасин, қуда, лекин мен сени уйимга киргизмайман, яхшиликча бу ердан жўнаб қол,— деди.

Митъканинг ранги оқариб кетди:

— Ҳа-а-а...— деб чўзди масалага тушуниб.— Демак, мени уйингдан ҳайдаяпсан, шундайми?

— Уйимни ҳаром қилишингни истамайман!— деб тақрорлади чол янада қатъийроқ қилиб.— Минбаъд қўрамга қадам босганингни кўрмайин. Биз, Мелеховлар, жаллодларминам нон-қатиқ емаймиз, тушундингми ?

— Тушундим! Бироқ сен жудаям раҳмдил бўпқопсан, қуда бува!

— Лекин сен, хотин-халаж, бола-чақани ўлдиришга қўлинг борган бўлса, демак, жудаям раҳмсиз бўп кетибсан. Кўзингни оч, Митрий, бу қилиғинг ярамайди... Даданг раҳматли гўрида бир ағдарилиб тушгандир бугун!

— Ўзингам қариганда эсингни еб қўйибсан чол, мен нима: уларга раҳмат дейми? Дадамни ўлдирган, бувамни ўлдирган кишилар билан оғиз-бурун ўпишсам яхши бўлармиди? Тур-э, бетинг қурсин!..— деди-ю, жаҳл билан от жиловини силтаб кўчага чиқди.

— Сўкма, Митрий, мен отанг тенги одамман. Сен минам мерос талашаётганим йўқ! Сўкмасдан йўлингда кетавер-да!

Тобора ранги ўчиб келаётган Митька қамчи ўқталиб ўшқира бошлади:

— Сен кўп жаҳлимни чиқарма! Бекорга қўлимни қичитма! Натальяга ачинаман, йўқса, сендақа раҳмдилни... Биламан ҳаммангни! Ниятларинг бузуқлнггини кўриб турибман! Ҳамма Донецга чекинганда сизлар уйда яйраб ўтиргинглар, а? Қизилларга сотилганларинг-чи? Шундай!.. Ҳаммангни Кошевойларга ўхшатиб осиш керак эди, итдан тарқаганлар! Қани кетдик, йигитлар! Сен энди, чўлоқ кўппак, бирор жойда қўзимга кўринма! Қўлимдан тирик чиқмайсан! Берган ош-нонингни эсингга солиб қўяман! Сендақа уруғ-аймоқлардан нечтасини савалаганман!..

Пантелей Прокофьевич қалтироқ қўллари билан кўча эшикни беркитиб тамбалади-да, оқсоқланиб уйга кирди.

— Акангни ҳайдадим,— деди у, Натальяга тик қарай олмай.

Наталья қайнатисининг қилган ишини тўғри деб топган бўлса-да, негадир индамади. Ильинична чўқинди ва хурсанд бўлиб:

— Хайрият-э, қоранг ўчкурдан қутулдик-а! Акангни қарғаним учун кечирасану, Натальюшка, бу Митьканг нақ жаллоднинг ўзи бўпти! Хизматниям шунақасини топиб олибди: бошқа казаклар қатори бирон қисмда ҳалол хизмат қилса бўлмасмиди? Қелиб-келиб, одам сўядиган отрядга кирганини қара! Номи казак бўла туриб одам сўйса, кампирларни осса, бегуноҳ гўдакларни қиличдан ўтказса, бу қандай бедодлик? Мишка учун бу бечорадан ўч оладими ахир? Ундай бўлса, қизиллар Гришанинг қасдига сенминам мениям, Полюшкаминам Мишатканиям ўлдириши ке-

рак эди, бироқ улар ҳеч қайсимиэни ўлдирмади, раҳм қилишди-ку! Йўқ, худоё тавба қилдим, мен бунга сира розимасман!

— Мен акамнинг ёнини олаётганим йўқ, ойижон...— деди-да, Наталья рўмол учи билан кўз ёшини артди.

Митъка ўша куниёқ қишлоқдан жўнади. Баъзи бир хабарларга қараганда, у Каргин станицаси ёнида ўзининг жазо отрядига етиб олиб, шу отряд билан биргаликда Донец округидаги украин қишлоқларида тартиб ўрнатгани кетган; бу ернинг аҳолиси Юқори Дон қўзғолонини бөстиришда қатнашгани учун айбдор ҳисобланарди.

Митъка жўнагандан кейин, бир ҳафтагача қишлоқда шөв-шув гап давом этди. Кўпчилик Кошевой оиласини қириб, йўқ қилиб юборгани учун уни қоралади. Жамоат пулига ўликларни кўмишди; Кошевоининг кулбасини сотмоқчи бўлишди-ю, бироқ харидор топилмади. Қишлоқ атаманининг буйруғи билан дера-за қопқоқларига кўндалангига тахта тўсиб, михлаб ташлашди. Болалар қўрқиб анча вақтгача бу мудҳиш жойдан узоқроқда ўйнашар, чол ва кампирлар бу хосиятсиз кулба ёнидан ўтаётib чўқинишар, шаҳидлар арвоҳига фотиҳа ўқишарди.

Сал орада пичан ўроғи бошланиб қолди-ю, бу во-кеа ҳамманинг эсидан чиқиб кетди.

Қишлоқ аҳолиси иш билан овора, фронт янгиликларидан бошқа нарсага қизиқмас эди. От-улови қўлида қолган рўзгор эгалари сўкина-сўкина, ноилож фронт учун арава беришарди. Деярли ҳар куни улар ҳўқиз ё отларини ишдан қўйиб станцияга юборишга мажбур эдилар. Чоллар ўроқ машинадан отларини чиқараётib кўпинча урушни қарғашар, бу қадар чўзилганидан нолишарди. Лекин минг нолиган билан тўп ўқи, патрон, ўрам-ўрам тиканли симларни, озиқ-овқатларни фронтга ташимай илож йўқ. Аксига ўша кунлари ҳаво бирам очиқ келган эдикি, қани энди етилган барра пичани ўриб, вақт ғаниматда йифишириб ола қолсанг...

Пичан ўриш тараддудига тушган Пантелей Прокофьевич Дарьядан қаттиқ хафа эди. Чунки келини

бир жуфт ҳўқиз қўшиб, патрон ортиб кетганди, юкни нариги бекатга ташлаб тез қайтиши керак бўлса ҳам, бир ҳафтадан бери ундан дом-дарак йўқ эди; бир жуфт ишонган қари ҳўқизи бўлмагандан кейин чолнинг даштга бориши бутунлай фойдасиз эди.

Яхиси, Дарьяни юбориш керак эмасди... Пантелей Прокофьевич келинининг ўйинқароқлигини, молга тузук қарамаслигини яхши билса-да, юборишга бошқа одам топилмаганидан ҳўқизларни ноилож унга топширган эди. Дуняшкани юбориб бўлмасди, чунки бегона казаклар билан йўлга чиқиш қиз боланинг иши эмас; Натальянинг болалари ёш; нима қилсин энди: Дарья, мен бора қолай деб турганда, бу дардисар патронларни чол ўзи ташисинми? Келинн илгари ҳам тегирмонга, сўкжувозга ёки бошқа бирон жойга бориши зарил бўлиб қолса, жон деб борарди, чунки у уйдан нарида доим ўзини эркин ҳис қиласарди. Ҳар сафар бир ёққа борса димоғи чоғ, хурсанд бўлиб қайтарди. Қайнатасининг кўзидан нарироқда бўлса, хотинлар билан тўйгунча фийбат қила олар ва дидига ёққан биронта казакни йўлдан уришни яхши кўрарди: «Пайти келганда ўйнаб қол» деган гап оғзидан тушмасди. Петро ўлгандан кейин ҳам Ильинична уни қаттиқ тергарди: эри тириклигига тийилмаган Дарьяни энди тийиб олмоқчи бўлиб жон куйдирарди.

Пантелей Прокофьевич ҳўқизлар қаровсиз қолишини билган эди-ю, бироқ бошқа илож топилмагандан кейин келинини жўнатишга мажбур бўлган эди. Жўнатишга жўнатиб қўйиб, кетидан бир ҳафтагача роса ташвишини тортди. Гоҳо кечалари уйғониб кетиб: «Ҳўқизларимдан ажрадим!»— деб уҳ тортарди.

Дарья ўн бир кун деганда уйга қайтди. Пантелей Прокофьевич эндинигина даладан келиб турган эди. У Аникушканинг хотини билан шерикликка пичан ўраётган эди, Дуняшка билан уни даштда қолдириб, овқат олиб келгани уйга қайтганди. Чолу кампир ва Наталья иснушта қилаётгандарига деразадан арава фидиракларининг шалдирагани эшитилди. Наталья дераза ёнига югуриб борди-ю, рўмолини кўзигача бостириб

ўраган Дарьяни кўрди: чарчаган, озиб кетган ҳўкизларни у қўрага ҳайдаб киргизмоқда эди.

— Дарьями?— деб сўради чол чайнаётган луқмасини ютолмай.

— Дарья.

— Хайрият, ҳўкизлардан умидимни узувдим-а! Худога шукур! Дайдимай ўлгур, тезроқ қайта қолса бўлмасканми...— деб пўнғилларди чол ҳам чўқиниб, ҳам кекириб.

Дарья ҳўкизларни боғлаб емакхонага кирди, тўрт қават қилиб тахланган шолчани остонаяга қўйди-да, уйдагилар билан саломлашди.

Пантелей Прокофьевич ер тагидан Дарьяга тикилиб, саломга жавоб бермасдан:

— Вақтли қайтдингу, келинжон! Яна бир ҳафта юрсанг бўларди!— деб заҳрини сочди.

— Ўзингиз борсангиз вақтли келардингиз!— деб узуб олди Дарья, чанг босган рўмолини бошдан олаётib.

Ильинична келин билан қайнатанинг орасига тушиб, гапга аралашди:

— Нега мунча кеч қолдинг!

— Юборишмади, шунинг учун кеч қолдим.

Пантелей Прокофьевич шубҳаланиб бош чайқади.

— Христонянинг хотинига нариги бекатдаёқ жавоб беришади-ю, нега сенга жавоб беришмайди?

— Ҳа, менга жавоб беришмади!— Дарья кўзи билан еб қўядигандай ўқрайди.— Ишонмасангиз, ўзингиз бориб, аравалар устидан турган бошлиқдан сўраб кела қолинг.

— Кетингдан суриштириб юрадиган аҳмоқ йўқ, энди сени бир ёққа юбориб бўпман. Бир кунмас, бир кун ўлигинг келар!

— Қўрқитмай қўя қолинг! Ўзим ҳам бормайман энди! Бор десангиз ҳам бормайман!

Чол жаҳлидан тушиб:

— Ҳўкизлар соғми?— деб сўради.

— Ҳаммаси соғ. Ҳўкизларингизни жин ургани йўқ...— Дарья истар-истамас жавоб берар, қовоғидан қор ёғиб турарди.

«Йўлда биронтаси билан топишгану, шундан аж-
ралганига хафа», деб ўйлади Наталья.

У ҳамиша Дарьяга ачинар ва унинг ҳаром-хариш
юриб ўрганганидан жирканарди.

Нонуштадан кейин Пантелей Прокофьевич энди
жўнамоқчи бўлиб турганда, қишлоқ атамани келиб
қолди.

— Йўлингни тўсмаслигим керак эди-ю, Пантелей
Прокофьевич, кетмай тур, гап бор.

Чолнинг жони ҳалқумига келди:

— Ҳойнаҳой, яна аравага келгандирсан?— деб
зўрма-зўраки мулойимлик билан сўради у.

— Йўқ, гап бошқа ёқда. Бугун бутун Дон армияси-
нинг қўмондони, генерал Сидорин бизнинг қишлоққа
келади. Тушундингми? Ҳозир чопар хат келтириди,
станица атамани ёзибди: чоллар билан хотинларни
битта қўймай йиғинга тўпланг, деб буорибди.

— Эси жойидами ўзи?— бақирди Пантелей Про-
кофьевич хуноб бўлиб.— Шундай долзарб маҳалда йи-
ғини нимаси? Менга бир қишлиқ пичанни ўша сенинг
генералинг ўриб берармикин?

— Генерал менга қандай бўлса, сенгаям ўшан-
дай,— деди атаман қизишимасдан.— Мен нимани бую-
ришса, ўшани қиласман. Ҳўқизларни чиқар! Ноң туз
билан кутиб олиш керак. Айтгандай, иттифоқдош ге-
нераллар ҳам бирга келаётганмиш.

Пантелей Прокофьевич арава ёнида бирпас ўйла-
ниб турди-да, индамай ҳўқизларни чиқара бошлади.
Атаман, чолга гапи таъсир этганини кўриб чеҳраси
очилди.

— Биянгдан фойдалансак бўлармикин?— деб сў-
ради.

— Уни нима қилмоқчисан тағин?

— Уч отлик аравадан иккитасини ясатиб, Ёмон
жарга пешвоз чиқарилсин деб буорибди, арвоҳ ур-
гур. Бунаقا тарантасни қаердан оламану, отларни
қайдан топаман — ақлим шошиб қолди! Қаллаисаҳар
туриб, қишлоқни гир айланиб юрибман, қора тер-
га ботиб, тўртта от топдим, холос. Ҳамма одам
далада иш билан банд, дод деганинг билан фойда-
си йўқ!

Пантелей Прокофьевич жаҳлидан тушиб биясини беришга, ҳаттоки рессорли тарантасини ҳам ўз ихтиёри билан атаманга топширишга рози бўлди. Ҳар ҳолда келаётган одам армия қўмондони, ёлғиз ўзи бўлса, бошқа гап эди, ёнида ажнабий генераллар бор! Пантелей Прокофьевич генералларни ҳамиша ҳурмат қилиб ўрганган, ҳатто соясига салом беришга тайёр эди...

Атаманинг жонбозлиги натижасида иккита уч отлиқ тарантас бир амаллаб тайёрланди-да, мұтабар меҳмонларни кутиб олмоқ учун Ёмон жарга жўнатилди. Халқ майдонга йифилди. Кўп одам пичан ўришни йиғиштириб қишлоққа югурди.

Пантелей Прокофьевич, бўлар иш бўлди деб қўл силтади-да, тоза кўйлагини, ҳошияли мовут чалвори-ни, бир вақтлар Григорий совфа қилиб олиб келган фуражкани кийиб ясаниб олди, сўнгра кампирига «Даръяни даштга юбор, Дуняшкага сувминам овқат оборсин», — деб тайинлади-да, сипогарчилик билан майдонга равона бўлди.

Бирпастдан кейин катта йўлдан чанг кўтарилиб қишлоқ томон ёпирилиб келаверди, чанг орасидан алланима йилтираб кўринди, ниҳоят олисдан автомобиль сиренасининг товуши эшишилди. Кўк рангга бўялган иккита яп-янги автомобилда меҳмонлар келмоқда эди; автомобилдан анча кейинда икки тарантас даладан келаётган ўроқчилардан ўзиб, қўнғироқларини жингирлатиб бўш қайтмоқда эди. (Почтачилар аравасига тақиладиган бу қўнғироқларни атаман аллақаердан топиб, бугунги тантанали маросим учун дугаларга осиб қўйган эди.)

Майдондаги оломон типирчилаб қолди, ғовур-фувур бошланди, болаларчуввос кўтаришли. Атаман ҳовлиққанидан оломон орасида у ёқдан-бу ёққа югуриб, меҳмонларга нону туз топширишга муносиб қарияларни қидира бошлади. Кўзи Пантелей Прокофьевичга тушиб, суюнганидан унга ёпишиб олди:

— Худо хайр берсин, ўзинг қойил қилмасанг, иш чатоқ! Сен кўпни кўргансан, пасти баландни яхши биласан... Улар билан қўл беришиш ва мағимла қилишни биласан... Ўзинг Кенгаш аъзосисан, ўғлинг

бўлса, ҳалигига... Сендан илтимос, нон-тузни ўзинг тутасан, менинг юрагим чопмаяпти, ҳалитдан тиззала-рим қалтирай бошлади.

Бу қадар иззату икромдан боши осмонга етган Пантелей Прокофьевич олдин йўлини қилиб: «йўқ» «йўқ», деб турди, кейин бирданига бўйини ичига тортиб, наридан-бери чўқинди-да, устига гулдор сочиқ ёпилган лагандаги нон-тузни қўлига олди, тирсаги билан одамларни турта-турта, олдинга чиқди.

Иккى автомобиль майдонга қуюндай яқинлашмоқда, овози бўғилган хилма-хил тусдаги бир гала ит кетидан эргашиб акиллашмоқда эди.

Рангида ранг қолмаган атаман Пантелей Прокофьевичдан:

— Қалай? Сен... Кўрқаётганинг йўқми?— деб сўради шивирлаб.— Бундай каттакон амалдорларни умрида биринчи марта кўриши эди. Пантелей Прокофьевич кўкимтири кўзларини чақнатиб, ер тагидан атаманга бир қараб қўйди-да, меҳмонларнинг салавоти босиб бўғилиб қолган овозини аранг чиқариб:

— Ма, манавини ушлаб тур, мен соқолимни тараб олай, ушласанг-чи, ахир!— деди.

Атаман бажону дил лагани олди, Пантелей Прокофьевич соқол-мўйловини тараб, чўлоқлигини сездир-маслик учун майиб оёгининг учгинасига босиб, мардонавор кўкрак кериб турди-да, яна лагани қўлга олди. Бироқ қўллари шу қадар қалтираб кетдики, атаман хавотирланиб:

— Ҳой, кўзингга қара! Ушлаб тура оласанми ўзинг?— деб сўрашга мажбур бўлди.

Пантелей Прокофьевич унинг гапини назарига илмай, кифтини қоқиб қўя қолди. Бў одамнинг аҳмоқона саволини қаранг! Ушлаб туролмай, ташлаб юборар-миди? Кенгаш аъзоси бўлган, лашкар атаманининг саройида ҳамма билан бемалол қўл бериб кўришган одам, келиб-келиб аллақандай бир генералдан қўрқсинми энди? Бу шўрлик атаман эсини еб қўйибди!

— Ҳей, биродари азиз, мен Кенгашга борганимда лашкар атаманинам бемалол...— деб туриб Пантелей Прокофьевичнинг дами ичига тушиб кетди.

Олдинги автомобиль чолдан ўн қадам нарироқда тўхтади. Соқоли олинган, кенг козирёкли фуражка кийган ва ажнабийча ингичка погон таққан шофер жойидан сакраб тушди-да, автомобиль эшигини очди. Мosh ранг форма кийган икки ҳарбий автомобильдан тушиб оломон томон юрди. Улар тўғри Пантелей Прокофьевичга қараб келаверишди. Чол эса хода ютгандай қаққайганича қотиб қолди. Ниҳоят, шу соддacha кийингланларнинг генерал эканини, уларнинг кетидан келаётганлар эса, кийимлари шинамлигига қарамай, анчайин мулозимлар эканини ҳам фаҳмлаб олди. Тобора яқин келаётган меҳмонларга чол киприк қоқмай тикилар, тикилган сари ҳайрон бўлар. афти бужмаярди. Бу нимаси, генералча эполетлари қани? Аксельбанту орденлари қани? Совлатига қараб генераллиги ни билиб бўлмаса, важоҳати анчайин солдатдан фарқ қилмаса, бу қандай генерал бўлди? Бирпастдаёқ Пантелей Прокофьевичнинг ҳафсаласи пир бўлди-қўйди. Генераллик номига иснод келтирувчи шу бемаъни генералларни тантанали суратда кутиб олиш учун аҳмоқ бўлиб тайёрлангани ўзига алам қилди. Оббо, ка-софат-э, агар у шунаقا генерал келишини олдинроқ билганда, бунчалик овора бўлиб ясанмасди ҳам, бунчалик ҳовлиқиб кутмасди ҳам, лоақал, мана бу нон солинган дардисар лаганин кўтариб, қоққан қозиқдай қаққайиб турмаган бўларди; нон ҳам чала пишган: сўлагини эплолмаган бирон кампир ёнгандир буни... Умрида бировга сўзини бермаган Пантелей Прокофьевичнинг келиб-келиб шу ерда шармандаси чиқса бўладими! Бундан бир минут олдин орқасида турган болалар ҳиқиллашиб: «Болалар! Уни қаранглар: маймоқ Мелеховнинг қаққайганини томоша қилинглар! Худди хода ютганга ўхшаб турибди!» деб майна қилишганини ўз қулоғи билан эшитган эди. Шунчалик масхара бўлганига, майиб оёғининг учига босиб, қимирламай турганига яраша, арзийдиган генерал келганидаям бошқа гап эди... Пантелей Прокофьевич аламига чидолмай, жони ҳалқумига келган эди. Ҳамма айб ана шу қўрқоқ, ношуд атаманда! Ўига келди-ю, йўқ нарсага ҳовлиқиб, бия билан тарантасни олди, бекорга тилини бир қарич осилтириб,

қишлоққа зир югуриб, қўнгироқ қидиргани қолди. «Мол кўрмаган одам қўтиришни бошига кўтаради» дегани ҳаққос рост. Пантелей Прокофьевич кўрган генераллар оллида ип эшолмайди! Масалан, император кўригига шундай генераллар бўлардики: кўкси тўла кресту медаль, зарбоф уст-бош тилладай ярақлайди; қараган сари қарагинг келади: генералмас икона! Булар-чи, ҳаммаси кўк кийимда, уларнинг кўк қарғадан фарқи йўқ. Биттаси, бошига ҳарбийча фуражка топилмагандай, тўр тутилган ғалати котелок қийиб олибди, чироқ ёқиб қидирсанг юзида бир дона тук топилмайди, қирилган пўстдумбадай тап-тақир... Пантелей Прокофьевич қовофини осилтириб олди, жирканиб энди тупуринмоқчи бўлганда аллаким елкасига туртиб:

— Қўлингдагини обориб тут!..— деб шивирлади.

Пантелей Прокофьевич олға томон юрди. Генерал Сидорин, унинг бошидан оша оломонга назар ташлади-да, баланд овоз билан:

— Салом, жаноби қариялар!— деди.

— Саломат бўлсинлар, жаноби олийлари!— Пойма-пой қилиб чуғурлашди қишлоқликлар.

Генерал Пантелей Прокофьевичнинг қўлидан нону тузни илтифот билан қабул қилиб «раҳмат!» деди-да, лаганин адъютантига берди.

Сидориннинг ёнида турган новча бўйли, қорни ичига кириб кетган инглиз полковниги, кўзигача бостириб кийган шлёми остидан ўқрайиб, казакларни томошга қиласарди. Кавказдаги Британия ҳарбий миссиясининг бошлиғи генерал Бриггснинг буйруғига биноан, у генерал Сидоринга ҳамроҳ бўлиб большевиклардан озод этилган ерларни айланиб кўрарди; полковник таржимонлар орқали казакларнинг кайфияти қандайлигини батафсил текшириб юрар ҳамда фронтлардаги аҳвол билан танишарди.

Полковник йўл азобидан, бир хил дашт манзарасидан, бир-бирига қовушмаган гаплардан ва улуғ давлат вакили сифатида зиммасига юкланган мураккаб вазифалардан қийналиб чарчаган бўлса-да, король хизматида юрганлигини унутмас эди. У дикқат билан станица атаманининг нутқига қулоқ солар, асосан ҳамма

гапни тушунарди, чунки рус тилини билар, лекин буни бошқалардан яшириб юрарди. У инглизларга хос тақаббурлик билан шу турган жанговар қиёфали, хилмажил характерли дашт фарзандларининг қорача юзларига тикилиб қарап ва қараган сари казаклар оммасининг ирқий жиҳатдан бу қадар аралаш-қуралаш бўлиб кетганлигидан таажжубланаарди: оқ-сариқдан келган славян типли казак ёнида мӯғул башарали казак турарди, унинг ёнида кир латта билан ярали қўли боғланган, ҳабашдай қоп-қора йигит иконага ўхшаш нуроний бир чол билан пичирлаб гаплашарди; бу эски бичимда казакча чакмон кийган, ҳасса ушлаган чолнинг томирида кавказ қони жўш ураётгани шубҳасиз эди...

Полковник тарихни оз-моз биларди; казакларни томоша қилаётib: «Бу ваҳшийларнинг ўзлари тугул, неваралари ҳам энди бирорта янги чиққан Платов қўл остида Ҳиндистонга юриш қилолмайди»,—деб хаёл сурарди. Унинг фикрича, большевиклар устидан ғалаба қозонилгандан кейин, гражданлар урушида толиқиб, силласи қуриган Россия узоқ йиллар давомида ўзига келолмай, улуғ давлатлар сафидан чиқиб қёлиши ва яқин ўн йиллар орасида Британиянинг Шарқдаги мустамлакаларига таҳдид сололмаслиги керак эди. Большевиклар устидан ғалаба қозонилишига полковник шубҳасиз ишонарди. Ақли расо, урушдан олдин бир неча йил Россияда яшаган бўлса ҳам, ярим ваҳщий мамлакатда коммунизм идеяларининг тантана қилишига бутунлай ишонмасди..

Полковникнинг диққатини пичирлашиб гаплашэтган аёллар жалб этди. У бошини бурмасдан, кўз қирида уларнинг шамол ялаган япалоқ юзларига назар ташлаш билан лаблари буришиб, истеҳзоли кулиб қўйди.

Пантелеј Прокофьевич нон-тузни топшириб, оломонга аралашиб кетди. Вешенскаядан келган аллақандай бир маҳмадананинг казаклар номидан меҳмонларни табриклаб гапирган нутқига чол қулоқ ҳам солмасдан, оломонни айланиб ўтди-да, нарироқда турган уч отли аравалар ёнига борди.

Отлар совундай кўпириб кетган, ҳарсиллаб зўр-

ға нафас олишарди. Чол ўртага қўшилган ўз бияси олдига бориб, енги билан унинг тумшуғини артди-ю, чуқур нафас олди. Ҳамма нарсадан шу қадар ихлоси қайтган эдики, сўкина-сўкина бияни чиқариб, уйига етаклаб кетгиси келарди.

Шу вақт генерал Сидорин татарскликларга қарата нутқ сўзлай бошлади Орқадан туриб қизилларга қарши жанг қилганлари учун уларни мақтаб кетди:

— Сизлар умумий душманимиз бўлган қизилларга қарши мардонавор курашибдингиз. Сизларнинг бу хизматларингизни большевиклар зулмидан энди халос бўлиб келаётган ватанимиз асло унутмайди. Биз, шу қишлоқлик баъзи бир аёлларнинг қизилларга қарши қурол кўтариб чиққанини биламиз; мен иш кўрсатган айрим аёлларга мукофот тақдим эгишни истардим. Ҳозир номлари ўқилган қаҳрамон казак аёлларнинг олдинга чиқишларини сўрайман!

Офицерлардан бири калтагина рўйхатни ўқиб эшиттирди. Рўйхатдаги энг биринчи ўринда Дарья Мелехова турар эди, қолганлари қўзғолоннинг дастлабки кунлари ўлдирилган казакларнинг хотинларч, Сердоб полки таслим бўлгандан кейин Татарскка ҳайдаб келинган асир коммунистларни қийнаб ўлдиришда Дарья қатори қатнашган аёллар эди.

Дарья Пантелей Прокофьевичнинг буйругини ерда қолдириб, далага бормаган эди. У худди байрамдагидай ясаниб-тусаниб, аёллар тўпида турарди.

Ўз фамилиясини эшитиши билан дарҳол хотинларни нари-бери туртқиляб, олға қадам ташлади, бошиндаги тўр уқали оқ рўмолини йўл-йўлакай тузатиб, кўзларини сузиб, уялгансимон жилмайганича тобора яқинлашиб бораверди. Шунчалик узоқ йўл босиб чарчаганига, жазман овлаб эндигина уйга қайтганига қарамасдан у ҳозир ҳам танноз ва сўлим эди! Сузилган хумор қўзларининг ялтираб туриши офтоб урмаган оппоқ бетларини равшанроқ қилиб кўрсатарди, бироқ қорага бўялган ўйноқи қошлари билан жилмайган лабларидан беҳаёлиги, дили бузуқлиги сезилиб турарди.

Оломонга орқасини ўгириб турган бир офицер

Даръянинг йўлини тўсиб турарди. У офицерни астагина итариб:

— Қайнисингилларга йўл беринг!— деди-да, Сидорин ёнига борди.

Генерал адъютант қўлидан георгий лентаси тақилган медални олди, бармоқлари қовушмаса ҳам бир амаллаб Даръянинг кўксига, кофтасининг чап томонига тақиб қўйди-да, кўзига кулиб қаради.

— Сиз март ойида ҳалок бўлган хорунжий Мелевховнинг хотини бўласизми?

— Ҳа.

— Ҳозир сиз беш юз сўм оласиз. Пулни манави офицер беради. Лашкар атамани Африкан Богаевский ҳамда Дон ҳукумати, ботирлик кўрсатганингиз учун сизга ташаккур айтиш билан бирга, таъзия билдириб... сизга ҳамдard эканлигини изҳор қиласидар.

Генерал айтган гапларнинг ярмисини ҳам Даръя тушунмади. У «раҳмат» дегандай бош қимирлатди-да, адъютантнинг қўлидан пулни олди-да, кулимсираб ўрта яшар генералнинг кўзига қаттиқ тикилди. Иккисининг бўйи қарийб баравар бўлганлигидан Даръя bemalol унинг қотма юзини томоша қиласар ва ўша онда: «Петромнинг нархини ерга урворишибди: бир жуфт ҳўкиз келади, холос бу пулга... Бинойидай генерал экан, гапга тушунса керак» деб ўзига хос енгилтаклик билан бузуқ хаёлларга борарди. Сидорин бўлса, Даръянинг тезроқ кетишини кутиб турар, бироқ у негадир жойидан қимирламасди. Сидориннинг орқасида турган адъютант ва офицерлар кўз қисишиб, бу шилқим бева жувонни бир-бирларига кўрсатишар, ҳаммасининг кўзи ўйнар эди; ҳатто инглиз полковниги ҳам жонланиб қолди, камарини тузатиб депсинди, хўмрайган башараси тиржая бошлади.

— Кетсам бўладими?— деб сўради Даръя.

— Ҳа-ҳа, албаттa!— шошилиб рухсат берди Сидорин.

Даръя бесўнақай ҳаракат билан пулни кофтасининг ичига тиқди-да, оломон томон юрди. Такаллуф ва нутқлардан безор бўлган офицерлар унинг илакдай эшилиб қадам қўйишига маҳлиё бўлиб, кетидан тикилиб қолишиди.

Марҳум Мартин Шамилнинг хотини тортина-тортина Сидорин ёнига борди. Унинг ҳам эгнидаги эски кофтасига медаль тақиғат, бирданига йиғлаб юборди, у шу қадар ҳўнграб, ув тортиб йиғладики, кулиб-ўйнаб турган офицерлар афталарини бирданига бужмайтириб, бевага ачингандай жиддий бўлиб олишди.

— Сизнинг эрингиз ҳам ўлдирилганми? — деб сўради Сидорин қисвоғини солиб.

Йиғлаётган хотин қўли билан юзини тўсиб, бош қимирантди холос.

— Бечоранинг бир тўда болалари бор! — деди казаклар орасидан аллаким дўриллаб.

Сидорин инглизга бурилиб қаради ва баланд овоз билан:

— Биз большевиклар билан курашда фавқулодда қаҳрамонлик кўрсатган аёлларни мукофотлаёттирмиз, — деди. — Кўпчилигининг эри қўзғолон бошида большевиклар томонидан ўлдирилган, лекин бу бевалар эрларининг қасоси учун ерлик коммунистлардан тузилган каттакон бир отрядни тор-мор қилишли. Ҳали мен мукофотлаган биринчи жувон — офицернинг хотини, золимлиги билан донги кетган машҳур коммунист-комиссарни ўз қўли билан ўлдирган.

Таржимон-офицер наридан-бери инглизчага таржима қилиб тушунтириб берди. Полковник тинглаб бўлиб бошини эгди:

— Мен бу аёлларнинг қаҳрамонлигига қойилман. Айтинг-чи, генерал, улар эркаклар билан баравар жангда қатнашганми?

Сидорин қисқача қилиб:

— Ҳа, — деб жавоб берди-да, шоша-пиша қўли билан имлаб, учинчи хотинни ёнига чақирди.

Мукофотларни топширилиб бўлгач, меҳмонлар дарҳол станицага жўнадилар. Халойиқ гарқалди, шоша-пиша пичан ўришга кетди; итлар акиллашиб кетидан эргашган автомобилларнинг қораси ўчгандан кейин, черков панжара девори ёнидаги уч чолдан бошқа, майдонда ҳеч ким қолмади.

— Ғалати замон бўлли-да! — деди чоллардан бири қўлларини кериб. — Кадимги замонда Егорьев креси ё медалини катта-ко-он иш кўрсатган одамга, қаҳ-

рамонларга бериларди, биласанми кимга! Юрагида ўфити бор йигигларга! Довюрак ботирларга бериларди! Крестга ишқибоз бўлиб майдонга чиқадиган азамат камдан-кам учарди. «Ё крест билан қайтарсан, ё йўлда қолиб кетарсан», деб бежиз айтилганмас. Энди хотинларга медаль беришялти... Кошки, арзийдиган иш бўлса, бекордан-бекорга... Казаклар қишлоққа ҳайдаб келган асиirlарни, қуролсиз одамларни калтаклаб ўлдиришиди. Шуям ботирлик бўлибдими? Нималигига тушунсам, худо урсин!

Кўзи хира, ўзи нимжон иккинчи чол оёғини кериб, шошмасдан чўнтағига қўл солди, латтадан тикилган ўроғлиқ тамаки халтасини олиб:

— Нималигини Черкасскдаги бошлиқларимиз билади. Ўзларича маслаҳатлашиб: «Хотинларга ҳам медаль бериб кўнглини олсак, ҳамманинг руҳи кўтарилиб, астойдил жанг қиласидиган бўлади».—деб ўйлашган бўлса керак. Бунисига медаль, бунисига беш юз сўмдан пул беравергандан кейин, хотин зоти бундай мукофотга учмай туролармиди? Баъзи бир фронтга боргиси келмай, урушдан қочиш пайига тушадиган казакни хотини ўйда тинч қўярмикин энди? Миясини қоқиб қўлига берар! Хотин киши бамисоли ҳакка: қақиллайвериб ахiri енгади. Энли ҳар бир хотин «менгаям зора-мора медаль тегса» деб орзу қиласди.

— Йўқ, Федор, бу гапларинг нотўғри, биродар!— деб эътиroz билдири учинчи чол.— Лойиқ топгандан кейин мукофотлашади-да. Бечоралар бева қолишиди, шу ёрдам билан рўзгорларини тиклаб олишади, ҳазилакам пулмас ахир! Ўктаамликлари учун медаль беришиди. Ҳамма анқайиб турганда, аввало Дашка Мелехова чиқиб Котляровни отиб ташлади, тўғри қилди! Тўғрими-нотўғрими, бунга парвардигор ўзи қози, лекин хотинларда айб йўқ: ҳар ким ўзидан ўтканини ўзи билади...

Чоллар то кечки ибодат маҳалигача талашиб-тортишишиди. Черковда қўнгироқ чалиниши билан учаласи ўринидан туриб, шалкаларини олиб чўқинишди-да, одоб билан бирин-кетин панжара ичкарисига киришиди.

Қизиқ нарса: Мелеховлар оиласига бир бало бўлди ўзи! Яқиндагина Пантелей Прокофьевич ўз уйида ўзини яккаю ягона хўжайин хис қиларди, уйдагилар ҳаммаси унга сўзсиз итоат этишар, йўқчиликка ҳам қаноат қилишарди, ҳамма иш жойида, ҳамма нарса тахт: кўзи ўткир, пишиқ одамнинг бу рўзғорга кўп йиллардан бери бош бўлиб келгани кўриниб туради. Тупла-тузук иноқ оиласига шу йил кўкламда бир гап бўлди... Дастлаб Дуняшқа айниди. Отасига бўйсунмаганини очиқдан-очиқ билдириласа ҳам, шу вақтгача ўзи билиб қилиб юрган ишларни, худди бирорвонинг хизматини қилаётгандай қўл учидагина қиласидиган бўлди. У бутунлай камгап, одам ёқтирамайдиган бўлиб қолди, илгариги хохолаб кулишларидан асар қолмади.

Григорий фронтга жўнагандан кейин Наталья ҳам чолу кампирдан узоқлашди; у болалар ёнидан бери келмас, фақат улар билан яйраб гаплашар ва нимагадир қаттиқ куюниб, ўз ёғига ўзи қовуриларди. Наталья бирон марта ёрилиб, дардини ўз яқинларига айтмас, бирорвонга ҳасрат ҳам қилмас, юраги эзилиб қийналганини ҳеч кимга сездирмасди.

Дарья тўғрисида оғиз очмаса ҳам бўларди: мажбурият билан арава ҳайдаб бориб келгандан бери у бутунлай ўзгариб кетганди. Кўпинча қайнатасига гап қайтарар, Ильиничнани бўлса-ку назарига илмас, бекордан-бекор ҳаммага заҳрини сочарди, «тобим йўқ» деган баҳона билан пичан ўроғига чиқишни йиғишириб, бугун-эрта Мелеховлар уйидан кетадиган одамдай, ноңлож юарди.

Шундай қилиб, Пантелей Прокофьевичнинг кўз олдида оила тарқала бошлади. Чолу кампир якка мөхов бўлиб қолишли. Оила аъзоларини бир-бирига боғлаб турган иплар тўсатдан узилиб, самимий муносабатлар йўқолган, сал нарсага аразлашиб, кўпинча сану манга бориб қолишарди... Қадимгидай стол атрофида ҳамжиҳатлик билан яйраб ўтириш ўрнига, тасодифан тўпланган етти ёт бегоналардай ўшшайиб ўтиришарди.

Ҳаммаси урушнинг касри эканини Пантелей Про-

кофъевич яхши тушунарди. Дуняшканинг ота-онасидан хафалигига са ёзаб: жонидан азиз кўрган, қизларга хос пок муҳаббат билан севган яккаю ягона кишисига — Михаил Кошевойга тегмайсан, деб бутун умидини пучга чиқаришгани эди; Наталья бўлса, Григорийни яна Аксинья ўзига оғдириб олганидан нафаси ичига тушиб, қон ютиб юради. Пантелей Прокофьевич ҳаммасини билар, лекин оиласадаги қадимги тартибни ўрнатишдан ожиз эди. Дарвоҷе, чолга ҳам қийин: орада шунча гап ўтгандан кейин, қизининг ашаддий большевикка тегиши учун қандай қилиб розилик беради? Ахир, куёв жувонмарг аллақайси фронтда тентираబ юрган бўлса, бунинг устига, ўзи қизил аскар бўлса, розилик беришининг нима аҳамияти қолади? Григорий масаласи ҳам шунга ўхшаш нарса: офицер номи бўлмаганда Пантелей Прокофьевич бирпасда танобини тортиб қўярди. Шундай танобини тортардик, Григорий умрбод Аксиньянинг номини тилга олмайдиган бўларди. Бироқ, уруш турмушни бутунлай остин-устун қилиб юборди, чол ўзи чистаганча яшаш, ўз билгича рўзгорини тебратиш имкониятларидан маҳрум бўлди. Уруш уни хонавайрон қилди, тўнғич фарзандидан жудо қилди, оиласини тўзитиб юборди, ишдан бутунлай кўнглини совутди. Уруш унинг ҳаётига бало-ю қазолай кириб келди, хулли буғдойзорни пайҳон қилган бўрондай, уни зер-забун қилиб ташлади; буғдой-ку, бўрондан кейин яна боягисидай қад кўтариб, офтобла яйраб ўсаверади, аммо Пантелей Прокофьевич энди қад кўтариб ўнгланиб бўпти... Чол, бўлганича бўлди, деб хаёлан ҳаммасига қўл силтади...

Генерал Сидориннинг қўлидан мукофотни олгандан кейин Даъя терисига сифмай қолди. Ўша куни у майдондан димоги чоф бўлиб, ҳовлиқиб қайтди. Кўзларини чақнатиб, Натальяга кўксидаги медални кўрсатди.

— Сенга нечук беришди? — деб сўради Наталья.

— Буни Иван Алексеевич учун олдим, жойи жаннатда бўлсин, итваччанинг! Манавини Петро учун... — деди-да, мақтаниб, Донда чиқсан шалдирاما қоғоз пулдан бир дастасини кўрсатди.

Шундай қилиб, Дарья далага бормади ҳам. Пантелей Прокофьевич овқат билан жўнатмоқчи бўлганда Дарья ўшқириб берди:

— Менга кўп осилаверманг, ота, йўл юриб, итдай чарчаб келдим.

Чолнинг қовоги осилиб кетди. Дарья буни пайқаб, қўпол жавоб қайтарганини хаспўшлаш мақсадида гапни ҳазилга буриб:

— Шундай кунда мени далага жўнатсангиз гуноҳкор бўласиз, отажон! — деди. — Бугун менга ҳайит!

— Үзим обора қоларман, — деди чол бўшашиб. — Хўш, пулни нима қилмоқчисан?

— Пулни нима қилардим? — Дарья таажжубланиб қошини чимириди.

— Пулни нимага харжлайсан, деяпман?

— Бу менинг ишим. Нимани хоҳласам, шунга харжлайман.

— Ие, бу нима деганинг? Пулни Петро учун беришганми, ахир?

— Пулни менга беришган, сиз хўжайнлик қилмай қўя қолинг.

— Сен нима, оила аъзосимисан ё бегонами?

— Оила аъзоси бўлсан, хўш, нима қилмоқчисиз? Пулни мендан тортиб оласизми?

— Мен ҳаммасини бер деяётганим йўқ! Ахир, Петро менинг ўғлимми ё бегонами? Кампир икковимиз тегишимизни олишимиз керакми, йўқми?

Қайнатасининг даъвоси ўринсиз экани очиқданочиқ кўриниб турганлигидан Дарья баланд келиб, чолни масхара қила бошлади.

— Бермайман дедим, бермайман, бир сўм ҳам бериб бўпман! Бу пулда сизнинг тегишингиз йўқ, бўлганда қўлингизга беришарди. Хўш, нима важдан тегишимиз бор деб даъво қиласиз? Бу тўғрида ҳеч қанақа гап бўлгани йўқ-ку! Пул меники, оламан деб овора бўлманг, бермайман!

Пантелей Прокофьевич энди сўнгти далилни пеш қилиб, келинини енгмоқчи бўлди:

— Ахир, сен бизнинг оилада турибсан, ош-нонимизни еяпсан, бас, ҳамма нарса ўртада бўлиши ке-

рак. Оила бир бўлса-ю, ҳар ким ўз ҳолича, билганини қилаверса, бу нима деган гап? Мен бунга йўл қўймайман!— деди чол.

Бироқ Дарья, ўз маблағи бўлган пулга чол эгалик қилмоқчи бўлиб келтирган бу важга ҳам жавоб топди. Уялмасдан илжайиб, қайнатасининг бетига шундай деди:

— Мен сизнинг никоҳингизда эмасман, отажон, бугун уйингизда бўлсан, эртага эрга тегиб кетишим мумкин, ўшанда қорамниям кўрсатмайман! Еган-ичганимни ҳисобладиган бўлсангиз, мен ойлангизда ўн йил малайдан баттар эзилиб ишлаганман, орамиз очиқ!

— Ўзинг учун ишлагансан, манжалақи!— фифони чиқиб бақирди Пантелей Прокофьевич. Чол яна алланималар деб вағиллай бошлади, бироқ Дарья ортиқ тоқат қилолмай, унинг түмшуғи ёнида шартта бурилди-да, этагини силкитиб, ўз ҳужрасига кириб кетди. «Сен айтган анойи мен эмас!»— деб заҳарханда билан ўзича пичирларди Дарья.

Шундан кейин бу ҳақда оғиз очишмади. Ҳақиқатан Дарья ўз ҳақини ҳимоя қилолмайдиган аноишилардан эмас, шунинг учун ҳам чолнинг дўқларидан қўрқмади.

Пантелей Прокофьевич далага жўнаш тараффудига тушиб, кетар олдида Ильинична билан қисқача гаплашиб олди:

— Сен Дарьяга кўз-қулоқ бўлиб юргин...

— Нимасига кўз-қулоқ бўламан?— ҳайрон бўлди Ильинична.

— Уйдан бирор нарсани кўтариб жўнаб қолмасин, шунга хушёр бўл. Билишимча, у бекорга шундай қиласётгани йўқ... Биронтасини топганга ўхшайди, бугун-эрта эрга тегиб кетади.

— Мен ҳам шуни ўйлайман,— деб уҳ тортиди Ильинична.— Шу кунларда унга ҳеч нарса ёқмай қолди... Худди қишлоқдан ташқарига кўчиб чиққан хоҳолдай, оламга аралашмай қўйди. Чиққан қиз — чиғриқдан нари.

— Ҷизга унинг энли кераги ҳам йўқ! Маболо ўзи кетишдан гап очса, қайтариб ўтирма, эси паст! Кетса,

кетаверсин. Ўзиям жонимга теккан.— Пантелей Прокофьевич аравага чиқди, ҳўкизларни юргизаётиб:— Иш деса, қочгани-қочган, ош деса, тайёр, овқатнинг мазалигини танлаб ейишни-ю, сайилгоҳда санқиб юришни билади холос. Раҳматли Петродан кейин бу касофатни уйда сақлашимизнинг ўзи тўғри эмас. Бу хотин эмас — балойи азим!

Чолу кампирнинг гумони бутунлай ўринсиз эди. Эрга тегиши Дарьянинг хаёлига ҳам келмаганди. У эро тўғрисида мутлақо ўйламас, унинг дарди бошқа эди...

Ўша куни кечгача Дарья ниҳоятда хурсанд ва ҳамма билан эл бўлиб юрди. Боя пул масаласида қайнатаси билан айтишиб қолган бўлса-да, бу нарса унинг руҳига заррача таъсир этмаганди. У ўзини ойнага солиб, кўксидаги медални ҳар тарафлама томоша қилиб кўрар, беш марта қайтадан кийиниб, йўл-йўл георгий лентасининг қайси кофтага ярашганлигини билмоқчи бўларди ва: «Яна бир-иккита крест олганимда жуда соз бўларди-да!»— деб ўзича ҳазиллашарди Ниҳоят, Ильиничнани ҳужрага чақириб, унинг қўлига йигирма сўмлик пулдан иккитасини тутқазди ва Ильиничнанинг сербўғин қўлини иссиқ кўксига босиб: «Бу— Петро учун... Унинг арвоҳига черковда дуойи фотиҳа ўқитинг, ойижон, худойи қилиб тарқатинг...»— деди-да, йиғлаб юборди... Орадан сал вақт ўтар-ўтмас, ҳали кўз ёши қуримай туриб Мишатка билан ўйнаша бошлади, бошидаги яп-янги ипак рўмолини Мишатканинг устига ёпиб, умрида йиғламаган ва кўз ёши нималигини билмаган киши сингари мириқиб кулди.

Дуняшка даладан қайтгач, Дарья ўзида йўқ суюниб кетди. Медални қандай бориб олганини унга гапириб берди, генералнинг дабдаба билан нутқ сўзлаганини, инглизнинг қаққайганича, бақрайиб қараб турганини тақлид қилиб кўрсатди, сўнгра киши билмас Натальяга кўз қисиб қўйди-да, Дуняшканни лакиллатиш учун жиддий қиёфада:

— Биласанми, офицер хотини эканимни, георгий медали олганимни назарда тутишиб, яқинда мениям офицерлик даражасига кўтаришади, бир сотня кекса казакларга командир қилиб тайинлашади,— деди:

Наталья болаларининг кўйлакларини ямаш билан овора эди, Дарьянинг гапларига кулгиси қистаса ҳам ўзини босиб ўтиради, Дуняшка эса на ишонишини ва на ишонмаслигини билмай, қўл қовуштириб ялинарди:

— Дарьушка! Барака топкур! Худо хайр берсин, тўғрисини айтгин! Гапингни қайси бири рост, қайси бири ёлғонлигини ажратолмай қолдим. Ҳазиллашмасдан гапиргин.

— Ишонмайсанми? Демак, сенда мия йўқ! Мен сенга ростини айтяпман. Ҳамма офицер фронтда бўлса, бу ердаги чолларга ким таълим беради, ахир? Солдатчасига юришни, милтиқ ушлашни ким ўргатади? Шунақаларнинг ҳаммасини менга беришади, мен ҳали бу қари шайтонларни шундай боллайнинки!.. Командирлик қанақа бўлишини ҳозир кўрсатаман, сен қараб тур!— Дарья қайнанаси кўриб қолмасин учун, ошхона томондаги эшикни беркитиб қўйди; этакларини йифиштириб чот орасидан ўтказди-да, орқа томондан ушлаб олди, сонигача очилган, болдиirlари йилтираган ҳолда меҳмонхонани солдатчасига айланиб чиқиб, Дуняшка-нинг рўпарасида тўхтади-да, жўрттага овозини йўғон қилиб команда берди:

— Чоллар, смирно! Соқолларингни баландроқ кўтар! Кругом, налево, ма-а-арш!

Дуняшка ўзини тутолмасдан, юзини кафтлари билан тўсиб, пиқирлаб кулиб юборди. Наталья кулги аралаш:

— Ҳой, Дарья, бас энди! Бу хурсандчилик хафагарчиликка айланмаса гўргайди,— деди.

— Хафагарчилик эмиш-а! Ўзинг умрингда хурсандчиликни кўрганмисан? Агар масхарабозлик қилиб кулдирмасам, диққатбозликдан ўласанлар!

Бироқ Дарьянинг күнчакларини узоқ давом этмади, гур этиб ёнган ўтдай бирдан сўнди. Орадан ярим соат ўтар-ўтмас у ўз ҳужрасига хомуш бўлиб қайтди-ю, кўксидаги хосиятсиз медални жаҳл билан юлиб олиб, сандиқча ташлади; қўлларини жағига тираб, аллавақтгача дераза олдида ўтиреди, ўша кечаси қаёққадир кетиб, хўroz бир чақиргандада уйга қайтди.

Шундан кейин тўрт кунгача далада астойдил ишлади.

Далада одам етишмаганлигидан иш судралиб борар, кунига атиги икки десятина ернинг пичанини ўришарди, холос. Ёмғир ёғиб, яна иш ортди: тўпланган пичанни ёйиб, офтобда қуритишга тўғри келди. Яна бошқатдан ғарам қилишаётган маҳалда яна ёмғир бошланиб, кечқурундан то эрталабгача шатирлатиб қуиди. Кейин ҳаво очилиб, шарқдан шамол турди, ўроқ машиналарнинг иши яна юришиб кетди, қорайган тўп-тўп пичанлардан тахир мөгор ҳиди аралаш буғ кўтарилиб, даштни туман сингари бошдан-оёқ қоплади. Лекин кўкимтир буғ орасидан қоровул тепаларнинг қораси, кўм-кўк сойларнинг ўзани ва олисадаги ҳовуз бўйида ўсган ям-яшил толларнинг учи кўзга фира-шира қўриниб турарди.

Тўртинчи куни Даръя даладан тўғри станицага бормоқчи бўлди, тушлик овқатга ўтирганларида шу тўғрида гап очди.

Пантелеј Прокофьевич норози бўлиб:

— У ёқда қанақа зарил ишинг бор? Якшанбагача кутсанг бўлмайдими?— деб калака қилди.

— Бўлмайди, шунақа зарил иш.

— Бир кун сабр қилсанг бўлмайдими?

— Йўқ!

— Ҳа майли, ўлиб турган бўлсанг, бир кун сабр қилишнинг иложи бўлмаса, бора қол. Лекин қанақа зарил иш экан ўзи? Билсак мумкинми?

Даръя ҳозиржавоблик билан:

— Ҳамма нарсани билаверсангиз, ажалингиздан бурун ўлиб кетасиз,— деди.

Гап келганда отасини ҳам аямайдиган тили заҳар келинидан чол хафа бўлиб тупуринди-да, яна қайта суринширмади.

Эртасига Даръя станциядан тўғри қишлоққа қайтди. Уйда Ильинична билан болалардан бошқа ҳеч ким йўқ экан. Мишатка келинойисининг олдига югуриб келди, бироқ у қўли билан тўсиб, ёнига йўлатмади-да, қайнанасидан:

— Наталья, қаерда?— деб сўради.

— Полизда, картошка чопяпти. Нима ишинг бор

эди? Ё чол чақириб кел, деб юбордими сени? Кўп жиннилик қилавермасин! Бориб шундай дегин!

— Ҳеч ким мени юборгани йўқ, Натальяга айтадиган гапим бор эди.

— Пиёда келдингми?

— Ҳа.

— Қачон ўриб бўлишади?

— Эртага.

Кампир зинадан тушиб кетаётган Даръянинг кетидан эргашиб:

— Тўхта, мунча шошасан ахир? Пичан ёмғирда қолиб кўл нобуд бўлгани йўқми?— деб суриштириди.

— Йўқ, унчалик эмас, Мен борай, вақт зиқ...

— Полиздан қайтишингда уйга келиб, чолнинг кўйлагини ола кет, эшиттингми?

Даръя эшитса ҳам эшитмасликка олиб, шоша-пиша молхона ёни билан кетди. Пристань ёнида тўхтади, кўзларини сузиб, буғланиб ётган ям-яшил Дон бўйларини томоша қилди-да, секин-аста полиз томон юрди.

Дон устида шамол гувиллар, балиқчи қушлар қанотларини йилтиратиб учишарди. Сув тўлқинланиб, қирғоқни оҳиста ялаб қайтарди. Тип-тиниқ кўкиш туман қоплаган бўр тоғлари қуёш нурида жимирлашганга ўхшаб кўринарди, ёмғирда чўмилган Дон бўйидаги ўрмон эса, эрта баҳор пайтидагидай ёшарип, ям-яшил тусга кирган эди.

Даръя чорифини ечиб қаварган оёқларини ювдида, дарё бўйида, иссиқ шағал устида узоқ ўтириб қолди; у кўзларини кафти билан қуёшдан пана қилиб, балиқчи қушларнинг нолигандай чийиллашига, тўлқинларнинг бир меёрда шалоплашига қулоқ соларди. Атрофдаги жимжитлик, балиқчи қушларнинг юракни эзувчи чийилдоқ овози таъсир этиб, Даръянинг йиғлагиси келар, тўсатдан бошига тушган фалокатни яна эсига солиб, дардига яна дард қўшарди.

Наталья зўрға белини кўтариб қаддини ростлади-да, қўлидаги кетмонни четан деворга суюб қўйди, бирданига Даръяни кўриб қолиб, унинг олдига келди.

— Мени чақиргани келдингми, Даشا?

— Йўқ, ўз дардим билан келдим...

Иккиси ёнма-ён ўтириди. Наталья рўмолини ечиб сочларини тузатди, гап кутиб Дарьяга тикилди; шу икки-уч кун орасида унинг ранг-рўйи бу қадар ўзгариб кетганини кўриб ҳайрон қолди: унинг бетлари ич-ичига кириб, кўкариб кетган, пешонасида узунасига чуқур ажин пайдо бўлган, кўзлари бежо, аланг-жаланг эди.

— Сенга нима бўлди? Юзларинг кўкариб кетибди-ку!— деб сўради Наталья унга раҳми келиб.

— Кўкармоқ тугул қорайиб кетарсан...— Дарья зўрғатдан илжайди-ю, жим бўлиб қолди.— Чопиладиган жой кўпми ҳали?

— Кечгача бўламан. Гапирсанг-чи, сенга нима бўлди, ахир?

— Менгами? Касал тегди... Мараз юқтиридим... Анави сафар борганимда илаштириб келдим... Бир абллаҳдан юқди, ўзи офицер тағин!

Наталья чўчиб тушди:

— Вой шўринг қурсин!— деди қарс уриб.

— Шўрим қуриди... кимга арз қилишимни, нима дейишимни билмай қолдим... Айб ўзимда... У ёғимдан кириб, бу ёғимдан чиқиб, ахийри авради, итвачча. Тиши оппоқ бўлсаям, ичи мараз экан... Мени худо урди энди.

— Вой шўрлик-э! Энди нима қиласан?— Наталья кўзларини каттароқ очиб Дарьяга тикиларди, лекин у ўзини босиб, кўзини ердан олмасдан бирма-бир сўзлаб берди:

— Йўлда келаётганимдаёқ менга бир бало бўлганини сезган эдим... Бироқ олдин парво қилмадим: ҳалигигидақа нарса бўлиши мумкин деб ўйладим... Ўзинг биласан-ку, хотинларнинг ой сайин қийналишини... Кўкламда бир қоп буғдойни ердан узиб оламан деб, уч ҳафтагача қон тўхтамаган эди. Лекин бу галгиси бошқачароқ, унақага сира ўхшамади... Аломати кўринли... Кеча станица фельдшерига бордим. Бирам уялдимки, ер ёрилмади кириб кетсам... Энди шубҳам йўқ... Овсинингни худо урди, Наталья!

— Қаратиш керак, лекин қандай юз чидайди? Бу касални тузатиб бўлармишми!

— Йўқ, овсин, менини тузалмайдиган касал.—
Дарья лабларини буриб илжайди ва боядан бери эн-
гашиб турган бошини кўтариб, ўтдай ёниб турган
кўзлари билан Натальяга қаради:— Касалим ёмон—
сифлис. Буни ҳеч ким тузатолмайди. Кимики бунга
мубтало бўлса, бурни чириб тушади... Андрониха
моманинг бурнига разм согланмисан?

— Энди нима қилмоқчисан, Даша?— йиғламси-
раб сўради Наталья ва ўша заҳотиёқ кўзлари ёшга
тўлди.

Дарья чурқ этмади. У кунгабоқар поясига ўралган
чирмовуқ гулини узиб, кўзига яқин олиб борди. Пар-
дан ҳам енгил ва нозик пушти ранг карнайчадан, оғ-
тобда қизиган тупроқникига ўхшаш аллақандай оғир
ҳид келарди. Дарья гулга термилиб тўймас, бу кўрим-
сиз оддий гулни умрида биринчи марта кўргандай,
таажжубланиб томоша қиласди; ниҳоят, бурун катак-
ларини кериб гулни исқади-да, янги чопилган, шамол-
да сергиган тупроқ устига секингина авайлаб қўйди.

— Энди нима қилишимни сўрасанг...— деди
Дарья,— мен станицадан келаётib бўй тўғрида ўйлаб-
ўйлаб тагига етолмадим... ўзимни-ўзим ўлдираман,
қўлимдан келадигани шу-да! Қимнинг ўлгиси келади,
овсин? Лекин нима қилай, бошқа илож йўқ. Агар
қаратадиган бўлсан, барибир, ҳамма эшитади, қиши-
локда овоза бўлиб, шармандам чиққани, одамлар май-
на қилиб кулгани, мендан юз ўғиргани қолади... Шу
аҳволда мени бирор бошига урадими? Ҳусним кетиб,
кундан-кун сўлиб, ишдан чиқаман... Йўқ, истамай-
ман!— Дарья худди ўзича мулоҳаза қилаётган кишига
ўхшаб гапирав, Натальянинг куюниб эътиroz бил-
дирганига мутлақо аҳамият бермасди.— Мен кеча ста-
ницага бормасдан олдин: агар ҳалигидай касаллардан
бўлса, албатта қаратаман, деган хаёлда эдим. Шунинг
учун ҳам чолга пулни бермадим, фершилларга тў-
лашга керак бўлар, деб ўйловдим. Ҳозир бошқа қа-
рорга келганман. Турмушдан бездим! Ҳеч нарса кў-
зимга кўринмайди. Истамайман!

Дарья эркакчасига болохонадор қилиб сўкинди-да,
тфу деб тупуриб, узун киприкларида осилиб турган
кўз ёшларини қўлининг сирт томони билан артди.

— Бу гапларинг яхшимас... Ҳудодан қўрқиш кёпрак! — деди Наталья шивирлаб.

— Менга энди худонинг кераги йўқ. Умр бўйи халяқит берганини кўрдим, лекин кароматини кўрмадим,— деб жилмайди Дарья; унинг мана шу хилда шўхлик ва айёрлик билан жилмайиши Натальяга қадимги Дарьяни эслатди.— Ундай қилиш мумкинмас, бундай қилиш гуноҳ, доим қиёмату дўзах билан қўрқитишидаи холос... Мен ҳозир етти дўзах азобидан зўр азобни бўйнимга олганман. Жонимдан тўйдим, Наташка! Одамлар кўзимга балодай кўринади... Осонгина ўламану кетавераман: чунки, менга ачинадиган, кетимда йиғлаб қоладиган ҳеч кимим йўқ. Кўз қиймайдиган ғамгузорим ҳам йўқ...

Наталья жон куйдириб, астойдил ялиниб, бунаقا хаёлни миянгдан чиқариб ташла, деб қайтариб кўрди, бироқ Дарья олдин паришонлик билан унга қулоқ солиб турган бўлса-да, бирданига жаҳли чиқиб, уни жеркиб ташлади.

— Сен бу гапларни қўй, Наташка! Мен сенинг олдинга насиҳат эшитгани келганим йўқ! Мен сенга ўз дардимни айтгани, бугундан бошлаб болаларингни менга йўлатма деб тайинлагани келдим. Менинг қасалим юқимли, фершил шундай деди. Ўзим ҳам буни илгари эшитгандим, болаларингга тағин юқибнетиб қолмасин дейман, тушундингми, эси паст? Қампиргаям сен айтгин, менинг тилим бормайди айтишга... Мен... мен ҳали-бери ўзимни осмайман, ҳавотир бўлма, ёв қуваётгани йўқ... Яна бир оз яшай, ёруғ дунёни томоша қилиб, хайрлашиб олай... Дунёда ҳали нимани кўрибмиз? Пешонанг деворга «тақ» этиб тегмагунча, атрофингда нима бор, нима йўқлигини билмайсан, кўча чангитиб юраверасан. Ўзим шу ёшга кирсам ҳам ҳеч нарсани кўрмай, кўрдан баттар юраверган эканман; станицадан қайтишда Дон бўйлаб келаётисб: «Яқинда бу жойлар билан умрбод хайрлашаман» деган хаёлга боришим билан кўзим шартта очилди! Қарсам, Дон сувлари мавж уриб турибди, қуёш нурида садафдай товланиб жимирилашиди, кўриб кўзларим қамашиб кетди. Атрофга қарадим: худоё тавба, олам шундай гўзалки!.. Кошки

мен буни шу вақтгача кўрган бўлсам...— деди-да, дами ичига тушиб кетди; у уялинқираб кулимсираб, қўлларини сиқарди. Томоfigа бир нарса тиқилгандай бўлди, ўпкаси тўлиб кетди; ниҳоят, Дарья ўзини босиб, янада баландроқ овози билан ҳаяжонланиб гапира бошлади:— Йўлда бир неча марта йиғлаб ҳам олдим. Қишлоққа етганда мундоғ қарасам — Донда болалар чўмилишялти... Қараб туриб, юрагим орзиқиб кетди, ўзимни тутолмай, жинни бўлган одамдай ҳўнграб йиғладим. Қумга мукка тушганимча икки соат қимирламай ётдим. Ўзинг ўйлаб кўр: менгаям қийин ахир...— Дарья ўрнидан туриб этагини қоқди, бошидаги рўмолини тўғрилаб олди.— Биттагина овунчоғим бор: ўлсам — у дунёда Петро билац кўришишим дарров кўз олдимга келади. «Мана, мен ҳам келдим, Петро Пантелеевич, йўлдан озган шармисор хотинингни қабул қил, жонгинам!» дейман.— Дарья яна қадимги қичиқлигини қилиб:— У дунёда маза қилиб юраман, эrim урмайдиям, урищмайдиям, уришқоқларни жаннатга киргизмасмиш, тўғрими? Хайр, Наташенька, яхши қол! Дардим нималигини қайнанамга гапириб бер, эсингдан чиқмасин, хўпми?— деди.

Наталья юзини чўзинчоқ кир кафтлари билан тўсиб, қимир этмай ўтиради. Бармоқлари орасидан йилтироқ кўз ёшлари тирқираб оқарди. Дарья новдан тўқилган четан дарвозагача бориб, яна изига қайтди ва жиiddий йўсинда:

— Бугундан бошлиб мен алоҳида идишда овқат ейман. Шуни ойимга тайинлаб қўй. Айтгандай, тағин бу гапни отамга айтиб юрмасин, худди чол мени уйдан ҳайдайди-я! Бир камим энли шу эди... Мен бу ердан тўғри далага, пичанзорга бораман. Хайр!

XIV

Эртасига ўроқчилар уйга қайтди. Пантелей Прокофьевич тушдан кейин пичан ташимоқчи бўлди. Дуняшка ҳўқизларни Донга ҳайдаб кетди, Ильинична билан Наталья дастурхон ёзишга тутинди.

Дарья ҳаммадан кейин келиб, столнинг бир четига ўтирди. Ильинична унинг олдига бир товоқ карам-

шўрва билан қошиқ, нон қўйди, қолганларга ҳар вақтдагидай, тоғорада овқат сузиб келтириди.

Пантелей Прокофьевич ҳайрон бўлиб, хотинига қарди ва кўзи билан Дарьяни кўрсатиб:

— Бу нимаси? Нега унга овқатни бошқа солиб бердинг? Дини бўлакми? — деб сўради.

— Нима ишинг бор? Овқатингни есанг-чи!

Чол Дарьяга қараб, истеҳзоли кулди:

— Ҳа, тушундим! Медаль олгандан бери идишдан овқатланишни истамай қолди бу. Сен нима, Дашка, биздан ҳазар қиласанми?

— Ҳазар қилаётганим йўқ, мумкин эмас,—деди Дарья хириллаб.

— Нега мумкин бўлмайди?

— Томогим оғрияпти.

— Оғриса нима қипти?

— Станицага бориб фершалга кўрсатсам: алоҳида идишда овқат егин, деди.

— Мениям томогим оғриган, лекин мен идишимни бошқа қилганмасман, худога шукур, касалим бировга юққанмас. Сеники қанақа касал экан ўзи?

Дарьянинг раңги оқариб кетди, у лабларини артида, қошиқни қўйди. Чолнинг эзмалигидан жаҳли чиққан Йльинична ўшқириб берди:

— Сен мунча тирғиласан унга? Дастурхон тепасидаям жағинг тинмайди. Одамга елимдек ёпишиб олади-я!

— Менга нима? — деб пўнғиллади Пантелей Прокофьевич.— Менга қолса — тоғорани кўтариб ичмайсанми...

Чол жаҳл устида иссиқ шўрвадан бир қошифини оғзига солди-ю, оғзи куйиб қайтарган эди, шўрва соқолларидан оқиб кетди:

— Овқат қўйишният билишмайди, лаънатилар! — деб чинқириб юборди.— Қайнаб турган нарсани сузиб келаверадими, ахир?

— Қўп жаврамаганингда оғзинг ҳам куймасди,— деди Йльинична.

Дадаси соқолига илашган карам билан картошка увоқларини териб олаётганини кўриб, Дуняшка пиқ этиб кулиб юбораёзди, лекин бошқалар ниҳоятда

жиддий бўлганлиги учун қўрқиб, у ҳам ўзини босиб олди-ю, юзини тескари ўгирди.

Овқатдан кейин икки келину қайната икки арава билан пичанга кетишди. Пантелей Прокофьевич дастаси узун паншаҳа билан пичанни аравага узатиб турди, Наталья сал-пал мөгор ҳиди келган қулоқ-қулоқ пичанни аравага босиб топтайверди.

Наталья билан Дарья кейинроқда қолиши, чол эса, йўрга ҳўқизларни ҳайдаб келинларидан анча узоқлашиб кетганди.

Қуёш тепа орқасига ботмоқда. Кечга томон пи-чандан бурқсиган аччиқ ислар анча пасайди, кун қизиган пайтдаги тахирлигини йўқотиб, хушбўй ҳидлар димоққа урила бошлади. Иссик ҳам шаштидан қайтди. Ҳўқизлар илдам-илдам қадам қўйишар, туёклари остидан кўтарилган чанг йўл ёқасидаги чанглларга қўнарди. Оқ карракнинг ичидағи пушти ранг гуллари қуёшда йилтираб товланарди. Гуллар устида қовоқ-арилар ғўнфиллаб айланишарди. Чурраклар чуриллашиб, даштнинг энг четидаги ҳовузга учиб ўтмоқда эди.

Дарья қўлларини жағига тираганича, тебраниб келаётган арава устида ҷўзилиб ётиб олган, аҳён-аҳёнда овсинига қараб қўярди. Наталья хаёлга чўмиб, бётаётган қуёшга тикилиб олганди; қизифи шуъла унинг беғубор юзларида экс этарди. Дарья овсинига қараб: «Наташка бахтиёр, эри, болалари бор, оилада ҳамма уни яхши кўради, унинг армони йўқ, мен... мен тамом бўлган одам. Ўлиб кетсан ачинадиган ҳеч кимса йўқ», деб хаёл сурарди; бирданига ала-мини Натальядан олгиси, унга озор бериб, дилини оғритгиси келди. «Дунёнинг ҳамма азоби ёлғиз мен учунми? Туну кун азоб чекиб, барбод бўлган ҳаётими-ни ўйлаб умрим ўтаверадими?» деган қарорга келиб, яна бир карра Натальяга юзаки қараб олди-да, мумкин қадар мулоим ва самимий овоз билан:

— Наталья, сендан узр сўрамоқчиман...— деди.

Бироқ Натальянинг хаёли бошқа ёқда эди. Кун ботишини томоша қилаётсиб, бирданига илгариги бир хотира эсига тушиб кетди. У вақтда Наталья Григорийнинг қайлифи эди; Григорий юз кўрарга келган

куни Наталья дарвозагача уни кузатиб чиққанди; ўша куни ҳам қуёш лоладай қизариб ботган, толзорда захчалар чағиллашар эди... Григорий эгарда қалмоқчасига қийшайиб олиб жўнаб кетганди, Наталья дукиллаб урган кўксига қўлларини босиб, шодиёна кўз ёслари аралаш унинг кетидан термилиб қолганди... Дарья хаёлини бузгани учун Натальянинг ғаши келиб, нохушлик билан сўради:

— Нима тўғрисида узр сўрамоқчисан?

— Сенинг олдингда айборман... Шу йил кўкламда Григорийнинг уйга келиб кетгани эсингдами? Ўша куни кечқурун мен сигир соғаётувдим. Молхонадан уйга қайтиб келяпсам, бирданига мени Аксинья чақириб қолди. Уйига обкириб менга манави узукни зўрлаб ҳада қилди,— Дарья бармогидаги узукни қимирлатиб қўйди.— Григорийни чақириб берасан деб, унамаганимга қўймади... Менга барибир... Эрингга айтдим. Ўша кечаси иккови... Сенга у,— Кудинов келди, тонг отгунча бирга бўлдик, дегани эсингдами? Ёлғон! Сени лақиллатди. Эринг Аксинъянинида эди.

Ҳанг-манг бўлиб ранги оқариб кетган Наталья қуриган қашқабеда чўпини бармоқлари билан синдиради.

— Мендан хафа бўлма, Наташа. Шу гапни сенга очганим учун менинг ҳам дилим сиёҳ...— деди Дарья жўрттага гап ковлаб, у ер тагидан Натальянинг кўзига қараб қўйди.

Наталья чурқ этмай, кўз ёрларини ютиб ўтиради. Эскирган дардини қўзғаб, ярасига туз сепган бу гап унга шу қадар оғир таъсир этгандики, Дарьяга нима дейишини билмай, фақат юзини тескари ўғирар, мусибатдан бужмайган афтини кўрсатмасликка ҳаракат қиласади, холос.

Қишлоққа яқинлашганларида Дарья ўзини-ўзи койий бошлади: «Негаям айтдим-а? Тилим қичимай ўлсин! Энди бир ойгача кўз ёши тийилмайди! Ҳеч гапдан хабарсиз юргани яхшийди. Бундай бефаҳмларнинг кўрга ўхшаб оламдан бехабар яшагани маъқул». Дарья гапи оғир ботганлигини пайқаб, Натальяни овутишга тушди:

— Кўп ғам ема, овсин. Шунгаям куясанми? Менинг

дардим сеникidan ўн чандон оғир, лекин пинагимни бузмай, балодай юрибман! У ёғи маълуммас: Аксинья билан бўлдими ё Кудинов ёнига бордими, буни худо билади. У ёғини мен текширганим йўқ. Кўзингминам кўриб, қўлингминам ушламагандан кейин, бирордан гумонсираш тўғримас.

— Ўзим ҳам сезгандим...— деди секингина Наталья рўймол учи билан кўз ёшларини артиб.

— Сезган бўлсанг, нега ўшанда тузукроқ суриштиргадинг? Эҳ, шуди йўқ! Менинг эрим бўлганда осон қутулолмасди! Мен уни шундай қистибасга олардими, она сути оғзидан келарди.

— Чинини билишга ўзим қўрқувдим... Осон эмас,— Наталья ҳаяжонидан тутилиб-тутилиб гапирав, кўзлари мўлт-мўлт қиласди.— Сен Петро билан шу хилда бирга яшай олгансан... Лекин мен агар... кечирган кунларимни... бошимга тушган кулфатларни ўйладиган бўлсам... кўзимга дунё қоронғилашади, дод дегим келади.

— Ундаи бўлса, бу гапни бутунлай эсингдан чиқар!— деб соғдиллик билан маслаҳат берди Дарья.

— Кошки эсдан чиқариш осон бўлса!..— деб чиякирди Наталья хириллаб ғалати овоз билан.

— Менга қолса, унтиб юборардим. Шуям дард бўпти-ю!

— Қани бўлмаса, ўз касалингни унугин-чи!

Дарья кулиб юборди.

— Жон деб унтардиму, бироқ бу дардисар ҳар қадамда эслатиб туриби-да! Менга қара, Наташка, агар истасанг аниғини Аксиньядан суриштириб билиб оламан, нима дейсан? Ҳамма гапни менга айтади. Худо урсин, айтади! Оламда сирини яширадиган, кимни қандай яхши кўришини бирорга айтмайдиган хотин йўқ. Ўзимдан қиёс қиласвер!

— Бу хизматинг менга керакмас. Ҳалиги хизматинг ҳам етиб ортади,— деди Наталья совуққина қилиб.— Мен кўр эмасман, нима мақсадда бу гапни очганингни кўриб турибман. Сен қўшмачилик қилганингни менга ачинганинг учун гапириб берганинг йўқ, дилимни оғритиш, мени янада қийнаш учун гапирдинг...

— Топдинг! — деди Дарья хўрсиниб. — Ўзинг ўйлаб кўр: ёлғиз мен азоб тортавераманми, ахир?

Дарья аравадан тушиб, тизгинни қўлга олди-да, оёқлари судралиб қолган ҳўкизларни етаклаб дўнгдан тушира бошлади. Қишлоқ тор кўчасига кираверишда арава ёнига борди:

— Ҳой, Наташка! Сендан бир гап сўрамоқчиман... Ростини айт, эрингни жудаям яхши кўрасанми?

— Қанақа яхши кўрганимни ўзим биламан,— деди Наталья мужмал қилиб.

— Бундан чиқди, жуда яхши кўраркансан,— деб хўрсинди Дарья.— Мен шўрлик умримда биронни сев-ганмасман. Ит мижоз вақтичоғликтан бошқаси менга насиб бўлган эмас... Қани энди тузалиб, янгидан тур-муш бошласам... бинойидай бўўп кетармидим, а?

Ёз оқшоми бирпасда қоп-қора тунга айланди. Қаронфида аравадан пичанни тушира бошладилар. Хотин-лар чурқ этмай ишлашарди. Пантелей Прокофьевич Ҳай-ҳайлаганида ҳам Дарья пинагини бузмасди.

XV

Дон армияси билан юқоридонликларнинг бирлашган қисмлари Усть-Медведицадан чекинган қизилларни шимолга томон қувиб боришимоқда эди. 9-Қизил Армиянинг жангда кўп талафот кўрган полклири Медведица яқинидаги Шашкин қишлоғи ёнида душманни тўхтатмоқчи бўлиб уриниб кўрди, бироқ казаклар яна улоқтириб ташлади, шундан кейин улар қатъий қаршилик кўрсатолмай, то Грязно-Царицин темир йўл тармоғига довур чекинишди.

Григорий ўз дивизияси билан Шашкин ёнидаги жангда қатнашиб, ёнбошдан зарбага учраган генерал Сутуловнинг піёда бригадасини тор-мор бўлишдан асрар қолди. Григорийнинг буйруғига мувофиқ ҳужумга ўтган Ермаков қўл остидаги отлиқ полк икки юзга яқин қизил аскарни асир туширди, тўртта станок пулемёти ҳамда ўқ ортилган ўн бир аравани ўлжа қилди.

Григорий биринчи полклик бир тўда казаклар билан Шашкин қишлоғига кириб келди. Дивизия

штаби жойлашган уй олдида, хом сурпдан тикилган кўйлак-иштонда ним яланғоч асиirlар фуж-фуж бўлиб туришарди; ярим сотня казак уларга соқчилик қиласди. Кўпчилик асиirlарнинг уст-боши тунаб олинган бўлиб, оппоқ ич кўйлакда қолган оломон орасида онда-сонда битта мosh ранг гимнастёркали одам кўринарди, холос.

Прохор Зиков асиirlарни кўрсатиб:

— Ҳаммаси оппоқ ғозга ўҳшаб қопти-я! — деди.

Григорий жиловни тортиб, отини ёнга бурди-да, казаклар орасидан Ермаковни топди-ю, бармоғи билан имлаб чақирди:

— Бери кёлсанг-чи, нега одамлар орқасига яшириниб ўзингни опқочасан?

Ермаков муштини оғзига тўсиб йўтала-йўтала яқинроқ келди. Қоп-қора сийрак мўйловлари остида, ёрилган лабларида қотиб қолган қон доғлари кўринар, ўнг бети шилинган, кўкариб-шишиб кетган эди. Ҳуҷум пайти ўқдай кетаётган остидаги от қоқилиб йиқилганда, Ермаков эгардан чалпакдай учиб, қорни билан қатқалоқ ерга тушган, икки саржинча жойгача сирғаниб борган эди. Ӯзи ҳам, оти ҳам баравар ўрнидан турди, орадан бир минут ўтар-ўтмас, афти башараси қоп-қора қонга бўялган Ермаков бош яланг, қиличини яланглаган ҳолда, ён бағирдан қуондай учиб бораётган казаклар кетидан от қўйиб етиб олган эди...

Ермаков Григорийнинг ёнига яқин борди-да, сир бой бермасдан:

— Нега сендан ўзимни опқочаман, бирор жиноят қилибманми? — деб сўради-ю, бироқ ўзи уялинқираб. Қонга тўлган, жанг тугаганига қарамай, ҳали ҳам ўтдай ёниб турган кўзларини опқочарди.

— Нима қилганинг кўзинг айтиб турибди! Хўш, нега орқада келяпсан? — деб сўради Григорий жаҳл билан.

Ермаков шишиб кетган лаблари билан зўрга илжайиб, кўз қирида асиirlарга назар ташлади:

— Гапингга тушунолмадим: кўзимга нима қилибди? Менга топишмоқ айтганинг билан барибир тополмайман, бугун отдан йиқилиб, миям айниб турибди...

Григорий қамчиси билан қизил аскарларни кўрсатиб:

— Сен буюрдингми?— деб сўради.

Ермаков бу асиirlарни чиндан ҳам энди кўраётгандай, шу қадар айёрик билан таажжубландики, афти ўзгариб кетди:

— Оббо итваччалар-э! Тўнаб олишибди-я! Вой лаънатилар-эй! Бирпасда қандай қилиб улгуришибди-а?.. Оббо олғирлар-эй! Ҳозиргина мен қаттиқ таинлаб, «буларга тегманглар!» деб кетувдим-а! Кўз очиб юмгунимча бечораларни қип-яланғоч қилиб қўйишибди...

— Сен менга лўттибозлик қилма! Муғомбирлик кетмайди! Асиirlарни тунаб олишга сен рухсат этдингми?

— Худо сақласин! Эсинг жойидами ўзи, Григорий Пантелеевич?

— Буйруқ эсингдами?

— Э, анави буй...

— Ҳа, ўша буйруқ!..

— Албатта, эсимда. Ёдаки биламан! Мактабда шеър ёдлаганимдай қилиб, ёдлаб олганман...

Григорий беихтиёр илжайди-да, эгардан энгашиб туриб, Ермаковнинг елка тасмасидан ушлади. Ӯлимдан қайтмайдиган бу ботир командирни Григорий яхши кўрарди.

— Харлампий, ҳазилни йиғиштири! Бу ишга нега йўл қўйдинг? Копилев ўрнига келган янги полковник юқорига маълум қилса, кети яхши бўлмайди, жавобгарликка тортиласан. Терговга тушиб, сўроқ беравериб, онангни кўрасан...

— Ростини айтсан, чидаб туролмадим, Пантелеевич!— деди Ермаков, жиддий ва содда қилиб.— Уларнинг кийими чақмоқдай экан, Усть-Медведицада яқиндагина ҳаммасига янги уст-бош берилган; менинг одамларим кийимдан абгор: на эгнида бор, на уйида. Буларникини биз олмаганимиз билан барибир нарёқдагилар тўнаб олишади? Асиirlни биз қўлга туширайлику, кийими анави аглаҳларга қолсинми! Мен жавобгарликдан қўрқмайман, қўлларидан келганини қилишсин! Сен ҳам менга кўп тирғилаверма. Минг айлантирганинг билан барибир ҳеч нарса билмайман,

бу гаплар етти ухлаб тушимга ҳам кирганмас. Хулла-си, тuya кўрдингми, йўқ!

Отлиқлар асиrlар ёнига борди. Гурунглашиб турган асиrlар жимиб қолди. Четда турган асиrlар отлардан ўзларини опқочишар, бир нарсани сезгандай казакларга ҳадиксираб тикилишарди. Қизил аскарлардан бири Григорийнинг командин эканини фаҳмлаб, унга яқин борди-да, узангисидан ушлади:

— Ўртоқ командин! Қазакларингизга айтинг, ҳеч бўлмаса шинелларимизни қайтариб беришсин. Бизга оталик қилинг! Кечалари совуқ, мана қаранг, қипяланғоч қолдик.

◀ Ёз куни совқотиб ўлмассан, шумшук!— деб ўшқирди-да, Ермаков қизил аскарни оти билан нари суриб, Григорийга ўгирилиб қаради: — Сен хотиржам бўлгин, мен йигитларга тайнлайман, эски-туски кийимларини беришади. Қани, йўлни бўшат, нарироқ тур деяпман, ҳой полвонлар. Қазаклар билан жанг қилишни сизга ким қўйибди? Битларингни боқиб уйларингда ўтирсаларинг-ку бўлади-я!

Асиr олинган рота командири штабда сўроқ қилинмоқда эди. Эски клеёнка солинган стол ортида янги келган штаб бошлиғи —полковник Андреянов ўтиради; бу ўзи—ёши қайтган, чакка соchlари оқарган, шалпангқулоқ, бурни пучуқ бир офицер эди. Унинг рўпарасида, столдан икки қадам нарироқда қизил командин турарди. Асиrnинг терговда берган жавобларини иккинчи бир штаб офицери — Андреянов билан яқинда дивизияга келган юзбоши Сулин ёзib борарди.

Қизил командин — новвот ранг сочини калта қилиб олдирган,malla мўйловли киши эди; у оёғи яланглигидан ўнфайсизланиб, сариқа бўялган муздай полда депсиниб турар, ора-сира полковникка қараб қўярди. Қазаклар асиrnинг эгнидаги ёлғиз сариқ хом сурп ич кўйлакдан бошқа кийимини батамом ечиб олишганди, шим ўрнига дабдаласи чиққан қирқ ямоқ, ҳошияси айнигана казакча жулдур чалвор беришган эди. Григорий стол томон ўтаётуб, асиrnинг уялинқирагани, чалворнинг думбадан йиртилган жойини қўли билан тўсиб, баданини бекитишига ҳаракат қилганини пайқаб қолди.

Полковник кўзойнак устидан асирга тикилиб:

— Сиз, Орлов губерна военкомати мобилизация қилди, дедингизми?— деб сўради-да, яна пастга қараб, қўзларини сузиб, аллақандай бир гувоҳномага ўхшаш қоғозни қўлида айлантириб кўра бошлади.

— Ҳа.

— Ўтган иили куздами?

— Қечки куз пайти.

— Ёлғон айтяпсиз!

— Мен ростини айтдим.

— Ёлғон айтяпсиз деяпман...

Асириндамай кифтини қисиб қўя қолди. Полковник Григорийга қаради ва нафрат билан имлаб командирни кўрсатди:

— Бу муттаҳамни томоша қилинг: император армиясининг собиқ офицери, ҳозир қип-қизил большевик бўлиб слибди. Қўлга тушиб, энди мени лақиллатмоқчи: қизилларга тасодифан қўшилганман, мажбуран мобилизация қилишди, деб гап сўқади, холос. Ҳомхаёл гимназистлар сингари келишмаган далиллар билан мени ишонтироқчи бўлади; тўғрисини айтиб, ватанин сотганига иқорор бўлиш учун гражданлик жасорати йўқ... Қўрқади, аплаҳ!

— Қараб турсам, жаноби полковник, сизда гражданлик жасорати борлиги учун боядан бери асирини ҳақорат қилаётган экансиз-да...

— Аплаҳлар билан мен гаплашмайман!

— Мени гапиришга мажбур қиляпсиз.

— Бас энди! Қўп жаҳлимни чиқарманг, йўқса, ҳақорат нималигини амалда кўрсатиб қўйишим мумкин!

— Асирини қийнаш сиз учун ҳам осон, ҳам хатарсиз...

Боядан бери индамай қараб турган Григорий стол ёнига бориб ўтирди-да, ғазабидан бутунлай ранги оқариб кетган, полковник билан баравар айтишаётган асирга хайриҳоҳлик билан жилмайиб қаради. «Полковникни роса боплади!»— деб Григорий ичидагурсанд бўлди, Андреяновнинг шолғомдай-қизариб, асаби қўзиганлигидан лип-лип учиб турган лўппи юзига бадҳоҳлик билан тикилди.

Григорий штаб бошлигини биринчи учрашданоқ

ёмон кўриб қолганди. Андреянов жаҳон уруши йилларида фронтга бормай, панада жон сақлаб қолган офицерлардан бирин эди; бундай офицерлар баъзи бир обўли кишиларнинг, қариндош-уруг ва ошна-оғайниларнинг ёрдами билан хавф-хатарсиз, тинчроқ хизматга кириб олишарди. Полковник Андреянов граждан уруши даврида ҳам йўлини қилиб, Новочеркасскда мудофаа соҳасида ишларди; фақат Краснов атаманликдан бўшатилгандан кейингина у фронтга жўнашга мажбур бўлди.

Григорий, Андреянов билан икки кечада бир уйда тургандан кейин, унинг кимлигини билиб олди. У ўз оғзи билан ниҳоятда художўйлигини, черковдаги диний маросимлар тўғрисида гап очилса, дарҳол кўзига ёш келишини айтди; дунёда унинг хотинидай баодоб аёл йўқлигини, оти Софья Александровна бўлиб, ҳатто бир вақтлари лашкар атамани барон фон Граббе унга мулозамат қилиб, бекорга овора бўлганини гапириб берди; полковник ундан ташқари, марҳум дадасининг қанчалик ер-сув, мулклари борлигини, ўзи қандай қилиб полковник дараҷаси олганини, 1916 йилда қайси олимаком шахслар билан овга чиққанини бирмабир ҳикоя қилиб берди; қолаверса, қиморда энг яхши ўйин — вист, энг фойдали ичимлик — бодиён солинган конъяк, энг қулай хизмат — ҳарбий интендантликда ишлаш деб тушунганигини ҳам яширмади.

Полковник Андреянов яқин жойда тўп отилса, чўчиб тушарди, жигар касаллигини баҳона қилиб, отда юришни унчалик ёқтириласди; у хамиша штаб атрофидаги соқчилар сонини кўпайтиришга кўп аҳамият берарди, казакларни ёмон кўрганини яширмасди, чунки унинг гапига қараганда, казаклар 1917 йилда ватанга хиёнат қилган, ўшандан бери умуман «пастки чиндаги» кишиларнинг ҳаммаси унинг кўзига балодай кўрина-диган бўлиб қолган эмиш. «Россияни фақат дворянлар халос этади!» — дерди полковник. Ўзи ҳам дворянлар оиласидан эканини эслатиб, Андреяновлар насл-насаби Донда энг эски ва энг мұтабар авлод ҳисобланишини гапириб мақтанаради.

Полковник Андреяновнинг асосий нуқсони маҳмаданалиги эди; у бир хил чоллар сингари оғзи тинмай

гапиравериб, ҳаммани безор қиласарди. Бу ҳам бир қасаллик; кўпинча бу нарса ёши қайтган, лекин ёшлигида ҳар нарсага сурбетларча қараб, юзаки баҳо бериб ўргангандан баъзи ақли калта, тили узун кишиларда учрайди.

Бу қабила сергап кишиларни Григорий умрида кўп кўрган, бироқ ҳар доим улардан қаттиқ нафратланиб келган эди. Андреянов билан танишганининг иккинчи куниёқ Григорий ундан ўзини опқоча бошлади; кундузлар қочиб қутулишнинг иложи бўлса-да, қоронги тушиб бирон жойга қўниши билан Андреянов уни қидириб топарди-ю, шоша-пиша: «Бирга тунаймизми?» деб сўрарди, лекин жавобини кутмасдан булбулигўёдай сайраб кетарди: «Сиз, масалан, биродари азиз, казакларнинг пиёда жангга шудлари йўқ, дейсиз, аммо, лекин мен, жаноби олийлари ҳузурида алоқа офицери сифатида хизмат этган давримда... Ҳой, ким бор у ёфда, менинг чамадоним билан тўшагимни келтириб беринглар!..» Григорий чалқанча тушиб ётиб олар, кўзларини юмиб, тишини тишига қўйиб қулоқ соларди, сўнгра ҳурматсизлик бўлса-да, бу жағи тинмас шилқимга срқасини ўтириб бошигача шинелга бурканиб олар, хўноб бўлиб ўйланарди: «Бошқа вазифага кўчирилганим тўғрисида фармон олишим биланоқ бошига биронта оғир нарса билан соламан: лоақал бирон ҳафта тилдан қолиб, ҳамманинг қулоғи тинчир!. Яна Андреянов: «Ухладингизми, юзбоши?»— деб сўрарди. «Ухладим,»— дерди Григорий овозини пасайтириб. «Сабр қилинг ахир, гапим тамом бўлгани йўқ!»— деб у яна вайсашга тушарди. Григорий уйқу аралаш: «Бу шилқимни жўрттага менга юборишган. Бу, албатта Фицхалауровнинг иши бўлса керак. Шундай бефаҳм киши билан бирга ишлаш мумкинми?..» Уйқуга кетаётганида ҳам полковникнинг гапи тугамас: унинг чинилдоқ овози қулоққа игнадай қадаларди.

Мана шунинг учун ҳам Григорий, асир командир штаб бошлигининг адабини берганини кўриб, терисига сиғмай роҳатланарди.

Андреянов кўзларини сузиб, миқ этмай қараб қолди, шалпайган қулоқларининг солинчоғи қизариб кетган, кўрсаткич бармогига йўғон тилла узук тақилган

біппөк ва сергўшт қўли стол устида қалт-қалт қилиб зўрға турарди.

— Менга қаранг, ҳой, ҳунасайи даргоҳ!— деди у тутақишиганидан бўғилиб.— Мен ади-бади айтишгани сизни бу ерга чақирганим йўқ, шуни унуманг! Минг тонганингиз билан барибир қутула олмайсиз, тушундингизми?

— Жуда яхши тушундим.

— Тушунган бўлсангиз — яхши. Ростини айтсам, сиз қизилларга ўз ихтиёрингиз билан қўшилдингизми ё сизни мажбур этишдими, бу билан мутлақо ишим йўқ. Бунинг аҳамияти йўқ, муҳими шуки, сиз бурч, виждон масаласини нотўғри тушунганлигинги учун ростини айтишга унамаяпсиз...

— Виждон деган сўзни икковимиз икки хил тушунсак керак.

— Сабаби шуки, сиз ўз виждонингизни бутунлай йўқотгансиз!

— Лекин менга қилаётган муомалангизни кўриб, сиздан виждон деган нарсанинг умуман бўлганига шубҳаланиб қолдим, жаноби полковник!

— Кўриб турибман, тезроқ бир ёқлик бўлишга шошилаётганга ўхтайсиз, а?

— Кечроқ бир ёқлик бўлсам, менга яхши бўлади, деб ўйлайсизми? Мени қўрқитаман деб овора бўлманг, фойдаси йўқ!

Андреянов қалтироқ қўллари билан портсигарни очиб, папирос ёндириди, икки марта қаттиқ сўрди да, яна асирга мурожаат қилди:

— Демак, саволларимга жавоб беришдан бош тортасиз, шундайми?

— Ўз тўғримдаги саволларингизга жавоб бердим.

— Ўзингизни бошимга ураманми? Сиз каби ифлос шахс мени мутлақо қизиқтирмайди. Марҳамат қилиб, мана бу саволга жавоб беринг: Себряково станциясидан қайси қисмлар сизга мададга келди.

— Айтдим-ку ҳали, билмайман, деб.

— Биласиз!

— Хўп, сиз хурсанд бўла қолинг: ҳа, мен била-ману, лекин айтмайман.

— Ҳозир сизни шомпол билан савалатаман, ундан кейин гапирмаганингизни қўрай-чи!

— Адашасиз!— асир чап мўйловини силаб, қўрқ-масдан илжайди.

— Қамишин полки шу жангда қатнашдими?

— Йўқ.

— Чап қанотингизда суворийлар бор эди, бу қандай қисм?

— Етар энди! Яна бир карра айтиб қўяй: мен бу хил саволларга жавоб бермайман.

— Ҳой итвачча, ё ҳозир айтасан, ё ўн минутдан сўнг отиласан! Қайсисига розисан?

Шу гапдан кейин асир тўсатдан жарангдор овоз билан полковникнинг юзига шартта-шартта айтди-қўйди:

— Боядан бери жонимга тегдингиз, аҳмоқ чол! Деволи қиёмат экансиз-ку! Вой, бефаҳм-э! Агар қўлимга тушганингизда, мен бу хилда тергов қилиб ўтирумасдим!..

Андряновнинг ранги докадай оқариб кетди, наган филофига ёпишди. Ўшанда Григорий шошмасдан ўрнидан турди-ю, огоҳлантириш учун қўлини кўтарди.

— Ана холос! Қараб турсам, икковингиз ҳам тез экансиз... Энди бас қилинглар! Шунча гаплашдинглар, етади! Мижозларинг тўғри келмагандан кейин, ортиқча гапнинг нима ҳожати бор? У ўз шерикларини сотгиси келмади, жуда яхши қилди. Унга қойил бўлиш керак! Худо урсин, мен буни кутмовдим!

— Йўқ, рухсат этинг!..— деб хезланарди Андреянов, тўппонча филофини очмоқчи бўлиб.

— Рухсат этмайман!— деди Григорий кулимсираб. У столга бориб, асирни гавдаси билан тўсиб олди.— Асирни ўлдириш ҳамманинг қўлидан келади. Шу аҳволдаги одамга қўл кўтаришга қандай виждонингиз чидайди? Ўзи асир, қуролсиз бир кимса бўлса, устбошини ялангоч қилиб тўнаб олишган бўлса, тағин сиз унга тўппонча ўқталасиз...

— Қўйворинг! Бу аблаҳ мени ҳақорат қилди!— Андреянов Григорийни итариб ташлаб, наганни филофидан олди.

Асир дарҳол унга тескари ўғирилиб деразага қараб олди-да, совуқдан жунжиккандай кифтларини қисди. Григорий Андреяновни томоша қилиб, илжайиб тураверди. Полковник наганнинг ғадир-будур дастаси кафтига келиб қолганини сезди, беўхшов ҳаракат қилиб тўппонча оғзини ерга қаратди-да, юзини тескари ўгириб олди.

— Қўлимни ҳаром қилгим келмади...— деди нафасини ростлаб, қақраган лабларини ялаб бўлгач, хирлдоқ овоз билан.

Григорий қулгисини тўхтатолмай, йилтироқ тишларининг оқини кўрсатиб кулиб юборди:

— Бекор айтибсиз, барибир отолмасдингиз! Олдин наганингизни бир кўринг: ичиди ўқи йўқ! Кеча тунаған жойимизда мен эрталаб туриб олиб қараганман... Биронта патрон йўқ, ўзи икки ойдан бери тозаланмаган бўлса керак. Ўз қуролингизга сиз яхши қарамайсиз!

Андреянов бошини қуёй солиб бош бармоғи билан наган ўқхонасини айлантириб кўрди-да, кулди:

— Вой, эсим қурсин! Дарвоқе, ўқи йўқ..

Боядан бери ичиди кулиб, четдан индамай томоша қилиб ўтирган юзбоши Сулин тергов дафтарини ёпдида, чучук тил билан:

— Мен сизга бир неча марта буни айтган эдим, Семён Поликарпович: қуролни расво қилиб тутасиз,— деди.— Бугунги воқеа гапим тўғрилигини яна бир карра тасдиқлади.

Андреяновнинг қовоғи осилиб кетди:

— Ҳой, ким бор у ёқда? Солдатлардан бирортасини юбор!— деб чақирди у.

Икки ординарец билан соқчилар бошлиғи даҳлиздан уйга кириши.

— Буни олиб кетинглар!— деди боши билан асирни кўрсатиб.

Асир Григорийга бурилиб қаради-да, унга таъзим қилиб эшик томон юрди. Григорийнинг назарида у, миннатдорлик билан мийигида сал-пал жилмайгандай бўлди...

Одамлар кетиб, оёқ товуши ўчгандан кейин, Андрея-

нов ҳорғин ҳаракат билан кўзойнагини олиб яхшилаб артди-да, заҳрини сочиб:

— Бу абраҳни сиз бажону дил ҳимоя қилдингиз,— деди.— Бу сизнинг ишингиз-ку, бироқ унинг олдида нагандан гап очиб мени ерга қаратганингиз... бу нима қилиқ, а?

— Ҳеч боқиси йўқ,— деди Григорий ярашмоқчи бўлгандек, мулоҳимгина қилиб.

— Йўқ, чакки қилдингиз. Биласизми, мен уни ўлдиришим мумкин эди. Ниҳоятда ярамас одам экан! Сиз келгунча ярим соат роса миямни ачитди. Ундаига алдаб, бундайига чалғитиб кўрди, фирт ёлғон маълумотларни рўкач қилиб, бирам найранг ишлатдики, асти қўяверинг! Гапидан тутиб олганимдан кейин жавоб беришдан биратўла бош тортиб, индамай туриб олди. Ҳарбий сирни ошкор қилишга офицерлик виждони йўл қўймасмиш. Лекин большевикларга қўшилаётган пайтда офицерлик виждони тўғрисида сира ўйламаган бу итвачча... менимча, буни ва командир составидан яна икки кишини енг ичидан отиб ташлаш керак... Булардан керакли маълумот олгунча она сутинг оғзингга келади: ҳаммаси бир сўзлик, тузалмайдиган ашаддий душманлар, аяб ўтиришдан наф йўқ. Сиз нима дейсиз?

Григорий жавоб бериш ўрнига:

— Унинг рота командири эканини сиз қайси йўл билан билиб олдингиз?— деб савол берди.

— Ўз қизил аскарларидан биттаси айтиб берди.

— Менимча, ўша қизил аскарни отиб ташлаб, командирларини тирик қолдириш керак!— Григорий Андреяновга ўсмоқчилаб назар ташлади.

Полковник кифтини қисди, Григорийнинг гали чин ё ҳазил эканини тушунолмай ғалати қилиб илжайиб:

— Бу қанақаси, гапингиз чинми ё ҳазилми?— деб сўради.

— Бу шунақаси — ҳазил-пазили йўқ.

— Кечирасиз, лекин қайси мулоҳазага асосланиб шундай қилиш мумкин?

— Мулоҳазами? Рус армиясида интизом ва тартиб сақлаш мулоҳазасига асосланиб. Кеча ётар пайтимизда сиз, жаноби полковник, большевикларни енгани-

миздан кейин, ёшлар онгидан қизил маразни томири билан суғуриб ташлаш учун қандай тартиб ўрнатиш зарурлиги тўғрисида ажойиб фикрлар айтган эдингиз. Мен сизга тамоман қўшилгандим, эсингиздами?— Григорий мўйловини силаб, Андреяновнинг юзи тобора ўзгара бошлаганига разм солиб, ўйлаб гапиради:— Энди нима таклиф этяпсиз? Бундай қиласиган бўлсангиз, солдатларни бузасиз-ку! Бундан чиқди, солдатлар ўз командирларини тутиб бераверсинми? Сиз уларга қанақа таълим бермоқчисиз, а? Борди-ю, сиз билан мен шу аҳволга тушсак, унда нима бўлади? Йўқ, кечираисиз, мен бунга юрмайман! Мен қаршиман.

Андреянов совуқина қилиб:

— Ихтиёр сизда,— деди-да, Григорийга диққат билан тикилди. У қўзғолончилар дивизия командирининг ниҳоятда ўжар, девонафеъл одамлигини эшигтан эди-ю, лекин ундан бу хилдаги гапларни кутган эмасди. У фақат шунигина айта олди:— Биз доим қўлга тушган қизил командирларни шундай қиласидик, айниқса, собиқ офицерларни... Лекин сизда аллақандай янги фикр... Ойдан равshan бир масалага нима учун бу хилда қараганингизни, тўғрисини айтсам, тушунолмаяпман.

— Одам ўлдириш зарил бўлса, биз бу ишни фақат жангда қиласиз, лекин асиirlарни бекордан-бекорга отиб ўрганганмасмиз!— деди Григорий қизариб-бўзарид.

— Яхши, сизнингча бўлсин: уларни орқага жўнатамиз,— деб кўна қолди Андреянов.— Энди иккинчи масала: асиirlардан бир қисми,— Саратов губерниясидан сафарбар этилган деҳқонлар,— бизнинг қаторимизга кириб жанг қилишни истаяпти. Учинчи пиёда полкимиздаги аскарлар сони ҳозир уч юз одамча ҳам келмайди. Кўнгилли асиirlардан бир қисмини яхшилаб текширилгандан кейин шу полкка қўшсак бўлармикин, сиз нима дейсиз? Бу ҳақда армия штабидан олинган алоҳида кўрсатма ҳам бор.

— Биронта мужикни мен яқинимга йўлатмайман. Қамиган одамлар ўрнига казаклар билан тўлғизишсин,— деди Григорий қатъий қилиб.

Андреянов унга ўз гапини маъқуллатишга ҳаракат қилди:

— Менга қаранг, баҳслашганимиздан фойда йўқ. Мен, дивизия бир хил составда, фақат казаклардан иборат бўлиши керак, деган фикрингизни яхши тушунаман, бироқ тўппи тор келгандан кейин асиirlарни ҳам аралаштиришга мажбурмиз ахир. Ҳатто Кўнгилли армияда ҳам баъзи полклар асиirlардан тузилмоқда.

— Улар билганини қилаверсин, лекин мен мужикларни қабул қилишдан бош тортаман. Қелинг, бу тўғрида ортиқ оғиз очмайлик,— деб гапни тамом қилди Григорий.

Бир оздан кейин у, асиirlарни жўнатиш тўғрисида буйруқ бергани ташқарига чиқди. Кейин тушлик овқатга ўтирганларида Андреянов ҳаяжонини босолмай:

— Ўйлаб турсам, иккимиз бирга ишлашолмайдиганга ўхшаймиз...— деди.

— Менинг ҳам фикрим шу,— деб жавоб қилди Григорий бепарволик билан. Сўнgra у, Сулиннинг кулганини сезмай, лагандан бир бўлак қўй гўштини олди-да, иштача билан кемирчак жойини шундай кусурлатиб чайнаб бошладики, Сулин жони оғригандай афтини буришириб, кўзларини юмиб олди.

* * *

Орадан икки кун ўтгач, чекинаётган қизил аскарларни таъқиб этиш вазифаси генерал Сальников группасига топширилди, Григорийни шошилинч суратда штабга чақириб олишди. Штаб бошлиғи — ёши қайтган, сумбати келишган генерал, қўзғолончилар армиясини қайтадан тузиш ҳақидаги Дон армия қўмондонининг буйруғи билан уни танишириб чиққандан кейин, дангалига шундай деди:

— Қизилларга қарши партизан уруши олиб борган вақтда сиз, дивизия командири вазифасини муваффақиятли равишда бажариб келгансиз, эндиликда биз дивизия тугул полкни ҳам сизга ишониб беролмаймиз. Чунки сизда ҳарбий маълумот йўқ, фронт ниҳоятда кенгайиб кетган шароитда ҳозирги замон жанг

методларини билмай туриб, сиз йирик ҳарбий қисмга командирлик қила олмайсиз. Бу фикрга қўшиласизми?

— Ҳа,— деди Григорий.— Мен ўзим дивизия командирлигидан кечмоқчи бўлиб юрувдим.

— Жуда соз, кимики ўз лаёқатига ортиқча баҳо бермаса, кам бўлмайди. Бизнинг ёш офицерларимизда бу фазилат жуда кам учрайди. Гап шундай: фронт қўмондонининг буйруғига мувофиқ, сиз ўн тўққизинчи полкнинг тўртинчи сотнясига командир қилиб тайнлангансиз. Ҳозир полк бу ердан йигирма чақирик нарида, Вязников қишлоғи яқинида. Шу бугуноқ жўнанг, жуда бўлмаса, эртага. Бирон гапингиз борга ўхшайди, гапиринг.

— Мени хўжалик қисмига кўчирсангиз деб илтимос қилмоқчи эдим.

— Бу мумкин эмас. Сиз фронтда керак бўласиз.

— Мен шу икки уруш давомида ўн тўрт жойимдан ярадор бўлганман.

— Бунинг аҳамияти йўқ. Сиз ҳали ёш, отдаисиз, ҳали кўп иш кўрсатаеиз. Ярадор бўлганингизни қўяверинг, ярадор бўлмаган офицер борми ўзи? Энди рухсат. Сизга муваффақият тилайман!

Қўзғолончилар армиясини қайтадан тузиш вақтида юқоридонликлар орасида рўй бериши мумкин бўлган норозиликнинг олдини олиш мақсадида, Усть-Медведица ишғол этилган кунлариёқ, қўзғолонда иш кўрсатган кўпгина казакларнинг погонларига лента тақиб, деярли барча вахмистрларни подхорунжийлик даражасига кўтаришди. Қўзғолонда қатнашган офицерларнинг мартабаси оширилиб, ҳаммасига мукофот берилди.

Григорий ҳам қатордан қолмади: унга юзбоши унвони беришди, қизилларга қарши курашда кўрсатган катта хизматларини армия бўйича буйруқ орқали қайд этишиб, ташаккур эълон қилишди.

Қайтадан тузиш иши бир неча кун ичida тамомланди. Дивизия ва полклардаги саводсиз командирлар ўрнига генераллар билан полковниклар тайнланди, сотняларга тажрибали офицерларни командир қилишди; штаб бошлиқлари ҳамда батареяларнинг

командирлари ёппасига янгиланди, оддий казаклар эса Донецдаги жангларда сўлогочи чиққан Дон армия-сининг номерли полкларини тўлғазишига жўнатилди.

Кечга яқин Григорий казакларни тўплаб, дивизияни қайтадан тузиш тўғрисидаги буйруқни эълон қилиди-да, ўз одамлари билан хайрлашди:

— Станицалик биродарлар, мендан ўтган бўлса, кечиринглар! Шу дамгача бирга хизмат этиб келдик, бугундан бошлаб ҳар ким ўз аравасини тортишга мажбур. Эндиги маслаҳатим шуки, бошларингни эҳтиёт қилинглар, қизиллар тешиб қўймасин тағин. Қалламиз уччалик пишмаган бўлса ҳам, бекорга ўқса тутиб беришнинг фойдаси йўқ. Ҳали бу каллалар керак бўлади, бундан буёни ишларнинг тагига етиш учун ҳали кўп ўйлашга тўғри келади...

Казаклар маъюс бўлиб, чурқ этмай қулоқ солдилар, сўнгра хилма-хил овозда бараварига чуфурлаша бошладилар:

— Яна эски ҳаммом, эски тос!
— Энди бизни нима қилишмоқчи?
— Энди ҳалқни роса эзишади, абллаҳлар!
— Бизни бўлиб-бўлиб юборишларини истамаймиз!

Бу қандай тартиб?!

— Ана, биродарлар, ўзимизга ўзимиз қилиб, шуларга қўшилдик-а!..

— Бу жаноблар яна бўйнимизга миниб олишади!

— Энди кўзингни оч! Бошимиздан тегирмон тоши юргизишиади ҳали...

Григорий одамлар жимиғунча кутиб турди, сўнгра:

— Бекорга кекирдагингизни чўзяпсиз. Буйруқларни ўртада муҳокама қиласидиган, бошлиқларга бўйсунмаса бўладиган замонлар ўтиб кетди. Жой-жойларингта тарқалинглар ва минбаъд оғизларингга қараб гапиринглар, чунки ҳозирги замонда ўйлаб гапирмассанг, балога қоласан: тили узун одам ҳаммадан олдин трибуналга ё штраф сотнясига рўпара бўлади.

Казаклар взвод-взводи билан Григорийнинг олдига келиб қўлини қисар:

— Хайр, Пантелеевич! Биздан ўтган бўлса, сен ҳам кечиргин,— деб видолашарди.

— Еттиёт бегона кишилар билан бирга хизмат қилиш осон эмас, Мелехов!

— Бекорга оёқ-қўлимизни боғлаб бердинг. Дивизияни топширмайман, деб туриб олганингда яхши бўларди.

— Сендан ажралганимизга ачиняпмиз! Бу командирлар бизга ёт, сендан илмли бўлганиминам, кошки дардимизга даво топса, қайтага бошга битган бало бўлади, шунисига доғмиз-да!

Ёлғиз бир киши, Наполово қишлоқлик қизиқчи ва асқиябоз казак:

— Сен буларга ишонма, Григорий Пантелеевич. Ўз одамларингми, бегонами, бари бир гўр, иш кўнглингга ёқмагандан кейин, қийналмай илож йўқ!— деди.

* * *

Григорий Ермаков ва бошқа командирлар билан оппоқ тонг отгунча самогон ичди, эрталаб Прохор Зиковни ёнига олди-ю, 19-полк қайдасан деб жўнаб қолди.

Ҳали сотняни қабул қилиб бўлмасдан, одамлар билан тузукроқ танишмасдан туриб, уни полк командири чақирилди. Ҳали қуёш кўтарилимаган. Григорий отларни текшириб кўрмоқда эди. Бир оз ҳаяллаб қолиб, командир олдига ярим соат кечикиб кирди. Шунинг учун у, офицерларга нисбатан қаттиққўл командирнинг танбеҳ беришини кутганди, бироқ у очиқ юз билан кутиб олиб кўришиди-да: «Қалай, сотня ёқдими? Одамлар жойидами?»— деб сўради, лекин Григорийнинг жавобини кутмасдан, кўзларини опқочиб:

— Гап бундай, азизим,— деди,— сизга қайгули хабарни айтишга мажбурман... Уйингиз нотинч, катта мусибат рўй берибди. Бугун кечаси Вешенскаядан телеграмма олдим. Уйингизни тинчтиб қайтиш учун сизга бир ойлик отпуска бераман. Тез жўнанг.

— Телеграммани беринг,— деди ранги ўчиб кетган Григорий зўрга тилга кириб.

У тўрт букланган қофозни олди, очиб ўқиди-ю, бирданига тер босган панжалари орасига олиб фижимлади. Бироқ ўзини тезда ўнглаб олди, бир оз тутилиб:

— Мен... Мен буни кутмовдим... Бормасам бўлмас экан. Хайр,— деди.

— Отпуска қоғозини олиш эсингиздан чиқмасин!

— Ҳа, ҳа. Раҳмат, оламан.

Григорий одатдагича қиличини авайлаб, дадил қадамлар билан даҳлизга чиқди, лекин баланд зинадан тушиб келаётганида тўсатдан ўз ёёқ товуши ўзига эшитилмай қолди, ўша онда юрагига бир нарса ханжардай санчилганини сезди.

Пастки поғонага етганда у гандираклаб кетиб, лиқиллаб турган панжарани чап қўли билан аранг ушлаб қолди ва ўша заҳотиёқ ўнг қўли билан ёқа тугмаларини шартта ечиб ташлади. Бирпас энтикиб, оғир-оғир нафас олиб турди ва шу туришида юрагига ором олгандай бир оз ўзига келиб, панжарани қўйворди-да, гурс-гурс қадам ташлаб, чайқалганича кўча эшикда боғлоғлиқ турган оти ёнига кетди.

XVI

Даръя билан гаплашган кундан бери Наталья, худди ёмон туш кўриб қора босганд одамдай карахт бўлиб юарди. У Прохор Зиковнинг хотини олдига бориб, Вешенскаяга чекинганда Григорий Аксинья билан учрашгани ё учрашмаганини суриштириб билиш учун бирор қулай баҳона изларди. У Дарьянинг сўзига гоҳ инонар, гоҳ инонмасди, шу сабабдан эрининг жиноятини исботлаб олгиси келарди.

Наталья қош қорайған маҳалда қўлида чивиқ ўйнаб, Зиковлар дарвозаси олдига келди. Прохорнинг хотини уй ишларидан қутулиб, дарвоза олдига чиқиб ўтирганди.

— Салом, овсин! Бузофимизни кўрмадингми?— деб сўради Наталья.

— Саломат бўл! Йўқ, айланай, кўрмадим.

— Бираам дайди бўптики, сира уйда турмайди ҳаром ўлгур! Энди қайдан қидиришимга ҳайронман.

— Сабр қил, пича ўтиргин, топилиб қолар. Писта чақасанми?

Наталья келиб ўтирди. У ёқдан-бу ёқдан гапириша бошлишди.

— Эрингдан хабар борми? — деб сўради Наталья:

— Ҳеч қандай хабар йўқ. Ерга кирдими, осмонга учдими, дараксиз кетяпти, имонсиз! Сеникидан хат-пат келдими дейман?

— Йўқ. Ёзид тураман деган эди, нима бало бўлди, дараги йўқ. Бизникилар Усть-Медведицадан нари ўтиб кетишибди, деб гапиришади-ю, шундан бошқасини эшитганим йўқ.— Наталья гапни секин-аста буриб, Доннинг нариги бетига чекинганлар масаласига ўтди: Вешенскаяда ҳарбийлар қандай яшаганини, қишлоқдан кимлар борганини олисдан айлантириб суриштира бошлади. Прохорнинг хотини айёрик қилиб, Натальянинг нима учун келганини дарров пайқади, лекин ўзини босиб сиполик билан жавоб қайтариб ўтираверди.

Григорий тўғрисидаги ҳамма гапни у эридан эшитган бўлса ҳам, тили қичиб турганига қарамай, айтишга қўрқди, чунки Прохор: «Бирорга оғзингдан гуллаб қўйсанг, бошингни кундага қўяману, тилингни тортиб, тагидан кесиб ташлайман. Шуни билиб қўй! Худо кўрсатмасин, агар шу гап Григорийнинг қулоғига етадиган бўлса, у мени ўлдиради-қўяди! Дунёда ёлғиз сендан безор бўлдим холос, лекин жонимдан тўйганим йўқ, тушундингми? Соқов бўлволиб, тек ўтиргин!»— деб қаттиқ тайинлаб кетгани эсида эди.

Наталья ортиқ сабр қилолмади:

— Прохоринг Вёшкида Аксинья Астаховани кўрмабдими ҳеч? — деб дангалига сўради.

— У қаёқдан кўрсан! Ким бору ким йўқлигини суриштириб юришга уларнинг қўли тегармиди? Худо урсин, ҳеч гапдан хабарим йўқ. Бу тўғрида мени кўп қийнама, Наталья Мироновна. Кошки Маллавойим одамлар сингари мундоғ ёрилиб гапирса, тўғри гапга жавоб бермайди-ку! Анавини обке, манавини обқўйдан бошқани билмайди.

Шундай қилиб, Наталья борганига пушаймон бўлиб, ҳеч нарсани билмай, қайтага юраги баттар эзилгани қолди. Бироқ шу кўйи бехабар юраверишга ортиқ тоқат қилолмай, Аксиньянинг олдига киришга мажбур бўлди.

Иккиси қўшни бўлганлиги учун сўнгги йиллари тез-тез учрашиб туар, бош қимирлатибгина саломлашар, баъзан бир-икки оғиз гаплашиб ҳам қўйишарди. Илгаригидай, учрашганда сўрашмасдан, бир-бирига хўмрайиб юришлар ҳозир йўқолган, илгариги адoват орадан анча кўтарилганди. Шунинг учун ҳам Наталья, бу гал Аксинья уни уйдан ҳайдаб чиқармаслигига ишонар, Григорийдан гап очсан, тили қичиб жим ўтира олмаса керак, деб ўйлаган эди. Наталья-нинг ўйлагани тўғри чиқди.

Аксинья таажжубланганини яширмасданоқ уни меҳмонхонага таклиф этди, дераза пардаларини тушириб, чироқни ёқди-да:

— Нима, бирор хайрли иш билан келдингми?— деб сўради.

— Сенинг олдингга хайрли иш билан келиб бўлармиди...

— Ёмон гап бўлсаям айтовор. Григорий Пантелеевичга бир нима бўлдими?

Аксиньянинг бу қадар ҳовлиқиб савол беришидан Наталья ҳамма сирни тушунди. Бир оғиз гап билан Аксинья юрагидаги дардини ошкор қилди-қўйди. Шундан кейин унинг Григорий билан алоқаси тўғрисида ортиқ гап кавлаб ўтиришга ҳожат қолмади, бироқ Наталья кетмади, бир оздан сўнг:

— Йўқ, эrim соппа-соғ, қўрқмасанг ҳам бўлади,— деди.

— Ҳеч қўрққаним йўқ, нимага ундаи дейсан? Унинг соғлиғи учун сен қайғуришинг керак, менинг ўз ташвишим бошимдан ортиб ётибди.— Дадиллик билан гапираётган Аксинья, юзига қон юргурганини сезгач, лип этиб стол ёнига борди-да, Натальяга тескари туриб, ўзи яхши ёнаётган лампа пилигини тузатмоқчи бўлиб анча уринди.

— Степанингдан дарак борми?

— Яқинда салом деб юборибди.

— Соғ-саломат юрганмишми?

Аксинья кифтини қисиб:

— Ким билсин...— деди.

Аксиньянинг ўз эри тўғрисида шу қадар бепарводик билан жавоб берганини кўриб, Наталья ортиқ

яширгиси келмай, дангал гапиришга мажбур бўлди, беихтиёр кулиб:

— Чамамда, эринг билан унчалик ишинг ҳам йўқ кўринади.. Ҳа, майли, бунинг менга алоқаси йўқ. Мен бошқа иш билан келдим. Қишлоқда ҳар хил гап юрибди: Григорий яна сен билан топишганмиш, ҳар сафар уйга келганида икковинг учрашармишсиз. Ростми шу?

Аксинья мазах қилиб кулиб:

— Роса одамини топиб сўрадинг-ку!— деди.— Қани, ўзинг айт-чи, ростми, ёлғонми?

— Ростини айтишга қўрқасанми?

— Йўқ, қўрқмайман.

— Ундан бўлса, қийнамасдан айт, мен ҳам аниғини билай ахир. Бекорга азоблашнинг нима кераги бор?

Аксинья кўзларини сузиб, қора қошларини чи-мирди:

— Барибир сенга мен ачинмайман,— деди қўполник билан.— Иккимизнинг дардимиз бир: мен қийналсан сенга яхши, сен қийналсанг — менга... Талашганимиз бир одам, шундайми? Энди мен сенга рости-ни айтиб қўя қолай: одамларнинг гапи тўғри, ҳеч ёлғони йўқ. Григорийминам яна топишганим рост, бу гал қўлимдан чиқариб юбормасликка тиришиб кўра-ман. Ҳўш, энди қўлингдан нима келади? Деразала-римни уриб чил-чил қиласанми ё пичоқ билан сўя-санми?

Наталья ўрнидан турди, қўлидаги новдани учма-уч тугди-да, печга ташлади ва шу вақтгача ўзида кўрилмаган қатъийлик билан:

— Ҳозирча сенга ҳеч қандай ёмонлик қилмай-ман,— деди.— Олдин Григорий келсин, гаплашиб кў-рай, кейин у ёғи маълум бўлади, нима қилишимни ўшанда кўрасан. Менинг икки болам бор, сенга бўш келмайман.

Аксинья кулди.

— Демак, ҳозирчалик хавотир бўлмай юраверсам бўлади, а?

Наталья Аксиньянинг кесатиб гапирганини сез-май, унинг олдига бориб, енгидан тортди:

— Аксинья! Умр бўйи сен йўлимга ғов бўлиб кел-

япсан, лекин бу сафар сенга ялинмайман, эсингдами Ягодноега борганим? У вақтда мен ёш эдим, ақлым етмасди, ялинсам менга раҳми келар, кўнгли эриб Григорийдан кечар, деб ўйлагандим. Энди ялинниб бўпман! Мен аниқ биламанки, сен уни севмайсан, ўрганган кўнгил ўртанса қўймас дегандай, суйканасан, холос. Сен уни ҳеч қаҷон мен каби севганимисан ўзинг? Севмаган бўлсанг керак. Сен Листницийнинг қўйнига кирдинг, бошқа билан юрдинг, юрмаган одаминг қолдими ўзи, шарманда! Севганимисан одам бундай қилмайди.

Аксинъя докадай оқариб кетди, қўли билан Натальяни итариб сандиқ устидан турди.

— У юзимга солмаган нарсанни, энди сен солмоқ-чимисан? Қанақалигим билан сенинг нима ишинг бор? Майли! Мен ёмонман, сен яхши бўла қол, яна гапинг борми?

— Гапим тамом. Хафа бўлма. Ҳозир кетаман. Яширмасдан ростини айтганинг учун раҳмат.

— Арзимайди, менсиз ҳам, барибир, билиб олардинг. Шошмай тур, бирга чиқамиз, дераза қопқоқларини беркитиб оламан.— Аксинъя зинапояда тўхтади:— Уришмасдан, сўкишмасдан тинчгина тарқалганимизга хурсандман. Пировардида сенга айтадиган гапим шуки, азиз ҳамсоғи: кучинг етса сеники, етмаса мендан гина қилма. Мен ҳам уни осонлик билан қўлдан бермайман энди. Ёшим анчага бориб қолди, ҳали сен мени «шарманда» дединг, лекин мен Дарьяга ўхшаган эмасман, умримда унинг қилиқларини қилганмасман... Сени-ку болаларинг бор, менинг кимим бор?— Аксинъянинг овози қалтираб зўрға-зўрға чиқди,— оламда ундан бошқа ҳеч кимим йўқ! Кўз очиб шуни кўрдим, шуни деб дунёдан ўтаман... Биласанми нима? Энди Григорий тўғрисида оғиз очмайлик. Омон бўлса, биби Марям бало-ю қазолардан асрабтирик қайтиб келса, иккимиздан биримизни ўзи танлаб олар...

Наталья туни билан ухламай тонг орттириди, эрталаб Ильинична билан картошка чопгани полизга кетди. У ишлаганда енгил тортар, унчалик хаёлга берилмасди, кетмон ерга бир текисда тушиб турар, офтобда қизиган майин қумоқ тупроқни юмшатар

эди: аҳён-аҳёнда қаддини кўтариб дам олар, юзининг терини артиб, сув ичарди.

Мовий осмон қўйнида шамол тўзитган парча-парча булултар сузиб юриб таралиб кетарди. Қуёш нури мисдай қизиган ерни баттар ловиллатарди. Шарқдан ёмғир ҳиди келарди. Наталья бошини кўтармасданоқ, қуёш юзини булат тўсганини сезди; орқасига муздай шабада теккандай бўлди, тарвуз палақлари-ю, кунгабоқар поялари устига булат сояси тушди. Бора-бора ён бағирдаги полизлар, офтобда сўлган кўкатлар, барглари шалпайиб, парранда ўтириб кетган ёввойи тоғолча-ю дўланаларни соя қоплади. Тезоттар беданаларнинг битпилдиқ отгани, тўрғайларнинг ёқимли сайрагани тобора қаттиқроқ эшитила бошлади, ҳаттоки иссиқ кўкатларни тебратган шамолнинг ҳарорати ҳам пасайгандай бўлиб туюлди. Ниҳоят, қуёш нурлари ғарбга томон сузиб кетаётган оппоқ булат орасидан ёриб ўтди, офтоб заррин нурларини яна ерга сочди. Дон бўйидаги кўкимтир тизма тоғлар устида кетаётган булултарнинг сояси ҳали ҳам ерда югуриб юрарди, лекин полизлар ичи яна мисдай қизиб, тушки қуёш тифида яллиғланар, ердан кўтарилиган ҳовур уфқда жимирилашар, тупроғу гиёҳлардан оғир ҳид тарқалиб, нафасни қайтарарди.

Айни туш пайти Наталья жарга тушиб, ўша ердаги қудуқчадан бир кўза муздай сув олиб келди. Ильинична билан иккиси чанқоқлари босилгунча ичишди, қўлларини ювиб, жазира мағлубиятни овқатлангани ўтиришди. Ильинична фартукни ерга солди-да, нонни чиройли қилиб тўғради, халтадан товоқ-қошиқларни олди, кун тушмасин деб, устига кофта ёпиб қўйилган оғзи тор қўзачадаги қатиқни келтирди.

Наталья иштаҳаси йўқ одамдай бўшашиб овқат ерди; қайнанаси:

— Анчадан бери разм солиб юрибман: сенга бир гап бўлган ўзи... Ё Григорийминам ораларнинг чатоқми?— деб сўраб қолди.

Натальянинг шамолда қовжираган лаблари қалтираб кетди:

— Ҳей, ойижон, у яна Аксинья билан топишиб олибди.

— Бу гапни... сен қаёқдан эшита қолдинг?
— Мен кечаке Аксинъяниг олдида бўлдим.
— Ўзи бўйнига олдими, манжалаки?!
— Ҳа.

Ильинична узоқ ўйланиб қолди. Юзларидаги ажини, лабларининг четлари буришиб кетди.

— Балким у шаллоқи, мақтаниш учун жўрттага шундай дегандир?

— Йўқ, ойижон, бу рост гап, ёлғони йўқ...

— Гафлатда қолиб, яхши куткиламагансан...— деди кампир мулойим овоз билан.— Бунақа эрнинг кетидан кўз-қулоқ бўлиб юриш керак.

— Минг кўз-қулоқ бўлганинг билан фойдаси йўқ! Мен инсофга келар деб юргандим... Нима қилай ахир, ё этагимга боғлаб қўяйми?— Наталья аламзадалик билан илжайди-да, овозини пасайтириб давом этди:— Кошки у Мишаткага ўхшаб гапимга кира қолса... Сочи оқарса ҳам эски қилигини қўймайди...

Ильинична қошиқларни ювиб артди, товоқни чайқади, идишларни халтага солиб бўлгандан кейин:

— Ташвишинг шугинами?— деб сўради.

— Жудаям қизиқсиз-а, ойижон... Оламни кўзимга қороғи қилиш учун шу ташвиш ҳам етиб-ортар!

— Хўш, энди нима қилмоқчисан?

— Болаларимни оламану онам ёнига кетаман. Бошқа нима қилардим? Григорий билан ортиқ бирга туролмайман. Суйганини уйга обкелиб, бирга яшайверсин. Шунчалик қийналганим ҳам етар.

— Ёшлигимда мен ҳам шундай ўйлардим,— деди хўрсишиб Ильинична.— Қайнатанг ҳам учига чиққан хотинбоз эди. Мени шунчалик кўйдирганки, гапирган билан тамом бўлмайди. Лекин кўз очиб кўрган эрни ташлаб кетиш ниҳоятда қийин, фойдаси ҳам йўқ. Миянгни ишлатиб кўрсанг, ўзинг тушунасан буни. Болаларни дадасидан ажратиб, тирик етим қилишинг яхшими? Йўқ, болам, бу гапларни қўй. Бутўрида ўйлама ҳам, мен розимасман!

— Йўқ, ойижон, мен у бўлан бирга турмуш қилмайман, барибир гапингиз бекор кетади.

— Нега бекор кетаркан?!— деб ғазабланди Ильинична.— Сен менга бегона эмассанки, индамай

кетаверсам! Мен ачинмасам, икковингга ким ачинади ахир, лаънатилар?! Қариган онангга шундай дейишга қандай тилинг борди? Мен сенга яна қайта айтаман: бу хаёлни миянгдан бутунлай чиқариб ташла! Топган гапини қара: «Уйдан кетаман!» Хўш, қайга борасан? Шу топда сенга кимнинг кўзи учиб турибди? Дадант йўқ, уйларингга ўт қўйилган, ойинг бировларникида сифинди бўлиб, зўрга юрса-ю, энди сен болаларинг билан бориб суқиласанми? Йўқ, болам, бу ишинг ақлга ҳеч тўғри келмайди. Гриша келсин, нима қилишни ўшанда кўрамиз, лекин ҳозир менга бу гапдан оғиз очма, гапингга қулоқ ҳам солмайман, рухсат ҳам этмайман!

Кўпдан бери Натальянинг юрагида йиғилиб ётган қайфу-аламлар бирданига хуруж қилиб томоғидан хиппа бўғди. У фарёд чекиб, рўмолини бошидан юлиб олди-ю, ўзини таппа ташлади, тошдай бемеҳр ерга кўксини бериб ҳўнграб йиғлайверди.

Кўпни кўрган, юраги кенг, доно Ильинична жойидан қўзғалмади ҳам. Кампир тагида қатифи қолган қўзачани яхшилаб кофтага ўраб, сояга қўйғандан кейин товоқقا сув солиб, Натальянинг ёнига келиб ўтирди. Бундай оғир пайтда гап билан юпатиб бўлмаслигини у биларди, кўз ёши қилмай, лабларини чирт юмиб, чидаб ўтиргандан кўра, бўтадай бўзлаб йиғлаш дурустлигини ҳам яхши биларди. Шунинг учун Ильинична, Наталья йиғлаб бўлгунча сабр қилиб турди, ниҳоят ишда қаварган қоқшол қўлини келининг бошига қўйиб, йилтироқ қоп-қора соchlаридан силади:

— Етар энди! Минг йиғлаганинг билан кўз ёшинг тамом бўлмайди, кейин йиғлашга ҳам пича қолсин. Ма, сувдан ҳўплагин.

Наталья тинчиган эди. Фақат аҳён-аҳёнда хўрсинганида кифтлари кўтарилиб, аъзойи баданига титроқ югуради. Бирданига ўрнидан сакраб турди-ю, товоқда сув тутиб турган Ильиничнани итариб юборди, юзини шарқقا ўгириб, кўз ёшларидан жиққа ҳўл бўлган кафтларини очиб энтика-энтика қарғай бошлади:

— Эй, тангрим! Жоним ҳалқумимга келди! Бу ахволда ортиқ яшай олмайман! Ё парвардигор, бу зо-

лим эримга ўзинг жазо бер! Ўша ёқдан ўлиги келсин!
Умрини хазон қил, мен ҳам азобдан қутулай!..

Шарқдан бурала-бурала қора булат босиб келмоқда эди. Олисдан момақалдироқ садоси эшитиларди. Қуббасимон булат чўққилари орасидан чақнаб чиққан яшин осмонга қинғир-қийшиқ из солиб ярақлар эди. Шамол қутуриб, шитирлаётган кўкатларнинг бошини эгиб ғарбга салом қилдирар, дони тўлишган кунгабоқар бошларини ерга довур букар, катта йўлнинг чангини ҳамма ёққа учирив юради.

Шамол Натальянинг ҳурпайган соchlарини ўйнатар, кўз ўшларини ялаб қуритарди, ишга кийилган кул ранг юбкасининг кенг этагини оёқлари атрофига дўмбирадек шиширади.

Иримчи Ильинична Натальяга тикилганича анграйиб қотиб қолди. Осмонни ярмигача қоплаган қора булатлар фонида келини унинг кўзига ёт ва балодай бўлиб кўринарди.

Ёмғир тобора яқинлашиб келарди. Момақалдироқ олдидағи жимжитлик узоқ давом этмади. Қиялама шўнғиб келаётган қирғий ваҳим ичиди чириллаб юборди, юронқозиқ сўнгги марта чийиллаганча инига кириб кетди, кучли шамол қум аралаш тўзонни учирив келиб Ильиничнанинг юзига урди-ю, гувиллаганча даштга қараб кетди. Қампир аранг ўрнидан турди. Ранги мурдадай оқариб кетган эди; яқин келиб қолган бўроянинг гувиллаши орасидан унинг фарёди эшитилди:

— Ҳой, бу гапингдан қайт! Тепангда худо бор! Кимга ўлим тилаяпсан, а?!

Ақлдан озган одамдай, кўзлари бежо бўлган Наталья, бўрон тўзитган, яшинда ярқираган ҳайбатли қора булатларга тикилганча:

— Худоё, жазосини бер! Худоё, ўзинг жазола!— деб чинқиради, холос.

Дашт устида момақалдироқ қарсиллаб кетди. Қапалаги учган Ильинична чўқиниб олди, гандираклай-гандираклай Натальянинг тепасига келиб, кифтларидан маҳкам ушлади.

— Ҳозир тиз чўк! Эшитдингми, Наташка!?

Наталья нурсиз кўзлари билан қайнанасига анграйиб қаради-ю, беихтиёр тиз чўқди.

— Тавба қил! Худодан гуноҳингни тиля!— дўқ билан буюрди Ильинична.— Дуойибадим ижобат бўлмасин деб тила! Кимга ўлим тиладинг, а? Ўз болаларингни отасиз қолдирмоқчимисан? Гуноҳи азимга ботдинг... Дарров чўқин! Сажда қил! «Яратган тангрим, тавба қилдим, ношукур бандангман, гуноҳимни кечгил» де, айт!

Наталья чўқинди, бўзарган лабларини қимирлатиб бир нималар деб шивирлади-да, тишлари юмилиб. жағлари қаришиб ёнбошига қулади.

* * *

Ёмғир ювиб ўтган дашт ажойиб ям-яшил тусга кирган эди. Қавс шаклидаги ранго-ранг камалакнинг бир учи йироқдаги ҳовузга, бир учи Дон бўйига қадалганди. Фарб томонда момақалдироқ гулдуради. Тоғдан тушган лойқа сув жарда чулдираб оқарди. Қўпирган жилғалар ён бағирлардан, полизлардан ўтиб, Донга қўйиларди, ёмғирда тўкилган баргларни, илдизи билан кўчган кўкатларни, қора буғдой бошоқларини оқизиб келарди. Полиздаги тарвуз ва қовун палакларини лойқа ва қум босиб қолганди; жала суви арава изларини ўйиб, қутуриб оқарди. Олисдаги дўнг этагидаги бир фарам пичанга чақмоқ тушиб, куйиб тамом бўлаёзган эди. Унинг кўкимтири тутуни осмон баравар кўтарилиб, камалакка тегай-тегай деб турарди.

Ильинична билан Наталья этакларини кўтариб, оёқ яланг ҳолда, тайғанчоқ лой йўлдан секин-аста қишлоққа тушиб келмоқда эдилар. Кампир гап бошлади.

— Эндиғи ёшлар бирам ношукур-эй, худоё тавба! Сал нарсага чучонглаб кетасизлар. Менинг ёшлиқда кўрганларимни сен кўрсанг нималар қилмасдинг? Гришка шу вақтгача пешонангга ҳам чертгани йўқ, тағин ношукурчилик қилсанг-а! Ташлаб кетмоқчи бўлдинг, ҳушингдан кетиб қолдинг, нималар қилмадинг, кўрганларимни сен кўрсанг нималар қилмасдинг? ҳатто эр-хотин орасига худони ҳам аралаштирединг... Ҳзинг айт-чи, шундай қилишинг яхшими, болам? Отинг ўчгур чўлоқ ёшлигимда мени бекордан-бекорга

ўласи қилиб уради, кошки бир ёмонлик қилган бўлсам! Ўзи хотинбозлиқ қилиб, аламини мендан оларди. Тонг ёришганда уйга қайтарди, аламимга чидолмай йиглардим, бетига солиб гапирсам, қўли қичиб ураверарди... Аъзойи баданим моматалоқ бўлиб, бир ойгача кетмасди. Шундай бўлса ҳам чиадим, болаларимни катта қилдим, лекин бирон марта уйдан кетаман деб оғиз очмадим. Мен Гришкани мақтамайман, айби кўп, лекин у билан муроса қилиш мумкин. Анави касофат илон бўлмаганда, қишлоқнинг олди одами ўша бўларди. Боламни ўша жодугар ўзига иситиб олган.

Наталья анча жойгача ўйланиб, индамай келди, ниҳоят:

— Ойижон, энди бу гапдан оғиз очмайлик,— деди,— Григорий келсин, у ёғини кўрамиз... Балки ўзим кетарман, балки у мени ҳайдаб юборар, кейин маълум бўлади, ҳозирчалик уйингиздан ҳеч ёқقا кетмайман.

— Ана энди ўзингга келдинг, болам!— кампир суюниб кетди.— Ҳудо хоҳласа, апоқ-чапоқ бўлиб кетасиз. Ўла қолсаям у сени ҳайдамас, буни хаёлинга келтирма! Ўзи сени суйса, болаларидан жонини аямаса-ю, қандай қилиб сени ҳайдасин? Йўқ-йўқ! Аксинъяни деб сендан кечмайди, бунга йўл қўймайди у! Эр хотин орасида ҳар хил гап ўтиши мумкин... Ишқилиб боши омон қайтсин...

— Мен ўлишини сира истамайман... Ҳали куйганимдан гапирвордин... Буни юзимга солманг... Уни ҳеч вақт кўнглимдан чиқаролмайман, лекин шу заийлда яашаш ҳам қийин-да, ойижон!..

— Эй, жигаргўшам! Қийналганингни онанг билмайди дейсанми? Биламан, лекин тўсатдан бирон иш қилиб қўймагин, дейман. Рост айтасан, энди бу гапни қўяйлик. Чолга бу гапдан зинҳор оғиз очма, тузукми? Үнга дахли йўқ.

— Сизга бир нарса демоқчи эдим... Григорий билан тураманми, йўқми, бу маълуммас, лекин ундан бўла туғмайман энди. Борини эсон-омон катта қилиб олсан ҳам катта гап... Ҳозир ҳомиладорман, ойи...

— Қанча бўлди?

— Уч ойлик.
— Нима қиласардинг? Туғасан-да, бошқа илож йўқ.

— Керак эмас!— деди Наталья қатъий қилиб.— Шу бугуноқ Капитоновна момога учрашаман. Мени бу ташвишдан халос қилсин... Баъзи хотинлар ўшанга бориб, боласини олдирибида.

— Болани ўлдирмоқчимисан? Шундай дейишга қандай тилинг борди, уятсиз?— Ильинична ғазаби қўзиганидан қарс уриб, йўл ўртасида тўхтаб қолди. У яна бир нима демоқчи эди, бироқ орқа томондан арава ғилдирагининг шалдирагани, от туёқларининг лойни чалпиллатгани ва аллакимнинг чув-чувлаган овози эшитилди.

Ильинична билан Наталья йўлдан четга чиқиб, этакларини тушириб турдилар. Даладан келаётган Филипп Агеевич Бесхлебнов дегаён чол асов биясини тўхтатди:

— Қани, аравага чиқинглар, обориб қўяй, лой кечиб юрасизларми...

Ильинична суюниб:

— Барака топинг-эй, Агеевич, лойда тайғалақлай-вериб тинкамиз қуриди,— деди-да, бўш аравага чиқиб олди.

* * *

Овқатдан кейин Ильинична Наталья билан гаплашгиси келиб, бола олдиришнинг мутлақо керак-сизлигини унга тушунтироқчи бўлди. Қампир идиштовоқларни юваётиб гапни нимадан бошлаш, қандай ишончли далиллар билан келинини бундан қайтаришни кўнглидан ўтказди, ҳатто Натальянинг сирини чолга айтиб: «бу нияти бузуқ келинни ёмон йўлдан қайтариб кўрсакмикан?»— деган хаёлга ҳам борган эди. Бироқ у ишини тамомлагунича, Наталья йиғишириниб, секингина чиқиб кетганди.

— Наталья қани?— деб сўради Ильинична Дуняшкадан

— Аллақандай бир тугунчани қўлтиқлаб чиқиб кетди.

— Қаёққа кетди? Нима деди! Қанақа тугунча?!

— Мен қайдан билай, ойижон! Рўмолга тоза юбкасини, яна алланимани тугди-ю чиқди-кетди, ҳеч нарса демади.

— Вой шўрим қурсе-е-ен!— Ильинична бўтадай бўзлаб, курсига ўтириб қолди.

Дуняша ҳанг-манг бўлиб:

— Сизга нима бўлди, ойижон? Нега йиғлайсиз, ахир?— деб сўради.

— Ўз ҳолимга қўйсанг-чи, шилқум! Менминан нима ишинг бор? Наталья нима деди, ахир? Йиғиштиринаётганини нега менга олдинроқ айтмадинг?

Дуняшканинг жаҳли чиқди:

— Эсингиз жойидами ўзи? Сизга айтиш кераклигини мен қаёқдан билай? Биратўла кетгани йўқ-ку! Балки ойисини кўриб келгани кетгандир, нимасига йиғлаганингизга сира тушунмайман.

Йельинична зўр ваҳима ичиди Натальянинг қайтишини кутарди. Чолнинг сасиб беришидан қўрқиб, унга бу гапни айтмасликка қарор қилди.

Кун ботар маҳалида даштдан пода қайтди. Бирнасда қорронғи тушди. Қишлоқда унда-мунда чироқлар ёқилди, лекин Натальядан дарак бўлмади. Мелеховлар оиласи кечки овқатга ўтирди. Ҳаяжондан ранги оқариб кетган Ильинична, бетига пиёздор солинган зифирмойли угра ошни столга келтириб қўйди. Чол нон ушоқларини тўплаб қошиққа олиб, соқолу мўйлов босган оғзига солди-да, стол атрофида ўтирганларга паришонлик билан қараб чиқди:

— Наталья қани? Нега овқатга чақирмайсиз?

— Наталья йўқ,— деди Ильинична секингина.

— Қаёққа кетди, ахир?

— Онасиникига кетган бўлса керак, меҳмон бўлиб қолган-да.

— Меҳмон бўлса, шу вақтгача юрадими? Тартибним билиши керак...— деди Пантелей Прокофьевич пўнгиллаб.

Чол ҳар вақтдагидай иштаҳа билан тез-тез ерди; ҳар замонда қошиққа дам бериб, столга тўнкариб қўяр ва ёнида ўтирган Мишаткага меҳрибонлик билан кўз қирини ташлаб, дағал овоз билан: «Бундоғ бурил-чи, қўзичогим, лабингни артиб қўйяй, дайди

онанг сизларга қараашга қўлиям тегмайди...», — деб пўнғилларди-да, қадоқ босган қоп-қора кафти билан неварасининг пушти ранг нозик лабларини артарди.

Овқатланиб бўлгач, ҳаммалари столдан туришди.

— Чироқни ўчиринглар,— деб буюрди Пантелей Прокофьевич.— Лампамой оз, бекорга исроф қилишнинг ҳожати йўқ.

— Эшикни занжирлайми?— деб сўради Ильинична.

— Занжирла.

— Наталья нима бўлади?

— Келса, тақиллатар. Балки, эрталабгача санқиб юрар ҳали? Бунисиям янги қилиқ чиқарди... Сен индамай юравергин, мияси йўқ кампир! Кечаси меҳмондорчилликни ким қўйибди унга... Еганини эрталаб бурнидан чиқараман. Даشكадан ибрат олган-да...

Ильинична ечинмасдан ётди. Ярим соатгача у ёнбошдан бу ёнбошга ағдарилиб, оғир-оғир нафас олиб миқ этмай ётди, сўнгра энди Капитоновникига бормоқчи бўлиб қўзғалганида, кўча томондаги дेरаза тагидан бирор оёғини судраб секин ўтгандай бўлди. Кампир ёш боладай ирғиб ўрнидан турди-ю, юргурганича даҳлизга чиқиб эшикни очди.

Ранги мурдадай оқариб кетган Наталья панжарани ушлаб зинадан зўрба-зўр чиқиб келмоқда эди. Тўлган ой унинг рангига ранг қолмаган юзини, киртайган кўзлари-ю, жон азобида чимирилган қошларини равшан кўрсатарди. У худди ўқ еган оҳудай гандираклаб аранг қадам қўяр, оёқ босган жойига қон доғи тушиб қоларди.

Ильинична уни индамай қучоқлади-ю, дарров даҳлизга олиб кирди. Наталья эшикка суяниб бўғиқ овоз билан шивирлади:

— Ҳаммаси ухладими? Ойижон, қон доғларини артиб олинг... Уни қаранг, ҳамма ер из бўлиб кетди...

Ильинична томоғига бир нарса тиқилгандаи, йиги аралаш бўғиқ овоз билан:

— Ўзингга ўзинг нима қилганинг бу?!— деб сўради.

Наталья жилмайиб кулмоқчи бўлди-ю, бироқ жилмайиш ўрнига юзи бужмайиб кетди.

— Жон ойи, шовқин қилманг... Уйдагиларни уй-готиб юборасиз... Мана, мен, бола туғишдан қутулиб келдим. Энди кўнглим жойига тушди... Фақат қон тўхтамаяпти... Ҳудди мол сўйгандагидай ичимдан қон кетяпти... Қўлингизни беринг, ойижон, бошим айланиб кетди.

Ильинична худді бегона уйга кириб қолган одамдай, қоронгида анчагача эшик тутқичини роса қидирди, ахийри бир амаллаб топди-да, лўқидонини солиб беркитди. Сўнгра оёқ учидаги Натальяни катта уйга олиб ўтди; Дуняшканни уйғотиб, бу уйдан чиқариб юборди, Даръяни чақириб, чироқни ёқди.

Емакхона эшиги очиқ бўлиб, Пантелей Прокофьевичнинг барада хуррак отгани эшлиларди; кичкингина Полюшка ширин лабларини чапиллатиб тушида алланималарни гапиради. Боланинг уйқуси қаттиқ, ҳеч нарса унга халақит беролмайди!

Ильинична тўшакни тузатиб, ёстиқни тўғрилаб бўлгунича Наталья курсига ўтириб, дармони қуриганидан бошини стол четига қўйиб турди. Дуняшка меҳмонхонага кирмоқчи эди, бироқ кампир уришиб берди:

— Йўқол, уятсиз, кўзимга кўринма! Сенга бу ерда пишириб қўйгани йўқ.

Даръя қовоғини солиб, ҳўл латта билан даҳлизни артгани чиқиб кетди. Наталья аранг бошини кўтариб:

— Каравотдан тоза чойшабни олинг... Шолча ташлаб қўя қолсангиз ҳам бўлади менга... Барибир ифлос бўлади...— деди.

— Гапирма!— деб буюрди Ильинична.— Ечиниб ётгин. Кўнглинг айнияптими? Сув обкелайми?

— Бўшашиб кетяпман... Тоза кўйлақ билан сув келтириб беринг менга.

Наталья бир амаллаб ўрнидан турди-да, имиллаб юриб каравот ёнига борди. Натальянинг юбкаси қондан шалаббо бўлиб, оёқларига ёпишиб қолганига Ильиничнанинг энди кўзи тушди. Кампир Натальянинг ёмғирда ивиган одам сингари энгашиб этагини сиққанини, қийналиб ечинганини кўрниб қўрқиб кетди.

— Қон кетавериб мадоринг қурибди, шўрлик! —
йиғламсираб гапирди Ильинична.

Наталья кўзларини юмиб, тез-тез энтикиб нафас оларди. Ильинична унга бир қаради-ю, шошилганича емакхонага чиқди. Пантелей Прокофьевични туртклиб аранг уйғотди-да:

— Наталья касал... — деди. — Аҳволи жуда оғир, ўлиб қолмаса гўргайди. Арава қўшиб ҳозир станицадан фершални топиб кел.

— Бўлмаган гапни қўйсанг-чи! Жин тегибдими унга? Касали нимаси? Кечалари камроқ юрсин эди...

Кампир воқеани қисқача гапириб берди. Пантелей Прокофьевич хуноб бўлиб ўрнидан иргиб турди. Йўлйўлакай чалворини тугмалаб, меҳмонхона томон югурди.

— Ҳаҳ, мочағар? Ҳаҳ, итвачча? Бу нима қилганинг, а!? Қим буни мажбур этдийкин!.. Ҳозир адабини бермасам!..

— Эсингни единги, лаънати! Нима қилмоқчи-сан? Яқинига борма, сенсиз ҳам ўзи зўрға турибди!.. Болаларни уйғоторасан, ахир! Қўрага чиқиб тезроқ аравани қўш!.. — Ильинична чолни ҳарчанд қайтарса ҳам, у қулоқ солмасдан меҳмонхона эшигини тепиб очиб юборди.

— Бу кунингдан баттар бўл, лаънати! — деб бақирди у остоидан туриб.

— Қирманг, дада! Мумкинмас! Худо ҳақи, кирманг! — деб чинқирди Наталья ечган кўйлаги билан кўқсини тўсиб.

Пантелей Прокофьевич сўкина-сўкина чакмон билан фуражкасини, от абзалларини қидира бошлади. Унинг ивирсиганини кўриб, Дуняшканинг тоқати тоқ бўлди, юрганича емакхонага кирди-ю, кўз ёшларини оқизиб, отасига ёпиша кетди:

— Тезроқ жўнасанг-чи, ахир! Қўнғизга ўхшаб мунча ивирсийсан? Наташка ўлай дейди-ю, бу бўлса бир соатдан бери имиллайди, холос! Балли, сенда-қа отага! Боргинг келмаса. айт, ўзим арава қўшиб бораман.

— Вой, аҳмоқ! Сенга жин тегдими ўзи? Бир ками сен эдинг, манжалаки! Дадасига бақиради-я, ҳаро-

ми!— Пантелей Прокофьевич чакмон билан қизини урмоқчи бўлиб юлқинди-да, ғўлдираб қарғаганича ҳовлига чиқиб кетди.

Чол жўнагандан кейин аёллар эркин нафас олишиди. Дарья эшик ва стулларни тарақлатиб, нари-бери суриб пол юварди; чол кетгандан кейин Ильиничнинг ижозати билан меҳмонхонага кирган Дуняшка Натальянинг каравоти бошида ёстигини тузатиб, сув бериб ўтиради; Ильинична ора-сира ёнбошдаги ҳужрага кириб, ухлаб ётган болаларни кўриб чиқар ва қўлини жағига тираб Натальяга яна узоқ тикилар, фамгинлик билан бош чайқарди.

Наталья чурқ этмай, ёстиқ устидаги бошини қаерга қўярини билмай ётарди, унинг соchlари тўзиган, кокиллари тердан жиққа ҳўл бўлган эди. Қон тўхтамасди. Ильинична ҳар ярим соатда уни авайлаб кўтариб, остидаги жиққа ҳўл чойшабни олиб, ўрнига янгисини қўяди.

Наталья тобора ҳолдан кетиб бўшашибмоқда эди. Тун ярмидан оғганда у кўзини очиб:

— Тонг отишга яқинлашдими?— деб сўради.

— Ҳали вақт эрта,— деб тинчитди уни кампир, бироқ ўзича: «Демак, вақт-соати яқин! Болаларини кўролмай кетишини ўйлаб хавотир бўляпти...»— деган гапни кўнглидан ўтказиб қўйди.

Гўё кўнглига келган гапни тасдиқлагандай Наталья секингина:

— Ойижон, Мишатка билан Полюшкани уйғотинг...— деб ялинди.

— Йўғ-э жон болам! Ярим кечада уйғотиб нима қиласмиш? Сени бу аҳволда кўришса, қўрқиб фарёд кўтаришади. Уйғотишнинг нима кераги бор?

— Мен уларни кўриб қолмоқчиман... Аҳволим ёмон.

— Худо сақласин, бу нима деганинг? Отанг ҳозир фершални обкелади, дори-дармон қилса енгил тортасан. Бирпасгина ухлаб олсанг бўлармиди, а, жонгинам!

— Ухлаш қайди, ойижон!— деди Наталья афсуслангандай хўрсиниб. Шундан кейин у анчагача бир текисда нафас олиб жим ётди.

Ильинична оҳиста юриб зинапояга чиқди-да, қўз ёшларига эрк бериб, тўйгунча йиглади. Шарқ томон сал-пал ёришган маҳалда у кўзлари қизарган, юзлари шишган ҳолда меҳмонхонага қайтиб келди. Эшик ғижирлаши билан Наталья кўзини очиб янга сўради:

— Тонг ёришдими?

— Энди ёришяпти.

— Оёғимни пўстин билан ўраб қўйинг...

Дуняшка унинг оёғига барра пўстинни ташлади, кўрпасининг ёнларини тузатиб қўйди. Наталья унга тикилиб, кўзи билан миннатдорлик билдириди, сўнgra Ильиничнани ёнига чақириб олди:

— Ойижон, менинг бошимда ўтиринг, сен, Дуняшка, Дашка сен ҳам, бирпас чиқиб туринглар, мен ойим билан танҳо гаплашмоқчиман... Кетишдими?— деб сўради Наталья кўзини очмасдан.

— Кетишди,— деди Ильинична.

— Отам келмадими ҳалиям?

— Тезда келади. Янаям оғирлашдингми?

— Йўқ, боягидай... Мен сизга шуни айтмоқчи эдим... Ажалим яқин, ойижон... Кўнглим аниқ сезяпти. Шунчалик қоп кетдик, тавба! Даشكага тайнинланг, печни ёққандан кейин кўпроқ сув қўйсин... Мени ўз қўлингиз билан ювинг, бегона киши ювса розимасман...

— Наталья! Кўзингни оч, эркатойим! Нега ўлимни тилга оласан, болам? Тангрим меҳрибон, тузалиб кетасан.

Наталья қўлини ожизона қимирлатиб, қайнанасининг жим бўлишини илтимос қилди:

— Сиз энди гапимни бўлманг... Гапиришгаям ҳолим қолмади, бироқ айтадиган гапим кўп... Яна бошим айланяпти... Мен сизга сувни айтдимми? Тагин ҳам бақувват эканман.. Капитонова боя тушдаёқ, борган заҳотим ишимни бажарган эди... Бечора, ўзиям қўрқиб кетди... Бирам қон кетдик... Ишқилиб, эрталабгача ўлмайин-да... Сувни кўпроқ иситинглар... Ӯлигим озода бўлишини истайман... Ойижон, эгнимга ҳалиги, бурмаси ҳошияли яшил юбкамни кийгизинг... Шуни Гриша яхши кўрарди... Поплин кофтамниям... Сандиқнинг ўнг томонида, шолрўмол тагига қўйгани-

ман... Кўзим юмилгач, болаларни ойим олдига юборинглар... Ойимга одам юборсангиз бўларди, тезроқ келсин... Видолашиб қолай... Остимдагини олинг ҳўл бўп кетди...

Ильинична Натальянинг белидан кўтариб, остида-ги чойшабни олиб янгисини қўйди, лекин Наталья:

— Енбошимга ётқизинг!...— деб шивирлади-ю, ҳушидан кетди...

Мовий тонг шуъласидан деразалар ёришди. Дуняшка челакни чайқаб, сигир соққани кетди. Ильинична деразани ланг очиб ташлади, қон ҳиди, тутаган керосин иси билан тўлган уйга эрталабки шифобахш муздай шабада ёпирилиб кирди. Шамол олча баргларига тушган кўз ёшидек шабнам зарраларини дераза токкасига учирив туширди; саҳар турган қушларнинг овози, сигирларнинг маърагани, подачи қамчисининг тарсиллагани эшитилди.

Наталья ўзига келиб кўзини очди, тилининг учи билан сарғайиб, қақраб кетган қонсиз лабларини ялаб сув сўради. У энди онасини ҳам, болаларини ҳам суриштирмасди. Тобора аҳволи оғирлашиб, ранги ўчар, энди ўнгланмаслиги кўриниб турарди...

Ильинична деразани ёпиб, каравот ёнига борди. Бир кечада Наталья бутунлай ўзгариб кетганди. Бир кун олдин олмадай гуллаб турган чиройли, соғлом, бақувват жувоннинг ҳозир икки бети бўрдай оқариб, бурни сумакдай бўлиб қолганди, яқиндагина кулиб-яшнаб турган қип-қизил лаблари сўлиб, юпқаланиб қолган, ҳатто тишларини зўрга ёпиб турарди. Фақат Натальянинг кўзларигина қадимги нурини сақлаган, лекин қараши бошқача, кишига боқиши бутунлай ўзгарган эди. Ёлғиз ўзига маълум бўлган зарурият остида у аҳён-аҳёnda кўкарган қовоқларини кўтариб, меҳмонхонага кўз югуртирап ва бир лаҳза Ильиничнага бегона одамдай тикилиб қоларди; қараашлари бежо, ваҳимали эди.

Кун чиқар маҳалда Пантелеј Прокофьевич фельдшерни олиб келди. Туну кун ярадорлар ва терлама касали билан оғриганларга қараб, кечалари уйқудан қолиб чарчаган фельдшер керишиб тарантасдан тушди, тугунини олиб уйга кирди.

У зинапояда туриб эгнидаги брезент плашчни ечди-да, панжарадан энгашиб, қўлини роса совунлаб ювди, кўзада сув қуяётган Дуняшкага ер тагидан қараб, ҳатто икки марта кўз қисиб ҳам қўйди. Сўнгра меҳмонхонага кирди-да, ҳаммани у ердан чиқариб, Наталянинг олдida ўн минутча бўлди.

Пантелей Прокофьевич билан Ильинична емакхонада ўтиришарди.

Иккиси меҳмонхонадан чиққач, чол дарҳол кампиридан:

— Аҳволи қалай?— деб сўради.

— Ёмон.

— Бу ўзидан чиққан ақлми!

— Ўзидан...— деди Ильинична очиғини айтишга истеҳола қилиб.

Фельдшер ҳурпайған бошини эшиқдан чиқариб:

— Қайноқ сув; тезроқ!— деб талаб этди.

Сув қайнагунча фельдшер емакхонага чиқиб турди. Чолнинг унсиз саволига у «умид йўқ» дегандай қўл силтади.

— Тушгача қолмайди. Қон кўп кетибди. Асраб қолишнинг иложи йўқ! Григорий Пантелеевичга хабар бердингларми?

Пантелей Прокофьевич жавоб бермасдан оқсаганича шоша-пиша чиқиб кетди. Даръя чолнинг кетидан қараб, унинг бостирма тагидаги ўроқ машина орқасига ўтганини ва уйиб қўйилган бултурги таппиларга бошини қўйиб, ҳўнграб йиғлаганини кўриб турарди..

Фельдшер яна ярим соатча кутди, зинапояга чиқиб эрталабки офтобда бирпас мудраб ўтиреди, сўнгра самовар қайнагандан кейин яна меҳмонхонага кириб, Наталяяга камфора уколь қилди-да, қайтиб чиқиб сут сўради. Эсноғини аранг қайтариб, икки стакан сут ичди.

— Мени уйга обориб қўйинг,— деди Пантелей Прокофьевичга.

— Станицада касал ва ярадорлар менга маҳтал, бу ерда туришимнинг ҳожати ҳам қолмади. Барибир фойдаси йўқ. Мен Григорий Пантелеевичнинг юз-хотири учун бажону дил хизмат этардиму, лекин рости ни айтсам, қўлимдан ҳеч нарса келмайди. Бизнинг

ишимиз касалларни боқиши — ўликни тирилтиришга ожизлик қиласиз. Келинингизни шундай тилимлашибдики, бу аҳволда тирик қолиши қийин... Бачадони дабдала бўлган, соғ жойи йўқ.. Кампир темир чангак билан тортган бўлса керак. Ҳамма касофат нодонлигимизда, кимга дод деймиз!

Пантелей Прокофьевич тарантасига пичан тўшаб, Дарьяга тайнинлади:

— Сен обориб қўясан. Донга тушганда бияни суғориш эсингдан чиқмасин.

Чол фельдшерга пул бермоқчи эди, бироқ у олишга ҳеч унамай, чолни уялтириди:

— Бу тўғрида оғиз очсанг, уят бўлади, Пантелей Прокофьевич. Ошна-оғайничнолик орасига пулни суқмагин. Йўқ-йўқ, пул билан яқинимга ҳам келма! Ҳизматимми? Буни гапирмасанг ҳам бўлади! Келинингни тузата олганимда, йўриги бошқа эди.

Эрталаб соат олтига яқин Наталья ўзини енгил ҳис қила бошлади. У сув келтиририб ювинди, Дуняшка ойнани ушлаб турди, у сочларини тараб олди, сўнгра чақнаган кўзлари билан уй ичидагиларга кўз югуртириди-да, зўргатдан жилмайди:

— Мана энди тузала бошладим! Жудаям қўрқиб кетувдим-да... Дунёдан умидимни узувдим... Болалар мунча узоқ ухлаб қолишиди бугун? Бориб қара-чи, Дуняшка, уйғонишмадимикин?

Онаси Лукинична билан синглиси Грипашка келди. Кампир қизини кўриб йиғлаб юборди, бироқ Наталья ҳаяжонланганидан тез-тез гапира бошлади:

— Нега йиғлайсиз, ойижон? Аҳволим анча тузук... Мен ўлмай туриб, аза тутасизми? Қўйинг ахир, бекорга йиғлайверасизми?

Грипашка секингина онасини туртиб қўйди, кампир йиғининг вақти эмаслигини пайқаб, дарров кўз ёшларини артди-да, тасалли беришга тушди:

— Айналай қизим, ўзим шундай, бехосдан кўзимга ёш келди. Сени кўришим билан кўнглим бир хил бўп кетди... Анча ўзгариб қопсан...

Наталья Мишатка билан Полюшканинг овозларини эшигтан заҳоти икки бетига сал-пал қизил югурди.

— Тезроқ чақириңг! Бу ёқса келишсин! Кийимларини кейин кийишар... Чақириңг! — деб ҳовлиқиб қолди.

Авал Полюшка күрінди, останада тұхтаб, муштлари билан уйқуси очилмаган күзларини ишқалай бошлади.

Наталья кулимсираб гапирди:

— Ойинг бетоб бўлиб қолди... Енимга кела қол, қўзичофим!

Полюшка ҳайрон бўлиб, тизилишиб ўтирган катталарга бир бошдан қараб чиқди, сўнгра онаси ёнига келиб, ачинган тарзда:

— Нега мени уйғотмадинг? Булар ҳаммаси нега келди? — деб сўради.

— Улар мени кўргани келишди... Сени уйғотиб ни ма қиласдим?

— Сенга сув келтириб берардим, ёнингда ўтирадим...

— Бор, ювиниб, соchlарингни тараб олгин, ибодат қилиб иннайкейин келсанг, ёнимда ўтирасан.

— Нонушта қилгани турасанми?

— Билмадим. Туролмасман.

— Бўлмаса, сеникини шу ерга обкелиб бераман, тузукми, ойижон?

• Наталья оёғига кўрпа ёпиб, бошини чалқанчасига ташларкан:

— Худди дадасининг ўзгинаси, фақат унинг сингари бағритош эмас, жудаям кўнгли юмшоқ... — деди ожизона илжайиб.

Бир соатдан кейин Наталья яна оғирлашди. У болаларини ёнига имлаб чақириб бағрига босди, чўқинтириб ўпид бўлгандан кейин, уларни онасига топшириб уйига олиб кетишини илтимос қилди. Лукинич на болаларни Грипашка билан жўнатиб, ўзи Натальяниг олдида қолди.

Наталья кўзларини юмди ва тушида гапирган одамга ўхшаб:

— Шундай қилиб, мен уни кўролмас эканман... — Сўнгра алланима эсига тушгандай, бошини кўтариб: — Мишаткани қайтаринглар! — деди.

Йиглайвериб кўзлари қизариб кетган Грипашка

Мишаткани меҳмонхонага итариб киргизди, ўзи емакхонада қолиб, эшитилар-эшитилмас айтиб йиғлашга тушди.

Мишатка Мелеховлар зотига хос меҳрсизлик билан қовоғини осилтирган ҳолда секин-аста каравот ёнига борди. Онаси ning ранг-рўйи бутунлай ўзгарғанлиги учун бола ўз онасини танимагандай, ётсираб туради. Наталья ўғлини ёнига олди. Мишатканинг юраги қўлга тушган чумчуқнинг юрагидай тез-тез дукиллаб ураётганини сезди.

— Бошингни энгаштири, болам! Қулоғингни тут!..

Наталья Мишатканинг қулоғига бир нима деб шивирлади, сўнгра уни нари итариб, кўзига астойдил тикилиб қаради, қалтираган лабларини чирт юмиб, бир амаллаб зўрма-зўраки кулимсиради-да:

— Унутмайсанми? Айтасанми?— деб сўради.

Мишатка онаси ning кўрсаткич бармоғини ўтдай ёнган муштумчасига олиб, бирпас маҳкам сиқиб турди-да:

— Унутмайман...— деб қўйворди. Сўнгра каравот ёнидан узоқлашиб, негадир қўлларини қанотдай ёйиб, оёқ учи билан секин-аста чиқиб кетди...

У эшикка етгуンча Наталья орқасидан тикилиб турди, сўнгра индамай деворга ўгирилиб олди.

Туш пайтида жони узилди.

XVII

Фронт билан ўз қишлоғи орасидаги икки суткалик йўлда Григорий кўп нарсаларни эслаб, кўп нарсаларни қайтадан ўйлаб чиқди... Даштларда ёлғиз ўзим Натальяни ўйлай бериб юрагим сиқилмасин, деган мақсадда Прохор Зиковни ёнига олволган эди. Сотня турган жойдан жўнаган заҳотиёқ, Григорий урушдан ган очди. Австрия фронтида 12-полкда хизмат этган даврини, Руминияга борганини, немислар билан қандай жанг қилганини ҳикоя қила бошлади. Оғзи гапдан тинмас, полкдошлари орасида рўй берган қизиқ воқеаларни эслаб, дамба-дам куларди...

Соддадил Прохор олдинига таажжубланиб, Григорийга кўз қирида қараб, унинг бу қадар сергапли-

гига тушунолмади, бироқ кейинчалик, Григорий оғир-ғамдан қутулиш, ўзини чалғитиш мақсадида жўрттага эски воқеаларни эслайтганини англади-да, гапга тез-тез аралашиб ҳаттоки ҳаддидан ошириб юборди. Прохор бир вақтлар ярдкор бўлиб, Чернигов госпиталида ётганини ипидан-игнасигача қўймай ҳикоя қилаётib тўсатдан Григорийга кўзи тушиб қолди, унинг қора-мағиз бетларидан дувиллаб ёш оқаётганини кўрди... Прохор одоб юзасидан бир неча саржин кейинроқ қолди-да, ярим соат чамаси орқада келаверди; сўнгра яна етиб олиб, ҳеч аҳамияти бўлмаган бошқа нарсадан гап бошлаб кўрди-ю, бироқ Григорий гапга қизиқмади. Шу аҳволда иккиси чурқ этмасдан тушгача ёнма-ён от чоптириб бораверди.

Григорий жон-жаҳди билан ўйга етишга шошиларди. Кун иссиқлигига қарамай, отини тоҳ чоптирас, тоҳ елдирар, аҳён-аҳёндагина бирлас секин юргизарди. Фақат кун тикка келгандагина у жарликда тўхтади, эгарини олиб отни ўтлагани қўйиб юборди-да, ўзи сояга бориб мукка тушиб ётиб олди; шу аҳволда у иссиқ қайтгунча ётди. Улар бир мартагини отларига сули беришиди, лекин Григорий ем бериладиган вақтга мутлақо риоя қилмади. Ҳатто олис йўл босишга ўрганган остидаги отларнинг ҳам бир кеча-ю кундузда аввалги чопқирилигидан асар қолмаган эди. Прохор хуноб бўлар ва ичиди: «Бу аҳволда отдан ажраш ҳеч гапмас. Қайси аҳмоқ отга шундай азоб беради? Унга барибир, остидагиси ўлса, бирпасда бошқасини топиб олади, мен нима қиласман? Бу аҳволда Татарска етолмай, йўлда қолиб кетмасак гўргайди, ана иннайкейин, аллакимларнинг аравасида ё пиёда юриб, йўлда она сути-миз оғзимиздан келади» деб ўйларди.

Эртасига эрталаб Федосеев станицасига қарашли қишлоқлардан бирига яқинлашганларида Прохор ортиқ тоқат қилолмай, Григорийга шундай деди:

— Умрида от қўрмаган одамнинг ишини қиласан... Қандай инсон кеча-ю кундуз отга дам бермасдан чопади, а? Отларнинг аҳволига бир қарагин! Кел энди, эрталабки салқинда тузукроқ ўтлатиб олайлик.

— Ҳайдайвер, кейин қолма,— деди Григорий хаёли фаромушлик билан.

— Мен кетингдан етиб юролмайман, отим чарчади. Дам берсакмикан?

Григорий индамади. Ярим соат чамаси иккиси ҳам чурқ этмасдан ҳайдаб бораверди, ниҳоят, Прохор қатъий қилиб:

— Кел энди, бирпас ўтлатиб олайлик, ахир! Мен бу аҳволда узоққа боролмайман! Эшиятсанми? — деди.

— Ҳайда! Ҳайдайвер!

— Қачонгача ҳайдайди ахир? Туёғи узилиб тушгунчами?

— Кўп гапираверма!

— Григорий Пантелеевич, отларга раҳм қил! Мен отимни нобуд қилмоқчимасман, аҳволига қара...

— Майли бўлмаса, жонимгаям тегдинг! Үтлироқ жой топ.

* * *

Григорийга юборилган телеграмма Хопер округининг станицаларида адашиб юра-юра, унинг қўлига жуда кеч теккан эди... Наталья қўмилгандан уч кун ўтгандан кейингина Григорий уйига етиб келди. Кўча эшик олдида у отдан тушди, уйдан йиғлаб югуриб чиқсан Дуняшкани қучоқлади-да, қовоини солиб:

— Отни етаклаб совутгин... Йиғлама кўп! — деди-ю, Прохорга бурилиб: — Уйингга бор. Қерак бўлсанг чақирираман, — деди.

Ильинична Мишатка билан Полюшканинг қўлларидан ушлаб, ўғлини кутиб олгани зинапояга чиқди.

Григорий болаларини қучоқлаб олди-да, қалтироқ своз билан:

— Лекин йиғлаш йўқ! Кўз ёши керакмас! Эй гўдакчаларим! Етим қолдингларми-а! . Йўқ-йўқ... Йиғламанглар... Онанг шўрликдан ажралдик... — деди.

Григорий йиғлаб юборишга сал қолганда ўзини зўрға тўхтатиб уйга кирди, отаси билан кўришди.

Пантелеј Прокофьевич:

— Асраб қололмадик, ўғлим... — деди-ю, ўша заҳотиёқ оқсоқланганича даҳлизга чиқиб кетди.

Ильинична Григорийни меҳмонхонага обкириб, Наталья тўғрисида узоқ гапириб берди. Қампир ҳамма гапни очгиси келмаса ҳам Григорий қўймади.

— Нима учун туққиси келмаганини биласанми?— деб сўраб қолди.

— Биламан.

— Хўш?

— Наталья шу ишдан олдин анавинг... Аксинъянг олдига кирган экан, бор гапни ўша айтиб берибди...

— Ҳа... Шундайми?— Григорий чўғдай қизариб, ерга қараб олди.

Меҳмөнхонадан чиққанда ранг-рўйи оқариб, мункайиб қолган эди; кўкарган қалтироқ лабларини қимирлатиб, стол ёнида болаларини тиззасига олиб, анчагача эркалатиб ўтирди, сўнгра чанг босган бир бўлак қандни халтасидан олиб, пичоқ билан иккига бўлди-да, уялгансимон илжайди:

— Сизларга обкелган бор-йўқ совфам шу... Дадагаям ялчимадинглар... Қани, чопинглар, бобойни ҷиринглар,— деди.

— Қабристонга борасанми? — деб сўради Ильинична.

— Кейинроқ борарман... ўлганлар гинахонликни билмайди... Мишатка билан Полюшка қалай? Эсга олишадими?

— Биринчи куни йиғлайвериб юрагимни эзворишиди, айниқса Полюшканг... Иккови тил бириктиргандай, бизнинг олдимизда ҳеч эсга олишмайди, лекин бугун кечаси Мишатканинг секин-секин йиғлаганини эшитиб қолдим... Ҳеч ким эшитмасин деб бошини ёстиқ тагига тиқиб олиби... Ёнига бориб: «Сенга нима бўлди, болагинам? Мен билан ёта қоласанми?»— деб сўрасам: «Мен тушимда йиғлаган бўлсан керак, бувижон, ҳеч зарари йўқ...»— дейди холос. Ўзинг гаплашиб, кўнглини кўтариб қўй... Қеча эрталаб қулоқ солсан, иккиси даҳлизда пицирлашишпти. Полюшка бўлса: «Онамиз қайтиб келади. У ёш, ёшлар бутунлайига ўлмайди»,— дейди. Муштдай бўлсалар ҳам, катталар сингари юраклари эзиларкан. Қорынинг очдир, болам? Бирон нарса обкелай, еб оласанми? Нега индамайсан?

Григорий меҳмонхонага кирди. Гүё бу уйни умрида биринчи марта кўраётгандай, деворларига зеҳн солиб қараб чиқди, ниҳоят, тузатиб қўйилган паркү ёстиқли каравотга тикилиб қолди. Наталья шу каравотда жон берган, шу тўшакда сўнгги марта овоз бериб, нафаси ўчган... Григорий Натальянинг болалар билан видолашиш пайтини, қандай қилиб ўпганини, балки чўқинтирганини, бирма-бир кўз олдига келтирди-ю, ўлим хабарини келтирган ўша телеграммани ўқиган пайтидагидай яна юраги жазиллаб, қулоқлари шангиллай бошлаганини сезди.

Уйдаги ҳар бир буюм Натальяни эслатарди. Унинг хотираси кўз олдидан кетмас, азоб берарди. Григорий негадир ҳамма хоналарни бир-бир айланиб кўрди-да, энтикан ҳолда зинапояга чопиб чиқди. Юрагини бир нарса чанглаб олгандай бўлди. Пешонасини муздай тер босган эди. У зинапоядан тушаётиб, қўлини кўксининг чап томонига маҳкам босганича: «Эй, бечора юрак, фам-фусса сени тамом қилганга ўхшайди...» деб ўйлади.

Дуняшка ҳовлида отни етаклаб, совитарди. Омборхона ёнида от тўхтаб, ер искади, бўйинни чўзиб, устки лабини қайириб тишларини иржайтирди, сўнгра пишкириб, олдинги оёқларини бука бошлади, Дуняшка жиловидан тортибчув-чувласа ҳам, от бўй бермай, ёта бошлади.

— Ётгани қўйма! — деб бақирди Пантелей Профоьевич отхонадан туриб. — Кўзинг кўрми, устида эгари бор-ку! Нега эгарини олмадинг, каллаварам?!

Хали ҳам юраги ўйнаб турган Григорий, секинаста от ёнига борди-да, эгарни олди ва қийналаетганига қарамай Дуняшкага кулимсираб боқди:

- Ҳалиям бақирадими? — деб сўради.
- Қадимги одати, — деб жилмайди Дуняшка.
- Яна бирпас етакла, синглим.
- Тери қотибди, ҳа майли, етакласам-етаклай.
- Ёткиси келса, қўйвор, ётсин.
- Ҳўп бўлади, акажон... Юрагинг эзилляптими?
- Тағинам эзилмасинми? — деди Григорий ҳаво етишмагандай энтикиб.

Дуняшка, акасига раҳми келиб, кифтидан ўпди-

да, алланарсадан уялгандай, кўзидан ёш чиқиб кетди, юзини тескари ўгириб олганича отни қўра томон етаклаб кетди.

Григорий отаси ёнига борди. Чол уриниб отхонанинг гўнгини тозаламоқда эди.

— Отингга жой тайёрлаяпман.

— Менга нега айтмадинг? Ўзим тозалардим.

— Гапингни қара-ю! Мен нима, кучдан қолибманми? Мен ҳали мильтиқдайман. Ўлгунимча шундай кетаман! Ҳалиям ёшлардан қолишмайман. Эртага бориб буғдой ўрмоқчиман. Сен кўп турасанми?

— Бир ой.

— Жуда яхши! Менинам далага чиқмайсанми? Иш билан анча овунар эдинг.

— Ўзим ҳам шуни ўйловдим.

Чол паншаҳани ташлаб, пешона терини енги билан артди, ўзини аранг босиб, титроқ овоз билан:

— Уйга кирайлиқ, болам, овқатланамиз... — деди. — Энди минг ўйлаганинг билан бу мусибатдан қочиб қутулолмайсан... Барибир, фойдаси йўқ. Тақдир шу экан...

Ильинична дастурхонга овқат қўйди, тоза сочиқ берди. Григорий: «Бир вақтлар, Наталья ўзи овқат келтиради...» деб яна ўйланиб қолди. Ўз ҳаяжонини сездирмаслик учун у овқатни тез-тез ея бошлиди. Отаси омборхонадан оғзига пичан тиқилган кўзачада самогон келтирганини кўриб, миннатдорлик билан унга қараб қўйди.

— Натальянинг арвоҳ хотири учун ичайлик, жойи жаннатда бўлсин, — деди Пантелеј Прокофьевич овозини дадил қилиб.

Иккиси бир стакандан ичишди. Чол кетидан яна қўйди:

— Бир йилда икки кишини қўлдан бердик. Ажал бизнинг уйга пашшахурда бўп қолди...

— Қўй энди, шу гапдан оғиз очма, дада! — деб ялинди Григорий.

У иккинчи стаканини ҳам дам олмасдан ичиб юборди-да, анчагача қоқи балиқни чайнаб ўтирди. Григорий тезроқ масти бўлиб, хаёлидан кетмаган ўйлардан тезроқ қутулишни истарди.

— Бу йил экин-текин жуда яхши! Бизнинг экинимиз-ку, ҳамманикidan ҳам олдин! — деб мақтанаарди Пантелей Прокофьевич. Бироқ Григорий атайлаб мақтанаётганини унинг овозидан сезиб қолди.

— Буғдой-чи?

— Буғдойми? Сал-пал оласи бор, лекин шундай бўлсаям ўттиз беш, қирқ пуддан дон тўқади. Айниқса, қора буғдойни айт: одамларники бирам етилибдики, асти қўявур! Аксига бу йил биз шуни сепганимиз йўқ эди. Барибир мен унча қайфурмайман. Замона шу аҳволда-ю, донни қайга қўясан? Парамонов пунктига оборолмасанг, омборда сақлай олмасанг... Фронт яқинлашса — яна ўртоқлар келиб бир дон қўймай, ҳаммасини олиб кетишади. Лекин парво қилма: бу йилги ҳосилдан ташқари, яна икки йилга етарли доғнимиз бор. Худога шукур, хамбаларимиз лиммо-лим, бошқа жойда ҳам бор... — Чол айёrona кўз қисиб қўйди: — Дашкадан сўрагин, қора кунга аtab, қанча дон яшириб қўйганимизни айтиб беради. Чуқурлиги сенинг бўйингдай, эни бир ярим қулоч келадиган ўрани оғзигача тўлғазиб кўмганимиз! Замона нобоп келиб, бир оз камбағаллашиб қолдик-да, бўлмаса биз ҳам ўзига баҳузур хўжайнлардан эдик... — Чол, ўз гапи ўзига таъсир этиб мастона кулди, лекин бирпастдан кейин соқолини сипогарчилик билан силаб, жиддий тусда: — Эҳтимол, ҳали сен қайнананг тўғрисида ўйлаб ғам еяётгандирсан, лекин мен уни ҳам унутганим йўқ, ёрдам қилдим, — деди. — Бир куни ўзи оғиз очар-очмас, эртасигаётқ бир арава буғдойни ўлчамасдан обориб бердим. Раҳматлик Наталья буни кўриб, азбаройи курсанд бўлганидан кўз ёши қилиб олган эди... Қани, ўғлим, учинчи стаканиям кўтарамизми? Дунёда сендан бошқа овунчогим ҳам қолмади!

— Қани қуй, бўлмаса! — деб Григорий стакании тутди.

Шу пайт Мишатка қўрқа-писа юриб, стол ёнига келди, дадасининг тиззасига чиқди-да, чап қўли билан уни маҳкам бўйнидан қучоқлаб туриб, лабларидан чўлпиллатиб ўпиб олди.

Григорий қаттиқ таъсирланди, унинг ёшланган кўзларига тикилиб, боланинг юзига самогон ҳиди урмаслиги учун дамини ичига тортиб:

— Бу нимаси, ўғлим? — деб сўради.

Мишатка секингина жавоб берди:

— Ойим меҳмонхонада ётганида... ҳали тирик ётган маҳалида... мени олдига чақириб: «Даданг келганда мен учун уни ўпкин, иннайкейин, айтгинки, сизларни хафа қилмасин», — деб тайинлаган эди. Яна бир нима девди, эсимдан чиқиби...

Григорий стаканни столга қўйди-ю, юзини дераза томон ўғириб олди. Ҳаммаси жимиб қолди. Юракни хуноб құлувчи сукунат узоқ давом этди.

Нихоят, Пантелеј Прокофьевич аста сўради:

— Йчамизми?

— Истамайман, — Григорий ўғилчасини тиззасидан тушириб, ўрнидан турди-ю, шоша-пиша даҳлиз томон юрди.

— Шошмай тур, болам, гўшт қолди-ку! Товуқ писирғанмиз, ҳали юпқа турибди! — Ильинична пеъ ёнига югуриб борди, бироқ Григорий эшикни тарақлатганича чиқиб кетди.

Григорий нима қилишини билмай қўрани айланиб, молхона билан отхонага кириб чиқди; отига тикилиб туриб: «Чўмилтириш керак экан» деб ўйлади-да, бостирма тагига кирди. Далага чиқишига тахт қилиб қўйилган ўроқ машина олдида, ерда ётган қарағай пайраҳалари билан қириндиларни, йўнилган бир парча тахтани кўриб: «Натальянинг тобутини дадам ясадди», — деган қарорга келди-да, тез-тез юриб уйга кетди.

Ўғли қистай бергандан кейин Пантелеј Прокофьевич ноилож унинг гапига кириб, отларни ўроқ машинага қўшди-да, бир бочка сувни ортди; кечга томон ота-бола далага жўнашди...

XVIII

Григорий бир ҳисобдан Натальяни севгани, у билан олти йил бирга умр кечириб ўрганиб қолгани учунгина эмас, балки хотинининг ўлимига ўзи сабаб

бўлганини сезгани учун азоб чекарди. Агар Наталья тириклигида ўз айтганини қилиб, болаларни олиб онасиникига кетганда, бевафо эрдан бутунлай юз ўгириб, ярашмасдан ўша ёқда ўлиб кетганда, Григорий жудолик ўтида бунчалик ўртамаган ва балки, бунчалик ичини ит тирнаб, пушаймон емаган бўлармиди... Бироқ Ильинична, Натальянинг чин юракдан севганини, тамомий қилмишларини кечирганини ва сўнгги дамигача уни тилга олганини ўғлини бирмабир гапириб берган эди. Мана шу унинг дардига дард қўшиб, виджон азобида қийналишга, ўтмишда нималар қилганини, умр қандай ўтиб кетганлигини аниқлаб олишга, яна ўйлаб чиқишга мажбур этарди...

Бир вақтлар Григорийнинг хотинига унчалик кўнгли йўқ эди, ҳаттоки уни ёқтирмасди ҳам, лекин сўнгги йилларда у Натальяга бошқача қарайдиган бўлганди; унда рўй берган ўзгаришнинг асосий сабабчиси болалар эди.

Олдин Григорий қалбида болаларга нисбатан оталик меҳри борлигини сезмасди. Фронтдан қисқа муддатга уйга келган вақтларида у Натальянинг кўнгли учун болаларини эркалатар ва хўжа кўрсингта силаб-сийпаган бўларди, лекин ўзи бундан баҳра олиш у ёқда турсин, Натальянинг оналик меҳри жўш уриб, болаларга парвона бўлганига ишонгиси келмай таажжубландарди. Шу чинқироқ кичкинтой гўдакларни қандай қилиб шу қадар яхши кўриш, жондан ортиқ севиш мумкинлигига сира тушунолмасди; ҳатто илгари, бола сутдан чиқмаган кезлари, кечаси бола уйғонадиган бўлса фани келиб, Натальяни кўпинча жеркиб ташлар: «Ёв келдими ўзи, мунча ҳовлиқ-масант? Овози чиқар-чиқмас, сўна чаққандай иргиб турасан! Кўявер, йиғласа йиғлар, бирпасга ҳеч нима қилмас!» — деб пўнғилларди. Болалар ҳам Григорийни унчалик ёқтиришмасди, лекин катта бўлган сайин улар дадаларига ўрганиб, тобора меҳр қўя бошладилар. Болалар меҳрига жавобан Григорийнинг кўнглида муҳаббат уйғониб, унинг учқуни Натальяга ҳам ўтган эди.

Аксинья билан ора бузилгандан кейин Григорий хотини билан ажралиш масаласи устида мутлақо бош

қотирмайдиган бўлганди; кейинчалик Аксинья билан яна топишгандан кейин ҳам ўгай она Натальянинг ўрнини босиб, болаларига оналик қилишига мутлақо ишонмаган ва бу тўғрида сира ўйламаган эди. Иложи бўлса у иккиси билан ҳам турмуш қилиб, ҳар қайси-сини ўзига яраша севиб, bemalol юра беришдан қайт-масди ҳам, бироқ хотинидан айрилгандан кейин бир-данига Аксинъядан қўнгли совуганлигини сезди, бу-нинг устига, у кундошлиқ қилиб ҳамма сирни Натальяга айтиб, уни қазога гирифтор қилгани учун Аксинъя-дан қаттиқ хафа бўлган эди.

Григорий далага чиқиб, ҳарчанд ўз аламини унумоқчи бўлиб ҳаракат қиласа ҳам, ҳаёли яна шунга қайтиб келарди. У чарчаганига қарамай, соатлаб ўроқ машинадан тушмасдан иш билан ўзини овутмоқчи бўлса-да, Наталья ҳадеб эсига тушаверарди; ҳаёл обқочиб, хотини билан бирга кечирган умрининг ilk хотираларини, аллақачонги арзимас воқеаларни, ҳар хил гапларни эсига соларди. Агар ҳаёл суришдан ўзи-ни тезроқ тўхтатиб олмаса, дарров кўз олдида кулиб турган тирик Натальянинг сиймоси пайдо бўларди. Григорий унинг қадди-қоматини, юришини, соchlарини қай хилда тузатиши ва қай хилда гапиришини, овози ва жилмайшини тасаввур эта бошларди...

Учинчи куни арпа ўришга тушиши. Чоштгоҳдан ошганда Пантелей Прокофьевич отларни тўхтатди, Григорий машинанинг кетинги ўтиргичидан иргиб тушди-да, дастаси калта паншаҳани бир четга қў-йиб:

- Дада, мен қишлоққа бориб келай,— деди.
- Нима қиласан?
- Болаларни соғиндим..
- Майли, бор,— жон деб рози бўлди чол.— Сен келгунча биз ўрилган арпани йифиштириб турамиз.

Григорий ўша заҳотиёқ машинадан ўз отини чи-қариб миниб олди-да, ўрилган сап-сариқ буғдойпоя йичи билан секин-аста катта йўл томон кетди. «Айтгин-ки, сизларни хафа қилмасин!»— деган Натальянинг гапи қулоғидан кетмасди. Григорий кўзларини юмди, жиловни қўйвориб, от билан иши бўлмай, ҳаёл суриб кетаверди.

Шамол тўзитиб юборган булут парчалари кўм-кўк осмонда қимир этмай муаллақ турарди. Буғдойпояда қузғунлар лапанглаб юришар, ғарамлар устида тўптўп бўлиб ўтиришарди; катталари яқинда қаноти чиқиб ҳали учирма бўлмаган болаларини тумшуқдан дон бериб боқишишарди. Дала-ю даштни қузғунларнинг қағиллаган-чағиллаган овози босиб кетган эди.

Григорийнинг оти йўл четидан юришга интилар, ора-сира қашқа беда учини каллаклаб, сувлиғини шилдиратиб ковшарди. Икки марта олисдаги отларни кўриб тўхтади-да, кишинаф юборди; Григорий кўзини очиб яна отини ҳайдади, атрофига аланглаб даштга кўз ташлади, чангиб ётган йўл, ҳар жой-ҳар жойга уйиб қўйиляган олтиндай ғарамлар, энди пишиб келаётган тахт-тахта қизғиши-кўк тариқ экинлари гўё уйқудагидай, кўзига эласлаб кўринарди.

Григорий уйга келиши билан кетма-кет Христоня кирди. Унинг қовоғи солиқ, кун иссиқлигига қарамай, инглизча мовут френч билан кенг чалвор кийиб олган эди. Шумтол шохидан кесиб олинган каттакон таёққа суюнганича, оқсоқланиб келиб Григорий билан кўришди.

— Ҳол-аҳвол сўрагани келдим. Бошларингга мусабат тушганини эшиитдим. Шундай қилиб, Наталья Мироновнаниям қўлдан бердингларми?

Григорий унинг гапини эшиитмасликка олиб:

— Сен қандай қилиб фронтдан келиб қолдинг? — деб сўради-да, Христонянинг букчайган бесўнақай гавдасини завқланиб томоша қила бошлади.

— Ярадор бўлдим, тузалгунимча менга жавоб беришди. Қорнимнинг икки жойидан ўқ тегди. Иккови ҳам ичагим ёнида, ҳалиям турибди, савил! Шунинг учун ҳасса кўтариб олдим. Кўрдингми?

— Қаерда ярадор бўлдинг?

— Балашов ёнида.

— Айтгандай, Балашовни олишдими? Қандай қилиб сенга ўқ тега қолди?

— Ҳужумга кирганимизда. Балашовниам олдик, Поворинониям. Мен олдим.

— Қани гапир-чи, қайси қисмдасан, ҳамқишлоқлардан ёнингда кимлар бор? Ўтири, ма, тамаки.

Григорий уйига одам келгани, ўз дардидан бўлак гапдан гаплашиб олиш мумкин бўлгани учун ниҳоятда суюнди. Христоня, ҳозир Григорий унинг тасалли беришига муҳтож эмаслигини тушунди-да, Балашов шаҳри қандай олингани, қандай ўқ текканини сўзлаб бера бошлади. У бир қарич қилиб ўралгац каттакон тамакини тутатиб, йўғон овоз билан шошмасдан гапга тушиб кетди:

— Биз, пиёда жанг қилиб, кунгабоқар экилган жойлардан секин-аста боравердик. Улар, масалан, замбарагу пулемётларидан, қолаверса, милтиқлардан ўққа тутишди денг. Ўзингга маълум, бўйим ўлгур новча, товуқлар орасида юрган ғозга ўхшаб, цепдаги одамлардан бир газ баланд, шунча энгашсам ҳам, барибир, отнинг қашқасидай кўриниб турман, шундай қилиб, ўқдан қутулолмадим. Яхшики, бўйим новча экан, агар паканароқ бўлганимда нақ бошимга тегарди-я! Хайриятки, ерга тушиб келаётган ўқларга дуч келдим, лекин дами қайтганлигига қарамай, ичимни қулдиратиб юборди, иккаласиям, савил, худди печдан янги чиққандай қайноқ денг... Кирган жойини мундоғ ушлаб кўрдим; теримнинг остида бездай бўлиб юрибди, иккаласининг ораси бир қарич. Бармоғим билан эзиб туриб йиқилдим. Ўйлаб қарасам, бунаقا ҳазилнинг кети зилга айланиши мумкин! Яхшиси қимирламай ётавериш, йўқса яна бошқаси, ўткирроғи келиб, у ёғимдан кириб, бу ёғимдан чиқиши ҳеч гапмас. Дамимни чиқармай ётавердим. Дамбадам ҳалиги савил ўқларни ушлаб кўраман денг. Иккаласиям ёнма-ён турибди. Бирданига юрагим шув этиб кетди: «Ҳозир-ку турибди, ўшанақаси қорнимга кириб кетса нима бўлади?» Ичагим орасида у ёқдан-бу ёққа юраверса, докторлар тополмай ўлиб бўлишади-ку» деб ўйладим. Иш пачава! Одамзоднинг бадани, масалан, ўзимдан қиёс қиласай, хамирдан ҳам юмшоқ, ўқ савил йўғон ичакка кириб жойлашиб олгандан кейин нима бўлади? Юрсан, иннайкейин, қорнингда қўнғироқ чалиб! Бўлади томоша! Ётган жоийимда бир бош кунгабоқарни узиб олдиму, семичкасини чақавердим, бироқ юрагимни ҳовучлаб зўрга ётибман. Бизнинг цеплар ўтиб кетишган... Балашовни

олганларидан кейин мен ҳам етиб бордим. Тишанскдаги лазаретга ётқизиши. Чумчукә ўхшаган олазарак алмат бир доктор бор экан. «Ўқни ёриб олиш керак!» деб мени хўп авраб кўрди. Мен эсимни еганмасман... «Жаноби олий, ўқ қоринга кириб кетиши мумкинми?» — деб сўрадим. — «Йўқ, мумкинмас», — деди. Ундаи бўлса, ёрдирадиган жинни йўқ! Оқибати нима бўлишини яхши биламан. Ёрдиран жойи битмай туриб, яна фронтга жўнатишади. «Йўқ, жаноби олийлари, ёрдирмайман, ичимда юравергани маъқул, мени безовта қилмайди, ҳеч қандай оғирлиги йўқ, — дедим. — Уйга совға қилиб обораман, хотинимга кўрсатмоқчиман», — дедим. Доктор мени роса койиди, кейин бир ҳафтага жавоб берди.

Григорий кулимсираб ўтириб Христонянинг солдатча ҳикоясини охиригача тинглади-да:

— Сен ҳозир қайси полкдасан ўзинг? — деб сўради.

— Тўртинчи терма полкда.

— Ҳамқишлоқлардан яна ким бор у ерда?

— Бизникилардан кўп: Аникушка ҳезалак бор, Бесхлебнов, Аким Коловейдин, Семка Мирошников, Тихон Горбачев бор.

— Хўш, казаклар қалай? Нолимаяптими?

— Ҳаммаси офицерлардан хафа. Шундай аблалар тепамизга келдики, кўз очгани қўйишмайди! Тагин ҳаммаси рус, биронта казаги йўқ.

Христоня гапираётиб, френчининг калта енгинидам-бадам тортиб қўяр ва гўё ўз кўзига ишонмагандай, инглизча асл мовут чалворни қўли билан силаб кўрарди.

— Шунча қидирсам ҳам оёғимга лойиқ ботинка топилмади, — комуш бўлиб гапида давом этди Христоня. — Англия мамлакатида менинидақа оёғи катта одам бўлмас экан... Бизнинг экишимиз — буғдой, еганимиз — буғдой нони, уларнинг емиши жавдар бўлгандан кейин, бунақа оёқ қайдаде дейсан? Бутун сотняни бошдан-оёқ кийинтиришди, хушбўй папирослар беришди, лекин барибири чатоқ...

— Нимаси чатоқ? — қизиқсиниб сўради Григорий.

Христоня илжайди:

— Сирти ялтироқ бўлганиминам ичи қалтироқ. Биласанми, казаклар яна урушдан беза бошлади. Демак, бу урушдан ҳеч натижа чиқмайди. Хотер окруғидан нари ўтмаймиз, деган гап юрибди...

Христоняни кузатиб қўйгандан кейин Григорий бир оз ўйланиб: «Бир ҳафта тураману фронтга жўнайман,— деган фикрга келди.— Бу ерда юрагинг тарс ёрилади». У кечгача уйда бўлди. Болалик чоғи эсиға тушиб, Мишаткага қамишдан шамол тегирмон ҳамда чумчук тутиш учун отнинг қилидан тузоқ қилиб берди; қизига, филдирақлари айланадиган кичкина аравача ясаб, шотисини ола-була рангга бўяди, ҳатто кипти латтадан қўғирчоқ ҳам қилиб бермоқчи эди, лекин бунга қўли келмади; қўғирчоқ Дуняшканинг ёрдами билан тайёр бўлди.

Илгари дадалари бунчалик меҳрибон бўлмаганидан болалар олдин унинг ҳаракатларига ишончсизлик кўзи билан қараб, ётсишиб турсалар ҳам, кейинчалик ундан бир қадам нари силжигилари келмай қолди, ҳатто кечга яқин Григорий далага жўнамоқчи бўлиб йўл тараддудига тушганда, Мишка йиғламсираб:

— Сен доим шу! Бирпас турасану яна бизни ташлаб кетаверасан... Қилиб берган тузофингният, тегирмонинтният, аравангният — ҳаммасини ол! Менга керакмае! — деб зарда қилди.

Григорий ўғлининг жажжи қўлларини ўзининг каттакон қўллари орасига олди:

— Ундай бўлса, масалани дарров ҳал қиласи: сен казаксан, бас, шундай экан, мен билан далага жўнайсан: арпа ўрамиз, тўплаймиз, ўроқ машинада буванг ёнида ўтириб от ҳайдайсан. Ўтлар орасида бирам чигиртка кўп-эй! Адирда ҳар хил қушчалар! Полюшқа бувиси билан уй пойласин. У биздан аразламайди; қиз боланинг иши — уй супуриш, кичкина челақчада бувисига Дондан сув обкелиш, қиласман деса, қиз болага иш кўп! Розимисан?

— Бўлмасам-чи! — деб қувонганидан бақириб юборди Мишатка. Далада жони киришини сезиб, кўзлари чақмай бошлади.

Ильинична қаршилик қилди.

— Буни қайга оборасан? Үйлаб топган нарсангни қара-я! Ётадиган жой йўқ-ку бунга? У ерда ким унга қарайди? Худо кўрсатмасин, отга яқин бориб қолса, тепиб олади, ё илон чақади. Дадангминам борма, уйда қолавер, айланай эркам! — деб ялинди неварасига кампир.

Бироқ Мишатканинг сузук кўзлари бирданига ўқрайди. (Буваси ғазабланган вақтда кўзлари шундай олайиб кетарди.) Муштлари қисилиб:

— Буви, овозингни ўчир!.. — деб чинқирди йифламсираб. — Барибир бораман! Дадажон, жон дада, унга қулоқ солма!..

Григорий кулиб, ўғлини кўтариб олди, онасини тинчиди:

— У ерда мен билан ётади. Отни чоптирмасдан, секин кетамиз, йиқитмасдан, бир амаллаб оборарман ахир! Ойижон, бунинг кийимини тайёрланг, ўзим эҳтиёт қиласман, қўрқманг, эртага кечқурун қайтиб келамиз.

Ана шундан кейин ота-бола дўст бўлиб олишди.

Григорий Татарскда икки ҳафта туриб, шу давр ичида фақат уч марта Аксинъяни узоқдан кўрди холос. Идрокли Аксинъя одоб сақлаб, жўрттага Григорийдан узоқроқ юрар, шундай вақтда унинг кўзига кўринмаслик лозимлигини яхши тушунарди. Аёлларга хос сезгирилик билан Григорийнинг қандай кайфиятда юрганини сезди: агар эҳтиётсизлик қилиб, ўз туйғусини унга изҳор этса, арзимаган нарсадан кўнгли қолиб, ораларига совуқчилик тушишига ақли етди. У Григорийнинг ўзи гап бошлишини кутиб юрди ва фронтга жўнашидан бир кун олдин шундай пайт келди. Григорий аравага дон ортиб, даладан кечикиброқ келаётган эди; қош қорайган маҳалда, далага туташган энг четки тор кўчада Аксинъяга дуч келди. Аксинъя олисдан таъзим қилиб саломлашди, қўрқа-писа жилмайди. Григорий унинг саломига жавоб берди, бироқ индамай кетаверишни ўзига эп кўрмади, от живовини аста тортиб, юришини секинлаштириди:

— Яхшимисан? — деб сўради у.

— Тузук, ёмон эмас, Григорий Пантелеевич.

— Нега кўринмайсан ҳеч?

— Далада эдим... Бутун рўзғор иши менга қолган.

Аравада Мишатка ҳам бор эди. Григорий, шунинг учун Аксинья билан гапни калта қилиб, отларни тўхтатмай кетаверди. Бир неча саржин узоқлашгандан кейин, Аксиньянинг овозини эшишиб, кетига бурилиб қаради: у четан девор ёнида туарди:

— Қишлоқда кўп турасанми?— деб сўради Аксинья қўлидаги мойчечакнинг гулбаргларини ҳаяжон ичидаги битталаб юлаётиб.

— Эрта-индин жўнайман.

Аксинья яна бирон гап сўрамоқчи бўлгандай бир лаҳза ийманиб турди-да, негадир сўрамади, қўл силтади-ю, тез-тез юриб ўтлоқ томон кетаверди, бир марта кетига бурилиб қарамади ҳам.

XIX

Осмонни қора булат буркаб олди. Ёмғир майдаб севалай бошлади. Майса кўкатлар, бурганлар, даштда унда-мунда кўринган ёввойи тоғолча барглари намдан йилтиради.

Муддатидан илгари жўнашганига ниҳоятда хафа бўлған Прохор, йўлга чиққандан бери Григорий билан гаплашмасдан, индамай қовоғини солиб олган эди. Севастъянов қишлоғидан ўтганларида учта отлик казакка дуч келишди. Улар пошиналари билан отларини ниқтаб, гурунглашиб ёнма-ён келишарди. Казаклардан бири — кул ранг чакмон кийган, малла соқолли кексароқ казак Григорийни олислан таниб ҳамроҳларига: «Ие, биродарлар, бу Мелехов-ку!» — деб бақирди, Григорийнинг олдига етгандан кейин, бўйдор тўриқ аргумогини тўхтатди.

— Салом, Григорий Пантелеевич! — деб сўрашди у.

— Саломат бўл! — деди Григорий; бу малла соқол, бадқовоқ казакни қаерда кўрганини шунчалик ўйласа ҳам эслай олмади.

Бу одамнинг яқинда подхорунжийлик даражасига кўтарилигани афтидан маълум эди: анчайин казаклардан ажралиб туриш учун чакмонининг кифтига янги погон тикиб олганди.

— Танимадингми? — деб сўради у яқинроқ келиб, лекин сап-сарин жун босган сўлоқмондай қўлини чўзиз кўришганда оғзидан гупиллаб бадбўй ароқ ҳиди келди. Янги амал теккан подхорунжийнинг такаббурлиги башарасидан кўриниб турарди: азбаройи мағуррлигидан бит кўзлари йилт-йилт қилас, лаб-лунжининг таноби қочиб иршаярди.

Мовут чакмон кийган офицернинг турқини кўриб, Григорийнинг кулгиси қистали, уни очиқдан-очиқ мазах қилиб:

— Танимаяпман. Оддий казак бўлиб юрган пайтингда кўрган бўлсан керак... Яқинда подхорунжий қилиб кўтаришганми дейман? — деб сўради.

— Топдинг! Бир ҳафтача бўлди. Иккимиз Кудиновнинг штабида учрашганини аранг ўйлаб томди, унииг «Семак» лақаби ҳамда Кудиновнинг берган баҳоси эсига тушди: «Аблаҳнинг отган ўқи хато кетмайди. Қуён қочса, милтиқ билан отиб қулатаверади; жангда баҳоси йўқ, энг яхши разведкачи, фақат ақли калтароқ» деган эди. Семак қўзғолон даврида сотня командири эди, аллақандай бир жинояти учун Кудинов уни жазоламоқчи бўлганда Григорий аралашиб, Семакнинг гуноҳидан ўтилган ва ўз вазифасида қолдирилган эди.

— Фронтданми?

— Ҳа, фронтдан, Новохоперск ёнидан чиқдим, отпуска олиб келяпман. Юз эллик чақирим айланма йўл босиғга тўғри келди, Слашевская станицасига кириб ўтдим, у ерда қариндошларим бор. Уша яхшилигинг ҳалиям эсимда, Григорий Пантелеевич! Сени шу топда сийлагим кепкетди, кўнглим учун йўқ демайсан, тўрвамда икки шиша тоза спирт бор, шуни ичамиз, хўпми?

Григорий ичишга кўнмади, лекин сўна қилинган бир шиша спиртни қайтармай олди.

— Ўлжанинг кони ўша ёқда экан! Олган ҳам олди, олмаган ҳам. Казаклар билан офицерлар олганича олишиб!— мақтаниб сўзларди Семак.— Мен Балашовдаям бўлдим. Шаҳарга киришимиз билан энг аввал темир йўлга човут солдик; ҳамма йўл тирбанд, вагонлар қатор-қатор бўлиб кетган. Бир вагонда қанд, иккинчисида кийим-кечак, учинчисида ҳар хил буюм. Баъзи казаклар қирқтадан уст-бош олволишиди! Иннайкейин, жуҳудларни таламоққа тушдик — ана томоша! Менинг сотнямдан бир олғир йигит жуҳудларни талаб, ўн олтита ён соат тўплади, ўнтаси тилла; ҳаммасини кўксига тақиб олиб, худди катта бойлар сингари кўчада бемалол юраверади, итвачча! Узукларни-ку, сон-саноғи йўқ! Ҳар бармоғига иккитадан, учтадан тақиб олган...

Григорий унинг дўппайган хуржунини кўрсатиб:

— Анавилар нима? — деб сўради.

— Буми... ҳар хил буюм.

— Сен ҳам таладингми?

— Гапингни қара-ю... Мен талаганим йўқ, қонуний йўл билан олдим. Бизнинг командиримиз: «Шаҳарни олсаларинг, икки суткагача уни сизларният ихтиёргизга бераман», — деди. Нима, бошқалардан камманми? Мен фақат давлат молидан олдим, қўлга илинганини олдим холос... Бошқалар ҳеч нарсадан тап тортмади.

— Балли, сиздай аскарларга! — Григорий ҳаромхўр подхорунжийга нафратланиб қаради: — Сен сиёқли одамларнинг жойи кўпrik тагида ўтириб йўл тўсиш, урушни ким қўйибди сизларга? Урушният талонторожга айлантирдингизми энди! Топган ҳунарларингни қара-ю! Минг лаънат, сенларга! Сен ҳали, бунинг учун ҳеч нарса бўлмайди, деб ўйлаётгандирсан! Полковнигинг билан қўшиб терингни шилиб олишади ҳали!

— Нима учун?

— Ўша қилиқлари учун.

— Қим теримизни шилади?

— Тепада турганлар.

Семак истеҳзоли кулди:

— Уларнинг ўзи олмабдими? Биз хуржуnda ол-

ган бўлсак, улар қатор-қатор араваларда карвон қилиб жўнатишиди.

— Ўзинг кўрдингми?

— Кўрдингми? дейди-я! Кўрмоқ тугул шундай араваларни Яриженгача ўзим обориб қўйганман. Кумуш қошигу идиш-товоқларнинг ўзи бир арава эди! Йўлда баъзи офицерлар тўхтатиб: «Аравалардаги нима? Қани, кўрсат!» деб тиқилинч қилганда: «Фалончи генералнинг шахсий буюмлари» дейишим биланоқ индамай кетаверишарди.

— Қайси генерал экан?— деб сўради Григорий кўзини қисиб, асабийлашганидан жиловни ўйнаб.

Семак мугомбirona илжайди:

— Фамилиясини унутибман... Ҳаҳ, эсим қурсин, оти нимаям эди? Йўқ, эслолмадим, бутунлай ёдимдан кўтарилиб кетиби! Бекорга койияпсан, Григорий Пантелеевич. Ҳамма шундай қиляпти, ўлай агар, рост. Ҳалиям мен бошқаларга қараганда инсофлиман; мен йўли билан олдим, бошқалар куппа-кундузи кўчада тунаб олишаверди, жуҳуд хотинларни зўрлашди! Мен унақа ишларни қилганим йўқ, худога шукур, никоҳлик хогиним бор, ўзиям хотинмисан хотин-да! Йўқ, сен мендан чакки хафа бўляпсан. Тўхтасанг-чи, ахир, мунча шошасан!

Григорий бош қимирлатиб, Семак билан совуқ-қина хайрлашди-да, Прохорга:

— Қани, кетдик!— деб отини елдириб кетди.

Йўлма-йўл гоҳ якка, гоҳ тўп-тўп бўлиб отпуска олиб келаётган казаклар учраб турарди. Дам-бадам қўшотлиқ аравалар учраб турарди. Ортилган юқ устидан брезент ё шолча ёпилиб, маҳкам танғиб ташланган эди. Яп-янги ёзлик гимнастёрка, қизил аскарча мош ранг шим кийган казаклар оёқларини узангига тираб, аравалар кетида от чоптириб келишарди. Казакларнинг офтобда қорайиб, чаңг босган юзлари кулиб-яшина бурулар, бироқ улар Григорийни кўришлари билан баббаравар честь бериб, индамасдан, тезроқ ўтиб кетиш пайида бўлишарди, фақат анча узоқлашиб олганларидан кейингина яна гаплашиб кетишарди.

Прохор юқ ортган араваларни ва уларни қўриқлаб келаётган отлиқларни олисдан қўриши биланоқ:

— Савдогарлар келяпти! — деб масхараомуз куларди.

Лекин уйига қуруқ қайтиб келаётганлар ҳам йўқ эмасди. Аллақайси бир қишлоқда Григорий отини сүформоқчи бўлиб қудуқ ёнида тўхтаганида, ёнбошдаги ҳовлидан ашула овозини эшишиб қолди. Овозларининг ширалик ва ўткирлигига қараганда ашула айтаётганлар ёш казаклар эдилар.

Прохор қудуқдан сув олаётиб:

— Бирон йигитни армияга жўнатишаётганга ўхшайди,— деди.

Кечада бир шиша спирт ичилгани учун ҳозир у бош оғриқ қилгиси келиб ўлиб турарди, шу сабабдан отларни нари-бери сугорди-да, илжайиб:

— Шу ҳовлига тўғри кириб борсак қалай бўларкин, Пантелеевич? Балки, бизгаям бир стакандан тегиб қолармиди, нима дединг, а? Уйи қамиш томли бўлсаям эгаси бадавлатга ўхшайди,— деди.

Григорий, йигитчани қандай кузатишаётганини кўргиси келиб, киришга рози бўлди. Иккиси отларини четанга боғлаб, ҳовлига киришди. Бостирма тагидаги айланма охурда тўртта эгарлоғлик от турарди. Ўспирин бола дон ўлчайдиган тунука идишда лиммо-лим сулини омборхонадан олиб чиқди. У Григорийга бир кўз ташлади-ю, кишинаётган отлар ёнига кетди. Уйнинг нариги томонидан ашула товуши келарди. Ингичка овозли тенор булбулдай сайрарди.

У ерларда қарға учмасди,

У ерларда ҳеч ким юрмасди...

Овози хириллаб қолган бас сўнгги сўзларини такорлаб тенорга жўр бўлди, унинг кетидан жарангдор овозлар янгради, қўшиқча жон кириб, улуғвор ва маъюс оҳангларга тўлиб жаранглай бошлади. Григорий ашулачи йигитларга халақит бермаслик учун Прохорнинг енгидан тортиб тўхтатди.

— Шошма, кўринмай турайлик, айтиб бўлишсин,— деб шивирлади, унинг қулоғига.

— Бу ерда кузатиш эмас, бошқа гап бор. Худди еланликларнинг қўшиғи бу. Улардан бошқа ҳеч ким

ашулани бундай қойил қилолмайди. Овозларини қара, одамни сел қиласди-я! — деб мақтади. Прохор, бу ердан бошоғриқ қиласдиган нарса топилмаслигига күзи етиб аламидан тупуринди.

Мулойим овозли тенор, фафлат босиб орқада қолган казакнинг тақдирини қўшиқ билан айтиб тутатди:

Бу йўллардан на пиёда, на отлиқ
Утмас эди, бир кун казаклар полки
Утиб қолди, энг орқада тулпор от
Чопиб келар эди, черкас эгари
Оғиб қолган, юганининг тасмаси
Қулоғига чувалашган, чилвири
Оёғига ўралишиб борарди.
От ортидан югуради ёш казак,
Тулпорига ялинарди ёш казак:
«Тўхта, жонивор, мени ёлғиз ташлама
Сенсиз қочиб қутуломайман чечендан».

Қўшиқقا маҳлиё бўлган Григорий уйнинг оқланган пойдеворига суюнганича туриб қолган эди, у от кишинаганини ҳам, тор кўчадан ўтган арава шалдинроғини ҳам эшитмасди...

Қўшиқ тамом бўлгач, ашулачилардан бири йўталди-да:

— Авжини яхши келтиrolмадик, кечирасизлар!
Ҳа, маили билганимизча айтиб бердик,— деди.—
Энди йўлгаям бирор нарса беринглар, бувижонлар.
Қорнимизни яхшилаб тўйғаздингиз, худо хайр берсин, бироқ йўлда ейдиган ҳеч овқатимиз йўқ...

Григорий ўзига келиб, уй орқасидан чиқиб келди. Зинанинг пастки босқичида тўртта казак йигит ўтиради; қўшни ҳовлилардан келган жувонлар, кампирлар ва бир гала болалар уларни ўраб олганди. Аёллар ўқсиб-ўқсиб йиғлаб кўз ёшларини рўмollари учига артишарди; Григорий зинапояга яқинлашганда новчадан келган, нуроний юзли қора кўз кампир:

— Буғинг тасаддуқ бўлсин, болаларим! Бирам одамни сел қиласдиган ғамгин ашула эканки, юраги эзилмаган одам қолмади. Уйда ҳар қайсингнинг онанг

қолган бўлса керак, ўғли урушда юргани эсига тушганда, шўрлик она зор-зор йиғламай туроладими...— Кампир салом бериб келган Григорийга кўзларини олайтириб бир қаради-ю, ғазаб билан:— Шу гулдай йигитларни қачонгача ажал сари бошлайсан, жаноби олий? Ҳаммаси урушда қирилиб кетаверса, майлими?— деди.

— Бувижон, бизниям аяшаётгани йўқ,— деб жавоб берди Григорий хўрсиниб.

Казаклар тўсатдан келиб қолган нотаниш офицердан уялиб, дарҳол ўринларидан турдилар, олдиларидан овқатдан бўшаган тарелкаларни оёқлари билан четга суриб, гимнастёркаларини, ўқдону портупейларини тузата бошладилар. Улар милтиқларини елкаларидан олмай, ашула айтишган эди. Энг катассининг ёши ҳали йигирма бешдан ошмаганлиги кўриниб туарди.

— Қаердан бўласиз?— деб сўради Григорий бўз йигитларнинг лўппи юзларига боқиб.

— Ўз сотнямиздан келяпиз...— бўшашиб жавоб берди биттаси; унинг бурни пучуқ, кўзлари кулиб туарди.

— Мен қаерлик, қайси станицаликсиз деб сўрайаппан! Бу ерлик эмасдирсиз?

— Еланликмиз, отпуска билан келяпмиз, жаноби олий.

Ашулани бошлаган йигит шу эканини Григорий дарров овозидан таниди.

— Сен бошладингми?

— Мен.

— Овозинг яхши экан! Ўзи нима гап, нучук ашулла айтяпсиз? Хурсандликданми? Ундей десам, ичганга ўхшамайсиз.

Сочлари чиройли қилиб тараган, ҳамма ёғини чанг босган, икки бети олмайдай қип-қизил йигит, кампирларга кўз кирида бир қараб олди-да, хижолат тортгандай илжайиб, истар-истамас жавоб берди:

— Хурсандлик қайда... Улганимизнинг кунидан!..
Бу ерларда текинга овқат топилмас экан, бир бурда нон берса беради, бўлмаса йўқ. Лекин ашулани бошлишимиз билан хотинлар дув ёпирилиб келишади;

биронта юракни эзадиган қўшиқдан оламиз, қарабизки. ҳаммаси сел бўлиб, униси чўчқа мой, буниси бир кўза сут ё бошқа егулик овқат кўтариб келади...

Ашула бошлаб берган йигит ўртоқларига кўз қисиб, кўзлари билан кулиб:

— Биз попга ўхшаб олдин хониш қиласизу, кетидан садақа тўплаймиз, жаноби юзбоши,— деди.

Казаклардан бири кўкрак чўнтағидан мой босган кир қофозни олиб Григорийга узатди:

— Отпуска қофозимиз мана.

— Мен нима қиласман буни?

— Эҳтимол, ишонмаётгандирсиз, биз дезертирмасмиз...

— Буни сен жазо отрядига дуч келганда кўрсатарсан,— деди Григорий энсаси қотиб, бироқ кетиши олдида уларга шундай маслаҳат берди:— Кечалари йўл юринглар, кундузи бирон жойда беркиниб ётаверинглар. Қофозларингнинг тайини йўқ, бунга ишониб қўлга тушмасаларинг гўргайди... Печати йўқ-ку!

— Бизнинг сотнида печать йўқ.

— Қалмоқларнинг шомполига тобларинг бўлмаса, менинг маслаҳатимдан чиқманглар, тузукми?

Қишлоқдан уч чақиримча нарида, йўл ёқасидаги кичкина ўрмондан юз эллик саржин нарироқда рўпарасидан келаётган икки отлиқча Григорийнинг кўзи тушди. Улар тўхтаб, бирпас тикилиб туришди-да, шартта ўрмонга бурилишди.

— Булар албатта қофозисиз,— деди Прохор.— Жуфтак уриб қочишини кўрдингми? Куппа-кундуз қўрқмасдан юришларини қара!

Яна бир неча киши Григорийни кўрган ҳамон йўлдан чиқа солиб яширинмоқчи бўлди. Уйига ўғринча қайтаётган ўрта яшар бир казак кунгабоқар орасига уриб уватда бекинган қуён сингари писиб ётаверди. Прохор унинг ёнидан ўтиб бораркан, узангидга тикка туриб:

— Ҳоён, шуди йўқ, тузукроқ пана бўл! Бошингни бекитибсану к... кўриниб қопти!— деб бақирди, сўнgra, овозига қаҳрли тус бериб:— Чиқ бу ёқقا! Ҳужжатингни кўрсат ҳозир!— деб дўйқ қилди.

Казак ўрнидан тура солиб, энгашганича кунгабо-

қар поялари ораси билан қочиб қолди; Прохор овози борича хохолаб қулиб юборди, кетидан қувламоқчи бўлгандада Григорий уни тўхтатди:

— Жиннилик қилма! Бошингга урасанми уни? Бу чопишида мадори қуриб йиқилади-ку. Ўтакаси ёрилиб, ўлиб қолмасин тағин...

— Бе!.. Уни този ит ҳам қувиб етолмайди! Шу чопишида ўн чақирим жойга бемалол боради. Кунғабоқарлар оралаб югуришини кўр! Қоч-қочга тушганда одамзоднинг оёғи ерга тегмайди, худди қанот пайдо қилгандай учади-я! Нега бундайлигини сира тушунолмайман.

Прхор умуман дезертиларни ёқтирумай:

— Буларни қара, Пантелеевич, подадай, тўп-тўп бўлиб бемалол келишяпти-я. Худди ёв қувгандай! Бу аҳволда бутун фронт сенминам менга қолмаса гўргайди...— деди.

Григорий фронтга яқинлашган сари Дон армиясининг бузғунликка юз тутганини тасдиқловчи жирканч манзаралар ҳар қадамда дуч келарди; армиядаги бу бузғунлик айни қўл баланд келган вақтда, қўзғолончилар билан бирлашиб, кучга куч қўшилган ва Шимолий фронтда катта муваффақиятга эришилган пайтда бошланган эди. Дон армиясининг қисмлари қатъий ҳужумга ўтиш, қизилларнинг қаршилигини енгиш у ёкда турсин, бирон жиддий сиқувга бардош бера олмайдиган ҳолга келганди.

Резерв қисмлар жойлашган фронтга яқин қишлоқ ва станицаларда офицерлар ароқдан бош кўтариш масди; талаб олинган ўлжаларни араваларга сиққанча босиб олишган, уларни ҳали жўнатганларича йўқ эди; қисмлари олтмиш процентга етар-етмас одам қолган: казаклар рухсат олмасдан отпускага кетаверишарди; қалмоқлардан тузилган жазо отрядлари даштда изғиб юргани билан, барибир, оммавий тус олган дезертилрикка қарши курашишга кучи етмасди.

Саратов губернасининг ишғол этилган қишлоқларида казаклар ўзларини ёт мамлакатни босиб олган босқинчилардай тутишар: халқни талашар, аёлларнинг номусига тажковуз қилишар, дон-дунларига ўт қўйиб; молларини сўйишарди. Армия ёш-яланлар, қари-

қартанглар билан тўлдирилмоқда эди. Мададга келлаётган сотнялардаги казаклар урушга тоблари йўқлигини очиқдан-очиқ айтишар, Воронеж томон жўна-тилаётган қисмларда-ку, казаклар ўз офицерларига рўй-рост бўйсунишмасди. Миш-мишларга қараганда, олдинги позицияларда офицерларни ўлдириш каби ҳодисалар кўпайган эди.

Қош қорайган маҳалда Григорий Балашовдан сал беридаги кичкина қишлоқда тунағани тўхтади. Қатта ёшдаги казаклардан тузилган 4-нчи алоҳида запас сотняси билан Таганрог полкининг сапёрлар ротаси қишлоқдаги ҳамма уйларни эгаллаб олишганди. Григорий анчагача овора бўлиб, қўнишга жой қидирди. Ҳар доимгида далада тунаб кетаверишса бўларди-ю, бироқ кечаси ёмғир ёғадиганга ўхшаб ҳаво айниганди; бунинг устига Прохорнинг безгаги тутиб, мазаси қочган эди; шунинг учун бирон пана жой топиш зарур эди. Қишлоқдан чиқаверишда, гир айланасига терак экилган каттакон уйнинг олдида тўп ўқи тегиб бузилган бронево-автомобиль турарди. Григорий ўша ердан ўтаётиб автомобильнинг кўк сиртидаги ўчирilmай қолган ёзувни ўқиди: «Аблаҳ оқларга ўлим!» ва пастроқда: «Свирепий»¹,— деб ёзилган эди. Ҳовлининг ичидаги ёғочга боғланган отларнинг пишқиргани, одамларнинг овози эшитиларди; уй орқасидаги боғда гулхан ёнар, тутуни ям-яшил дараҳтлар учини чулғаб олганди; у ёқ-бу ёққа юриб турган казакларнинг қораси гулхан шуъласида аниқ кўринарди. Шамол хашак тутуни аралаш куйган тўнғиз жунининг исини димоққа опкелиб уради.

Григорий отдан тушиб, уй томон юрди. Ичи одамга тўлган пастак ҳужрага кириб:

— Бу уйнинг эгаси ким?— деб сўради.

Печга суюнган ўрта бўйли мужик жойидан қўзғалмасдан Григорийга қаради:

— Мен. Хўш, хизмат?

— Бир кеча тунашга рухсат этасизми? Икки кишимиз.

¹ Свирепий — бераҳм демакдир. (*Тарж*).

— Ўзимиз жой торлигидан тиқилиб ётибмиз-ку,— деб пўнғиллади сўрида ётган кекса казак.

Үй эгаси узр сўрагандай:

— Менга барибир-ку, лекин жудаям одам кўп, сиғмассиз,— деди.

— Бир амаллаб сиғишамиз. Ёмғирда қолсак яхши бўлмас, ахир?— деб қаттиқ туриб олди Григорий.— Орденарецим касал бўлмагандаям майлийди.

Ҳалиги казак сўридан оёғини осилтириб Григорийни бошдан-оёқ қараб чиққандан кейин муомаласи ҳам дарҳол ўзгарди:

— Жаноби олийлари, бизлар уй эгалариминам ўн тўрт киши — икки ҳужрада турибмиз, учинчи хонани инглиз офицери ўз денщиклари билан эгаллаб олган, ёнида яна битта казак офицер ҳам бор.

Старший урядниклик погони таққан оқ соқолли иккинчи казак жонкуярлик қилиб:

— Шулар билан гаплашсангиз қалай бўларкин?— деган маслаҳатни берди.

— Йўқ, шу ер ҳам бўлаверади. Менга кўп жой керакмас, полда ётавераман, сизни безовта қилмайман.— Григорий шинелини ечди, кафти билан сочларини силади-да, стол ёнига бориб ўтирди.

Прохор отларга қарагани чиқиб кетди.

Нариги хонадагилар буларнинг гапини эшитган бўлсалар керакки, орадан беш минут ўтар-ўтмас, башибанг кийинган паст бўйли поручик чиқди.

— Сиз тунашга жой қидиряпсизми?— деб сўради у Григорийдан, сўнгра унинг погонини кўриб, илтифот билан илжайди:— Бизнинг бўлмага марҳамат қила қолинг, юзбоши. Мен ва инглиз армиясининг лейтенанти жаноб Кэмпбелл илтимос этамиз, у ер сизга қўлайроқ бўлади. Менинг фамилиям Шеглов. Сизники?— У Григорийнинг қўлини сиқиб кўришибди:— Сиз фронтдан келяпсизми? Ҳа, отпусканми? Қани юринг, марҳамат этинг! Бизга меҳмон бўлсангиз, бошимиз осмонга етади. Қорнингиз очган бўлса керак, сизни сийлайдиган нарса топилади.

Поручикнинг асл мовутдан тикилган оч-яшил френчинга тақилган офицерча георгий медали ликиллаб турарди, соchlари бежирим қилиб тараалган, эти-

ги яхшилаб мойланганди, соқоли олинган қорамагиз силлиқ юзи, келишган қад-басти бенуқсон, ўзини ниҳоятда озода тутар, ундан қиммат баҳо атирнинг ҳиди гупиллаб келарди. Даҳлизда у Григорийга йўл берил, одоб билан ўзи кейинроқ қолди:

— Чапдаги эшик. Эҳтиёт бўлинг, яшик бор, қоқилиб кетманг тағин,— деб огоҳлантириди.

Новча бўйли, тўладан келган ёш лейтенант ўрнидан туриб Григорийни кутиб олди: унинг кул ранг кўзлари қаншарига яқин бўлиб, устки лабидаги тиртигини қора мўйлови ёпиб турарди. Поручик инглиз тилида алланима деб, Григорий билан уни таништириди. Лейтенант гоҳ поручикка, гоҳ унга қараб, қўлини маҳкам сиқиб кўришди-да, ўз тилида бир нима деди, кейин имо-ю ишора билан меҳмонни ўтиришга таклиф этди.

Ўйнинг ўртасида тўртта ўиғма каравот қатор турар, бурчакда аллақандай яшиклар, чарм чамадонлар, қоплар уйилиб ётарди. Сандиқ устида: Григорийга но маълум системадаги қўл пулемёти, дурбин филофи, ўқдонлар, қўндоғи қора, тифи яп-янги, мойи артилмаган, кўкиштоб карабин ётарди.

Лейтенант Григорийга жилмайиб қараб, ёқимли ўғон овозда алланималар дерди. Григорий қулоғига ғалатироқ эшитилган ёт тилни тушунмаса ҳам, гап ўз устида кетаётганини фаҳмлаб, бир оз ўнғайсизланаради. Чамадонлардан бирини титаётган поручик инглизнинг гапига кулимсираб қулоқ солгандан кейин таржима қилиб берди:

— Лейтенант Кэмбелл, казакларга ҳурматим зўр, дейди, казаклар энг ўткир суворий ва асл жангчи, дейди. Қорнингиз оч бўлса керак, а? Сиз ичасизми? Хавф-хатар кишиларни бир-бирига яқин қиласди, дейди... Э, қўяверинг уни, ҳаммаси бемаъни гаплар!— Поручик чамадондан бир неча консерва банкалари, икки шиша конъяк олди-да, яна чамадонга энгашиб, таржима қила бошлади:— Лейтенантнинг гапига биноан, Усть-Медведицада казак офицерлари уни иззат ва ҳурмат билан қарши олишибди. У ерда Дон виносидан каттакон бир бочкасини ичишибди, ҳаммаси фирт маст бўлиб, аллақандай гимназистка қизлар би-

лан роса вақтикоғлиқ қилишибди. Бунисига ишонса бўлади! Шунинг учун лейтенант, унга кўрсатилган иззат ва меҳмондўстлик эвазига ҳозир сизни меҳмон қилиб, мамнуният билан ўз бурчини адо этмоқчи. Шу азобга чидайсиз энди. Сизга ачинаман холос... Сиз ичасизми?

— Раҳмат. Ичаман,— деди Григорий ва чанг босган, жиловни ушлайвериб кир бўлган бармоқларига кўз қирини ташлади.

Поручик стол устига консерва банкаларини қўйиб, пичоқ билан тез-тез оча бошлади:

— Биласизми, юзбоши,— деб хўрсинди,— бу мечкай инглиз тўнфизи бошимга битган бало бўлди! Эрталабдан бошлаб ярим кечагача ичгани-ичган, молдай ичади-я! Мен, ўзим ҳам, ичкилик бўлса жон дейману бироқ бунинг ичганини асло кўтаролмайман. Бу бўлса,— поручик лейтенантга илжайиб қаради-да, бирданига болохонадор қилиб сўкди,— оч наҳоргаям қарамайди, тўқлигигаям.

Лейтенант бош қимирлатиб, тиржайиб кулар, рустилини бузиб чулдирар эди:

— Та, та!.. Хорошо.... Нато вып'ит фаш здор'ов!

Григорий соchlарини силкитиб, қотиб-қотиб кулди. Улфатлар дидига жуда ёққан эди, айниқса манави тиржайиб турган, рус тилини бузиб, ҳар бир сўзни чертиб галирган лейтенантнинг баҳоси йўқ эди.

Поручик стаканларни артаётиб ҳасрат қилиша бошлади:

— Икки ҳафтадан бери она сути оғзимга келди, бу нима кўргилик, а? Бу одам Иккинчи корпусимизга берилган танкларни ҳайдаш масаласида инструкторлик қиляпти, шу дардисарга мени таржимон қилиб беришиди, денг. Инглиз тилини яхши билганим қайтага бошимга бало бўлди... Бизда ҳам ичишади, лекин бунчалик эмас. Бу ўзи меш экан, кўрдим демайди! Қанча ичишини ҳозир кўрасиз! Ёлғиз ўзига тўрт-бешшиша конъяк бир суткага етмайди. Дам олиб, дам олиб ичади, лекин асло маст бўлмайди, шунча ичгандан кейин тағин бемалол ишлайверади. Мени бу адойи-тамом қилди. Ошқозонимда ғалати оғриқ пайдобўлди, шу кунларда таъбим хира, қийналиб юриб-

ман, аъзойи баданимга спирт шу қадар сингиб кетганки, чироқ ёнида ўтиришга қўрқаман денг... Бу нима азоб, а?— Гапириб туриб, икки стаканга конъяк тўлдирди, ўзига озгина қўйди.

Лейтенант кўзи билан стаканни кўрсатиб, илжайиб, алланималар деди. Поручик қўлини кўксига қўйиб, унга ялинар, сал-пал кулимсираб гапиради, аҳён-аҳёнда унинг мўлтираган қора кўзларидан бирданига ғазаб ўти учқунланарди. Григорий стаканни олиб, хушчақчақ мезбонлар билан уриштириб-да, ичиб юборди.

— О!— деди инглиз унинг ичишига қойил қолиб, у бир ҳўплади-да, поручикка жиркангансимон қараб қўйди.

Лейтенант меҳнатда чиниқсан бақувват қўлларини столга қўйиб ўтиради, кафтларининг орқа томони, терисининг оралари, машина мойи юқиб қолганлигидан қорайиб кўринар, панжалари доим бензинда ишқаланаверганидан пўст ташлаб, ҳамма ёғи тимдаланиб кетганди, фақат юзи силлиқ, икки бети қип-қизил, йилтиллаб туради. Лейтенантнинг юзи билан қўллари орасида шу қадар катта тафовут бор эдики, ҳатто Григорий: «бу ўзи маска кийиб олганми!» деган хаёлга ҳам борди.

Поручик икки стаканни лиммо-лим тўлғазиб Григорийга:

— Сиз менинг жонимга оро кирдингиз,— деди.

— У нима, якка ўзи ичмайдими?

— Ҳамма иллат шунда! Эрталаб бир ўзи ичаверади, лекин кечқурун ўла қолсаям ёлғиз ичмайди. Қани бўлмаса, кўтарайлик.

— Жуда ўткир экан...— деди озгинасини ичиб Григорий, бироқ лейтенантнинг ажабсинганини кўриб, қолганини ҳам ичиб юборди.

— Сизнинг ичишингиз бунга ёқибди, азamat экан, деб сизни мақтаяпти.

— Сизнинг ўрнингизда бўлсам, жоним киаркан,— деб кулди Григорий.

— Чидасангиз — бир ҳафта чидайсиз, ўлай агар, ундан кейин қочасиз!

— Шунчалик ноз-неъматни ташлаб-а?

— Менга қолса, бунақа ноз-неъматнинг баҳридан кечиб юборсам дейман.

— Фронтни яхши деб ўйлайсизми?

— Бу ер ҳам фронт. У ерда ўқ ейиш мумкин, тўп ўқининг парчаси тегиб, ярадор бўлиш мумкин, лекин ўшаем даргумон, аммо бу ерда юрсам, жинни бўлишим аниқ. Мевадан қилинган мана бу консерванинг мазасини кўринг. Ветчина истайсизми?

— Раҳмат, мен еяппан.

— Инглизларнинг бунақа нарсаларга суяги йўқ. Улар ўз армиясини яхши боқишиди, бизга ўхшаган мас...

— Армиямизни ким боқяпти? Бизнинг армия йўлда топганини еб тириклиқ қиляпти холос.

— Бахтга қарши, бу гапингиз тўғри. Лекин аскарларимизни шу йўсунда таъминладиган бўлсак, айниқса, жангчиларга халқни талатиб, индамай қараб тураверсак, узоққа боролмаймиз...

Григорий поручикка диққат билан қараб сўради:

— Сиз нима, олисга бормоқчимисиз ҳали?

— Йўлимиз бир бўлгандан кейин, у ёғини сўраб нима қиласиз?— Поручик, лейтенант шишани олволиб, унинг стаканига тўлғазиб конъяк қўйганини сезмади ҳам.

— Ахийри қўтаришга мажбур бўлдингиз-ку,— деб кулди Григорий.

Поручик стаканни кўриши билан:

— Яна бошланди!— деб инграб юборди. Икки бети лоладай қизариб кетди.

Индамасдан уриштириб, учови ҳам ичди.

— Йўлимиз бирликка бир-ку, лекин бу йўлдан ҳар хил юриш бор...— деб яна гап қўзғади Григорий. У, юзлари бужмайган ҳолда, тарелкадаги сирфаниб кетаверган ўрикни вилкага илиб ололмай гаранг эди:— Бирор ярим йўлда қолади, бирор нарироқ боради, бамисоли поезддай гап...

— Сиз нима, охириги станцияга етмай, йўлда тушиб қолмоқчимисиз?

Григорий маст бўла бошлаганини сезар, лекин ҳали ҳам эс-ҳушини йўқотгани йўқ эди; кулиб жавоб берди:

— Охиригача бориш учун билетга пулим етмайди. Сиз-чи?

— Йўқ, меники бошқа масала: агар мени йўлда зўрлаб туширишса, пиёда юриб бўлса ҳам, охирги станциягача етиб бораман!

— Ундай бўлса, сизга оқ йўл тилайман! Қани, ичайлик!

— Ичишдан қочмаймиз. Дастребуси қийин, у ёғи мойдай кетаверади...

Лейтенант Григорий ва поручик билан қадаҳ уриштириб индамай иchar, бироқ тамадди қилмасди. Унинг юзлари пишган ғиштдай қизариб кетган, кўзлари равшанлашиб, ҳаракатларида вазминлик пайдо бўлган эди. Иккинчи шишани ичиб тамомлашмасдан у секин ўрнидан турди-да, дадил юриб бориб, чамадондан яна уч шиша конъяк олиб келди. Шишаларни столга қўяётиб, лабининг бир чети билан кулимсиради-да, алланима деб чулдиради.

— Мистер Кэмпбелл, улфатчилигимиз давом этиши керак, дейди. Ароҳ урсин, бу мистерни! Сиз нима дейсиз?

— Майли, давом эттирамиз,— деб рози бўлди Григорий.

— Майли-ю, лекин эви билан-да! Ўзи инглиз бўлсаям қилифи худди рус купецлариникига ўхшайди. Мен тамом бўлдим...

— Ҳали балодайсиз,— деди Григорий шайтонлик қилиб.

— Гўрдами! Менинг шу топда мазам қочди... Лекин ҳали кўтара оламан, ҳа-ҳа, бемалол кўтара оламан ҳали!

Поручик бир стакан ичгандан кейин караҳт бўлиб қолди: қора кўзларини шира босиб, ғилайлашиб кетди, лаб-лунжлари осилиб, силлиқ бетларининг гўштлари дип-лип этиб уча бошлади. Конъяк унга ёмон таъсир этганди. Поручик худди сўйиншдан олдин бошига босқон билан уриб сулайтириб қўйилган ҳўқизга ўхшаб бақрайиб қолган эди.

— Сиз ҳаливери бўш келмайсиз. Ичкилик тортди, энди кор қилмайди,— деб уни мақтарди Григорий, ле-

кин ўзининг ҳам қайфи ошиб қолганини сезар, шунга қарамай, ҳали кўп ича олишига кўзи етарди.

— Ростдан, а? — Поручикнинг чеҳраси очилди, — Олдин бир оз бўшашган бўлсам ҳам, ҳозир отдайман, энди ҳар қанча бўлсаям кетаверади! Ҳа-ҳа, сира қайтармайман! Сиз менга ёқиб қолдингиз, юзбоши. Сиз бақувват экансиз, сизда, масалан, самимийлик хислати бор экан. Шуниси менга ёқди. Қелинг энди, манави аҳмоқ пиянистанинг ватани учун ҳам ичайлик. Ўзи молга ўхшаган бир маҳлуқ-ку, лекин ватани аломат. «Британия, денгизлар ҳукмдорисан!»¹ Ичамиزمи? Лекин ҳамма денгизларга эмас! Мистер Қэмпбелл, сизнинг ватанингиз учун! — Поручик кўзларини чирт юмиб туриб ичди-да, ветчинадан тамадди қилди. — У шундай ажойиб мамлакатки, асти қўяверинг! Қанақалигини тасаввур этиш қийин, юзбоши, лекин мен у ерда турганман... Қани, ичайлик!

— Ёмон бўлсаям ўз онанг ўгайдам афзал.

— Бу гапни қуйинг, ичайлик!

— Қўтаринг.

— Ватанимиз танидаги фасодни қизиган темир билан кўйдириб тозалаш керак, бироқ бунга бизнинг қурбимиз келмайди, ожизлик қиласиз. Умуман, ватанимиз борми ўзи? Тўғрисини айтганда, сиз билан биз беватанмиз. Майли, сатқайи саримга! Қэмпбелл, қизилларни енгишимизга ишонмайди.

— Ишонмайдими?

— Ҳа, ишонмайди. У бизнинг армиямизни ерга уриб, қизилларни мақтайди.

— Жангла қатнашганми ўзи?

— Қатнашиш ҳам гапми? Қизилларнинг қўлига тушишига сал қолган... Уҳ, конъяги қурсин-э?

— Ўткир экан! Кучи спиртга бараварми?

— Сал-пал бўшроқ. Суворийларимиз жонига оро кирмаганда, Қэмпбеллнинг қўлга тушиши аниқ эди. Бу воқеа Жуково қишлоғи ёнида бўлган. Қизиллар, ўшандада битта танкимизни босиб олишган эди... Хомуш кўринасиз, юзбоши, нима гап?

— Яқинда хотиним ўлган...

¹ Англия гимнининг сўзи. (Тарж.)

— Оғир мусибат! Болаларингиз борми?

— Ҳа.

— Болаларингиз соғлиғи учун! Менда бола йўқ, балки, бордир ҳам, лекин қаердалигини худо билади... аллақаерларда газета сотиб юрибдими — ким билсин... Қэмпбеллнинг Англияда қайлиғи бор. У ҳафтада икки марта қайлиғига хат ёзишни канда қилмайди. Ҳар хил бемаъни гапларни ёзса керак-да... уни кўрарга кўзим йўқ. Гапирдингизми?

— Ҳеч нарса деганим йўқ. Хўш, нега у қизилларни ҳурмат қиласмиш?

— Ким айтди «ҳурмат қиласди» деб?

— Сиз айтдингиз.

— Ҳеч бундай деганим йўқ. У ҳурмат қилмайди ва ҳурмат қилиши ҳам мумкин эмас, сиз янгишяпсиз! Ҳар ҳолда ўзидан сўраб кўрай-чи.

Ранг-рўйи оқариб кетган маст поручикнинг сўзини Қэмпбелл астойдил тинглаб бўлга, узоқ гапириб кетди. Григорий унинг гапи тамом бўлишини кутмай, Поручикдан сўради:

— Нима деб чулдираяпти?

— Қизиллар чориқ кийган ҳолда, танкларга қарши пиёда саф тортиб, ҳужум қилганини ўз кўзи билан кўрганини айтаяпти. Эшитияпсизми? У, ҳалқни енгиш мумкин эмас, дейди. Аҳмоқ! Бунинг гапига ишонманг, юзбоши.

— Сабаб?

— Буни қўяверинг.

— Нега энди?

— У ҳозир маст, оғзига келганини вайсайверади. Ҳалқни нега енгиб бўлмас экан? Ярмини, масалан, қириш мумкин, ярмини бўйсундириш... Нима дедим? Йўқ. бўйсундириш эмас, тиз чўқтириш... Нечанчи шишани тамомляпмиз ўзи? — Поручикнинг боши шилқ этиб, қўллари устига тушди, тирсаги билан консерва банкасини ерга тушириб юборди; у тез-тез нафас олиб, кўқисини столга тираганича узоқ ўтириб қолди.

Ташқари зим-зиё қоронғи эди. Ёмғир дераза қоп-қоғини ноғора қилиб чаларди. Жуда-жуда олисдан гумбуrlаган товуш келди, лекин бу момақалдироқ овоздими ё тўплар садосими, Григорий ажратади алмади.

Кэмбелл кўм-кўк сигара тутунига ғарқ бўлиб, конъяқ симиради. Григорий, оёқда зўрға турганига қарамай, поручикни туртиб деди:

— Ҳой, менга қара, анавиндан сўра-чи: қизиллар бизни қандай қилиб енга олади?

— Қўйсанг-чи, эй!— деб пўнфиллади поручик.

— Йўқ, сўраб кўр.

— Йўқол-эй!

— Сўра, деяппан сенга!

— Поручик бақрайганича, бирдан Григорийнинг юзиға тикилиб қолди, сўнgra астойдил қулоқ солиб тинглаётган Кэмбеллга дудуқланиб, алланима деди-ю, яна бошини кафтлари орасига қўйиб олди. Кэмбелл поручикка жиркангансимон илжайиб қаради-да, Григорийнинг енгидан тортиб, тушунтира бошлади: олдин стол устига ўрик данагини қўйди, сўнgra, унга таққослагандай қилиб, кафтини унинг ёнига тикка қўйиб туриб, тилини «так» эткизди-ю, кафти билан данакни таппа босди.

— Топган гапини қара! Буни сенсиз ҳам тушуман...— деб пўнфиллади Григорий хомуш бўлиб. У гандираклаб бориб меҳмондўст лейтенантни қучоқлади, қўлларини ёйиб, столни кўрсатиб таъзим қилди.— Сийлаганинг учун раҳмат! Хайр. Биласанми, сенга нима демоқчиман? Эсинг борида тезроқ уйингга жўнаб қол, бу ерда каллангдан айриласан. Сенга чин юракдан маслаҳатим шу. Тушундингми? Бизнинг ишимизга аралашмай қўя қолинглар. Тушундингми? Тезроқ жўнаб ол, йўқса, ўлигинг шу ёқларда қолиб кетади.

Лейтенант ўрнидан туриб таъзим қилди, сўнgra ухлаб қолган поручикка дам-бадам қараб, Григорийнинг кифтига қоқиб қўйди-да, тез-тез гапира бошлади.

Григорий эшик лўқидонини зўргатдан топиб, гандираклай-гандираклай, зинапояга чиқди. Қияламасига ёққан майда ёмғир юзига уриларди. Чақмоқ чақиб, кенг ҳовлини, ивиган панжарани, боғдаги дараҳтларнинг йилтироқ баргларини ёритиб юборди. Зинадан тушаётуб, Григорий тойиб ийқилди, ўрнидан тура бошлаганда қулоғига шу гаплар эшитилди:

— Офицерлар ҳалиям ичишяптими? — деб, сўради аллаким, даҳлизда гугурт чақиб.

— Ичаверсин-чи... Ичганлари ахийри бурунларидан чиқар!

XX

Дон армияси Хопер округи чегарасидан ўтгач, 1918 йилдагига ўхшаб ўз кучини, ҳужумга қобилиятини яна йўқотган эди. Юқори донлик қўзғолончи казаклар ва қисман хоперликлар аввалгидек Дон вилоятидан ташқари чиқиб урушишни истамас эдилар; бунинг устига, қизилларнинг қаршилиги ҳам кучайганди: янги кучлар қўшилиб, улар энди аҳолиси Совет ҳукуматига хайриҳоҳ бўлган жойларда ҳаракат қилмоқда эди. Казакларнинг ўзларига қолса, яна мудофаага ўтиб жим ётаверишдан бошқасига мутлақо тоблари йўқ эди: Дон армияси қўмондонлиги ҳийла-ю найранг ишлатиб, казаклар яқиндагина ўз вилоятларида қандай матонат билан урушган бўлсалар, шундай жанг қилишга уларни мажбур эта олмади. Ҳолбуки кучлар ўртасидаги нисбатга қараганда казаклар устун эди: жангда чарчаган 9-нчи Қизил Армиянинг кучи 11 000 пиёда, 5 000 суворий ва 52 тўпдан иборат бўлса, унга қарши қўйилган казак корпусларида 14 400 пиёда, 10 600 отлиқ аскар ва 53 тўп бор эди.

Энг кучли жанг операциялар ёнбош томонда — жануб ёқдаги Кўнгилли ва Кубань армиясининг қисмлари турган жойларда авж олмоқда эди. Генерал Брангель қўмондонлиги остидаги Кўнгилли армия муваффақиятли равишда Украянанинг ичкарисига бостириб кириб, 10-нчи Қизил Армияни қаттиқ сиқиб қўйди, шиддатли жанглар билан уни Саратов томон суриб бораверди. 28 июлда кубанлик суворийлар Қамишин шаҳрига яқинлашиб, уни ҳимоя қилаётган аскарларнинг кўпчилигини асир олди. 10 армия қисмлари бошлаган қарши ҳужум даф этилди. Кубань билан Терск суворийларидан тузилган ҳаракатчан терма дивизиянинг чап қанотга бостириб кириш хавфи туғилди, натижада 10 армия қўмондонлиги ўз қисмларини Борзенкова—Латишево—Қизилжар—Каменка — Банное фронт линиясига олиб ўтишга маж-

бур бўлди. Шу вақт 10-нчи армия сафида 18 000 пиёда, 8 000 суворий ва 132 тўп бор эди; унга қарши турган кубанлик Кўнгилли армия 7 600 пиёда, 10 750 отлиқ аскар ва 68 тўпга эга эди. Бундан ташқари, оқларда танк отрядлари, аллақанча самолётлар бўлиб, булар разведка хизматида ва жанг операцияларида қатнашарди. Лекин Врангелга француз самолётлари ҳам, инглиз танклари ва тўплари ҳам ёрдам беролмади; қанчалик уринса ҳам Камишиндан нари ўта олмади. Бу участкадаги оғир жанглар узоққа чўзилса-да, фронтда айтарли ўзгариш ясай олмади.

Июль ойининг охирларидан қизиллар Жанубий фронтнинг марказий участкаси бўйлаб кенг ҳужумга ўтиш учун тайёрлана бошладилар. Шу мақсадда 9-нчи ва 10-нчи армиялар Шориннинг қўмондонлиги остида бирлаштирилиб, зарбор қўшин ташкил этилди. Бу қўшинга Шарқий фронтдан олинган 28-нчи дивизия билан собиқ Казанск мудофаа районининг бригадаси ҳамда 25-нчи дивизия билан Саратов мудофаа районининг бригадаси резерв сифатида қўшилмоғи керак эди. Жанубий фронт қўмондонлиги булардан ташқари, 56-нчи ўқчи дивизияни ва фронт яқинидаги резерв аскарларни ҳам қўшиб, зарбор қўшинни кучайтиromoқда эди. Бунинг устига, 8-нчи армия ва Шарқий фронтдан келтирилиб унга қўшилган 31-нчи ўқчи дивизия ҳамда 7-нчи ўқчи дивизия билан Воронеж томондан ҳам қўшимча зарба бериш кўзда тутилганди.

1 ва 10 август ораларида ялпи ҳужумга ўтиш мўлжалланганди. Қизиллар бош қўмондонлигининг планига биноан, 8-нчи ва 9-нчи армиялар ҳужумга ўтганда, икки қанотдаги армиялар душманни қуршаб олиш учун ҳаракат қилишлари керак эди; айниқса 10-нчи армия зиммасига энг масъул ва мураккаб вазифа юклanganди, бу армия Доннинг чап қирғоғида жанг қилиб, душманнинг асосий кучларини Шимолий Кавказдан ажратиб ташлаши лозим эди. Farb томондан 14-нчи армия кучларининг Чаплино — Лозоваяга қараб жадаллик билан намойишкорона юриш бошлиши кўзда тутиларди.

9-нчи ва 10-нчи армиялар жойлашган участкаларда қўшинларни планга мувофиқ қайтадан группаларга

бўлаётган вақтда оқлар қўмондонлиги қизилларнинг ҳужумга тайёргарчилигини барбод этиш мақсадида, Мамонтов корпусини тузиб бўлаётган эди; оқлар фронтни ёриб, бу корпусни қизилларнинг орқа томонига ташлашни мўлжаллаганди. Врангель армиясининг Царицин томонда қозонган муваффақияти у ердаги фронтни чапга томон кенгайтиришга имконият туғдириди ва натижада Дон армиясининг фронт линиясини торайтиб ундан бир нече отлиқ дивизияларни олиш мумкин бўлди. 7 августда Юропин станицасига 6 000 отлиқ ва 2 800 пиёда аскар ҳамда учта тўрт тўплик батарея келтирилган эди. 10 августда янгидан тузилган корпус генерал Мамонтовнинг қўмондонлиги остида 8-нчи ва 9-нчи армияларнинг орасини ёриб ўтиб, Новахоперскдан Тамбовга юриш бошлади.

Оқлар қўмондонлигининг дастлабки режасида Мамонтов корпусидан ташқари генерал Коноваловнинг суворий корпусини ҳам қизилларнинг орқа томонига ташлашни кўзда тутилганди; бироқ Коновалов корпуси жойлашган участкаларда жанг бошланниб кетгани учун бу корпусни фронтдан қўзратиш мумкин бўлмади. Шу сабабдан Мамонтовнинг олдига кичикроқ вазифа қўйилди, жудаям олға интилмаслик ва Москвага юриш тўғрисидаги хаёлни кўнгилдан чиқариб ташлаб, фақат қизилларнинг орқа томонини, алоқа йўлларини тор-мор қилиш ва ундан кейин яна ўз жойига қайтиш вазифасигина юкланди; ҳолбуки Мамонтов билан Коноваловга берилган олдинги буйруққа мувофиқ, улар жами отлиқ аскарларни ёппасига ҳужумга ташлаб, қизилларнинг марказий армияларига ёнбошдан ва орқадан қақшатғич зарба беришлари, ана ундан кейин жадалик билан Россиянинг ичкарисига бостириб киришлари, советларга қарши кайфиятда бўлган кишилардан йўл-йўлакай сафларини тўлғазиб, Москва томон юришни давом эттиришлари керак эди.

8-нчи армия резервидан қўшин келтириб, ўзининг чап қанотини яна мустаҳкамлаб олди. Лекин 9-нчи армиянинг ўнг қаноти барбод бўлган эди. Асосий зарбдор қўшин қўмондони Шорин томонидан кўрилган чоралар натижасида икки армиянинг оралиғи жислаштирилган эди, лекин шунга қарамай, Мамонтов

суворийларини тўсиб қолиш мумкин бўлмади. Шориннинг буйруғига мувофиқ, Кирсановдан 56-нчи резерв дивизия Мамонтовнинг олдидан тўсиб чиқиш учун юборилди. Араваларга солиниб, Сампур станциясига жўнатилган бир батальон аскар, Мамонтов корпусининг ёнбошдаги отряди билан йўлда жанг қилиб, тор-мор бўлди. 36-нчи ўқчи дивизияга қарашли суворий бригада ҳам шу аҳволга тушди: бу бригада Тамбов билан Балашов орасидаги темир йўлни қўриқлагани бораётганида Мамонтовнинг бутун бошлиқ суворий қўшинига рўпара бўлиб, қисқача жангдан кейин тарқаб кетди.

18 августда Мамонтов бир ҳамлада Тамбовни ишғол этди. Лекин бу воқеа қизилларга халақит беролмади: Шорин Мамонтовга қарши курашиш учун ўз қўшинидан икки пиёда дивизия ажратишга мажбур бўлса-да, зарбдор қўшиннинг асосий кучлари билан ҳужумни бошлаб юборди. Айни вақтда Жанубий фронтнинг Украина участкасида ҳам ҳужум бошлангани эди.

Бир учи шимолда ва шарқи-шимолдан, Эски Осколдан то Балашовга довур чўзилган ва бир учи Царичинга келиб тақалган фронт линияси текислана бошлади. Қазакларнинг полклари қизилларнинг сиқувига бардош беролмай, жанубга чекинишар, ҳар маррада тўхтаб, дамба-дам қарши ҳужумга ўтиб қўришарди. Дон ўлкасига қадам қўйишлари билан казакларда яна илгариги жанговарлик қобилияти пайдо бўлди, дезертирилик камайди; ўрта Дон томонлардаги станицалардан кетма-кет одамлар келиб қўшилаверди. Шориннинг зарбдор қўшини Дон вилоятига кириб борган сари казаклар ҳам шунчалик қаттиқ ва кучли қаршилик кўрсата бошладилар. Юқори Дон округидаги қўзғолончи станицаларнинг казаклари йиғилишларда ўз ихтиёрлари билан ёппасига сафарбарлик эълон қилиб, дуо-ю фотиҳадан кейин тўғри фронтга жўнашарди.

Шорин қўшини оқларнинг шиддатли қаршиликларини енгиб, кўпчилик аҳолиси қизилларга очиқдан очиқ душман бўлган жойларда узлуксиз жанглар билан Хопер ва Дон дарёлари томон силжиб бормоқда, лекин кундан-кунга ҳужумкорлик қобилиятини йўқот-

моқда эди. Худди ўша кунлари оқлар қўмондонлиги ҳам қараб турмасдан, Қачалин станицаси билан Котлубань станцияси атрофида учта кубанлик корпус билан 6-нчи пиёда дивизиядан иборат ҳаракатчан қуҷли группа тузиб, зўр ғалабалар билан бостириб келаётган 10-нчи Қизил Армияга зарба беришга тайёрланган эди.

XXI

Мелеховлар оиласи бир йилда уч одамидан ажради. Пантелеј Прокофьевичнинг: «Ажал бизнинг уйга пашшахўрда бўп қолди» деган гапи тўғри чиқди. Натальяни кўмиб бўлар-бўлмас, Мелеховлар уйи яна бўтакўз билан бухўр ҳидига тўлди. Григорий фронтга жўнаб кетгандан кейин орадан бир ярим ҳафта ўтгач, Дарья Донга чўкиб ўлди.

Дарья шанба куни даладан келиб, Дуняшка билан чўмилгани кетди. Полизлар ёнида иккиси ечиниб, обек остида эзилган юмшоқ кўкат устида узоқ ўтиришди. Ўша куни эрталабдан бошлаб Дарьянинг таъби хира эди; боши оғриб, тоби қочганини айтиб нолиган, бир неча марта яширинча йиғлаб олган эди... Сувга тушмасдан олдин Дуняшка соchlарини туғиб, дуррачасини ўради-да, кўз қирида Дарьяга қаради:

— Бирам озиб кетибсанки, Дарья, қуруқ суюгинг қопти-я!— деди ачиниб.

— Яқинда семираман!

— Бош оғриғинг қолдими?

— Қолди. Қани юр, сувга тушайлик, кун ҳам кетди.— Дарья олдин туриб, юрганича ўзини сувга ташлади, боши билан шўнғиди-да, қайтиб чиқиб, пўркана-пўрканда дарёнинг ўртасига қараб сузиб кетди. Тез оқар сув уни оқиза бошлади.

Дуняшка Дарьянинг эркакчасига кенг қулоч отиб сузишига ҳаваси келиб, белигача сувга кирди-да, юзларини ювди, офтобда исиган бақувват, дўмбоққина билакларини ҳамда кўксини хўллади. Ёнбошдаги полизда Обнизовнинг икки келини карам сугоришмоқда эди. Иккиси ҳам Дуняшканинг:

— Дашка, кетингга қайт! Лаққабалиқ тишлаб олиб кетмасин тағин!— деб чақириб кулганини эшишишди.

Дарья кетига бурилди, уч саржинча сузиб келди-да, бир дам тўхтаб, то белигача сувдан кўтарили-ю, қўлларини осмонга қилиб: «Хайр, хотинлар» дегани-ча сувда йўқ бўлиб кетди...

Чорак соатдан кейин ранги ўчган Дуняшка ёлғиз ички юбкада уйга чопиб келди-да, энтика-энтика:

— Дарья сувга чўқди, ойижон !.. — деди.

Фақат эртаси куни эрталаб Даръянинг ўлигини қармоқ билан тутиб олишди. Татарсклик энг уста кекса балиқчи Архип Песковатсков тонг маҳалида, Дарья чўккан жойдан пастроққа олтита қармоқ боғлаган чилвирни оқимга кўндаланг қўйиб келди. Пантелей Про-кофьевич билан иккиси қайиққа тушиб, текшириб кўргани боришли. Дарё бўйига хотин-халаж, болалар йиғилганди, Дуняшка ҳам шулар орасида эди. Архип тўртинчи қармоқ ипни эшқак учига илиб, қирғоқдан ўн саржин чамаси узоқлашгандага Дуняшка унинг: «Илингана ўхшайди...» деб шивирлаганини аниқ эшилди. Архип чилвирни секин-аста йиғиштириб, тиккасига сув тагига судраб кетаётган ипни авайлаб торта бошлади. Бир оздан кейин ўнг қирғоқда алланима оқариб кўринди, икки чол баравар сувга энгашди, қайиқ бир ёққа оғиб, ичига сув кирди, жасаднинг қайиқ ичига гуп этиб туингани оломонга эшитилди. Одамлар бараварига эркин нафас олишди. Аллақайси бир хотин пиқирлаб йиғлади. Шу ерда турган Христоня болаларга: «Қани, туёқларингни шиқирлатинглар!» деб ўшқирди. Архипнинг қайиқ кетида тик турган ҳолда эшқакни қимирлатиб, қирғоқ томон қелаётганини Дуняшка кўз ёшлари орасидан кўриб турарди. Қайиқ дарё бўйидаги бўр шағалларни қисирлатиб, янчиб, қирғоққа чиқди. Дарья жонсиз оёқларини буккан, бетини қайиқнинг ҳўл тахтасига қўйган ҳолича ётарди. Сал-пал кўкарган оппоқ баданида қорайган тешикчалар — қармоқ излари кўринарди. Қорамағиздан келган озғин boldирида, тиззасидан сал пастроққа боғланган тасма ёнида (Дарья сувга тушиш олдида уни ечиб ташлашни унуган бўлса керак) қон сизиб турган қизғич жароҳат кўринарди. Қармоқ учи оёғда узунасига эгри-буғри, калта-култа из қолдириб, тимдалаб кетган эди. Дуняшка дағ-дағ титраган ҳолда фартуини ғижимлай-

ғижимлай Даръяниг жасади ёнига борди-да, чокидан сўқилган қопни устига ёпиб қўйди. Пантелей Прокофьевич чақонлик билан почаларини қайириб, қайиқни сувдан торта бошлади. Бирпасда, арава ҳам етиб келди. Даръяниг ўлигини ортишиб Мелеховлар уйига жўнашди.

Дуняшка ўлиқдан қўрққанига, ҳазар қилганига қарамай, Доннинг муздай сувида тўнгигб қолган танани ювишда онасига қараши. Даръяниг шишинқираган қовоғи солиқ юзи, сувда нури кетиб безрайиб қолган кўзлари уни аллақандай бегона аёлга ўхшатиб қўйган эди. Сочлари орасига кумушдай йилтироқ қум кириб қолган, бетларига ипакдай майнин сув кўкати ёпишганди, сўридан осилиб тушган жонсиз қўллари гўё ором олаётгандай икки ёққа бемалол ташланганди. Дуняшка бу мудҳиш манзарага кўзи тушган ҳамон дарҳол ўзини четга олди. Бу ўлик кечагина ўйнабкулиб, ҳаёт лаззатини суриб юрган Даръяга мутлақо ўхшамаганига ҳайрон бўлар ва қараган сари уни вахима босарди. Анча кунгача Даръяниг муздай совуқ кўкси-ю, қорни, қотиб қолган таранг оёқ-қўллари Дуняшканинг кўз ўнгидан кетмади, уни эслаб туриб, баданлари жимирилашиб кетар ва тезроқ унутишга ҳаракат қиласарди. У Даръя тушимга кирмасайди, деб қўрқиб бир ҳафтагача онаси билан бирга каравотда ётди, ётар олди худога сиғиниб: «Худоё худовандо! Даръя тушимга кирмасин! Ўзинг асррагайсан, тангрим!» деб ёлворарди:

Даръяниг: «Хайр, хотинлар!» деб бақирганини Обнизовнинг келинлари эшитмаганда, унинг ўлиги гап-сўзсиз, жимгина кўмилган бўларди, бироқ бу гап поп Виссарионнинг қулоғига етди, Даръяниг ўз жонига қасд қилганлиги ошкор бўлиб қолди, шунинг учун у: «Ўзини ўзи ўлдирган одамга жаноза ўқимайман» деб туриб олди. Пантелей Прокофьевичнинг жаҳли чиқди:

— Нима сабабдан жаноза ўқимайсан? У нима, чўқинмаган кофирмиди?

— Ўзини ўзи ўлдирган одамга лозим эмас, қонун бунга йўл қўймайди.

— Сенга қолса, итнинг ўлигидай қилиб кўмиш керак экан-да, а?

— Менга қолса, истаганингдай қилиб, истаган жоингга кўм, лекин қабристонга эмас, чунки у ерга факат пок христианлар кўмилган.

— Йўқ, бир иложини қиласан, барака топкур,— деб ялина бошлади Пантелей Прокофьевич.— Оила-мизга сира иснод теккан эмас.

— Иложи йўқ, Пантелей Прокофьевич. Энг яхши муҳлисим бўлганинг учун мен сени ниҳоятда ҳурмат этаману, лекин бу илтимосингни бажаролмайман. Агар биронтаси ҳазратнинг қулогига етказса борми, бошим фалокатдан чиқмайди,— деб оёғини тираб олди у.

Бундай шармандагарчиликка чидаб бўлмасди. Пантелей Прокофьевич қайсар попни йўлга солмоқчи бўлиб авраб кўрди, хизмат ҳақини оширишга ва Николай пули билан тўлашга ваъда қилди, битта тўқли ҳадя қилмоқчи бўлди, бироқ попга гап кор қилмагач, пировардидаги дўқ қилишга ўтди:

— Барибир мен уни қабристондан бўлак жойга кўммайман. У менга еттиёт бегонамас, ўз келиним бўлади. Эри қизилларга қарши жангда ҳалок бўлган, офицерлик даражасида эди, ўзи Георгий медали билан мукофотланган, сен ҳали шунаقا пўстаки важларминам қутулмоқчимисан?! Йўқ, отахон, майнавозчилигинг кетмайди, ҳали ўзинг ялиниб, жаноза билан кўмасан! Майли, ўлик уйда ётаверсин, мен ҳозир бориб станица атаманига устингдан арз қиласман. Сенминам ўзи гаплашади энди.

Пантелей Прокофьевич хайрлашмасдан, жаҳл билан эшикни қаттиқ ёпиб, попнинг уйидан чиқиб кетди. Чолнинг дўқи попга таъсир этган эди: ярим соатдан кейин кетидан одам келиб, Виссарион билан ҳофиз ҳозир етиб келишини хабар берди.

Дарьяни иззату икром билан қабристонга, Петронинг ёнгинасига кўмдилар. Гўр қазилаётган пайтда Пантелей Прокофьевич ўзи учун ҳам бир жойни мўлжаллаб қўйди. Белкурак билан ишлаётуб у атрофга қаради, лекин бундан яхшироқ жой кўзига кўринмади. Петронинг қабри устида яқинда экилган теракнинг новдалари шитирлашарди; учидаги барглар куз нафасидан сарғайиб, заволга юз тутган эди. Девор-

нинг қулаган жойидан кириб ўрганган бузоқлар қабрлар орасидан йўл солиб олишганди; шамол тегирмонга борадиган йўл девор ёнидан ўтарди; ўлганларнинг қариндош-уруғи эккан заранг дараҳтлари, терагу акаслар, ёввойи тоғолчалар ям-яшил бўлиб яшнаб турарди; дараҳтлар тагида ўралиб ўсган чирмовуқ, гули сариқ шўнғия кўринар, ёввойи сули ва донга тўлган ёввойи буғдой пишиб ётарди. Қабр устидаги крестларни бошдан-оёқ кўм-кўк печак гул ўраб кетганди. Бу ер ҳақиқатан ҳам дилрабо, соғ тупроқ жой эди...

Чол гўр ковлаётib, дамба-дам белкуракни қўйиб, намхуш тупроқ устига ўтирас, тамаки чекиб, ўлим тўғрисида ўйларди. Бироқ у, замона шу хилда кетадиган бўлса, эндиғи қарияларнинг ўз уйида оёқ-қўлини узатиб ўлишига, ўз ота-боболари ётган қабристонда дафн этилишига ишонмасди...

Даръяни кўмиб бўлишгандан кейин Мелеховлар уйи аввалгидан баттар ҳувиллаб қолди. Оила аъзолари даладан дон ташишар, фалла янчишар, полизларда етилған мўл ҳосилни йиғиштиришарди. Григорийдан хат-хабар кутишар, бироқ фронтга жўнагандан бери ундан дом-дарак йўқ эди. Ильинична кўпинча: «Лоақал болаларига салом юбормайди, газанда! Хотини ўлгандан кейин биз керак бўлмай қолдик...» деб ҳасрат қиласди. Кейинчалик сафдаги казаклар тез-тез Татарскка келиб-кетадиган бўлиб қолишиди. «Балашов фронтида казаклар шикаст еб Донга чекинишяпти, сув тўсигидан фойдаланиб, қиши тушгунча мудофаага ўтишмоқчи» деган овоза тарқалди. Лекин қишида нима бўлишини фронт кўрган казаклар: «Дон музлагандан кейин қизиллар бизни денгиз бўйигача қувиб боришади!»— деб рўй-рост гапиришарди.

Астойдил фалла янчишга тушиб кетган Пантелей Прокофьевич бу овозаларга уччалик эътибор бермасада, рўй берадиган воқеаларга бепарво қарай олмасди. Чол фронт яқинлашган сари Ильинична билан Дуняшкага қўпроқ бақирадиган, гап кўтармайдиган бўлиб қолган эди. У кўпинча рўзгорга керакли бирор буюм ясамоқчи бўлиб уринар, бироқ қўлидаги иш юришавермаса, уни улоқтириб ташларди-ю, тупурина-

тупурина сўкиниб, хирмон томон югуар ва жаҳлидан тушгунича ўша ёқда юрарди. Дуняшка дадасининг бундай тутақишиганини кўп кўрарди. Бир куни Пантелей Прокофьевич бўйинтуруқни тузатмоқчи бўлди, лекин иш юришмади, жаҳолати қўзиган чол шартта болтани олиб бекордан-бекорга бўйинтуруқни майда-майда қилиб ташлади. Хомут тузатишда ҳам шу аҳвол рўй берганди. Қечқурун чироқда Пантелей Прокофьевич ип эшиб, уни мумлаб, чоки сўқилган хомутни тика бошлади; ип чириганиданми ё эса, ўзи асабийлашганиданми, устма-уст икки марта ип узилиб кетди, чолники тутди-қолди: оғзидан боди кириб, шоди чиқаётган Пантелей Прокофьевич иргиб тураман деб табуреткани ағдарди ва уни печга қаратса тепиб юбордида, итдай ириллаб, хомутнинг устидан қопланган чармни тиши билан узиб ташлай берди, ниҳоят, хомутни ерга ташлаб, иргишилаб тепкилай бошлади. Барвақт ётган Ильинична унинг тўполонидан чўчиб, ўрнидан турди, бироқ бўлаётган воқеани кўриб, жаҳлига чидамай:

— Қариганда миянгни едингми, лаънати? Хомут сенга нима қилди?— деб қарғай бошлади.

Пантелей Прокофьевич кўзларини ола-кула қилиб хотинига бақирди:

— Овозингни ўчи-ир, бадбахт!!!— чол синган хомутнинг бир бўлагини олиб хотинига отди.

Дуняшка азбаройи кулгиси қистаганидан нафаси тиқилиб, даҳлизга қочиб чиқди. Чол яна бирпас шовқин-сурон солиб, ниҳоят, тинчида-да, жаҳл устида айтган аччиқ гаплари учун хотинидан кечирим сўради, сўнгра анчагача инқиллаб, бошини қашлаганича, бу дардисар хомутнинг синиқ парчаларини нимага яратиш мумкинлигини ўйлаб, туриб қолди. Чолнинг бу хил тўполонларини кўравериб, безор бўлган Ильинична бошқача тактика ишлатишга мажбур бўлган эди: Пантелей Прокофьевич, оғзидан боди кириб, шоди чиқиб, рўзғордаги бирор буюмни синдира бошлади дегунча, кампир хотиржамлик билан:

«Синдир, Прокофьевич! Синдиравур! Омон бўлсак, бундан яхшисини топамиз!»— деб гижгижларди. Ҳаттоқи ўзи ҳам унга қўшилиб, синдиришга ёрдам

берарди, Шундан кейин Пантелей Прокофьевич дар-ҳол жаҳлидан тушиб, бирпас хотинига анқайиб турарди-да, қалтироқ қўллари билан чўнтағидан тамаки халтасини оларди, ўзига келгунча, тамаки чеккани бир четга бориб хижолат ичидаги ўтирас, жаҳли тезлиги учун ичидаги ўзини койиб, қанча зарар етганини ҳисоблашга тушарди. Уй олдидаги боғчага адашиб кириб қолган уч ойлик чўчқача ҳам чоннинг жаҳолати касридан нобуд бўлди. Пантелей Прокофьевич уни қозиқ билан уриб белини синдириди, орадан беш минут ўтар-ўтмай, сўйилган чўчқачанинг ёлини мих билан юлаётуб, қовоғи солиқ Ильиничнага бўйини қисиб хокисорлик билан гапира бошлади:

— Ўзиям чўчқа эмас, пуф деса, учиб кетадиган чиллашир эди... Барибир ҳаром ўлиб қоларди. Ёз куни уларга доим ўлат тегади; бекор кетгандан кўра, еганимиз қолади-ку! Мунча қовоғингдан қор ёғмаса энди! Падарига минг лаънат бундай чўчқачани! Кошки чўчқа сиёки бўлса, мушук ҳам ундан афзал! Қозиқ тугул бир чертишгаям чидамасди. Ҳаммасиданам заараркунандалигини айтмайсанми! Қирқ туп картошкани кавлаб ташлади!

— Боғчада бор-йўғи ўттиз туп картошка бор эди холос,— деб секингина луқма ташлади Ильинична.

— Яхшики ўттиз туп экан, қирқ бўлганда қирқиниям ҳаромга чиқаарарди, бу дардисар! Худога шукурки, бу лаънати заараркунандадан кутулдик!— ўйламасдан жавоб қайтарди Пантелей Прокофьевич.

Дадалари жўнагандан кейин болалар зерика бошлади. Ильинична рўзгордан қўли бўшамай, болаларга тузукроқ қарай олмаганидан улар ўз ҳолига қолиб, эртадан кечгача боғда ё хирмонда ўйнашарди. Бир куни Мишатка кечгача қорасини кўрсатмади, фақат кунботар маҳалидагина уйга қайтиб келди. Ильиничнанинг, қаёқда эдинг, деган саволига Мишатка, болалар билан Дон бўйида ўйнаб юрувдим, деб жавоб берди, бироқ Полюшко ўша заҳотиёқ унинг сирини очиб ташлади:

— Ёлғон айтяпти, бувижон! Аксинья холаникода эди!

Ильинична бу янгиликдан ҳайрон бўлиб:

— Сен буни қаёқдан биласан! — деб сўради.

— Уша ҳовлидан четан деволдан ошиб тушганини ўзим кўрдим.

— Уникига борувдингми? Кўрқмасдан айтавур, эркатоим, нега қизариб кетдинг?

Мишатка бувининг кўзига рўйи рост тикилиб:

— Мен ёлғон айтдим, бувижон... Тўғриси, мен Аксинья холаникида эдим, Дон бўйига борганим йўқ,—деди шивирлаб.

— Уникига нега бординг?

— Узи чақиргандан кейин бордим-да.

— Ундаи бўлса, нега болаларминам ўйнадим, деб ёлғон гапирасан?

Мишатка бир дам ерга қараб қолди, сўнгра бошини кўтариб, ростини айтди:

— Мени койишингдан қўрқдим... — деди шивирлаб.

— Сени нега койийман, жон болам? Йў-ўқ... У сени нимага чақирибди? Уникида нима қилдинг?

— Ҳеч нима. Мени кўриб қолиб: «Бу ёқقا кел!» деб чақирди, мен бордим, уйига обкириб, стулга ўтқазди...

— Иннайкейин-чи? — Ильинична усталик билан ҳаяжонини яшириб, сабрсизлик билан суриштира бошлади.

— ...Совуган юпқа берди, иннайкейин, манавини берди, — Мишатка чўнтағидан бир чақмоқ қанд олиб кўрсатди-да, яна чўнтағига солиб қўйди.

— Сенга ҳеч нима демадими? Балки, бирон гап сўрагандир?

— Деди. Тез-тез келиб тургин, бўлмаса зерикиб қоламан, деди, ширинлик ваъда қилди... Уйига кирганимни ҳеч кимга айтмагин, деди. Бувинг эшитиб қолса, сени уришади деди.

— Шундай дегин... — Ильиничнанинг ғазаби қайнаганидан нафаси қайтиб аранг овози чиқарди. — Сендан ҳеч гап сўрагани йўқми?

— Сўради.

— Нимани сўради? Кўрқмасдан гапиравер, қўзи-чоғим!

— Дадангни соғиндингми, деб сўради. Мен, со-

ғиндим дедим. Иннайкейин, даданг қачон келади, ҳеч хабар борми, деб сўровди, мен, билмайман, урушда жанг қиляпти, дедим. Иннайкейин, у мени тиззасига ўтқазиб, чўпчак айтиб берди. — Мишатка кўзларини шодиёна чақнатиб, жилмайди. — Яхши чўпчак экан! Ванюшка деган бола тўғрисида. Оққушлар уни қанотига ўтқазиб, осмонга учишибди. Ялмоғиз кампир тўғрисида ҳам айтиб берди.

Ильинична лабларини қимтиб, Мишатканинг гапларини охиригача эшитди-да:

— Бундан буёқ уникига қадам босмагин, — деб қаттиқ тайнлади.— Берадиган ширинлигиниям олмагин, керакмас, буванг билса, сени аямай уради. Худо кўрсатмасин, агар буванг эшитиб қолса, терингга соғон тиқади-я! Сира бора кўрма, эркатойим!

Лекин бувисининг қаттиқ тайнлаганига қарамай, Мишатка икки кундан кейин яна Астаховларниги борди. Ильинична Мишатканинг кўйлагига бир қарангандәёқ буни пайқади: эрталаб у неварасининг енгини тикиб беришга вақт тополмаган эди, лекин ҳозир кўйлак енги яхшилаб ямалган, ёқасига яп-янги садаф тутгамча қадалганди. Дуняшка ғалла янчишда банд бўлгани учун болаларнинг йиртиқ-ямоғига унинг ҳам қўли тегмаслигини кампир биларди.

— Яна қўшниникига кирдингми? — деб сўради Ильинична ўпкалаб.

Мишатка нима важ қилишини билмай:

— Яна кирдим... — деди-да, ўша заҳотиёқ: — Энди кирмайман, тавба қилдим, бувижон, мени койима... — деб ялина бошлади.

Ўшанда Ильинична Аксинья билан тузукроқ гаплашиб олишга, Мишаткани ўз ҳолига қўйиши, совға-ю, чўпчаклар билан болани ўзимга ўргатиб оламан деб ҳомтама бўлма, деб шартта юзига айтишга жазм қилди. «Натальянинг-ку бошига етди, энди бу бадбахт, болаларига чанг соляпти, шундай қилиб, Гришкани қўлга олмоқчи. Вой жодугар-эй! Эри тирик туриб, бошқанинг пайида... Бекорга овора бўлгани қолади! Шунча гапдан кейин Гришка уни хотин қиласмиди?» — деб ўйланарди кампир.

Уйда шунча кун туриб, Григорий Аксинъядан ўзи-

ни обқочиб юрганини сезгир она қалби пайқаган эди. Ўғли одамлар таънасидан қўрққани учун эмас, балки Натальянинг ўлимига Аксинья сабаб бўлди, деб у билан учрашмай кетганини кампир тушунарди. Ильинична дилида, Натальянинг ўлеми Григорий билан Аксиньяни умрбод юз кўрмайдиган қиласига келин бўлиб қадам қўёлмайди, деб умидвор бўларди.

Уша куни кечқурун Ильинична Дон бўйидаги пристанда Аксиньяни кўриб қолиб, чақирди:

— Бери кел, сенда икки оғиз гапим бор...

Аксинья челягини ерга қўйиб, шошмасдан унинг ёнига келиб салом берди.

Ильинична кўзига балодай кўринган ҳамсоясининг чиройли юзига қаттиқ тикилиб туриб:

— Гап бундай, айланай, — деб бошлади. — Сен бирорвнинг боласини нега йўлдан уряпсан? Нима учун уни уйингга чақириб гапга соласан? Ким сендан кўйлагини ямаб қўй, ҳар хил ширинлик бер, деб сўради? Сен нима, онаси йўқ, болага қарайдиган одам қуриб кетди, деб ўйладингми? Сенсиз иш битмас эканми? Сенда шарм-ҳаё деган нарса борми ўзи, юзсиз?

— Мен нима ёмонлик қилдим? Нега уришасиз ахир, бувижон? — деб сўради Аксинья тутақшишиб.

— Тағин нима ёмонлик қилдим, дейди-я? Натальянинг болаларига қўл теккизишга нима дахлинг бор? Узини-ку, гўрга тиқиб қутулдинг!

— Нима деяпсиз, бувижон? Ўйлаб гапиринг! Ким уни гўрга тиқибди? Узига ўзи қилди.

— Сенинг касрингдан эмасми?

— Йўқ, унисини мен билмадим.

— Лекин мен аниқ биламан! — деб жиғибийрон бўлиб чинқирди Ильинична.

— Шовқин солманг, бувижон, мен келинингиз эмасманки, бекорга бақираверсангиз. Мени тергайдиган эрим бор, ахир.

— Дилингда нима борлигини биламан! Ниятинг нималигини биламан! Келин бўлмасанг ҳам келин бўлиш пайдасан! Олдин болаларини қўлга олиб, иннайкейин; Гришканинг пинжига кирмоқчисан-да, а?

— Мен сизга келин бўлмоқчи эмасман. Эсингизни едингизми, бувижон? Эрим ўлгани йўқ ҳали.

— Биламан! Эринг тирик туриб сен бошқага осилмоқчисан!

Аксинъянинг ранги оқариб кетди.

— Мени нега қарғаб, нима учун шарманда қиляп-канингизга сира тушунмадим... Мен ҳеч кимга осилганим йўқ ва осилмоқчи эмасман; неварангизни уйга чақирган бўлсам, нима қипти? Биласизки, ўзимда бола йўқ, ўзганикини кўриб овунаман, шунинг учун чақирганман холос... Кошки мен унга арзидиган нарса берган бўлсам! Берганим бир чақмоқ қанд, шуям гапми? Мен унга нима учун совға берарканман? Билар-бilmас, оғзингизга келганини гапираверманг-да!..

— Онаси тириклигига, негадир, сен уни уйингга чақирмасдинг. Наталья ўлгандан кейин жудаям мөхрибон бўлиб қолдинг!

— Наталья тириклигидаям у менинг олдимга келиб-кетиб юарди, — деди Аксинъя билинар-билинмас жилмайиб.

— Ёлғон гапирма, уятсиз!

— Сиз олдин ўзидан сўраб кўринг, иннайкейин, мени ёлғончига чиқаринг.

— Нима бўлса бўлгандир, лекин бундан буёқ болани уйингга чақириб, бошини айлантирма. Шу ўйл билан Григорийнинг кўнглини оламан, деб хомтама бўлмагин. Барибир сени у хотин қилмайди, шуни билиб қўй!

Аксинъянинг юзи ғазабдан бужмайиб кетди.

— Овозингни ўчир! — деди у бўғилиб. — У сендан маслаҳат сўрамайди. Бироннинг ишига аралашма!

Ильинична яна бир нима демоқчи эди, бироқ Аксинъя индамай кетига бурилди-ю, чelаги ёнига бориб, шартта обкашни елкасига олди-да, сувни чайқалтириб, ёлғиз оёқ йўлдан кетаверди.

Уша кундан бошлаб у Мелеховларнинг ҳеч қайсиси билан саломлашмай қўйди, мабодо учрашиб қолганда ҳам бегойимлардай кеккайиб олиб, бурун катакларини кериб индамай ўтиб кетаверарди, аммо бирор жойда Мишаткани кўриши билан атрофга аланглаб қаранарди-да, ҳеч ким бўлмаса, дарҳол

унинг ёнига чопиб борарди ва энгашиб уни бафрига босар, офтобда қорайган пешонасидан, Мелеховлар зотига хос қоп-қора маъюс кўзларидан ўпар, гоҳ кулиб, гоҳ йиғлар: «Фамгузорим Григорьевич! Холанг айлансанн сендан! Сени бирам соғиндимки! Аксинья холанг эсидан ажради... Жинни бўлаёзди!» — деб ўзидан-ўзи чулдиради. Ҳар учрашувдан кейин анча вақтгача титроқ лабларида табассум ўйнар, ёшланган кўзлари севинчга тўлиб, қиз боланинг кўзларидай чақнаб туради.

Август ойининг охирида Пантелей Прокофьевич ас-карлик хизматига олинди. Милтиқ кўтаришга ярайдиган барча казак Татарскдан жўнаб кетди. Қишлоқда эркаклардан фақат инвалидлар, болалар, қариб-чириб қолган чоллар қолди, холос. Ёппасига сафарбарлик эълон қилинганилиги учун, медицина комиссиялари озод этган бутунлай яроқсиз мажруҳлардан бўлак ҳеч ким қолмади.

Пантелей Прокофьевич қишлоқ атаманидан ҳарбий пунктга бориш тўғрисида буйруқ олгандан кейин кампира, қизи ва неваралари билан наридан-бери хайрлашди-да, инқиллаб тиз чўқди-ю, икки марта сажда қилиб иконага чўқинаркан:

— Хайр, болаларим! Сизлар билан яна дийдор кўришолмайдиганга ўхшайман, тирик қайтишимга ишонмай қолдим,— деди.— Мендан сизларга насиҳат шу: ғаллани кеча-ю кундуз тўхтовсиз янчиб, ёғингарчиликка қолдирмай йиғиб олишга ҳаракат қилинглар. Лозим бўлса, одам солинглар, тезроқ қутуласиз. Агар кузгача қайтиб келмасам, қараб ўтирмасдан ўзларингни ўзларинг эплайверинглар; кучларинг етгунча шудгор қилинглар, лоақал бир десятина ерга жавдар сочинглар. Сен, кампир, ишга пухта бўл, сира бўшашма! Биз Григорий билан қайтиб келамизми йўқми, лекин ҳаммадан ҳам сизга дон керак бўлади. Уруш ўз йўлига, аммо, лекин дон-дунсиз кунинг ўтмайди. Хайр, сизларни худога топширдим!

Ильинична эрини майдонгача кузатиб қўйди, арава орқасида Христоня билан ёнма-ён оқсоқланиб кетаётган чолига сўнгги марта боқди-ю, шишинқираган кўзларини этаги билан артиб, кетига қарамасдан изига

қайтди. Хирмон тўла янчилмаган буғдой, печга қўйилган сут қолиб кетган, болалар эрталабдан бери овқат емаган, хуллас, кампирнинг иши бошидан ортиб ётарди, шунинг учун у ҳеч ерда тўхтамасдан, онда-сонда учраган хотинларга индамай таъзим қилиб уйга шошиларди, бирор таниши жонқуярлик билан: «Чолингни жўнатдингми?» деб сўраса, гапни чўзмасдан, фақат бош қимирлатибгина қўя қоларди.

Орадан бир неча кун ўтгач, бир куни Ильинична саҳарлаб сигирларини соғди-да, тор қўчага ҳайдаб чиқди, энди ҳовлига қайтмоқчи бўлиб турганда, қулоғига аллақандай гулдураган ғалати товуш эшитилди. Кампир осмонга қаради, бироқ осмонда ҳеч қандай булат кўринмади. Бирпасдан кейин шу товуш яна тақорланди.

Молларни бир ерга тўплаётган чол подачи:

- Музикани эшитяпсанми, кампир? — деб сўради.
- Қанақа музика?
- Овози хунук музикани...
- Эшитишга эшитяпману, лекин нималигини тушумаяпман.

— Ҳали тушунасан. Дарёнинг нариги ёғидан туриб қишлоққа ўқ ёғдира бошлагандан кейин, дарров тушунасан! Замбарак отишяпти. Чолларимизнинг ичак-чавоғини ағдаришяпти...

Ильинична чўқиниб олди-ю, индамай ҳовлига кириб кетди.

Ўша кундан бошлаб тўрт кечаю кундуз тўпвозлиқ давом этди. Айниқса, саҳар пайтлари аниқ эшитиларди. Лекин шарқи-шимолдан шамол турган пайтларда, олисда бораётган жангларнинг садоси, кундузлари ҳам бемалол эшитилаверарди. Ўшанда хирмонларда бирданига иш тўхтаб, хотин-халаж чўқина бошларди, урушга кетган болалари, эрлари эсига тушиб, оғир-оғир хўрсинишар, пицирлашиб дуо қилишарди, кейин яна хирмонларда увол тошлар қалдирай бошлар, от ҳайдовчи болалар от ва хўқизларни чу-чувлаб ҳайдашар, шамол машиналар шалдираб, иш яна қизиб кетарди. Августнинг охирларида ҳаво очиқ, кун иссиқ келган эди. Шамол сомон чангини қишлоқ сари учирив келар, янчилган жавдар сомоннинг ёқимли ҳиди

димоқقا келиб уриларди, офтоб жазиллатиб турганига қарамай, ҳамма нарса куз яқинлашганлигидан далолат берарди. Пода жойдаги кўм-кўк шувоқ гулини тўкиб оқара бошлаган, Доннинг нарёғидаги теракларнинг учи сарғайиб, боғларни олма ҳиди босиб кетган, йироқдаги уфқлар ҳам куз шарофати билан тиниқлашганди, эгалари кетиб бўш қолган далаларда жанубга учиб кетаётган турналарнинг дастлабки галалари пайдо бўлган эди.

Гетман йўлидан кун сайин қатор-қатор арава фарбдан шарққа қараб ўтиб турар, булар Дон бўйига, дарёдан ўтиладиган жойга ўқ-дори ташишарди. Дон атрофидаги қишлоқларда қочоқлар пайдо бўлди. Улар казакларнинг жанг билан чекинаётгани тўғрисида хабар келтиришди, баъзилари эса: «Қизилларни чалфитиш ва бир четга чиқариб олгандан кейин қуршовга олиб қириб ташлаш мақсадида жўрттага чекинишяпти», деб гапиришарди. Татарсклик баъзи бирорлар киши билмас йўл тарааддудига тушиб қолди. От-уловларини боқиб, дон-дунларини, сандиқлари тўла қиммат баҳо буюмларини кечалари ерга кўма бошладилар. Овози ўчган тўплар бешинчи сентябрда яна қаттиқроқ наъра торта бошлади, лекин бу гал ваҳимаси зўр бўлиб, гумбурлагани аниқ эшитиларди. Жанглар Дондан қирқ чақирим нарида — Татарскнинг шарқишиномида давом этарди. Бир кундан сўнг фарб ёқда—дарёнинг юқори томонида ҳам қасира-қусур бошланди. Фронт тобора Дон бўйига яқинлашмоқда эди.

Кўпчилик ҳамқишлоқларининг чекинишга тайёр гарлик кўриб қўйганидан хабардор бўлган Ильинична Дуняшкага ҳам кетишни маслаҳат берди. Кампир саросималикка тушиб, уйни, рўзгорни нима қилишини билмай боши қотган эди: на ҳамма нарсани ташлаб, одамларга қўшилиб кетаверишини, на уйда қолишини билмасди. Пантелей Прокофьевич фронтга жўнаш олдиди галла янчиш, шудгор қилиш, мол-ҳолга қарашни тайинлаган бўлса ҳам, лекин фронт Татарскка яқин келиб қолганда нима қилиш тўғрисида ҳеч нарса демаган эди. Шунинг учун Ильинична ҳар эҳтимолга қарши, Дуняшка билан болаларни ҳамда энг асл

буомларни ҳамқишлоқлардан бирортасига қўшиб жўнатишга, ўзи эса, қизиллар қишлоқни олган тақдирда ҳам уйдан силжимасликка жазм қилди.

17 сентябрга ўтар кечаси тўсатдан Пантелей Прокофьевич уйга кириб келди. Ў Қазанская станицаси ёнidan итдай чарчаб, хуноб бўлиб пиёда келган эди. Ярим соат чамаси дам олгандан сўнг стол ёнига ўтириб, овқатни шундай тушира кетдики, Ильинична умрида унинг бунчалик ютоқиб еганини асло кўрмаганди: бир қозон гўштсиз қарам шўрвани паққос тушириб, сўқ бўтқага ёпишди. Ильинична ҳанг-манг бўлиб, қарс урди:

— Худоё тавба, бу қанақаси ахир, Прокофьевич! Худди уч кундан бери овқат емаган одамга ўхшайсан, а!

— Бўлмаса епманми, эси паст хотин? Оғзимга ҳеч нима олмаганимга роса уч кун бўлди.

— Нима, у ерда сизларга овқат беришмайдими?

— Овқат тугул балоям йўқ! — деб минғиллади оғзини бўтқага тўлғизиб олган Пантелей Прокофьевич.— Нимани топсанг, ўшани ейсан, мен ҳали ўғриликка ўрганганим йўқ. Бунақага ёшлар уста, чунки уларда уят деган нарсадан бир чақалик ҳам қолганмас... Улар шу касофат урушда ўғриликка шундай ўрганибдики, олдин ваҳимам келди, ахийри парво қилмайдиган бўлволдим. Кўзига нима кўринса, олади, ташийверади... Уруш эмас, худонинг ғазаби!

— Бирданига кўп емасанг бўларди. Бўкиб қолмагин тағин. Авзойингга қара, мешдай шишиб кетдинг, ахир.

— Ишинг бўлмасин! Сут обкел менга, каттароқ идишда келтир!

Ильинична ўлгудай ютоққан чолига қараб туриб, чидолмай йиглаб юборди.

Пантелей Прокофьевич бўтқадан бошини кўтаргач, Ильинична:

— Бутунлай келдингми? — деб сўради.

— Кейин маълум бўлади... — деди чол мужмал қилиб.

— Бундан чиқди, ҳамма чолларга жавоб берилди-да, а?

— Ҳеч кимга жавоб берилгани йўқ. Қизиллар Донга яқин келиб қолганда жавоб берармиди? Мен ўзимча келавердим.

— Бунинг учун сени жавобгар қилишмаскин?— деб сўради Ильинична ҳадиксираб.

— Қўлга тушсам, эҳтимол, осон қутулмасман.

— Сен нима, бекиниб юрмоқчимисан?

— Сен, сайилгоҳга ёки меҳмондорчиликка боради, деб ўйловдингми? Улгудай каллаварам бўпсанки!— Пантелей Прокофьевичнинг жаҳли чиқиб, турунса ҳам барибир кампир бўш келмасди:

— Оббо, касофат-эй! Балога қоладиган бўлдик энди, сени тутиб олиб қийноққа солишмаса гўргайди...

— Майли, милтиқ кўтариб, даштма-дашт санғиб юрғанимдан кўра, шу ерда қўлга тушиб, турмага қамалганим яхшироқ,— деди Пантелей Прокофьевич бўшашиб.— Мен улар учун кунига қирқ чақирим йўлни босадиган ёшлардан эмасман, окоп қазиш, ҳужумга кириш, ўқдан биқиниб эмаклаб юришга ҳолим йўқ. Минг биқинганинг билан барибир ўқдан қутулолмайсан! Кривая дарёси томондан келган бир жўрам чап кураги остидан ўқ еб, қулоқ қоқмай кетаверди. Буна-қа азобга кимнинг тоби бор дейсан!

Пантелей Прокофьевич милтиғи билан ўқдонини сомон орасига беркитиб келди, Ильинична, чакмонинг қани, деб сўраганда чол қовоғини солиб:

— Сотиб едим, — дебрайсизгина жавоб берди.— Тўғрисини айтсам — ташладим. Шумилин станицасининг нарёғида қизиллар бизни шундай қувладики, ҳамма нарсамизни ташлаб, жинни бўлган одамдай, тумтарақай қочишга тушдик. Шундай маҳалда чакмон кўринадими кўзга... Баъзи бирорлар ҳатто пўстинидан ҳам кечиб, ташлаб қочди... Шу топда чакмон нега эсингга тушди, бошингга урасанми уни? Кошки чакмон сиёғи бўлса, гадой ҳазар қиласиган нарсани...

Лекин ҳақиқатда яп-янги, асл чакмон эди, бироқ чол нимани йўқотмасин, ҳеч балога ярамайди, деб сира гапини бермасди. Шундай важ билан ўзини овтишга одатланган эди. Ильинична эрининг бу одатини яхши билганлигидан, чакмоннинг сифати масаласида у билан талашмай қўя қолди.

Кечаси ўзаро маслаҳатлашиб, Ильинична билан Пантелей Прокофьевич рўзгорга қараш, янчилган донни яшириб кўмиш учун болалар билан уйда қолишга, бир жуфт қари ҳўкизга сандиқларни ортиб, Дуняшкани Чирга — Латишев қишлоғидаги қариндошларини кига жўнатишга қарор қилишиди.

Бироқ бу режани тўла равиша амалга ошириш учун имконият бўлмади. Эрталаб Дуняшкани жўнатишиди-ю, лекин туш пайти Татарска сальсклик қалмоқлардан тузилган жазо отряди келиб қолди. Афтидан, Пантелей Прокофьевичнинг яширинча уйга қайтиб келаётганини биронтаси кўриб қолган бўлса керак; жазо отряди қишлоққа киргандан сўнг орадан бир соатча вақт ўтгач, тўртта қалмоқ Мелеховлар қўраси ёнига от чоптириб келди. Пантелей Прокофьевич отлиқлар қорасини кўрган ҳамоно, оёғини қўлга олиб, чаққонлик билан ўзини чордоққа урди; меҳмонлар олдига Ильинична чиқди.

Қомати келишган, старший урядник погони таққан, ўрта ёшли қалмоқ отдан тушди-да, Ильиничнанинг ёнидан ўтиб, оstonага қадам қўяркан:

— Сеники чол қаерда? — деб сўради.

— Қаерда бўларди — фронтда, — деб жавоб қилди Ильинична қўрслик билан.

— Уйга бошла, меники обиска қиласди.

— Нимани қидирмоқчисан ўзинг?

— Сеники чол қидираман. Қап-катта одам ёлғончи гапирасан! Ай-ай, уят! — деди урядник кампирни изза қилмоқ учун бош чайқаб, оппоқ зич тишларини иржайтириб.

— Кўп иржаяверма, ювуқсиз.! Уйда йўқ деяпманми сенга, йўқ!

— Бижи-бижи гап тамом, уйга бошла! Бўлмаса, ўзим кирамиз,— деди қатъий қилиб ранжиган қалмоқ ва қийшиқ оёқлари билан катта-катта қадам ташлаб зинапояга чиқди.

Улар ҳамма хоналарни бирма-бир қараб кўришиди, қалмоқ тилида ўзаро гаплашиб олгандан кейин иккитаси текширмоқ учун ҳовлига чиқди, пакана бўйли, ҳабашдай қоп-қора, бурни пучуқ, юзи чўтирир қалмоқ ҳошиядор кенг чалворини тузатиб олди да, даҳлизга

чиқди, Ильинична эшик тирқишидан мўралаб, унинг бир сакраб тўсинга осилганини ва ўшанақаси томга чиққанини кўриб туради. Орадан беш минут ўтгач, қалмоқ томдан сакраб тушди, унинг кетидан, уст-боши чангга бўялган, соқолига ис ёпишган Пантелей Прокофьевич ҳам инқиллаб, эҳтиётлик билан ерга тушди. Чол лабларини қимтиб олган кампирига қаради-ю:

— Топиб олишди, лаънатилар! Бирон киша бориб чаққан-да... — деди.

Пантелей Прокофьевич соқчилар назорати остида Қаргин станицасида турган ҳарбий-дала судига жўнатилди, Ильинична сал-пал кўз ёши қилиб олгандан сўнг, Доннинг нариги томонида яна ўт очган тўплар нинг гумбурлаши ва аниқ тариллаб эшитилган пулемётларнинг овозига бирпас қулоқ солиб турди-да, дон-дундан лоақал пичасини яшириб қўймоқчи бўлиб, омборхонага кетди.

XXII

Қўлга тушган ўн тўрт дезертир судни кутарди. Суд узоққа чўзилмас, бераҳмлик билан ҳукм чиқараарди. Раислик қилувчи кекса ясовул ҳар қайси жавобгарнинг фамилияси, исми, отасининг отини, даражасини, қайси қисмдан эканини сўрап, унинг қанча вақтдан бери қочиб юрганини билгандан кейин ёнидаги суд аъзолари — шапкўр хорунжий ҳамда текин овқатдан семирган афти кепчикдай мўйловдор вахмистр билан икки оғиз шивирлашарди-ю, ҳукмни эълон қиласди. Қочоқларнинг кўпчилиги калтакланиш жазосига ҳукм этиларди, қалмоқлар маҳсус ажратилган эгасиз уйларда ҳукмни яширинча ижро этишарди. Дон армияси сафида қочоқлар ниҳоятда қўпайиб кетганлигидан ҳозир уларни 1919 йилдаги сингари эл кўзида очиқдан-очиқ калтаклаб бўлмасди...

Пантелей Прокофьевични беш кишидан кейин чакиришди. У суд столи қаршисида ҳаяжонланган, ранги оқарган ҳолда қўлларини икки ёнга қилганича қотиб турарди.

— Фамилиянг? — деб сўради ясовул унинг бетига қарамасдан.

- Мелехов, жаноби олий.
— Исминг, отангнинг оти?
— Пантелей Прокофьевич, жаноби олий.
Ясовул қофоздан бошини кўтариб, чолнинг юзига тикилиб қаради.
— Сиз қаердан бўласиз?
— Вешенская станицасининг Татарск қишлоғидан, жаноби олий.
— Сиз юзбоши Григорий Мелеховнинг отаси эмасмисиз?
— Ҳа, отаси бўламан, жаноби олий.— Қалтақдан қутулиш эҳтимоли борлигини сезган Пантелей Прокофьевичга дарров жон кирди.
— Менга қаранг, шундай қилишга уялмадингмизми? — деб сўради ясовул ўтирик кўзлари билан Пантелей Прокофьевичнинг озиб кетган юзига қаттиқ тикилиб.
Шундан кейин чол ҳарбий уставга риоя қилмастан чап қўлини кўксига босди-да, йигламсираб ялина бошлади:
— Жаноби олийлари, ясовул жаноблари! Умр бўйи ҳақингизга дуо қилишга розиман, лекин мени қалтакламанг! Уйланган икки ўғилнинг отасиман... Каттасини қизиллар ўлдириди... Невараларим бор, мен каби мункайган қарияни қалтаклашдан нима фойда?
— Биз, қарияларга ҳам қандай хизмат қилиш лозимлигини ўргатамиз. Сен нима, қочганим учун крест беришади, деб ўйловдингми? — деб чолнинг гапини бўлди шапкўр хорунжий. Унинг лаб четлари асабийликдан лип-лип этиб учарди.
— Крестни бошимга урармидим... Мени ўз қисмимга жўнатинг, энди ҳалол хизмат қиласман... Нега қочганимни ўзим билмайман, шайтон йўлдан оздирган бўлса керак... — Пантелей Прокофьевич яна алланималар деб чулдиради, янчилмай қолган дон-дуни, оёғи майблиги, рўзгор эгасиз қолгани тўғрисида ҳасрат қила бошлади, бироқ ясовул қўл қимирлатиб, овозини ўчириб қўйди, хорунжийнинг қулогига анчагача шивирлаб гапирди. Хорунжий рози бўлиб бош қимирлатгандан кейин ясовул Пантелей Прокофьевичга қараб деди:

— Ҳамма гапни айтиб бўлдингизми? Мен сизнинг ўғлингизни яхши биламан, лекин унинг отаси шундай одамлигига таажжубланаман, холос. Ўз қисмингизни ташлаб қочганингизга қанча бўлди? Бир ҳафтами? Сиз нима, қизиллар қишлоғингизни босиб олиб, тे-рингизга сомон тиқишини истайсизми? Ёшларга шунаقا ўрнак кўрсатмоқчимисиз ҳали? Қонунга қара-ганда биз сизни суд қилиб калтаклашимиз лозим эди-ю, бироқ ўғлингизнинг офицерлик номини ҳур-мат этиб, мен сизни шарманда гарчиликдан холос этаман. Сиз рядовоймидингиз?

— Худди шундай, жаноби олий.

— Даражангиз?

— Младший урядник эдим, жаноби олий.

Ясовул овозини баландлатиб, сансирашга ўтди:

— Погонларингни обташла! Ҳозир ўз қисминга жўна,— деб қўрслик билан буйруқ қилди.— Ҳарбий-дала судининг қарорига мувофиқ сен урядниклик унвонидан маҳрум этилдинг, шуни сотня командирига бориб айт! Ўтган урушларда ёинки ҳозирги урушлар-да мукофот олганмисан? Жўна!

Пантелей Прокофьевич азбаройи суюнганидан ҳовлиқиб кўчага чиқди-ю, черков гумбазига қараб чў-қина кетди ва ўшанақаси дўнгдан ошганича йўлни қўйиб, далама-дала уйига жўнаб қолди. «Энди кўзим очилди, бу гал шундай бекиниб олайки, уч сотня қал-моқ кетимдан келгандаям мени топиб бўпти!» деб ўйларди ўт босган буғдойпоя орасидан оқсоқланиб кетаётган Пантелей Прокофьевич.

Даштга чиққандан кейин у, ўткинчилар эътибори-ни ўзига жалб этмаслик учун йўлдан боришини маъ-қул топди-да, буғдойпоядан ажириқ босган ёзги йўлга тушиб олди: «Бу аҳволда мени дезертир деб гумон қилиши мумкин. Фалокат босиб биронта амалдорга рўпара бўлсан судсиzoқ калтакка қоларман», — деб овоз чиқариб ўлади у, лекин нимагадир ҳозир ўзини дезертир деб ҳисобламасди.

Пантелей Прокофьевич Донга яқинлашган сари қочоқлар тушган аравалар кўпроқ учрай бошлади. Кўкламда қўзголончилар Доннинг чап томонига че-кингандаги аҳвол яна такрорланган эди: дашт-

нинг тўрт томонидан ашқол-дашқол ортган қатор-қатор аравалар, бўкирган пода-пода қорамоллар, суворий аскардай чанг кўтарган қўтан-қўтан қўйлар босиб келарди... Араваларнинг ғижирлаши, отларнинг кишнаши, одамларнинг қий-чуви жимжит бепоён дашти бошга кўтариб, ваҳим соларди.

Ўткинчи аравада кетаётган боши боғлиқ нотаниш бир казак;

— Йўл бўлсин, бува?— деб бақирди.— Изингга қайт: кетимиздан қизиллар босиб келяпти!

— Елғон гап! Қизиллар қаерда экан? — Пантелей Прокофьевич саросимага тушиб тўхтади.

— Доннинг нарёғида. Вёшкига яқинлашишди. Сен нима, улар ёнига кетяпсанми?

Пантелей Прокофьевичнинг кўнгли жойига тушдида, йўлдан қолмай кетаверди, кечга яқин Татарскка етди. Тоғдан тушиб келаётганда у ҳамма ёқни яхшилаб кўздан кечирди. Қишлоқда одам боласи кўринмасди, кўчаларда зоф учмасди. Дераза қопқоқлари ёпилган эгасиз уйлар ҳувиллаб қолган эди. На одам овози, на молларнинг маърагани эшитилмасди; факат Дон бўйида шошиб-пишиб юрган одамлар қораси кўринарди, холос. Пантелей Прокофьевич яқинроқ бориб, булар қайиқларни сувдан тортиб олиб, қишлоққа элтиб қўяётган қуролли казаклар эканини аниқ ажратса олди. Татарскини халқ ташлаб кетгани Пантелей Прокофьевичга равshan бўлди. Чол секинаста ўз кўчасига кирди-ю, уйга томон юрди. Ильинична билан болалар емакхонада эдилар.

— Ана, бувам келди!— суюнганидан чинқириб юборди Мишатка, бувасининг бўйнига осилиб.

Ильинична шодлигидан йиғлаб юборди ва кўз ёши аралаш:

— Сен билан дийдор кўришишдан умид узган эдим,— деди.— Энди нима десанг ҳам, Прокофьевич, мен бу ерда туришга ортиқ рози эмасман! Менга деса ҳаммасига ўт тушиб, куйиб кул бўлсин, бўум-бўш уйни қўриқлашга сира тобим йўқ. Ҳамма одам қишлоқдан кетиб бўлди, мен бўлса, болаларминам ў-ўтирибман жиннига ўхшаб! Ҳозир бияни аравага қўш,

бошимиз оғган томонга кетамиз! Сени қўйворишдими?

— Қўйвориши.

— Бутунлайми?

— Бутунлай... яна қўлга тушгунимча...

— Ана кўрдингми, бу ерда барибир бекиниб қутулмайсан! Бугун эрталаб қизиллар нарёқдан бирам ўтишди, ваҳимасига туриб бўлмайди! Мен ўқ товуши ўчгунча болаларминам ертўлада ўтириб жонсақладим. Ҳозир уларни ҳайдашди чоғим. Казаклар сут сўраб келишди, бу ердан тезроқ кетишни маслаҳат беришди.

Дераза часпагининг ўқ тешган жойини синчиклаб кўздан кечираётган Пантелей Прокофьевич:

— Қимлар экан, бизнинг қишлоқлик казаклар эмасми?— деб сўради.

— Йўқ, бизниклармас, Хопер томоннинг одамларига ўхшатдим.

— Ундай бўлса, жўнаш керак,— деди Пантелей Прокофьевич уҳ тортиб.

Чол кечаси таппихонада ўра кавлади-да, етти қоп буғдойни унга солиб, яхшилаб кўмди, устини таппилар билан бостириб қўйди; қош қорайган маҳалда бияни қўшди, икки пўстин, бир қоп ун, сўк, оёғи боғланган бир қўйни аравага босиб, икки сигирни кетига боғлаб, Ильинична билан болаларни аравага мингазиб бўлгандан кейин:

— Панойи худо!—деди-ю, ҳовлидан кўчага чиқди, тизгинни кампирга бериб, дарвозани ёпди, сўнгра, дўнгга етгуンча дамба-дам бурнини қоқиб, чакмони енги билан кўз ёшларини артиб арава ёнида кетаверди.

XXIII

Шориннинг зарбдор қўшинига қарашли қисмлар ўттиз чақирим йўл босиб, 17 сентябрда Дон бўйига етиб келди. 18 сентябрь куни эрталабдан бошлаб Медведица дарёси қуйиладиган жой билан Казанск станицаси ўртасидаги оралиқда тўп овозлари янгради. Қисқача артиллерија тайёргарлигидан кейин пиёда аскарлар Буканов, Елан, Вешенская станицаларига

қарашли Дон устидаги қишлоқларни ишғол этишиди. Доннинг чап қирғоғидаги юз эллик чақиридан кўпроқ жой бир кун ичидан оқлардан тозаланган эди. Казак сотнялари чекинишар, тартибли равишда Дондан ўтиб, олдиндан тайёрлаб қўйилган маррага жойлашишарди. Дарёдан ўтиш учун керакли ҳамма нарса казаклар қўлида эди, лекин Вешенскаядаги кўприк сал бўлса, қўлдан кетганди. Казаклар чекингандан сўнг ўт қўйиб юбориш учун элдан бурун кўприк атрофига похол тўплаб, ёғочларига керосин сепиб қўйишган эди; энди ўт қўймоқчи бўлишганда, бирданига чопар келиб, 37-нчи полкнинг бир сотня казаклари Перевозной қишлоғидан тўғри шу кўприкка келаётганини хабар қилди. Қизилларнинг пиёда аскарлари станицага бостириб кирган маҳалда орқада қолган бу сотня от чоптириб кўприкка аранг етиб келди. Казаклар пулемёт ўқлари остида кўприкдан ўтиб олишга улгурдилар ва унга ўт қўйиб юбордилар, лекин ўлган ва ўқ еганлар бўлиб, ўндан ортиқ одамдан, ўшанча отдан ажрадилар.

9-нчи Қизил Армиянинг 22-нчи ва 23-нчи дивизиясига қарашли полклари ўзлари ишғол этган Доннинг чап қирғоғидаги қишлоқ ва станицаларни сентябрнинг охиригача қўлдан беришмади. Ҳар иккала томоннинг орасини дарё ажратиб турарди, ўша кезларда унинг эни саксон саржиндан ошмас, ҳатто баъзи жойлари ўттиз саржинга келиб қолган эди. Қизиллар дарёдан ўтишга унчалик ҳаракат қилишмасди; баъзи бир саёз кечув жойларда Дондан ўтишга уриниб кўришди-ю, бироқ душман йўл бермади. Шу участкадаги фронтнинг у бошидан бу бошига довур икки ҳафтагача тўпбозлик ва милтиқбозлик қизғин давом этди. Дарё бўйидаги тепаликларга ўрнашиб олган казаклар атрофни бемалол кўздан кечириб қизилларни Донга яқин келтиришмас, кундузи қирғоқ томон силжишга йўл қўйишмасди; бироқ бу участкадаги казаклар жангга чидамсиз кишилардан иборат бўлгани учун (ҳаммаси чоллар ва ўн етти-ўн тўққиз орасидағи ёшлар эди), ўзлари ҳам Дондан ўтиб қизилларни орқага суришга, чап қирғоқ бўйлаб ҳужум бошлашга сира уринишмасди.

Доннинг ўнг қирғоғига чекинган казаклар дастлабки куни, қизиллар ишғол этган қишлоқлардаги уйларга ана ўт қўяди, мана ўт қўяди деб роса кутишиди, лекин чап қирғоқдан ҳеч қандай тутун чиқмаганига ҳаммаси ҳайрон қолди; ҳаммадан ҳам қизифи шуки, кечаси нариги қирғоқдан ўтиб келган одамлар, қизиллар халқнинг ҳеч нарсасига тегмаганини, олган озиқ-овқатлари учун, ҳатто тарвуз, сут-қатиқ учун ҳам совет пули билан тўла ҳақ тўлашганини гапириб берди. Бу хабардан казаклар бира тўла гангид қолишиди. Улар, қўзғолон кўтарғанларининг жазоси учун қизиллар энди жами қишлоқ ва станицаларга ўт қўйинб кулинни кўкка совуради, деб гумон қилишган эди; улар, чекинмай қолган аҳоли, ҳеч бўлмагандага эркаклар шафқатсиз равишда қириб ташланади, деб кутишган эди; лекин ишончли манбаларга қарагандага, қизиллар тинч аҳолидан биронтасига қўл тегизмагани ва ўч олиш ниятида эмаслиги маълум бўлди.

19 сентябрга ўтар кечаси, Вешёнскаянинг рўпарасидаги қоровулхонада турган хоперлик казаклар, қизиллар нега бундай олижаноблик қилаётганини аниқлаб олишга аҳд қилишди; овози баланд бир казак қўлини карнай қилиб бақирди:

— Ҳой, қизилоёқлар! Нега уйларимизга ўт қўймайсиз? Ё гугуртларинг йўқми? Бу ёққа сузуб ўтинглар, сизга гугурт берамиз!

Қоронфилик ичидан йўғон овоз жавоб қайтарди:

— Яхшики, шу ерда қўлга тушмадинг, уйинг билан қўшилиб кул бўлардинг!

— Гугурт тополмадингизми? Шўрларинг қурсин!— деб майна қилиб бақирди хоперлик казак.

Унга жавобан хушчақчақ овозлар янгради:

— Бу ёққа ўт, оқ кўпрак, думинг тагига новшадил қўямиз. Үмрбод қашлаб кунинг ўтади!

Ҳар икки томонда қоровул турганлар не вақтгача бир-бирларини майна қилиб сўкишишди, сўнгра бироз ўқ отишгандан кейин жим бўлиб қолишли.

Дон армиясининг Қазанск — Павловск участкасида шайланиб турган икки корпусдан иборат асосий кучи октябрь бошларида ҳужумга ўтди. 8 000 пиёда ва 6 000 отлиқ аскардан иборат бўлган З-нчи Дон корпуси

си Павловскнинг яқинида Дондан ўтиб, қизилларнинг 56-нчи дивизиясини улоқтириб ташлади-да, муваффақиятли равишда шарқ томон силжий бошлади. Сал вақтдан кейин Коноваловнинг 2-нчи корпуси ҳам Дондан ўтди. Бу корпус аксарият отлиқ аскардан ташкил топганлиги учун қизилларнинг ичкари томонига ўтиб олиш ва бир мунча қақшатгич зарба бериш имкониятига эга бўлган эди. Ўша вақтгача резервда турган қизилларнинг 21-нчи ўқчи дивизияси жангга кириб, 3-нчи Дон корпусининг олға силжишини бир оз тўхтатиб турган бўлса-да, лекин бирлашган икки казак корпусининг сиқувига бардош беролмай, чекинишга мажбур бўлганди. 14 октябрда казакларнинг 2-нчи корпуси шиддатли жангдан кейин қизилларнинг 14-нчи ўқчи дивизиясини тор-мор қилиб, деярли ҳамма өдамини қириб ташлади. Бир ҳафтанинг ичida қизиллар Доннинг чап қирғоғидан суреб чиқарилди, фақат Вешенская станицасигина қўлларида қолди. Казак корпуслари кенг плацдармда ўрнашиб олиб, 9-нчи Қизил Армия қисмларини Лузево — Ширинкин — Воробьевка линиясига суреб ташладилар ва 9-нчи армиянинг 23-нчи дивизиясини гарб томондаги Вешенскаядан Кругловск қишлоғига чўзилган фронтни шошилинч суратда қайтадан тузишга мажбур этди.

Генерал Коноваловнинг 2-нчи корпуси билан бир маҳалда 1-нчи Дон корпуси ҳам Клетск станицаси ёнидаги ўз участкасида дарёдан ўтди.

Чап қанотдаги 22-нчи ва 23-нчи қизил дивизиялар қуршовга тушиш хавфи остида қолдилар. Шарқи-жануб фронтининг қўмондонлиги бу хавфни ҳисобга олиб, 9-нчи армияга Икорец дарёсининг қўйилиши жойидаги Бутурлиновка — Успенс — Тиshan — Кумилжен линиясига чекиниш тўғрисида буйруқ берди. Лекин қизиллар бу линияда узоқ тура олмади. Ёппасига сафарбар қилинган сон-саноқсиз казак сотнялари гала-гала бўлиб дарёдан ўтиб олишди-да, 2-нчи корпуснинг мунтазам қисмлари билан бирлашиб, қизилларни шимол томон қувлай бошладилар. 24 октябрдан 29 октябргача оқлар Филоново ва Поворино станицаларини ҳамда Новохоперск шаҳрини ишғол этдилар.

Бироқ октябрь ойида Дон армияси шунчалик ғала-
баларга эришганига қарамай, кўкламда вилоятнинг
шимолий чегарасига ғолибона юриш бошлаган ма-
ҳалда казакларда бўлган руҳий кўтариликдан асар
қолмаганди. Фронт кўрган казакларнинг кўпчилиги
бу ютуқлар муваққат эканини, қишига бориб бардош
бериш мумкин эмаслигини тушунишарди.

Сал вақтдан кейин жанубий фронтдаги аҳвол туб-
дан ўзгарди. Кўнгилли армиянинг Орлов — Кром ёни-
даги ҳал қилювчи жангда мағлубиятга учрагани ҳамда
Будённий суворийларининг Воронеж участкасидаги
муваффақиятли жанглари натижасида ғалаба тъ-
мин этилди: ноябрь ойида Кўнгилли армия Дон ар-
миясининг чап қанотини очиб бериб, чекинишга маж-
бур бўлди ва шу чекинганича уни ҳам эргаштириб
жанубга қочди.

XXIV

Пантелей Прокофьевич ўз оиласи билан бирга Ла-
тишево қишлоғида икки ярим ҳафтагача бемалол
жон сақлади, лекин қизиллар Дондан чекинди, деган
хабарни эшитиши биланоқ уйга қайтиш ҳаракатига
тушди.

Қишлоғига етишга беш чақирим қолганда чол
шартта аравадан тушди-да:

— Бу аҳволда имиллаб юришга тоқатим қолма-
ди-ю,— деди.— Манави дардисар сигирларнинг дасти-
дан аравани тез ҳайдаб бўлмаса! Бу ҳаром ўлгурлар-
ни негаям ҳайдаб келган эканмиз? Дуняшка! Ҳўқиз-
ларни тўхтат! Сигирларни ўз аравангга боғлаб ол,
мен тезроқ уйга етиб олмасам бўлмайди. Ҳамма имо-
рат куйиб, кулга айланган бўлсаям ажабмас...

Юрагига ғулғула тушган чол болаларни ўз арава-
сидан олиб, Дуняшканинг катта аравасига ўтқазди.
ортиқча буюмларни ҳам ўша аравага ортди-да, юки-
ни енгил қилиб олиб, қатқалоқ йўлдан шалдират-
ганча ҳайдади. Бир чақирим йўл босмасданоқ бия
терга ботди; илгари бундай қийноқни у сира кўрган
эмасди: чол қамчига дам бермай савалар, тўхтовиз
ҳайдарди.

Арава иргитиб ташлайверганидан жон азобида юзлари бужмайиб кетган Ильинична араванинг ён тахтасига тармашиб олиб:

— Бу аҳволда бияни ўлдирасан-ку! Мунча қаттиқ ҳайдайсан ахир, эсинг жойидами ўзи?— деб нолирди.

— Ўлса сатқайи сар, барибири мозоримга мармар тош қўймайди,... Чу, ҳаром ўлгур! Терлаганига ачинади-я!.. У ёқда уйимдан ном-нишон ҳам қолмагандир ҳали...— тишларини маҳкам босиб зарда билан гапирарди Пантелей Прокофьевич.

Чолнинг ташвишлангани ўринсиз бўлиб чиқди: уйи жойида, фақат ҳамма деразаларининг ойнаси синдирилган, эшиги ошиқ-мошиғидан суғуриб олинган, деворларини ўқ тешиб юборган эди. Эгасиз қолган ҳовлининг аҳволига қараб бўлмасди. Отхонанинг бир бурчагини тўп ўқи бутунлай ағдариб ташлаган, иккинчи тўп ўқи қудук ёнини ўйиб, устидаги тахтасини қулатиб юборган, ҳовозасини икки бўлак қилиб кетган эди. Пантелей Прокофьевич урушдан шунчалик қочса ҳам, барибири қутулолмади, уруш ўзи унинг қўрасига бостириб кириб, ҳамма ёқни вайрон, нест-нобуд қилиб кетди. Лекин қишлоқда турган хоперликларнинг рўзгорга етказган зарари ҳаммасидан ҳам ошиб тушган эди: улар молхонадаги четанларнинг барисини қулатишган, одам бўйи қилиб траншея қазишган эди; жон койитиб ўтирмасдан омборхона деворларини бузиб, синчлари билан траншеяларни ёпиб олишган; харсанг деворни бузиб пулемёт учун пистирма қуришганди; бир фарам пичаннинг ярмисини отларига топтатиб, нест-нобуд қилишган; четан деворни бузиб ўтга ёқишган, ёзлик ошхонани булғатиб ташлашганди...

Пантелей Прокофьевич уй ичини, қўрадаги иморатларни айланиб чиққандан кейин бошини чангллаб қолди. Бу сафар чол қўлдан кетган нарсалар учун қаттиқ ачинди, қадимги одати бўйича: ўзи ёмон эдига чиқариб қўя қолмади. Ахир, қандай қилиб умр бўйи ортирган шунча бойликий: бир пулга арзимас, ташлашдан бошқага ярамасди, дейиши мумкин? Кошки анчайин чакмон бўлса, омборхона-я! Уни қургунча қанча пул кетган?..

— Омборхонадан асар ҳам қолмабди-я! — деб хўрсинди Ильинична.

— Ўзиям номига омборхона эди... — деб юборди Пантелей Прокофьевич ўйламасдан, лекин гапини таомламай, қўл силтади-ю, ғарам томон кетди.

Ўйнинг деворларини ўқ илма-тешик қилиб юборганидан кўзга жуда хунук кўринарди. Уй ичидаги шамол ғувиллар, столу курсилар устини бир энлик чанг босиб ётарди... Ҳамма ёқни супуриб-сидириб тартибга солиш учун озмунча вақт кетмаслиги аниқ эди.

Пантелей Прокофьевич эртаси куниёқ станицага бориб, у ердаги таниш фельдшердан: «Мазкур казак Пантелей Мелехов, оёғи майиб бўлгани учун пиёда юра олмайди, даволатишга муҳтождир» деган мазмунда қофоз олиб келди. Бу ҳужжат Пантелей Профьевични фронтга боришдан озод этди. Чол уни атаманга кўрсатди, лекин қишлоқ маҳкамасига кетаётганда касаллигининг далили учун жўрттага ҳасса таяниб олди-да, гоҳ у оёғида, гоҳ бу оёғида оқсан бораверди.

Ҳеч вақт Татарскада ҳаёт бу қадар изидан чиққан эмасди. Чекинган жойларидан қайтиб келган одамлар ҳовлиқиб уйма-уй юришар, хоперликлар талаб кетган мол-ҳолларини топиб олишга ҳаракат қилишарди, даштма-дашт, жарма-жар зир югуриб подадан адашиб қолган сигирларини қидишишарди. Татарск тўпга тутилган куни қишлоқнинг юқори томонидан уч юз бош қўй дом-дараксиз кетган эди. Чўпоннинг гапига қарангандан, битта тўп ўқи ўтлаб юрган қўйларнинг олдига тушгану қўйлар ҳуркиб қўйруқларини селкиллатганларича даштга қараб қочган ва ўшанақаси кўринмай кетган. Одамлар қишлоққа қайтиб келгач, орадан бир ҳафта ўтгандан кейин қўйларни қишлоқдан қирқ чақирим нарида, Елан станицасига қарашли ердан топиб келишди, бироқ эгалари ўз қўйларини ажратиб ола бошлаганларида ярмининг қулоғидаги тамғаси бўлак — бегона мол экани маълум бўлди, ўзларининг қўйларидан эллик бошдан кўпроқ қўй кам чиқди. Богатировларнинг тикув машинаси Мелеховлар полизи орасидан чиқди, ўз омборхонасининг тунукасини Пантелей Прокофьевич Аникушканнинг ғарами ёнидан топиб келди. Қўшни қишлоқларда ҳам аҳвол шу хилда

Эди. Дон атрофидаги узоқ ва яқин қишлоқларнинг одамлари Татарска пашишахурда бўлиб қолди; не вақтгача одамлар бир-бiri билан учрашганда: «Саман тусли сигир кўрмадингизми? Пешонаси қашқа, чап шохи синган». «Қўнғир тусли новвос йўқотдим, молларингиз орасига адашиб кириб қолмаганмикин?»— деб сўроқлашишиб юрдилар.

Қазак сотняларининг дошқозонида ва дала кухняларида қанча бузоқ гўшти пиширилганини ҳеч ким билмасди, бироқ мол эгалари умидини узолмай, даштма-дашт юриб, топилмаслигига кўзлари етгунча роса қидиришди.

Пантелей Прокофьевич аскарликдан озод бўлиб олгандан сўнг иморатларини тузатишга, қўрани ўраб олиш ҳаракатига тушди. Хирмонда янчилмаган дон қолиб кетган эди, орасида сичқонлар югуришиб юрарди, бироқ чол янчишга киришмасди. Бир ёқда ҳовли деворсиз ҳувиллаб ётса, бир ёқда омборхонадан асар қолмаган бўлса, ҳамма ёқ вайронага айланиб, кўзга балодай кўриниб турса-ю, қандай қилиб хирмонга қўл тегади ахир! Куз яхши келиб, ҳаво очиқ бўлгани учун дон янчишга шошилишнинг ҳожати ҳам йўқ эди.

Дуняшка билан Ильинична она-бала уйларни суваб, оқлаб чиқишиди, қўрани ўраб олишда ва шунингдек бошқа хўжалик ишларида Пантелей Прокофьевичга қарашиб туришди. Бир амаллаб ойна топиб, деразаларга солишиди, ёзги ўчоқни, қудуқни тозалашди. Чол ўзи қудуққа тушди, бироқ у ерда шамоллаб қолиб, бир ҳафтагача йўталиб, акса уриб, кўйлаклари тердан жиққа ҳўл бўлиб юрди. Ниҳоят, бир ўтиришда икки шиша самогонни паққос ичиб, иссиқ печь устида ётиб терлади-ю, касал кўрмагандай бўлиб юриб кетди.

Григорийдан ҳали ҳам дарак йўқ эди; фақат октябрь охирларида Пантелей Прокофьевич ўғли соғсаломат ўз полки билан Воронеж губернасида юрганини тасодифан эшитиб қолди. Бу хабарни унга Григорийнинг полкдоши бўлган бир ярадор казак қишлоқдан ўтиб кетаётib айтган эди. Чол суюниб кетиб, хурсандлигидан сўнгги шиша дорини ҳам ичиб олди-да, жўжахўроздай кеккайиб олиб, эрталабдан кечгача кўчада гап сотиб юраверди.

Ураган одамни тўхтатиб:

— Эшитдингми? — деб сўради. — Бизнинг Григорий Воронежни олибди! Баъзи бир гапларга қарагандага катта даража олганмиш, ҳозир яна дивизия командири бўлибди, балки корпус командири бўлсаям ажабмас. Бунаقا уришадигани камдан-кам топилади! Узинг ҳам биласан-ку... — Чол ўз шодлигини ичига сиғдиролмай, ҳадеб мақтанар, хилма-хил уйдирмалар билан ўзини овутарди.

— Ўғлинг ниҳоятда ботир! — дейишарди унга ҳам-қишлоқлари.

Пантелей Прокофьевич шодиёна кўз қисиб дерди:

— Менга тортгандан кейин тағинам ботир бўлмасинми? Мақтансаданоқ чинини айтсан ёшлигимда мен ҳам ундан қолишмасдим. Аттангки оёғим чатоқда, йўқса, ҳозир ҳам бўш келмасдим. Дивизияга кучим етмасаям, бир сотня аскарга бемалол бош бўлардим! Агар фронтда биздақа қариялардан кўпроқ бўлганда-ку, аллақачон Москвани босиб олардик! Булар бўлса, бир жойдан қимилламайди, мужикларга кучи етмайди...

Уша куни Пантелей Прокофьевич ҳаммадан кейин Бесхлебнов чол билан гаплашди. У Мелеховлар қўраси ёнидан ўтиб бораётганда Пантелей Прокофьевич уни ҳам тўхтатиб гапга тутди:

— Ҳой, Филипп Агеевич, бирпас тўхта! Саломат-мисан ўзинг? Бу ёққа кир, гаплашамиз.

Бесхлебнов яқинроқ келиб салом берди.

— Янги гапдан хабаринг борми? Гришкам нималар қилаётганини эшитдингми? — деб сўради Пантелей Прокофьевич.

— Нима гап?

— Унга яна дивизия беришибди! Каттакон бир бўлинмага командир бўлибди!

— Дивизияга?

— Ҳа, ҳа, дивизияга!

— Шундай дегин!

— Ҳа, шундай! Дивизияни ҳар қандай одамга беришмас, сен нима дединг?

— Албатта.

Пантелей Прокофьевич керилиб, улфатига қараб

олди-да, ширин хаёлларга берилиб, гапида давом этди:

— Ўзиям ҳаммани қойил қолдирадиган аломат ўғил чиқди-да! Кўкраги тўла орден, ҳазилакам гапми бу? Биласанми, неча марта ярадор, неча марта майиб бўлган? Ундан бошқа одам бўлганда аллақачон ўлиб кетарди, лекин у назар-писанд қилмайди. Ҳей, биродар, Донда асл казаклар ҳалиям топилади!

— Топилишга топилади-ю, бироқ уларнинг ҳеч қандай фойдаси тегмаяпти-да,— хомушлик билан деди кўп гапни ёқтирамайдиган Бесхлебнов бобо.

— Ие, нега тегмас экан? Биласанми, улар ҳозир қизилларни Воронеждан нари ҳайдашди, Москвага етай деб қолишиди!

— Етай деб қолгани қаочон эди...

— Дарров олма пишиб оғизга тушмайди, Филипп Агеевич. Сен шуни билиб қўйки, урушда шошқалоқлик билан иш битмайди. Шошган қиз эрга ёлчимайди, дейилган. Бу ишни секин-аста қилиш керак бўлади, ҳаммасини картада кўриб, ўzlари чизган ҳалигидақа планларга тўғрилаб чиқиш лозим... Россияда мужик демаганинг қайнаб ётибди, казаклар бир сиқим холос.

— Бу гаплар ҳаммаси тўғри-ку, лекин сирасига келганда, казакларимиз узоқ бардош беролмайдиганга ўхшаб қолди. Қишига бориб меҳмонлар яна қайтиб келишади, эл оғзида шундай гап юрибди.

— Ҳозир Москвани олишолмаса, қизиллар қайтиб келиши аниқ, бу гапинг тўғри.

— Сен, нима, олади деб ўйлайсанми?

— Менинча, олишлари керак, у ёғини худо билади. Наҳотки казаклар бўш келса? Ўн икки казак дивизијаси ёппасига отлангандан кейин Москвани ололмайдими?

— Билмадим. Сен нима, урушни бас қилдингми?

— Менинг аскарлигим қаерга борарди! Оёғим соғ бўлганда-ю, мен уларга душман билан қандай жанг қилишни кўрсатиб қўярдим-а! Биз, қариялар, ҳали михдаймиз.

— Миш-миш гапларга қараганда ана шу михдай қариялар Доннинг нарёғида жуптак уриб, қизиллардан қочишганмиш: биронтасининг эгнида пўстини қол-

мабди, йўл-йўлакай тамоми уст-бошини ечиб ташлайверишибди. Одамлар, даштни бошдан-оёқ нимча пўстин босиб, ҳамма ёқ таррил лоладай гуллаб кетди, деб кулишади!

Пантелей Прокофьевич Бесхлебновга хўмрайиб қаради-да, совуққина қилиб:

— Менимча бу ёлғон гап деди.— Албатта, баъзи бирорвлар, юким енгил бўлсин, деб кийимини ташлаган бўлиши мумкин, лекин одамлар бирга ўн қўшиб гапиришга уста! Чакмон ёки нимча пўстин нима деган нарса? Қани айт-чи, жон ширинми, уст-бошми! Ҳамма қария бирмас, баъзи чоллар кийими оғирлик қилиб, чополмаслиги мумкин. Бу дардисар урушда тозидан ҳам тез чопадиган, оёғи чаққон бўлиш керақ, хўш, мен қайдан оламан бунақа оёқни? Сен ўзинг нега мунча куйиб-пишасан, Филипп Агеевич? Нимасига ташвишланасан ахир, бу пўстинлар сенга зарил қолдими? Масала пўстинда ёки, масалан, чакмонда эмас, душманни устомонлик билан енгишда, шундай эмасми? Хайр биродар, гапимиз чўзилиб, уйда ишим қоп кетди. Айтгандай, бузофингни топдингми? Ҳалиям қидириб юрисанми? Дараги йўқми? Бундан чиқди, хоперликлар сўйиб еган, илоё тешиб чиқсан! Лекин уруш тўғрисида хотиржам бўл: казакларимиз мужикларни енгади!— деди-да, Пантелей Прокофьевич гердайиб уйи томон кетди.

Бироқ «мужиклар» осонгина енгила қолмади... Қазаклар сўнгги ҳужумда ҳам кўп талафот кўрдилар. Орадан бир соат ўтар-ўтмас, кайфи чоғ бўлиб юрган Пантелей Прокофьевич хунук хабар эшитиб, таъби тирриқ бўлди. Чол қудуқ оғзини тузатмоқчи бўлиб ёғоч йўнаётганида бирданига хотинларнинг ув тортиб йиғлаганини эшитиб қолди. Йиғи овози тобора яқинлашаверди. Пантелей Прокофьевич Дуняшкани ўша ёққа юборди.

— Югуриб бориб билиб кел-чи, ким ўлиди,— деди у болтани ходага тишлатиб.

Бирпастдан кейин Дуняшка, Филоново фронтидан уч казакнинг:— Аникушка, Христоня ва қишлоқнинг нариги четидаги ўн етти яшар боланинг ўликларини олиб келишибди, деган хабар билан қайтди. Бу

воқеадан ҳаиг-манг бўлган Пантелей Прокофьевич шапкасини бошдан олиб чўқинди.

— Жойлари жаннатда бўлсин! Қазакмисан казак эди-я...— деб хўрсинди Христоняни кўз олдига келтириб, иккиси яқиндагина Татарскдан ҳарбий пунктга бирга жўнаганини ўйлаб.

Шундан кейин ортиқ ишга қўли бормади. Аникушканинг хотини қишлоқни бўшига кўтариб йиғлар, эрини ёдлаб шу қадар ув тортардики, Пантелей Прокофьевичнинг жигар-бағри эзилиб кетди. Унинг фарёдини эшитмаслик учун чол уйга кирди-да, эшикни маҳкам ёпиб олди. Дуняшқа меҳмонхонада онасига энтика-энтика сўзларди:

— Мундоғ қарасам,вой ойижон-эй, Аникушканинг бошида бош қолмабди, қатиги чиқиб кетибди. Бирам ваҳималики! Сассифига одам туролмайди... ўликларни бу ерга обкелиб нима қиларди? Христоня бўлса, бутун арава бўйлаб ётибди, оёғи шинель тагидан чиқиб, арава кетида осилиб ётибди... Ранги оппоқ докадай оқариб кетибди! Ўнг кўзи тагида тангандай келадиган жиндай тешик, қулоқ орқаларида қон қотиб қолибди.

Пантелей Прокофьевич жаҳл билан тупуринди-да, ҳовлига чиқиб болтани олди ва ўшанақаси дикангланича Дон томон кетди. Ёзги ўроқ ёнида ўйнаб юрган Мишаткага йўл-йўлакай:

— Бувингга айтиб қўй, мен ўтин кесиб келгани Доннинг нарёғига бораман. Эшитдингми, қўзичноғим?— деб тайинлади.

Доннинг нарёғидаги ўрмонда ёқимли кузги сукуннат ҳукм сурарди. Ҳазон бўлган барглар тераклардан шитирлаб тўкиларди. Наъматақлар чўғдай қизариб, сийрак барглар орасидан ҳақиқдай мевалари мўралаб туради. Ўрмонни бошдан-оёқ эман пўстлоғининг димогни ёрувчи кучли ҳиди босиб кетган эди. Серпалак маймунжон ер бетини ўраб-чирмаб олганди; унинг қорамтири-кўкиштоб тусга кириб пишган гуж-гуж мевалари, бир-бирига чирмашиб кетган палаклари тагида офтабдан яшириниб писиб ётарди. Жонсиз кўкатлар устига тушган шабнам сояда тушгача кўтарилмаганди, ўргимчак инлари шабнам зар-

раларидан садафдай йилтиради. Фақат қизилиштонларнинг така-туки билан қораялоқнинг чуғурашигина ўрмон сукунатини бузарди.

Ўрмоннинг салобатли гўзаллиги таъсирида Пантелей Прокофьевичнинг кўнгли ором олиб тинчиди. У дараҳтлар орасида секин-аста қадам қўяр, шабнамда ивиган хазонларни оёғи билан титиб хаёл сурарди: «Ҳаёт шундай экан: яқиндагина ҳаммаси тирик эди, мана энди мурдаларини ювишяпти. Шундай азамат казакнинг бошига етишди-я! Ахир, кечагина уйга келиб биздан хабар олган, Дарьяни сувдан олаётганимизда Дон бўйида турган эмасмиди! Эй, Христан, Христан! Сениям ёв ўқи бир ёқлик қилди.. Бечора Аникушка... қандай шўх йигит эди... ичишга ишқибоз, ўйин-қулгини яхши кўрарди, мана энди бекорга ўлдикетди...» Пантелей Прокофьевич Дуняшканинг гапини эслаб, доим кулиб турадиган кўса Аникушканинг ҳезалакчалиш афтини кўз олдига келтирди, бироқ ҳозир шу Аникушканинг боши мажақланган ҳолда нафаси чиқмай ётганини асло тасаввур этолмади. Боя Бесхлебнов билан суҳбатлашганида Григорийни мақтагани эсига тушиб: «Бекордан-бекорга худонинг олдида осий бўлдим,— деб ўзини койирди.— Шу топда Григорий ҳам ўқ еб, бирон жойда қулаб ётган бўлса-я? Худо кўрсатмасин-эй! Ундан айрилгандан кейин чолу кампир қайга борамиз?»

Бута тагидан бехосдан париллаб кўтарилиган лойхўрак Пантелей Прокофьевични чўчитиб юборди. Қияламасига ўқдай учиб бораётган парранданинг кетидан чол қараб турди-да, яна юриб кетди. Қичкина кўл ёнида бир неча туп бутани танлаб, шуларни кесишга тушди. У ишга берилиб, ҳеч нарсани ўйламасликка ҳаракат қиласиди. Бир йил ичиде аллақанча яқин кишилари, танишлари ажал чангалида кетди; булар эсига тушган сари чолнинг юраги эзилар, олам қоронғилашиб, кўзига ҳеч нарса кўринмасди.

— Манави тупни қулатиш керак. Қозиқбоп экан! Четан деворга жуда боп,— деб жўрттага ўзига-ўзи гапиради у оғир хаёлларга берилмаслик учун.

Пантелей Прокофьевич ишлаб чарчагандан кейин курткасини ечди-да, кесилган шох-шаббалар устига

ўтириб, хазон бўлган баргларнинг тахир ҳидини тўйиб-тўйиб искади, кўкимтири туман қўйнида жимирилаган йироқдаги уфқقا, куз бағрида олтиндай сарғайиб, сўнгги чиройини кўз-кўз қилаётган олисдаги дарахтзорларга узоқ тикилиб қолди. Яқинида бир туп қоразаранг кўринди. Бу дарахт кечки куз қюёшининг шуъласида зарвароқ тўн кийгандай парпираб турарди, қирмизи барглар билан безанган ажойиб шохлари, учишга ҳозирланган афсонавий қуш сингари қанот ёйган эди. Пантелей Прокофьевич анчагача уни томоша қилди, сўнгра бехосдан кўлга қаради-ю, тип-тиниқ ҳалқоб сувда юрган катта-катта зофора балиқларга кўзи тушди. Балиқлар сув бетига жуда яқинлашиб сузиб юрганидан қанотлари ва биланглаб турган қип-қизил думлари аниқ кўринарди. Ҳаммаси бўлиб саккизта эди. Улар гоҳ ям-яшил нилуфар карнай гуллари тагига кириб кетишар, гоҳ очиқ жойга сузиб чиқиб, чўкаётган тол баргларини илиб олишарди. Куз келиб кўлчада сув қурий бошлагани учун балиқларни тутиш қийин эмасди. Пантелей Прокофьевич бирпас у ёқ-бу ёқни ахтариб чиққандан кейин ёнидаги иккинчи кўлдан, аллаким ташлаб кетган таги йўқ ҳалта тўр топди, қайтиб келиб шимини ечди-да, совуқдан инқиллай-инқиллай, балиқ овлашга киришди. Чол сувни лойқатиб, тизза бўйича балчиқ-қа бота-бота ҳалтани сув таги билан кўл бўйлаб судраб борарди, дамба-дам қўлини ҳалтага суқиб кўрар, каттакон балиқнинг қўлга тушиб биланглашини сабрсизлик билан кутарди. Чолнинг меҳнати зое кетмади: ҳар биттаси ўн қадоқдан келадиган учта зофора балиқ тутди; лекин совуқ сувдан майиб оёғининг томири тортишиб қолгани учун овни йифиштиришга мажбур бўлди. Борига барака деб, сувдан чиқди-да, қамиш попуги билан оёқларини артиб кийинди, ўт ёқиб исиниш учун яна ўтин кеса бошлади. Ҳарқалай, чолнинг ови ўнгидан келган эди. Кутилмаганда бир пудга яқин балиқни тутиб олиш ҳазилакам гапмас, ҳар кимнинг қўлидан келавермайди! Чол овга алаҳсиб, бояги оғир хаёллардан ҳам қутулди. У кейин яна қайтиб келиб, қолган балиқларни ҳам тутиб олиш ниятида ҳалтани бир жойга яхшилаб яширди-да,

ҳар бири чўчқа боласидай келадиган, семиз тилла балиқларни сувдан олиб ташлаганимни ҳеч ким кўрмадимикин, деган хаёлда теварак-атрофни кўздан кешириб бўлгандан кейингина ўтинини орқалаб, новдага тизилган балиқларни қўлга олиб, шошмасдан Дон томон равона бўлди.

Оғзининг таноби қочган чол Ильиничнага, овда омади келганини гапириб, қип-қизил мисдай товланган зогора балиқларни яна бир карра завқланиб томоша қилди, бироқ кампир унинг овига унчалик аҳамият бермади. У ўлганларни бориб кўрган, ўша ердан қаттиқ хафа бўлиб, йиглаб қайтган эди.

— Аникейни бориб кўрасанми?—деб сўради Ильинична.

— Бормайман. Мен нима, ўлик кўрмабманми? Шунча кўрганим ҳам етар!

— Бир кириб чиқсанг бўларди. Яхши эмас, лоақал видолашганим келмади, деб гина қилишади.

— Худо хайрингни берсин, мени тинч қўй! Мен у билан офтобда қатиқ ичишганим йўқ, видолашмасам ҳам бўлаверади!— газаб билан хотинини жеркиб ташлади Пантелей Прокофьевич.

У жанозага ҳам, қабристонга ҳам бормасдан, эрталабданоқ Донга жўнаб, ўша ёқда кунни кеч қилиб келди. Жанозага жом чалингандан у ўрмонда эди: шапкасини бошидан олиб чўқинди, бироқ: «Мунча узоқ жом чалишнинг нима ҳожати бор?—деб попдан ўпкалади.— Бир-икки марта қўнфироқни даранглаттинг, бўлди-да! Бир соат чўзишади-я! Ҳадеб чала-веришдан нима фойда? Фақат одамнинг кўнгли бузилгани, яна бир марта ўлим эсга тушгани қолади, холос. Куз фасли ҳар қадамда ўлимдан дарак беряпти: дарахтдан тушган барг, мовий осмонда ғафиллаб учуб ўтаётган гала-гала ғозлар, ётиб қолган нимжон кўкатлар — ҳаммаси ўлимни эслатяпти...

Фам-ғуссадан юраги безиллаб қолган Пантелей Прокофьевич, ўзини қанчалик эҳтиёт қилмасин, сал орада яна бир кулфатга дучор бўлди. Бир куни овқат маҳалида Дуняшка деразага қараб:

— Ие, яна аллакимнинг ўлигини обкелишяпти!— деди.— Арава кетига боғланган эгарлоғлиқ оти ҳам

бор, секин-аста келишяпти... Аллаким арава ҳайдаб келяпти, ўлик шинель тагида ётибди. Аравакаш тескари ўтириб олибди, танимадим, бизнинг қишлоқликми ё бошқами...— Дуняшка тикилиб қаради-ю, бирданига ранги докадай оқариб кетди.— Йе, бу... бу...— деб лаблари пичирлаганича, бирдан чинқириб юборди:— Гришка-ку... Гришани обкелишяпти!... Унинг оти!— деб ҳўнграб йиғлаганича даҳлизга чопиб чиқди.

Ильинична ўтирган жойидан қўзғалолмай, капит билан кўзларини тўсиб олди. Пантелей Прокофьевич бир амаллаб ўрнидан турди-ю, сўқир одамдай, қўлларини олдинга чўзиб эшик томон юрди.

Прохор Зиков дарвозани очди, зинадан чопқиллаб тушган Дуняшкага кўз қирида қараб қўйди-да:

— Мехмонни қабул қилинглар... Кутмагандирсизлар?— деди тумтайиб.

— Вой, меҳрибоним! Вой, акажоним!— деб фарёд чекди Дуняшка қўлларини қайга қўйиншини билмай.

Прохор бурилиб қаради-да, унинг юzlари кўз ёшидан жиққа хўл бўлганини, Пантелей Прокофьевичнинг зинапояда шағамдай қотиб қолганини кўргандан кейингина масалага тушуниб, тасалли бера бошлади:

— Қўрқманглар, қўрқманглар! Трик. Тиф касалига йўлиққан, холос.

Пантелей Прокофьевич дармони қуриганидан эшик кесакисига суюниб қолди.

— Тирик экан!!!— ҳам кулиб, ҳам йиғлаб овози борича дадасига қичқирауди Дуняшка.— Гришка тирик! Эшилдингми!? Қасал бўлгани учун обкелишибди! Тезроқ ойимга кириб айт! Нега турибсан, ахир?!

Прохор отларини етаклаб, аравани ҳовлига киргизаркан:

— Қўрқма, Пантелей Прокофьевич! Үғлинг тирик, лекин соғлигини асти сўрама,— деб шоша-пиша Дуняшканинг гапини тасдиқлаган бўлди.

Пантелей Прокофьевич гандираклай-гандираклай, бир неча қадам босди-да, зинапояга ўтириб қолди. Дуняшка унинг ёнидан қуюндай учиб ўтиб, онасини овутгани уйга кириб кетди. Прохор отларни зинапоя тагида тўхтатиб Пантелей Прокофьевичга қаради.

— Ўтираверасанми, ахир? Шолча олиб кел, аравадан олайлик.

Чол индамай ўтиради. Қўзларидан тирқираб ёш оқар, бироқ юзидағи бирон томири қимир этмасди. У икки марта қўлини кўтариб, чўқинмоқчи бўлди-ю, лекин пешонасига олиб боришга мажоли келмай, яна туширди. Томоғида бир нима қулқуллаб қайнар эди.

— Бундоқ қарасам, қўрққанингдан эсинг оғиб қолганга ўхшайсан,— деди Прохор унга ачиниб.— Олдинроқ бирор кишини юбориб, сизларга хабар бериш кераклиги нега эсимга келмабди, а? Мен аҳмоқ, ўлай агар, аҳмоқман! Қани, тур, Прокофьевич, ахирка сални уйга обкириш керак. Шолча қани? Ёки қўлда обкираверамизми?

— Бирпас шошма...— деб хириллади Пантелей Прокофьевич.— Оёғимга бир бало бўлди... ўлиди, деб ўйловдим... Худога шукур... Умидимни узуvdим... — Чол эгнидаги эски кўйлак тугмачасини узиб ташлади-да, ёқасини чок этиб, оғзини каппа-каппа очиб, чуқур нафас ола бошлади.

— Қани тур, тура қол, Прокофьевич!— деб қистарди Прохор.— Икковимиздан бўлак буни кўтарадиган одам йўқ!

Пантелей Прокофьевич аранг ўрнидан турди-ю, зинапоядан тушиб, шинелни очди ва беҳуш ётган Григорийнинг устига энгашди. Томоғида яна алланима қулқуллай бошлаганига қарамай, у ўзини тутиб. Прокорга қаради:

— Оёғидан кўтар. Уйга обкирамиз.

Григорийни ҳужрага обкиришди, этикларини вакийимларини ечиб каравотга ётқизиши. Емакхона томондан ҳовлиқиб чақирган Дуняшканинг овози келди:

— Дада! Ойимнинг кўнгли озиб қолди... Бу ёққа кел!

Ильинична емакхонада, қоқ ерда ётарди. Дуняшка тиз чўкиб, унинг кўкарған юзига сув сепарди.

— Югур, Капитоновна момани чақириб кел, тезроқ! У қон олишни билади. Ойимдан қон олиш керак, дегин, асбобларини ола келсин!— деб буюрди Пантелей Прокофьевич.

Буйи етиб қолган Дуняшка бош яланг ҳолда қишлоқ сари ёш боладай чопиб кетавериши үзига эп кўрмади, у рўмолини олди-да, наридан-бери ўрай бошлади.

— Болаларни жудаям қўрқитиб юбордик! Худоё, бу нима қўргилик, а... Дада, болаларга қараб туринг, мен бирпасда бориб келаман,— деб тайинлади.

Дуняшка ойнага қараб олишдан ҳам тоймасди-ю, бироқ Пантелей Прокофьевичнинг еб қўйгудек бўлиб хўмрайганини қўргач, емакхонадан ўқдай отилиб чиқиб кетди.

Кўча эшикка чиққандан кейин Аксинъяни кўриб қолди. Унинг оппоқ юзида бир қатра қон қолмаган эди. У бўшашган қўлларини осилтириб, четанга суянганича қотиб қолган эди. Унинг хиралашган қоп-қора кўзлари ёшланмаса ҳам шу қадар зўр изтироб ичидা мўлтмўлт этиб боқардики, Дуняшка бир дам тўхтаб қолди-да, беихтиёр:

— Тирик, тирик! Тиф, холос,— деди-ю, селкиллаган кўксини қўллари билан ушлаб, чопқиллаганича тор кўча бўйлаб кетди.

Ҳар нарсага қизиқувчи аёллар нима гаплигини билиш учун Мелеховлар қўраси томон югуришарди. Улар Аксинъянинг Мелеховлар эшигидан узоқлашганини, сўнгра бирданига қадамини тезлатиб, букчайган ҳолда юзини қўллари билан тўсиб олганини кўрдилар.

XXV

Бир ойдан кейин Григорий тузалди. Ноябрь ойининг йигирманчи кунларида биринчи марта ўрнидан турди, сўррайиб сурати қолган Григорий, эҳтиёткорлик билан аста-секин юриб дераза ёнига борди.

Ер бети-ю, похол ёпилган иморат томлари янги ёқсан қордан оппоқ бўлиб кўзни қамаштиради. Тор кўча бўйлаб чана излари кўринарди. Четан ва дараҳтларни кўкимтирил қирор босиб, ботаётган қуёш шуъласида камалак сингари ранг-баранг тусда товланарди.

Григорий қоқшол бармоқлари билан мўйловини си-лаб, хаёл ичидагилмайганича деразага узоқ тикилиб қолди. У бу хил ажойиб қишини умрида биринчи марта кўраётгандай эди. Ҳамма нарса унга бошқача

янги маъно касб этганга ўхшаб кўринарди. Гўёки, касалдан кейин кўзи ҳам аввалгисидан равшанроқ кўраётгандек, атрофида илгари номаълум бўлган ҳар хил янги буюмлар билан танишди, қадимдан унга таниш бўлган нарсаларда рўй берган ўзгаришларни ажратса бошлади.

Григорийнинг характеристида илгари мутлақо кўринмаган хусусият пайдо бўлди: у қишлоқдаги воқеаларга, рўзгор ишларига қизиқа бошлади. Ҳаётдаги жами нарса ажойиб янги маънога эга бўлиб, ҳаммаси унинг эътиборини ўзига жалб этарди. Янгидан ўз сирини очган оламни у бир оз таажжублангандай томоша қиласди, кўпинча оғзининг таноби қочиб, ёш боладай соддалик билан жилмайганича узоқ туриб қоларди, ўшанда хўмрайган башараси билан хунук важоҳати ҳам бир оз ўзгариб, оғзининг бурчакларидаги ажинлар тарқай бошларди. Баъзан у болалик чоғидан кўриб ўргангандай рўзгор буюмига қошлирини чимириб, худди бошқа юртдан келган ва бундай нарсани умрида энди кўраётган одам сингари, астойдил тикилиб қоларди. Бир куни Ильинична ўғли урчуқнинг устидан чиқиб, ниҳоятда таажжубланди. Қампир уйга кириши билан Григорий бир оз хижолат тортиб, урчуқдан узоқлашди.

Дуняшка акасининг сўррайган қоқ суяқ гавдасига кулмасдан қарай олмасди. У уйда ёлғиз ич кийимда юради. Иштони тушиб кетаверганидан бир қўли билан ушлаб, букчайган ҳолда, почалари узун чиллакдек оёқларини судраб зўрғатдан қадам қўярди; ўтирадиган бўлса, йиқилиб тушишдан қўрқиб, бирор нарсага муқаррар тармашиб оларди. Касал ётгандан бери ўсиб кетган қоп-қора соchlари тўкила бошлади, оқ ораглаган жингалак кокили чигал бўлиб қолди.

Дуняшканинг ёрдами билан сочини ўзи устарада олди, сўнгра синглисинга бурилиб қараган эди, у устарани ерга тушириб юборди-ю, қорнини ушлаганича, каравотга ағанаб, кула-кула ичаги узила ёзди.

Синглисинга кулгиси босилгунча Григорий кутиб турмоқчи бўлди, бироқ сабри чидамай, ингичка титроқ овоз билан:

— Кўзингни оч, жувормаг бўп кетасан-а! Қейин уялиб юрганин тағин, ҳадемай келин бўласан,— деди. Ўнинг товушидан бир оз ранжигани сезилиб турарди.

— Вой, акажон! Айналай сендан-эй! Яхиси мен кета қолай... Кулгимни босишга ҳолим қолмади! Аллакимларга ўхшаб қолибсан-ки-и-и! Нақ полиздаги қўриқчининг ўзгинаси бўлсан!— дерди Дуняшка, кулгиси срасидан аранг овоз чиқариб.

— Сениям тифдан кейин қандай бўлишингни бир томоша қилсам эди. Устарани ол, қани бўл!

Ильинична Григорийнинг ёнини олиб, қизини койий бошлади:

— Сен ўзинг мунча ҳингиллайсан? Эси паст, Дунька!

— Унга бир қаранг, ойижон, аллакимга ўхшаб қопти!— дерди Дуняшка кўз ёшларини артиб.— Бoshининг ҳамма ёғини фурра босиб кетибди, дуб-думалоқ қора тарвузга ўхшайди... Вой ўлай!

— Ойнани обкел!— деди Григорий.

У бир парча синиқ ойнага қараб ўзини кўрди-ю, анчагача, қотиб-қотиб кулди.

— Ўғлим, нега сочингни олдинг, шундай юраверганинг яхши эмасми?— деди Ильинична ачиниб.

— Сенингча, тепакал бўлсам яхшими?

— Ҳозир ҳам калдан баттар хунугинг чиқибди.

— Ишларинг бўлмасин!— деб жеркиб ташлади-да, Григорий чўтка билан совунни кўпиртираверди.

Кўчага чиқиши имкониятидан маҳрум бўлган Григорий уйда болалар билан ўйнаб вақт ўтказарди. Улар билан ҳар тўғрида гаплашаверар, лекин Натальянинг номини тилга олмасликка ҳаракат қиласарди. Лекин бир куни Полюшка, унга эркаланиб:

— Дадажон, ойим энди қайтиб келмайдими?— деб сўраб қолди.

— Йўқ, қўзичофим, у ёқса кетганлар қайтиб келмайди.

— У ёқ деганинг нима? Гўристонми?

— Хулласи, ўлган одам қайтмайди.

— Ойим бутунлай ўлганми?

— Бўлмаса-чи? Бутунлай ўлган.

— Мен бўлсам, бир кунмас, бир кун бизни соғи-

ниб қайтиб келади, деб ўйловдим...— деди Полюшка эшитилар-эшитилмас пичирлаб.

— Сен уни ўйлама, жон қизим, керак эмас, — деди Григорий хириллаб.

— Қандай қилиб ўйламайин, ахир? Ҳеч бўлмаса бир келиб хабар ҳам олмайдиларми? Бирпасгина... А?

— Йўқ. Бор энди, Мишатка билан ўйнагин.— Григорий юзини тескари ўгириб олди. Афтидан, касал уни енган, иродасини заифлаштирган эди: дарров кўзлалига ёш келди, лекин Григорий буни болаларга билдирамаслик учун, дераза ёнида юзини ойнага қўйганича узоқ туриб қолди.

У болалари олдида урушдан гап очишни ёқтирасди, бироқ Мишатка ҳамма нарсадан ҳам урушга кўпроқ қизиқарди. У доим дадасига: қандай жанг қилинади, қизиллар қанақа одам, уларни нима билан ва нима учун ўлдирилади, деган саволларни бераверарди. Григорий хўмрайиб, жаҳл аралаш:

— Яна шундан оғиз очди бу қақажон!— дерди.— Урушдан бошқа гап қуриб кетганми, ахир? Яхшиси, бошқа гаплардан гаплашайлик, ёзда қармоқ билан балиқ овлаш тўғрисида маслаҳатлашайлик. Сенга қармоқ қилиб берайми? Қўрага чиқа бошласам, сенга бирпасда от думидан қармоққа ғалати ип ўтказиб бераман.

Ҳар гал Мишатка урушдан гап очса, Григорий ўсал бўлиб, ерга кириб кетай дер, боланинг оддий, тўғри саволларига жавоб беролмай қийналарди. Сабаби нима? Ёки бу саволларнинг жавобини алҳолгача топа олмагани учун шундаймикин? Қандай бўлмасин, лекин Мишатка алданганга кўнадиган анойилардан эмасди: у дадасининг балиқ овлаш тўғрисидаги гапларини астойдил тинглаган бўларди-да, салдан кейин:

— Дадажон, сен урушда одам ўлдирганмисан?— деб яна сўрарди.

— Қўйсанг-чи, шилқим!

— Одам ўлдирганда ваҳимали бўладими? Ўлдирганда қон чиқадими? Қон кўп кегадими? Товуқникиданам, қўйникиданам кўпми?

— Мен сенга айтдим-ку, бу гапларни қўй, деб.

Мишатка бирпас жим бўлар, сўнгра хомушлик билан яна гапиради:

— Яқинда бувам қўй сўйганида мен қараб турувдим. Ҳеч қўрққаним йўқ... Сал-пал чўчиган бўлсамам, лекин унча қўрққаним йўқ!

— Ҳайдасанг-чи буни ёнингдан!— деб бақирди Ильинична хуноб бўлиб.— Буям бир каллакесар бўлади чоғим! Қотиллардан қолишмайди! Эртаю кеч фикри-зикри уруш, урушдан бошқани билмайди. Зигирдай бошингдан шу лаънати урушни тилга олишинг яхими, жигаргўшам? Бери кел, манови юпқани олиб, бирпас вайсамай тургин.

Бироқ уруш ҳар қадамда эсга тушаверарди. Фронтдан қайтган казаклар Григорийни кўргани кириб, Будённий суворийлари Шкуро ва Мамонтовни тор-мор этганини, Орёл яқинидаги муваффақиятсиз жанглар, фронтда бошланган чекинишлар тўғрисида гапириб беришарди. Грибановка билан Кардаил ёнидаги жаңгда яна икки татарсклик казак ўлдирилган эди; Герасим Ахваткинни қишлоқقا олиб келишди; терлама касали билан оғриган Дмитрий Голошеков вафот этди. Григорий икки уруш давомида ҳалок бўлган ҳамқишлоқларини хаёлан бирма-бир кўз ўнгидан ўтказиб кўрди: Татарскда қурбон бермаган биронта оила йўқлиги маълум бўлди.

Григорий ҳали ҳовлига чиқмай туриб, қишлоқ атамани станица атаманининг буйруғини келтириб берди. Унда: юзбоши Мелехов қайтадан текширишдан ўтиш учун дарҳол медицина комиссиясига келиши лозим, дейилган эди.

— Атаманингга ёз, оёғимга дармон кириб юра бошлаганимдан кейин, улар буюрмаса ҳам ўзимоқ бораман,— деди Григорий аччиғланиб.

Фронт тобора Донга яқинлашиб келмоқда эди. Қишлоқдагилар чекиниш тўғрисида гапира бошладилар. Тез кунда округ атаманидан, ҳамма эркаклар чекинсин, деган фармон келиб, майдонда ўқиб эшилтирилди.

Пантелей Прокофьевич майдондан қайтгач, келган буйруқнинг мазмунини Григорийга гапириб берди-да:

— Энди нима қиласми?— деб сўради.

Григорий кифтларини қисди:

— Нима қиласадик! Чекиниш керак. Буйруқсизоқ ҳамма қўзғалади.

— Мен ўз тўғримизда сўраяпман: икковимиз бирга жўнаймизми ё бошқа-бошқа кетаверамизми?

— Бирга жўнашга тўғри келмас. Бир-икки кундан кейин мен отда станицага бориб келаман, билай-чи: Вёшкидан қайси қисмлар ўтаркин? Шулардан биронтасига қўшилиб кетавераман. Сен, қочоқлар орасида чекинганинг дуруст. Ёки сен ҳам ҳарбий қисмга кирмоқчимисан?

— Худо кўрсатмасин!— деди Пантелеј Прокофьевич чўчиб кетиб.— Ундай бўлса мен Бесхлебнов буваминам бирга жўнайман, у куни менга, бирга ҳамроҳ бўлайлик, деб таклиф этувди. Чол ўзи мулоийм одам, стиям жойида, иккала отни аравага қўшамизу «ҳайт» деб жўнайверамиз. Менинг биям ҳам хирсадай семирган. Шундай битиб кетибдики, бу лаънати, тенинади холос, олдига боргани қўрқаман!

— Жуда соз, Бесхлебнов билан ҳамроҳ бўлиб жўнайвер,— деб маъқуллади Григорий.— Ҳозирчалик, қайси йўлдан кетишингизни пухта гаплашиб олайлик, балки йўлим тушса, мен ҳам ўша томондан ўтиб қоларман.

Григорий планшеткасидан жанубий Россиянинг харитасини олди-да, қайси қишлоқлардан ўтиш кераклигини дадасига яхшилаб тушунтириди, сўнгра ўша қишлоқларнинг номини энди қоғозга ёзмоқчи бўлганда, ҳурмат билан харитага тикилиб турган чол бирданига:

— Тўхта, ёзма,— деди.— Албатта, сен бу ишларни мендан кўра яхшироқ тушунасан, харитаям, албатта муҳим нарса, йўлни яқин қиласади, тўғри йўлни кўрсатади, бироқ менга тўғри келмагандан кейин қандай қилиб мен унга амал қиласман, ахир? Сен, аввало Каргиндан ўтиш керак, дейсан, Каргиндан йўл тўғрилигини мен ҳам яхши тушунаман, бироқ барибир мен мана бу ёқдан айланмасам сира бўлмайди.

— Айланмасига сарсон бўлиб юришнинг нима зариллиги бор?

— Зариллиги шуки, Латишевода аммамнинг қизи бор, ўшаникнида ўзимга ва отимга текин овқат топилади, бегонаникига тушадиган бўлсам, ўз ёнимдан ейишга тўғри келади. Ундан кейин сен, картага мувофиқ Астахово слободасига бориш керак, йўл тўғри, дейсан, лекин мен Малаховска бораман; у ердаям менинг чатишган қариндошим ҳамда жўрам бор; у ердаям ўзимникни сарф қилмасдан, текин ем-хашакдан фойдаланишим мумкин. Мундоғ ўйлаб кўргин, бир ғарам пичанини аравага ортиб юролмайсан, бегона юртларда бальзан ем-хашак деган марса текин тугул пулгаям топилмайди.

— Доннинг у ёғида қариндошларинг йўқми?— деб сўради истеҳзо билан Григорий.

— У ёқдаям бор.

— Ўша ёққа жўнай қолгин-да?

— Сен мени калака қилма!— Пантелей Прокофьевич тутақшиб кетди.— Сен менга тўғри ғапир, ҳазилингни қўй! Ҳазилниям вақти бўлади-да, ақлинга балли!

— Қишлоқма-қишлоқ санғиб юришнинг нима кераги бор? Чекинадиган одам тўғри йўлдан чекинаверди, қариндош-уругиникига кириб юрмайди, меҳмондорчиликка кетяпканинг йўқ!

— Бўлди, кўп ўргатаверма, қайси йўлдан кетишни ўзим ҳам биламан!

— Ўзинг билсанг, истаган томонингга кетавур!

— Сенинг планинг деб, йўлда қопкетмай тағин? «Тўғри йўлни тўнғизга чиқарган» деган гапни эшитганмисан? Бинои умр қишида йўл тушмайдиган аллақайси гўрларда қолиб кетарман. Қайси ақлинг билан менга шу бемаъни маслаҳатни беряпсан? Тағин бу дивизия командири бўлган эмиш!

Ота-бала анчагача тортишди, ниҳоят, Григорий ўйлаб кўрди-ю, отасининг гапларида маъно борлигини тан олишга мажбур бўлиб, уни юпатишга киришди:

— Хафа бўлма, дада, сенга ўз маршрутимни мажбуран қабул қилдирмоқчи эмасман, истаган томонингдан боравер. Донецнинг нарёғида сени топиб олишга ҳаракат қиласман.

— Ана, бу гап бошқа! — суюниб кетди Пантелей Прокофьевич.— Боядан бери ҳар хил маршруту планларминам бекорга миямни ачитасан холос, ем-хашак бўлмагандан кейин ҳеч ерга етолмаслигимни, пла-нинг планлигича қолиб кетишини сира тушунмай-сан.

Чол Григорий касал бўлиб ётган кезлариёқ секин-аста йўл тараддудини қўриб, бияни яхшилаб боқсан, чанани тузатган, янги пийма буюртириб, намгарчиликда сув ўтмасин учун ўз қўли билан унга чарм қоплаб олган эди; элдан бурун қопларни асл сули билан тўлғазиб қўйганди. Ўз ишига пухта бўлган чол чекинганда қийналмаслик учун тайёргарлик қўриб қўй-ган — йўлда керак бўладиган ҳамма нарсани олдиндан таҳт қилиб қўйган эди. Болта, дастарра, исказа, кошибчилик асбоби, ип, қўш-қўш тагчарм, мих болға, бир боғлам қайиш, арқон, бир бўлак мум, от тақаси-ю, тақа михлари — ҳаммаси брөзентга ўралган бўлиб, аравага ортишга тайёр турарди. Пантелей Прокофьевич ҳаттоқи шайтон тарозини ҳам ола кетмоқчи бўлди; Ильиничнанинг: йўлда тарозининг нима кераги бор, деган саволига чол пичинг аралаш жавоб берди:

— Хотин-эй, қариган сари ақл киармикин десам, қайтага миянг суюляпти. Наҳотки анчайин бир нарса-ага ақлинг етмаса? Чекинганимда пичан ёки кепакни ўлчаб тортиб олишим керакми? Ёки у ёқдагилар пи-чанини газлаб сотишармикин?

— У ёқда тарози қуриб кетибди-да, а? — деб та-ажжубланди Ильинична.

— У ёқдаги тарозилар қанақалигини сен қайдан биласан? — Пантелей Прокофьевичнинг жаҳли чиқди.— Балки, у ёқдаги тарозиларнинг ҳаммаси нотўғридир, тошдан уриб, шўримизни қуритар. Шу ёғини ўйлаш керак! У томондаги одамларнинг қанақалигини яхши биламиз! Уттиз қадоқ нарса олиб, бир пудга пул тўлайсан! Ҳар бекатда гўсҳур бўлиб чув тушгандан кўра, ўз тарозимни ола кетганим яхши, сира оғирлик қилмайди! Бу ерда тарозисиз кунларинг ўтаверади, тарозичи бошингга урасанми? Қишлоқдан ҳарбийлар ўтадиган бўлса, пичанини тортмасданоқ олаверади... Арқонига боғлаб беравериб чарчайсан. Мен бунақа

шох-бутоги йўқ шайтонларни кўп кўрганман, жуда яхши биламан!

Олдин Пантелей Прокофьевич кўкламда арава оламан деб чиқимдор бўлмаслик учун ҳатто ўз арасини ҳам чанага ортиб ола кетишни мўлжаллаган эди, бироқ кейинчалик ўйлаб кўриб, бу бемаъни фикрдан воз кечди.

Григорий ҳам йўлга тайёрлана бошлади. У маузери билан милтигини тозалади, жангларда ҳалол хизмат этган қиличини созлади; касалдан турганига бир ҳафта бўлганда ҳовлига чиқиб, отидан хабар олди, унинг йилтироқ сағрисини кўриб, чол бия қатори унга ҳам яхши қараганига қаноат ҳосил қилди. Сўнгра. ўйноқлаган отига зўрғатдан минди-ю, роса чоптириди; уйга қайтиб келаётганида,— назарида шундай туғулдими ёки кўзига чиндан кўриндими,— Астаховлар уйининг деразасидан бирор оппоқ дастрўмол қимирлатгандай бўлди...

Татарскликлар йиғинда, бутун қишлоқ баравар жўнаймиз деб қарор қилишди. Хотинлар казакларга йўл харжи тайёрлаб, икки кечаю кундуз нон-пон ёпиб, овқат пиширишди. Ўн иккинчи декабрда жўнамоқчи бўлишди. Пантелей Прокофьевич қош қорайгандা чанага пичан ва сули ортиб қўйди, эрталаб тонг ёришган маҳалда пўстинини кийиб, белини боғлади, қўл-қопини белбоғига қистириб чўқинди-да, бола-чақаси билан хайрлашди.

Сал вақтдан кейин қишлоқдан чиқсан аравалар турна қатор бўлиб, тоф томон йўл олди. Подахонада тўпланган хотин-халаж рўмолларини қимирлатиб, жўнаётганлар билан узоқ хайрлашди, ниҳоят, даштда изғирин турди, оппоқ қор тўзони ичидагимиллаб тоққа чиқаётган аравалар ҳам, арава ёнида пиёда кетаётган казаклар ҳам кўринмай қолди.

Григорий Вешенскаяга жўнашдан олдин Аксинья билан учрашди. Қоронғи тушиб, қишлоқда чироқ ёқилган маҳалда уникига кирди. Аксинья ип йигирар, унинг ёнида Аникушканинг хотини пайпоқ тўқиб, алланимани ҳикоя қилиб ўтиради. Григорий уйда бегона хотинни кўриб, гапни чўзмасдан:

— Аксинья, бирпасга чиққин, ишим бор,— деди:

Даҳлизда у қўлини Аксинъянинг елкасига қўйди-да:

— Мен билан жўнайсанми? — деб сўради.

Аксинъя нима дейишини билмай, узоқ ўйланиб қолди, ниҳоят, шивирлаб:

— Рўзғор нима бўлади? Уй-чи? — деди.

— Биронтасига топшириб кетасан. Жўнаш керак.

— Қачон?

— Эртага сени обкетгани келаман.

Аксинъя қоронғида жилмайди:

— Эсингдами, бир вақтлар мен сенга, тупканинг тагига десанг ҳам боравераман, дегандим. Ҳозир ҳам ўша гапим гап. Сенинг умри вафоли ёрингман. Қаёққа юр десанг, бораман, ҳеч нарсадан тоймайман! Сени қачон кутай?

— Кечаси. Йўлга кўп нарса олма. Уст-бош, озиқ-овқатдан кўпроқ ол, бошқаси керакмас. Ҳозирчалик хайр!

— Хайр. Уйга кирсанг бўларди... у ҳозир кетади. Сени кўрмаганимга талай вақт бўлди... Фамгузорим Гришенъка! Хаёлимда сен... Йўқ! Айтмайман.

— Вақтим йўқ. Мен ҳозир Вёшкига боришим кепрак, хайр. Эртага учрашамиз.

Григорий даҳлиздан чиқиб, аллақачон кўча эшикка етган бўлса-да, Аксинъя ҳали ҳам даҳлизда туриб жилмаяр, ловуллаган бетини кафти билан ишқалардӣ.

* * *

Вешенскаяда округ идораларини ҳамда интендант складларини эвакуация қилиш бошланди. Григорий округ атаманининг маҳкамасига кириб, фронтдаги аҳволни суриштирди. Адъютантлик вазифасини бајарувчи ёшгина хорунжий унга шундай деди:

— Қизиллар Алексеев станицаси ёнида. Вешенская орқали қайси қисмлар ўтади ва умуман ўтадими, йўқми, бизга маълум эмас. Ўзингиз ҳам кўриб турибсиз, ҳеч ким ҳеч нарса билмайди, ҳамма тезроқ қочишнинг пайида... Мен сизга шундай маслаҳат бераман: ўз қисмингизни қидириб овора бўлмасдан, тўғри Миллеровога жўнайверинг, ўша ерда сўроғлаб

тезроқ топиб оласиз. Ҳар ҳолда, сизнинг полкингиз темир йўл бўйлаб чекинса керак. Хўш, душман Дон бўйида тўхтатиладими? Буниси даргумон. Лекин Вешенскаяни жангэиз топширишимиз аниқ, бунга шубҳа йўқ.

Григорий кечаси алламаҳалда уйга қайтди. Ильинична овқат пишираётib:

— Сен кетгандан кейин орадан бир соатча ўтгач, Прохоринг келди; яна қайтиб келмоқчи эди, алҳол дараги йўқ,— деди.

Григорий суюниб, наридан-бери овқатини еб олдилла, Прохорникига борди. Прохор аразлаган одамдай, ноилож илжайиб қарши олди.

— Вёшкидан думингни хода қилиб, ўшанақаси жўнавордингми, деб ўйловдим.

Григорий содиқ ординарецининг кифтига қоқиб:

— Қайси шамол учирди, қаердан келдинг?— деб кулиб сўради.

— Қаердан бўларди, фронтдан.

— Қочдингми?

— Худо асрасин, йўғ-э! Шундай азamat жангбоз йигит қочадими? Қонуний йўл билан жавоб олдим, сенсиз якка ўзим иссиқ юртларга жўнаб кетгим келмади. Билла юриб гуноҳга ботганмиз, билла бориб рўз маҳшарда жавоб беришимиз керак. Ишимиз хуржун, биласанми ўзинг?

— Биламан. Қани гапир, сенга нечук жавоб берагалишиди?

— Эй, бу узоқ ҳангама, кейин айтиб бераман,— деди Прохор бўйинтоблик қилиб; унинг таъби хира бўлиб кетди.

— Полк қаерда?

— Ким билади дейсан қаердалигини.

— Сен ўзинг полкдан қачон чиқдинг?

— Икки ҳафтача бўлди.

— Шунча вақтдан бери қаерларда юрувдинг?

— Үлай агар, жудаям ғалагисан-да...— деди Прохор норози бўлиб ва кўз қирида хотинига қараб қўйди.— Қаерда, қачон, нега... Босган изим орқамда қолди. Айтдим-ку, гапириб бераман деб, гапириб бераман, ахир. Ҳой, хотин! Арогинг борми? Командир билан

учрашганда пича тортмасак бўлмас. Борми ўзи? Йўқми? Қани бор, иложини қил, оёғингни қўлга олвомлиб дарров топиб кел! Эринг йўқ, ҳарбий интизомни унубиб қўйибсан-а! Бўшашмай ўл!

— Нега мунча вағиллайсан?— деб сўради Прохорнинг хотини қулимсираб.— Менга кўп жекираверма, сендақа хўжайнини қара-ю! Йил бўйи икки кун қорасини кўрсатиб, тағин хўжайнлик қиласди.

— Ҳамма менга бақиради, мен сенга бақирмасам, кимга бақираман? Сабр қил, генераллик даражасига кўтарилий, иннайкейин бошқаларга бақирадиган бўламан, лекин ҳозирча чидагин ва лаш-лушкингни кийиб тезроқ жўна!

Хотини кийиниб, уйдан чиқиб кетгандан кейин Прохор таъна кўзи билан Григорийга қаради:

— Сенда заррача фаҳм йўқ экан, Пантелеевич... Хотиним олдида қандай қилиб сенга ҳамма гапни очиб айта оламан? Қачон, нима дейвериб роса қийнадинг мени. Хўш, терламадан кейин тузукмисан ўзинг?

— Мен-ку, тузукман, сен ўз саргузаштингдан гапир. Ҳароми бир нарсани яширяпсан ўзинг... Ростини айт: нима бало қилдинг, қандай қилиб қочдинг?

— Қочишдан ҳам баттар иш бўлди... Сени касал ҳолда обкелиб қўйганимдан кейин ўз қисмимга қайтдим. Мени сотняга, учинчи взводга жўнатишиди. Биласан-ку, жанг деса, жоним киради! Икки марта ҳужумга киргандан кейин ўзимга-ўзим: «Бу ердан туёқни шиқиллатиш керак! Бошқа бирор бошпана топмасанг, каллангдан ажрайсан, Прошка»,— дедим. Аксига ўша кунлари жанглар авжига чиқиб, бизни шундай исканжага олишдик, бира тўла кўз очирмай қўйишиди! Қаерни душман ёриб ўтса, бизни ўша ерга рўпара қилишади, қаер бўшащса бизнинг полкни ўша ерга юборишади. Бир ҳафта ичидан сотнядан ўн бир казак асфаласофилинга кетди! Шундан кейин юрагим сиқила бошлади, азбаройи хафақонликдан баданимни бит босиб кетди.— Прохор тамаки чекди-да, халтасини Григорийга узатиб, шошмасдан ҳикоясини давом этирди:— Бир куни Лискининг ёнгинасида разведкага чиқишига тўғри келди. Уч кийши йўлга чиқдик. Тепа-

ликдан кетяпмиз, теварак-атрофни кўздан кечириб боряпмиз, денг; мундоғ қарасак, жардан бир қизил аскар чиқиб қўлини кўтаради. От чоптириб олдига бордик, у бўлса: «Станицалик биродарлар! Мен бегонамасман! Мени ўлдирманглар, сиз томонга ўтаман!»— деб бақиради. Нима бало бўлди-ю, шайтоннинг гапига кириб, ғазабим қайнаб тепасига бордим: «Ҳой, итвачча, дедим,— урушга чиққанингдан кейин таслим бўлмаслигинг керак! Роса аblaҳ экансан-ку, дедим,— шартимиз кетиб, ўзимиз аранг турганимизни кўрмаяпсанми, кўр? Сен таслим бўлиб, бизга қўшилсанг тағин кучимиз ортади-ку!— дедим-да, от устидан туриб қиличнинг қини билан елкасига солдим. Ёнимдаги бошқа казаклар ҳам уни койиб: «Бу нимаси ахир, бўзчининг мокисидай гоҳ у ёққа, гоҳ бу ёққа ўтаверсанг, шуям уруш бўлдими? Астойдил ёпишиб, қаттиқроқ сиқсаларинг-ку, тезроқ уруш тамом бўларди-я!»— дейишиди. Фалокат босмаса, бу қочоқнинг офицер эканини дарров пайқамасмидик? Қочоқ эмас, нақ офицернинг ўзгинаси экан! Жаҳл устидаги билан урганимдан кейин ранги оқариб: «Мен офицерман, мени уришга ҳақларинг йўқ! Илгари мен гусар бўлиб хизмат этганман, мобилизация вақтида қизиллар орасига кириб қолганман, сизлар мени ўз командирингиз олдига оборинг, ҳамма гапни ўша ерда айтиб бераман»,— деди. «Ҳужжатларингни кўрсат!»— десак, у: «Мен сизлар билан гаплашишни истамайман, мени командирларинг олдига оборинглар!»— деб баланд келди.

Григорий унинг гапини бўлди:

— Ҳали сен шуни хотинингдан яшириб, гапиролмай ўтирибсанми?— деб таажжубланди.

— Хотинимдан яширган гапга ҳали етганим йўқ, бирпас гапни бўлмай тур. Шундай қилиб, биз уни сотняга олиб келдик. Аттанг-аттанг, ўша ерда отиб ташлай қолсак-ку, олам гулистон эди... Биз шўрлиқ, бошимизга бало қилиб, ҳайдаб келдик: бир кундан кейин қарасак, ўшани бизнинг сотняга командир қилиб тайинлашибди. Бунга нима дейсан? Ҳамма касофат шундан бошланди! Орадан бир қанча вақт ўтгандан кейин у мени чақиртириди: «Сен ҳали, итвач-

ча, бўлинмас ягона Россия учун шунаقا хизмат қил-япсанми? Эсингдами, мени асир туширганда юзимга айтган гапларинг?»— деб қолди-ку. Ундаи деб кўрдим, бундай деб кўрдим, қани қутулсам! Қилич қини билан урганим эсига тушса, бирданига дағ-дағ тит-рай бошлайди: «Биласанми, мен гусарлар полкининг ротмистри бўлганман, дворянлар табақасиданман, сен исқиқт менга қўл қўтардинг-а?»— дейди. Бир ча-қириб қўймайди, икки чақириб қўймайди, унинг зул-мидан ўлар бўлсан ўлиб бўлдим. Взвод командирига буюриб, мени навбатдан ташқари посбонликка юбор-тиради, қоровул турғизади, устма-уст наряд беравериб кўз очгани қўймайди, хулласи калом, мени адойи тамом қилиш учун пайимга тушиб олди бу хунаса! Мен билан разведкада бўлган икки ҳамро-ҳимгаям худди шу хилда азоб бераверди. Улар сабр қила-қила, ниҳоят мени бир четга чақириб олиб: «Шу-ни ўлдирайлик, йўқсан у бизни кўз очиргани қўймайди!»— дейишиди. Мен ўйлаб кўриб, ҳамма гапни полк командирига айтишга аҳд қилдим, лекин уни ўлдиришини виждоним қабул қилмади. Ўлдирадиган бўлсак, ўша қўлга тушган жойида киши билмас ўлди-риб қўя қолардик, вақт ўтгандан кейин бу ишга, негадир, қўлим бормади... Хотиним товуқ сўйганда кўзимни чирт юмиб оламан, бу ахир одам-ку...

— Ишқилиб, ўлдириингларми уни?— яна гапни бўлиб сўради Григорий.

— Бирпас шошмагин, ҳаммасини эшитасан... Шундай қилиб, полк командирига айтдим, гап ўша жойга келганда, командир кулиб юборди: «Ўзинг уни ургандан кейин ўпкалашнинг ҳожати йўқ, Зиков, у тўғри қиласди, интизом ўрнатяпти. Узи билимдон, яхши офицер»,— деди. Алам қилиб унинг олдидан чиқдиму ичимда: «Яхши офицер бўлса, сен уни крест ўрнига ту-мор қилиб, бўйнингга тақиб ола қол, лекин мен у билан бир сотняда хизмат қилиб бўпман!»— деб қўйдим. Мени бошқа сотняга юборинглар, деб илтимос қилган эдим, йўқ, юборишмади. Шундан кейин мен қочишга аҳд қилдим. Бироқ қочиш осонми? Бизларни орқа то-монга кўчириб, бир ҳафталик дам бериши; ўша ерда мени шайтон яна йўлдан оздирди... Ўйлаб туриб: би-

ронта триппер касалига йўлиққан хотин топмасам. бўлмас экан, деган қарорга келдим, ўшандагина хизматдан қутулиб, касалхонага тушишим мумкин, бу ёғи ҳеч гапмас, чекиниш бошланади, ҳаммага чекинишмиз маълум бўп қолган эди. Умримда хотинбозлик қилмаган одам, хотинлар кетидан югурга бошладим, энг хунук, касал башараларини қидиришга тушдим. Лекин, мановиниси соғ, мановиниси касал, деб пешонасига ёзиб қўйилмагандан кейин қандай билиш мумкин? Ана бош оғриғи!— Прохор жаҳл билан тупурди-да, хотиним келяптимикин, деган хаёлда қулоқ солди.

Григорий кулгисини яшириш учун озғини кафти билан тўсди-да, кулгидан юмилиб кетаётган кўзларини чақнатиб:

— Излаганингци топдингми?— деб сўради.

Прохор ёшланган кўзлари билан унга тикилди. У худди қариб, ўлар ҳолатига етган кўпракдай одамга маъюс боқарди. Бирпас жим тургандан кейин жавоб берди:

— Осонгина топди-қўйди, деб ўйлаётгандирсан ҳали, а? Керак бўлмаганда ўзи илашадиган нарса, қидиргандан сира топилмас! Дод десанг ҳам йўқ, фарёд десанг ҳам!

Григорий юзини сал четга ўгириб, овозини чиқармай пиқирлаб куларди; кейин, кафтини юзидан олдида, энтикиб:

— Худо ҳақи, қийнамасдан тезроқ айтгин: топдингми, йўқми?— деб сўради.

— Албатта, сен учун кулгили кўринади...— деди Прохор ўпкаланиб.— Менимча, эсини еган одам бирордан кулади.

— Мен кулаётганим йўқ.... Хўш, иннайкейин, нима бўлди?

— Иннайкейин, мен хўжайин қизининг пайига тушдим. Қирқларга борган қиз, балки ёшроқdir. Юзига ҳуснбузар тошган, башарасини кўрсанг, кўнглинг айнайди! Яқинда унинг фершалга қатнаганини қўшниларидан эшилдиму: «Бу қиздан албатта илаштирсан керак!» деб ўйладим. Шундан кейин мен жўжакхўроздай у ёғидан ўтдим, бу ёғидан ўтдим, ҳар хил

гаплар билан аврай бошладим... Қаёқдан мунчалик гапга уста бўп кетганимни ўзим билмайман!— Прохор уялгандай бўлиб илжайди, ҳаттоқи ўтган иш эсига тушиб, чеҳраси очилиб кетди ҳам:— Ўйланмоқчи бўлиб ваъда қилдим, ишқилиб, оғзимга келганини айтавердим... Ахири бир амаллаб қўндиридим, энди гуноҳга ботадиган маҳалда бирданига кўз ёши қиласа бўладими! У деб кўрдим, бу деб кўрдим: «Ёки сен қасалмисан?— деб сўрадим,— майли, зарари йўқ, қайтага яхши»— дедим. Лекин ўзим қўрқаман денг: қоронги кечак, шовқинимизни эшитиб, биронтаси сомонхонага кириб қолса борми!.. «Додлама,— дедим,— худо хайр берсин, овозингни ўчир! Агар касал бўлсанг, сира парво қилма, сенга муҳаббатим зўрлигидан мен ҳаммасига розиман»,— десам, у: «Йўқ, Прошено́ка жоним! Мен ҳеч бир касал эмасман. Мен ҳали қизман, шунинг учун қўрққанимдан йиғлаяпман»,— деди. Ишонсанг, Григорий Пантелеевич, шу гап оғзидан чиқиши билан аъзойи баданимни муздай тер босиб кетди! «Худоё тавба! Роса қўлга тушибман-ку! Бир камим энди шу қолувди...»— деб ўйладим. Жиғибийрон бўлиб сўрадим: «Ундай бўлса, фершалга нега қатнадинг, лаънати? Нега одамни лақиллатасан?»— десам:— «Юзимдаги ҳуснбузарни йўқотиш учун дори олишга борувдим»,— дейди. Аламига чидолмай сочими ни юлиб: «Тур ўрнингдан, ҳозир кўзимдан йўқол, минг лаънат сендақа алвастига! Онаси ўпмаган қиз менга керак эмас, сенга спраям уйланмайман!»— дедим. Прохор янада баттарроқ ғазаб билан тупуринди-да, раъий келмасдан гапида давом этди:— Шундай қилиб, ҳамма меҳнатим зое кетди. Ўйга кирдиму, лашлушларимни олиб, ўша кечасиёқ бошқа жойга кўчдим. Кейин йигитлардан дарагини эшитиб, бир бева хотин билан учрашдиму, қидирган нарсамни топдим. Бу гал мен олдин дангалига: «Қасалмисан?»— деб сўрадим.— «Оз-моз»,— деди.— «Менга озиям етади, кўпини бошимга ураманми»,— дедим. Ҳожатимни чиқаргани учун Керенский пулидан қўлига йигирма сўлкавой тутқаздим, эртаси куни ортирган матоҳимдан суюна-суюна, касалхонага йўргалаб қолдим, у ердан тўғри уйга келдим.

— Сен отсиз келдингми?

— Нега отсиз бўлсин? Отим, яроғ-аслаҳаларим, ҳаммаси шу ерда. Йигитлар отимни касалхонага келтириб беришди. Лекин гап ундумас; бир маслаҳат бер: хотинимга нима важ қиласан? Ёки, айбимни ошкор қиласдан, сеникига бориб тунасаммикин, а?

— Йўқ, йўқ, дийдорингни кўрмай! Уйингда ётавер, Ўқ теккан дейсан. Бинт борми?

— Шахсий пакетим бор.

— Пакетинг бўлса, тезроқ ҳаракат қил!

Барибир ишонмайди,—деди Прохор маъюс бўлиб, лекин ўрнидан турди. Сумкасини титкилаб, ҳужрага кириб кетди ва ўша ёқдан секин овоз билан:— хотиним келса, гапга солиб тур, мен бирпасда бўламан,—деди.

Григорий тамаки ўраётиб, жўнаш тўғрисида ўзича план тузарди. «Икковимиз отларимизни аравага қўшамизу, жўнайверамиз. Қоронғи тушганда жўнаш керак, бўлмаса бизникилар Аксинъяни ола кетаётганинни кўриб қолишади. Лекин яшириш қийин, барibir эшитишади...» деб хаёл сурарди.

Прохор ҳужрадан оқсоқланиб чиқди-да, стол ёнига келиб ўтирди:

— Айтгандай, юзбошининг нима бўлганини сенга гапириб бермабман. Мен касалхонага борганимдан кейин уч кун ўтгач йигитлар уни ўлдиришибди.

— Йўғ-еў!

— Худо урсин! Жанг пайтида орқадан отиб, саранжом қилишибди. Бекорга ўзимни-ўзим дардга чалинтирганим қолди, шуниси алам қиласи холос!

Жўнаш ташвиши билан мияси банд бўлган Григорий, хаёли қочган ҳолда:

— Отган одамни топишдими?—деб сўради.

— Бе, топиб бўпти? Шундай бир тиқилинч пайтда, у кимнинг эсига келади дейсан. Хотиним нега мунча ҳаяллаб кетди, а? Бу юришида иштаҳа бўғилиб, ичкинг ҳам келмай қолар. Қачон жўнамоқчисан?

— Эртага.

— Яна бирор кун турсак, нима қиласи?

— Нимага энди?

— Уст-бошимни битдан тозалаб олардим, йўлда эргаштириб юришнинг нима қизиги бор!

— Йўлда тозалаб оларсан. Вақт ғанимат. Қизиллар Вёшкидан икки бекат нарига келиб қолишиди.

— Эрталаб жўнаймизми?

— Йўқ, кечаси. Бир амаллаб Қаргинға етиб олсак, ўша ерда туナймиз.

— Қизиллар бизни қўлга тушурса-я?

— Ҳушёр бўлиш керак. Айтгандай мен... Мен Аксинъя Астаховани ола кетмоқчиман. Сен қаршимасмисан?

— Менга нима? Менга деса иккитасини олвол... Фақат отларга оғир бўлади.

— Унчалик оғир эмас.

— Хотин киши билан сафарга чиқишнинг хосияти йўқ... Бошингга урасанми уни? Иккимиз бедаҳмаза кетаверардик,— Прохор четга қараб хўрсинди-да:— Униям судрашингни ўзим билувдим,— деди.— Хотинбозликни сира қўймадинг-да... Эҳ, Григорий Пантелеевич, елканг қамчини соғиниб қолганга ўхшайди!

— Бунинг сенга алоқаси йўқ,— деди Григорий совуққина қилиб.— Хотинингга айтиб қўйма тағин.

— Илгари бирон марта айтганмидим? Уялмай, менга шундай деганингни қара! Хўш, Аксинъянг уйини кимга ташлаб кетади?

Даҳлизда оёқ товуши эшитилди. Хотин уйга кирди. Унинг кул ранг жун рўмолида қор йилтиради.

— Бўрон турибдими?— Прохор жавондан стаканчаларни олиб бўлгандан кейингина:— Бирор нарса топиб келдингми?— деб сўради.

Юзлари чўғдай қизарган хотин, тер босган икки шишани қўлтифидан олиб столга қўйди.

— Мана бу жуда соз, сафар бехатар бўлсин, деб ичамиз!— деди Прохор жонланиб. У самогонни исқаб кўриб:— Гули экан! Жудаям ўткир!— деди.

Григорий икки марта стаканчада кўтарди-да, чарчаганлигини важ қилиб, уйига кетди.

XXVI

— Ана, уруш ҳам тамом бўлди! Қизиллар шундай дўумимизни тугиб қўйишадики, биз энди то денгизга ет-

гунимизча, шўр сувга бориб тақалгунимизча чекинаверамиз,— деди Прохор тоққа чиққанларидан кейин.

Пастда, кўкиш туман орасидан Татарск қишлоғи кўринарди. Бошдан-оёқ қор босган пушти ранг уфқда қўёш ботмоқда. Чана излари остида қор ғарчилларди. Отлар секин-аста йўл босишарди. Қўшотлик чананинг орқа томонида Григорий эгарларга суянганича ётарди. Унинг ёнида этакларига уча тутилган донча пўстинга ўралиб Аксинья ўтиради. Унинг қоп-қора кўзлари оппоқ тивит рўмол тагидан чақнаб турарди. Григорий кўз қирида унга қараб-қараб қўяр, аёзда лоладай қизарган бетларига, тим қора қуюқ қошларига. қирор қўнган қайрилма киприклари остида ялтираган кўкиштоб кўз соққаларига тикиларди. Аксинья астойдил қизиқиб атрофидаги қорга кўмилган даштни, қатналавериб шишадай ялтираб кетган йўлни, қоронфилаша бошлаган уфқни томоша қиласарди. Уйдан нари чиқиб ўрганмагани учун унга ҳамма нарса янгилик бўлиб, бошқача кўринар, унинг диққатини ўзига жалб этарди. Лекин аҳён-аҳёнда кўзларини ерга қаратиб, киприкларидаги қировнинг жизиллатиб қитиқлаганидан роҳатланарди-да, кўпдан бери хаёlinи асир этиб юрган орзуси, яъни Григорийга эргашиб, ўзи туғилиб ўсан ва лекин не-не жафоларни бошига солган шу лаънати ютидан, умрининг ярми севимсиз эр билан ит азобида ўтган шу қишлоқдан, унинг учун энг оғир ва энг мудҳиш хотиралар макони бўлган Татарскдан чиқиб кетиш орзуси қўққисдан рўёбга чиққанига суюниб жилмаярди. У бутун вужуди билан Григорийдан баҳр олар ва шунинг учун жилмаярди, лекин бу бахтга эришгунча қанчалик қон ютганини ҳозир ўйламасди, ҳаттоки келажагим нима бўлади, деб ғам емасди ҳам, келажаги эса кишини ўзига чорловчи уфқдай зулмат ичиди эди.

Прохор тасодифан бурилиб қаради-да, Аксиньянинг аёзда дўрдайган қип-қизил лабларида табассум ўйнаганини кўриб, ғаши келди:

— Мунча тиржаймасанг энди, келин пошаларга ўхшаб? Ўйингдан кетганингга суюняпсанми?— деб сўради.

— Тағинам суюнмайинми? — жавоб берди Аксинья қўнғироқдай овози билан.

— Топган севинчини қара... Сенда эс йўқ! Бу ёғи нима бўлиши маълуммас, ҳалитдан тишингнинг оқини кўрсатиб илжаяверма.

— Нима бўлса бўлаверсин, сира қўрқмайман.

— Икковингга қараб турсам, чунонам кўнглим айнайдики... — Прохор отларга аямай қамчи босди.

— Кўнглинг айниса, тескари ўгирилиб туриб, бармоғингни оғзингга суқ,— деди Аксинья кулиб.

— Эсинг йўқлигини яна бир карра тасдиқладинг! Мундан чиқди, денгизга етгунча бармоғимни оғзимдан олмас эканман-да? Ақлингга балли!

— Нега мунчалик кўнглинг айнайдиган бўп қолди, а?

— Сен гапирмасанг ҳам бўлади! Хўш, эринг қани? Бегона одамга эргашиб, аллақайси гўрларга кетяпсан! Степан шу топда қишлоққа кириб келса, хўш, у ёғи нима бўлади?

— Менга қара, Проша, яхвиси сен бизнинг ишга аралашмагин,— деб илтимос қилди Аксинья,— йўқса, сен ҳам баҳтеиз бўласан.

— Мен аралашяпканим йўқ, аралашиб зарил кептими менга? Фақат ўз фикримни айтмоқчиман холос! Ёки фақат кучерлик қилиб, от билан гаплашиб ўтирверади, деб ўйлайсизми? Топган гапингни қара-я! Йўқ, Аксинья, хафа бўлсанг ҳам ростини айтай: бир боғлам новда билан сени шундай савалаш керакки, даминг ичингга тушиб кетсан! Баҳт тўғрисида гапириб мени қўрқитмай қўя қол, баҳтимни ола кетяпман. Бу шундай бир ғалати баҳтки, на ётгани қўяди, на тургани... Чу, ҳаром ўлгурлар! Индамасанг имиллагани-имиллаган, чу, шалпангқулоқ лаънатилар!

Григорий кулиб қулоқ солиб турди-да, ниҳоят бости-бости қилиб:

— Ҳалитдан сўкинаверманглар ахир,— деди. — Йўл олис, сўкишиш бўлса қочмас. Бунга мунча тирғиласан, Прохор?

— Тилини тиймай, гап қайтараверса, тирғилганим-тирғилган,— деди Прохор хуноб бўлиб.— Мен ҳозир ўйлаб қарасам, оламда хотин кишидан баттари

йўқ экан! Хотин зоти бамисоли қичитқи ўтнинг уруғи... Мен сенга айтсам, биродар, худойим яратган махлуқлар ичидаги энг бедавоси хотин! Ихтиёр менда бўлса, бу зааркунанда алвастиларнинг биронтасини қолдирмай қирадим, токи ер юзини ифлос қиласин! Мен булардан шу қадар безор бўлганман! Нимасига куласан? Бироннинг устидан кулиш аҳмоқнинг иши! Тизгинни ушлаб тур, пастга тушаман.

Прохор анчагача пиёда юрди, ниҳоят чанага чиқиб олди-да, ортиқ оғиз очмади.

Каргинда тунадилар. Эрталаб нонушта қилганиндидан кейин яна жўнадилар ва кечгача олтмиш чақирим йўл босдилар.

Қочоқларнинг сон-саноқсиз аравалари тизилишиб, жануб томон кетар эди. Вешенская станицаси чегарасидан узоқлашган сари, тунаш учун жой топиш масаласи оғирлашмоқда эди. Морозов станицаси ёнида биринчи марта казакларнинг ҳарбий қисмлари кўрина бошлиди. Сафика ўттиз-қирқقا яқин одами қолган отлиқ қисмлар, кети кўринмайдиган обозлар олға силжишарди. Кечга яқин қишлоқлардаги ҳамма уй банд бўлиб, тунаш у ёқда турсин, ҳатто отларни қўйишига ҳам жой топилмасди. Тавричанлар яшаган участкалардан бирида Григорий тунаш учун жой ахтариб, ҳамма уйни бирма-бир айланиб кўрди-ю, жой топилмагандан кейин бостирма тагида тунашга мажбур бўлди. Қор бўронида ивиган кийимлари эрталаб-гача музлаб тарашадай қотиб, қайишиб қолганлигидан қимирлаган сари шалдирар эди. Деярли тун бўйи Григорий ҳам, Аксинья ҳам, Прохор ҳам ухламадилар, фақат тонг отар маҳалига яқин ҳовлининг орқа томонида похол ёқишиб, исиниб олдилар.

Эрталаб Аксинья қўрқа-писа:

— Гриша, бугун шу ерда қола қолмаймизми? Туни билан совуқда ухлай олмай чиқдик, бир оз дам олволсак қалай бўларкин? — деди.

Григорий рози бўлди. Бир амаллаб бўш жой топди. Обозлар эрта тонгдаёқ жўнаб кетишган, бироқ юздан ортиқ ярадорларни ҳамда терлама касали билан оғриган кишиларни ортиб келаётган кўчма лазарет ҳам бир кунга қишлоқда қолган эди.

Кичкинагина ифлос ҳужрада ўнтача казак қоқ ерда ётарди. Прохор бир қол озиқ-овқат билан шолча олиб кирди, эшикнинг ёнгинасига похол түшади, данг қотиб ухлаётган аллақандай бир чолни оёғидан судраб, нари сурди-да, мардонавор овозда меҳрибонлик қилиб:

— Ёта қол, Аксинья, сенга жудаям жавр бўлди, рангингда ранг қолмабди,— деди.

Кечга яқин қишлоқни яна одам босиб кетди. Оппоқ тонг отгунча тор кўчаларда гулхан гуриллади, одамларнинг вағир-вуғури, отларнинг кишнагани, чаналар қўшқарофининг ғирчиллагани эшитилиб турди. Тонг ёришай деганда Григорий Прохорни уйғотиб, қулогига шивирлади:

— Чанани қўш. Жўнаш керак.

— Нега мунча эрта?— деб сўради Прохор эснаб.

— Хўп дейвур.

Прохор эгар кўрпаҷадан бошини кўтарди-ю, бирданига олисларда отилган тўпнинг гулдураган овозини эшитиб қолди.

Учови ювинди, чўчқа мойидан тановул қилиб, йўлга тушишди. Участкага яна жон кирган эди. Тор кўчалар қатор-қатор чанага тўлган, ивирсиган одамлар кўринарди, фира-шира тонг қоронғисида аллаким хириллаб:

— Йўқ, кечирасиз, ўзларинг кўмаверинглар! Олти кишилик гўр қазигунимизча туш бўлади!— деб бақирди.

Иккинчи бирор:

— Биз нима, уларни кўмишга мажбурмизми?— деб сўради.

— Керак бўлса кўмарсиз!— деди, овози хириллаган киши.— Йистамасаларинг, майли, ётаберсин сабиб, менга барибири!

— Бу қандай гап, жаноби дохтир? Шатдан ўтганлар ўлавурса, ўлиги бизга қолса... ахир биз ўлик кўмамизми, иш қиласизми? Ўзингиз саранжом қила қолинг-да, а?

— Йўқол-эй, башаранг қурсин, исқиrtle! Мен нима, сенинг гапингга кириб, лазаретни қизилларга топширасам яхши бўладими?

Григорий кўчани тўсиб, тиқилиб ётган араваларни айланиб ўтаркан:

— Ўликлар ҳеч кимга керак бўлмай қолди...— деди.

— Шу топда тирик одамнинг қадри қолмади-ку, сен бўлса, ўликни гапирасан,— деди Прохор.

Доннинг шимолидаги жами станицалар жануб томон йўл олган эди. Қоюқларнинг сон-саноқсиз аравалари Царицин — Лихая орасидаги Темир йўлдан ошиб, Маничга яқинламоқча эди. Бир ҳафтадан бери йўл юрган Григорий татарскликларни кўргиси келиб сўроқларди, бироқ унинг йўли тушган қишлоқларда ҳамқишлоқлари учрамасди; ҳар ҳолда, уларнинг чапга бурилгани ва украинлар слободасига кирмасдан, казаклар яшаган қишлоқлар ичи билан тўғри Обливскаяяга кетган бўлишлари эҳтимолдан узоқ эмасди. Фақат ўн уч кун деганда Григорий ҳамқишлоқларидан дарак топди. Темир йўлга етиб аллақайси бир қишлоққа киргандан кейин у, тасодифан, шу яқиндаги уйда вешенскаялик бир казакнинг терлама билан оғриб ётганини эшишиб қолди. Григорий унинг қаердан эканини билмоқчи бўлиб борди; пастаккина бир уйга кирди-ю, полда ётган Обнизов чолни кўрди. Чол унга татарскликлар ўтган куни бу қишлоқдан жўнаганини, кўплари терлама касалига мубтало бўлганини, йўлда икки киши ўлганини, уни ўз ихтиёрига кўра шу ерда қолдириб кетишганини сўзлаб берди.

— Бир оз тузалсаму, қизил ўртоқлар менга раҳм қилиб ўлдирмасалар, бир амаллаб уйимга қайтарман, йўқса, ўлигим шу ерларда қолиб кетар. Ўлишга келгандан кейин барибир, ҳамма жой баравар...— деди чол Григорий билан хайрлашаётуб.

Григорий, дадасининг соғлигини сўраган эди, Обнизов, ҳеч нарса билмайман, чунки у энг орқадаги аравада эди, Малахов қишлоғидан чиққандан кейин Пантелеј Прокофьевични яна қайта кўрмадим, деб жавоб берди.

Эртаси тунағани тўхталганда Григорийнинг иши ўнгидан келди: жой сўрамоқчи бўлиб кирган биринчи уйдаёқ Юқори Чирлик таниш казакларни учратди. Улар сурилишиб, Григорийга пеъ ёнидан жой бе-

ришди. Бу хонада ўн бештача қочоқ ерда юмалашиб ётарди, шулардан учтаси терлама касалига йўлиққан, биттасини совук чалган эди. Қазаклар кечки овқат учун чўчқа ёғи солинган сўк бўтқа пишириб, Григорий ва унинг ҳамроҳларини дастурхонга таклиф этишди. Прохор билан Григорий, иштаҳа билан роса ейишли, лекин Аксинья овқатдан бош тортди.

Сўнгги кунлари Аксинъяга нисбатан муносабатни бутунлай ўзгартиб, бир оз қўйполроқ бўлса-да, қўлидан келганича меҳрибонлик кўрсата бошлаган Прохор:

— Қорнинг очмадими ахир? — деб сўради.

— Негадир, кўнглим айнийди холос... — деди-да, Аксинъя рўмолини елкасига ташлаб, ҳовлига чиқди.

— Бетоб эмасмикин? — деб сўради Прохор Григорийдан.

— Ким билсин.— Григорий тарелкани нари суриб, ҳовлига чиқди.

Аксинъя қўлини кўксига босиб, зина ёнида турарди. Григорий уни қучоқлади, хавотирланиб:

— Сенга нима бўлди, Қсюша? — деб сўради.

— Кўнглим айнийди, бошим оғрийди.

— Уйга кирайлик, бирпас ётишинг керак.

— Сен боравур, мен ҳозир кираман.

Аксинъянинг овози бўғиқ ва ожиз, ҳаракатлари суст эди. Печь ёқилган иссиқ уйга кирган заҳоти Григорий унга синчиклаб тикилди: икки бети чўғдай қизарганини, кўзлари бежо бўлиб йилтираганини пайқади. Бирданига юраги орқасига тортиб кетди: Аксинъянинг касал бўлгани равшан эди. Қеча ҳам баданим увшади, бошим айланади, деб нолигани Григорийнинг эсига тушди, эрталабга яқин қаттиқ терлаганини, бўйнига тушган жингалак соч толалари, бош ювандагидай, жиққа ҳўл бўлганини ҳам эслади; буни у тонг маҳалида уйғонганида кўрган ва ухлаб ётган Аксинъядан кўзини олмай, узоқ тикилиб қолган эди, лекин унинг уйқусини безовта қилмаслик учун қўзғалмай, тек ётаверган эди.

Аксинъя ўйлазобига мардларча чидарди, ҳаттоки, Прохор: «Бу уруш эмас, балойи азим, бу касофатни ким ўйлаб чиқарган экан? Аzonдан кечгача итдай

йўл юрсангу, кечаси тунарга жой тополмасанг, қачонгача санқиб юрамиз ахир» деб нолиганда унга далда бериб овутарди ҳам. Лекин бу сафар Аксинъя бардош беролмади. Кечаси ётганларидан кейин Григорийнинг қулоғига Аксинъянинг йифиси киргандай бўлди.

— Сенга нима қилди?— сўради у шивирлаб.— Қатинг оғрияпти?

— Мен касалман... Энди нима қиламиз? Мени ташлаб кетасанми?

— Ундаи дема, эси паст! Сени нега ташларканман? Йиғлама, балки, йўлда шамоллагандирсан, шунгаям қўрқиб кетдингми?

— Йўқ, Гришенька, терлама бу.

— Бекор айтибсан! Ҳеч гап йўқ! Пешонанг совуқ, терлама бўлмаса керак.— Григорий тилида тасалли берса ҳам дилида Аксинъянинг тепкили терлама касалига йўлиққанига шубҳаланмасди, агар касали зўрайиб ётиб қоладиган бўлса, уни нима қилиш кераклигини билмай, боши қотарди.

Аксинъя Григорийнинг пинжига кириб:

— Воҳ, бу аҳволда йўлда жудаям қийналамиз!— шивирлаб нолирди.— Тунаган уйларимизда лиқ-лиқ одам! Битлаб-қуртлаб кетамиз, Гриша! Мен бўлса, уст-бошимни қараб оладиган жой тополмайман, ҳамма ёқда эркак... Мен кеча оғилхонага кириб, уст-бошимни ечиб қарасам, кўйлагимни кўриб бўлмайди... Умримда бу фалокатни асло кўрган эмасдим, худоё тавба қилдим-эй! Эсимга тушса кўнглим айнииди, ҳеч нарса егим келмайди... Сен кеча, сўри устида ётган анови чолни кўрдингми? Чакмони устида ўрмалашиб юришибди-я.

— Бунаقا нарсани кўп ўйлайверма, боядан бери шуни гапирасан холос! Ҳа, бит бўлса бордир, аскарлик хизматида битни санаб ўтиришмайди,— деди шивирлаб Григорий жаҳл аралаш.

— Аъзойи баданим қичишяпти.

— Ҳаммаям шу аҳволда, илож нима? Чидагин. Екатеринодарга боргандан кейин ювиниб-тараниб оламиз.

— Уст-бошимни алмаштирганим билан барибир

фойдаси йўқ!— деди Аксинья хўрсиниб.— Бир бало-
ни бошлаб келмаса гўргайди, Гриша!

— Ухла, эрталаб барвақт жўнашимиз керак.

Григорий анча вақтгача ухлай олмади. Аксинья
ҳам ухламади. У пўстин этаги билан бошини буркаб,
бир неча марта ҳиқиллаб йиғлади, сўнгра анчагача у
ёнбошидан бу ёнбошига ағдарилаверди, ниҳоят Григо-
рий унга ўгирилиб қучоқлагандан кейингина, хўрсина-
хўрсина уйқуга кетди. Тун ярмида эшик қаттиқ тақил-
лади, Григорий уйғониб кетди.

— Тезроқ очинглар! Йўғасам эшикни синдирамиз!
Ҳаммаси данг қотибди, лаънатилар!

Уй эгаси — ёши қайтган ювошгина казак даҳлизга
чиқиб сўради:

— Ким? Сизга нима керак? Агар тунамоқчи бўл-
сангиз, жой йўқ, уй ичи одамга лиқ тўла, қимирлаб
бўлмайди.

— Оч деяпман сенга!— деб бақиришди ҳовлидан
туриб.

Эшикни ланг очиб, қурол-яроғлик бештacha казак
даҳлизга бостириб кирди.

Шулардан биттаси — аёзда совқотиб кўкариб кет-
ган казак гезарган лабларини аранг қимирлатиб:

— Ўйингда кимлар бор?— деб сўради.

— Қочоқлар ётибди. Ўзингиз ким бўласиз?

Жавоб бермасданоқ яна биттаси ҳужрага қадам
қўйди-да:

— Ҳой, ётганлар! Роса чўзилишибди-ку! Дарров
үйни бўшатинглар!— деб бақирди.— Бу ерга аскар-
лар жойлашади. Туринглар, туринглар ҳой! Тезроқ
қимирланглар, йўқса бирпасда ҳайдаб чиқарамиз!

— Сен ўзинг кимсан, мунча бақирасан?— деб сў-
ради Григорий хириллаб, у секин-аста ўрнидан турди.

— Кимлигимни ҳозир мен сенга кўрсатиб қўя-
ман!— Қазак Григорий томон бир қадам қўйди, қў-
лидаги наганнинг оғзи фира-шира чироқ ёруғида йил-
тиллаб кўринди.

— Ҳо, жудаям чаққон экансан-ку...— деди Григо-
рий тулкилик қилиб,— қани, ўйинчоғингни кўрай-
чи!— Бир ҳамла билан казакнинг билагидан ушлаб
олди-да, кучи борича қаттиқ қисган эди, казак «вой»

деб панжаларини очиб юборди. Наган «тап» этиб шолча устига тушди. Григорий казакни итариб юборди ва чақонлик билан энгалиб, наганни олди, чўнтағига солди-да, хотиржамлик билан: — Мана энди гаплашамиз,— деди.— Қайси қисмдансан? Сендақа шоввозлардан бу ерда қанча бор?

Ҳанг-манг бўлиб қолган казак энди ўзига келиб:
— Йигитлар! Бу ёқقا!— деб бақирди.

Григорий остона ёнига бориб, кесакига суянганича эшикни тўсиб олди:

— Мен, ўн тўққизинчи Дон полкининг юзбоши-си бўламан. Жим! Бақирма! Ким у акиллаётган? Бу нимаси, ҳурматли ҳамқишлоқлар? Кимни уйдан ҳайдаб чиқармоқчисиз? Ким сизларга бунақа ҳуқуқ берди? Қани, туёқларингни шиқиллатинглар!

Қазаклардан бири овозини баланд қилиб:

— Мунча дўқ қиласан?— деди.— Сендақа юзбошини кўп кўрганмиз! Биз нима, ҳовлида ётамиزمи? Уйни бўшатинглар! Бизда шундай буйруқ бор: ҳамма қочоқларни уйлардан ҳайдаб чиқарилсин дейилган, тушундингми? Индамаса, жудаям ҳаддидан ошиб кетяпти! Мунақаларни кўп кўрганмиз!

Григорий гапираётган одамга бетма-бет бўлди-да, тишини тишига қўйиб туриб:

— Лекин мендақасини ҳали кўрганинг йўқ,— деди.— Бир аҳмоқни иккита қиладиганни кўрганмисан? Мен бунга жуда устаман! Қетингга тисарилаверма кўп! Бу менинг наганим эмас, командирларингникини тортиб олдим. Ма, ўзига бериб қўй, ўзинг ҳам калтак емасдан тезроқ қорангни ўчир, йўқса соқол-мўйловингни битталаб юлиб оламан!— Григорий астагина казакни кетига бурди-да, елкасидан итариб, эшикка тўғрилаб қўйди.

— Миясига соп қолайми шу?— сўради тия жундан тўқилган бошлиқ кийган забардаст казак. У Григорийнинг орқасидан унга қаттиқ тикилиб турар, депсиниб, чарм қопланган каттакон пиймасини ғарчилатарди.

Григорий кетига бурилиб унга юзма-юз бўлди, ортиқ ўзини тутолмасдан муштларини маҳкам қисди, бироқ казак қўл кўтариб, унга дўстона насиҳат қилди:

— Менга қара, жаноби олий, ёки бошқача мурожаат қилиш керакми, билмадим: сен менга мушт күттарма! Биз ҳозир кетамиз, жанжалга жудаям тобимиз йўқ. Лекин сен замонага қараб иш қил, казакларга жудаям ўшқираверма. Ўн еттинчи йилдаги аҳвол яна бошланай деб турибди. Биронта аламзадага рӯпара бўлсанг, у сени икки эмас, беш бўлак қилиб қўяди! Кўриб турибмиз, довюрак офицер экансан, гапларингга қарасам, бегонамас, ўзимиздан чиқсанга ўхшайсан; маслаҳат шуки, шу кунларда ўзингга ниҳоятда эҳтиёт бўл, йўқса балога қоласан...

Григорий наганини тортиб олган одам унга жаҳл билан:

— Қўй уни, сатқайи насиҳатинг кетсин! Юринглар нариги уйга борамиз,— деди-да, дастлаб ўзи эшик томон юрди. Григорийнинг олдидан ўтаётib унга хўмрайиб гап ташлади:— Жанжалга тобимиз йўқ, жаноби офицер, йўқса яхшилаб адабингни берардик.

Григорий нафратланиб лабларини қийшайтириди:

— Шу аҳволинг билан адабимни бермоқчимидинг ҳали? Жўна, иштонингни ечиб олмасимдан жўнаб қол! Сендақа адаб берадиганни қара-ю! Аттанг, наганингни бекор қайтиб берибман, сендақа абжирга наган эмас, жунтароқ муносиб!

— Кетдик, йигитлар, айтишганнинг фойдаси йўқ! Тегмасанг у ҳам сасимайди!— деди гапга аралашмай қараб турган бир казак мулојимлик билан.

Казаклар музлаган этикларини тўқиллатиб, сўкина-сўкина даҳлизга чиқишиди. Григорий уй эгасига жаҳл билан:

— Эшикни оча кўрма! Тақиллатиб-тақиллатиб кетишади, жуда бўлмаса, мени уйғот, — деб тайинлади.

Шовқиндан уйғониб кетган юқоричирликлар ўзаро шивирлашиб гаплашарди.

— Интизом деган нарса қолмади!— деди чоллардан биттаси афсусланиб.— Офицерга гап қайтаришади-я, итваччалар... Илгариги вақтда биласанми, бунинг учун нима қилишарди? Тўғри сивирга ҳайдашарди.

— Гап қайтарганини айтасан! Муштлашишга хез-

ланганини кўрдингми? «Миясига солворайми!»— дейди, бошлиқ кийган ҳалиги новчаси. Бу ҳаромилар жудаям бевош бўп кетищди!

— Шунчалик гапдан кейин уларга индамай кетаврасанми, Григорий Пантелеевич?— деб сўради казлардан бири.

Устига шинель ёпиниб, чолларнинг гапини бегараз кулимсираб тинглаётган Григорий:

— Улар билан гаплашиб барака топиб бўлармид!— деди.— Улар ҳозир ҳамма нарсадан кечган, ҳеч кимга итоат этишмайди; молдай тўдалашиб, командирсиз санғиб юришибди, на суддан қўрқишиди, на бошлиқдан. Қайси бири зўр бўлса, ўша бошлиқ. Уларнинг қисмida биронта офицер ҳам қолмаган бўлса керак. Бундай сотняларни кўп кўрганман, чўпонсиз қолган қўйдан баттар! Қани, ухлайлик энди.

Аксинья шивирлаб:

— Улар билан нега айтишдинг ахир, Гриша? Худо хайрингни берсиин, зинҳор уларга дўқ қила кўрма! Бундай безорилар сени ўлдиришдан ҳам тоймайди,— деди.

— Ухла, эртага барвақт турамиз, ухла. Аҳволинг қалай? Бир оз енгил тортай дедингми?

— Боягисидай.

— Бошинг оғрияптими?

— Оғрияпти. Тузалмайдиганга ўхшаб қолдим...

Григорий Аксинъянинг пешонасига кафтини қўйиб кўриб хўрсинди:

— Худди қизиган печкадай, иссифинг баланд. Ҳеч нима қилмайди, қўрқма! Бақувват хотинсан, тузалиб кетасан.

Аксинья индамади. У ҳадеб чанқайверарди. Дамбадам ошхонага чиқиб, илиб қолган bemaza сувдан иchar, сўнгра кўнгли айниб, боши айланиб турса ҳам ўзини бардам тутиб, яна жойига бориб ётарди.

Туни билан яна тўрт мäрta эшик тақиллади. Қўноқ жой ахтариб келган одамлар милтиқ қўндоғи билан эшикни уришар, дераза қопқоғини очиб ойнани ноғора қилишарди, фақат уй эгаси Григорийнинг буйруғига мувофиқ даҳлиздан туриб: «Йўқол бу ердан! Бу уйда бригада штаби жойлашган!»— деб бақириб сўка бошлагандан кейингина кетишарди.

Тонг маҳалида Прохор билан Григорий стларни чанага қўшишди. Аксинья зўрғатдан кийиниб, ҳовлига чиқди. Қуёш энди кўринган эди. Мўрилардан кўкимтири турун чиқиб, кўм-кўк осмонга кўтарилимоқда эди. Остки томонига қуёш шуъласи тушган бир парча булут ҳақиқдай қизариб кўринарди. Четан деворларга, томлар устига қалин қирор тушган эди. Отлардан буғ кўтарилаарди.

Григорий ёрдамлашиб Аксиньяни чанага ўтқазди.

— Ёнбошлаб ёта қоласанми? Сенга қулайроқ бўларди.

Аксинья рози бўлиб бош қимирлатди. Григорий меҳрибонлик билан унинг оёқларини ўраётганда, миннатдор бўлиб, индамай унга бир қаради-ю, астагина кўзини юмди.

Туш пайти отларни хашаклатиш учун, йўлдан икки чақиримча четроқдаги Ново-Михайлово посёлкасида тўхтаганларида, Аксинья чанадан ўзи туша олмади. Григорий уни суюб, уйга олиб кирди-да, меҳмондўст уй бекаси кўрсатган каравотга ётқизди.

— Оғирлашдингми, жонгинам?— деб сўради у, ранги оқариб кетган Аксиньяга энгашиб.

Аксинья зўрғатдан кўзини очди, хиралашган кўзларини сузиб бир қаради-ю, яна бўшашиб кетди. Григорий қалтироқ қўллари билан унинг бошидан рўмолини олди. Аксиньянинг бетлари муздай, лекин пешонаси ўтдай ёнарди, икки чаккасидан оққан тер сумалак сингари яхлаб қолган эди. Кечга яқин Аксинья ҳушидан кетди. Шундан олдин пицирлаб сув сўради:

— Лекин жуда совуқ, қор суви бўлсин,— деди-да, бир дам жимиб тургач:— Гришани чақиринглар!— деди.

— Мен ёнингдаман. Нима дейсан, Ксюша?— Григорий унинг қўлини ушлади, қўли қовушмаса ҳам тортичоқлик билан силай бошлади.

— Мени ташлаб кетма, Гришенька!

— Хеч ташламайман. Нега ташларканман энди?

— Ёт элларда қолиб кетмайин... Мен шу ерда ўламан.

Прохор сув келтириб тутди. Аксинья қақраган лаблари ила мис кружкага ёпишиб, бир неча қултум ютди-да, қаттиқ инграб, бошини ёстиққа ташлади. Беш минутдан кейин у алаҳлаб, бир нималар деб чулдирай бошлади. Унинг бош томонида ўтирган Григорий бир неча сўзларни: «Кир ювиш керак... синъка топиб кел... барвақт...»—деганини ажрата олди. Пойма-пой гапириб туриб, шивирлашга ўтди. Прохор Григорийдан ўпкалаб, бош чайқарди:

— Сенга айтувдим-ку, уни олиб юрмайлик, деб! Хўш, энди нима қиласиз? Буям бўлса пешонамиз-нинг шўри, ҳақ гап шу! Шу ерда тунаймизми? Нега индамайсан, қулоғинг кар бўлиб қолдими? Шу ерда тунаймизми ё жўнаймизми, деб сўраяпман сендан?

Григорий чурқ этмади. У Аксинъянинг докадай оқарган юзидан кўзини олмай, букчайганича жим ўтиради. Ўй бекаси — очиқ чеҳрали раҳмидил аёл кўзи билан имо қилиб Прохорга Аксинъяни кўрсатди-да:

— Хотиними? Болалари борми?— деб сўради.

— Болалари бор, ҳамма нарсаси бор, фақат омади йўқ холос,— деб пўнғиллади Прохор.

Григорий ҳовлига чиқиб, чана устида анчагача тамаки чекиб ўтириди. Аксинъяни шу посёлкада қолдириш керак эди, яна йўлга чиқадиган бўлса, тирик қолиши даргумон. Григорий буни аниқ биларди. У ўйга кириб, яна каравот ёнига ўтириди.

— Тунаймизми шу ерда?— деб сўради Прохор.

— Ҳа. Балки, эртагаям жўнай олмасмиз.

Сал вақтдан кейин бўйи пакана, олазарак, айёр башара, нимжон мужик — уй эгаси кириб келди. Ёғоч оёғини дўқиллата-дўқиллата (бир оёғи тиззадан йўқ эди), тез-тез стол ёнига борди, ечинди, хўмрайиб Прохорга қаради.

— Худойим бизга меҳмон юборганми дейман? Қаердансиз?— деб сўради, лекин жавобини кутмасдан, хотинига:— Егани бирор нарса келтир дарров, итдай оч қолдим!— деди.

У овқатни устма-уст оғзига тиқар, ҳали-бери тўядиганга ўхшамасди. Унинг олазарак кўзлари дам Прохорга, дам қимирламай ётган Аксинъяга тикилар-

ди. Григорий меҳмонхонадан чиқиб, хўжайинга салом берди, лекин у индамай бош қимирлатиб қўя қолди.

— Чекиняпсизми? — деб сўради у.

— Чекиняпмиз.

— Урушиб бўпмиз-да, жаноби олий?

— Бу ким, хотинингзими? — хўжайин Аксинья томонга имо қилди.

— Хотиним.

У хотинидан норози бўлиб:

— Нега сен уни каравотга ётқиздинг? Ўзимиз қарерда ётамиз? — деб сўради.

— Қасал экан, Вания, ачиндим.

— Ачиндим? Барibir ҳаммасига ачинолмайсан, бунақаларнинг сон-саноги йўқ! Бизни мушкул аҳволга солиб қўйдингиз, жаноби олий...

Умрида бирорвага ялинмаган Григорий қўлини кўксига босиб, ожизона овоз билан уй эгасига ялиниб-ёлвора бошлали:

— Жон биродар! Исо ҳурмати, сўрайман, кунимга сиз ярамасангиз, ҳолим хароб! Буни олиб юришнинг иложи йўқ, йўлда ўлиб қолади, сизнида қолдиришга рухсат этинг. Хизматингиз учун оғзингиздан чиққанини берай, умр бўйи бу яхшилигингизни унутмайман... Менга шафқат қилиб, хўп дей қолинг!

Хўжайин олдин, қасалга қарааш учун қўли тегмаслигини, тор жойда ортиқча даҳмаза бўлишини айтиб, сира унамади, лекин овқатини еб бўлгандан кейин шундай деди:

— Албатта, текинга ҳеч ким уни боқмайди, бу турган гап. Қараганимиз учун, масалан, қанча бермоқчисиз? Хизмат ҳақимиз учун неча пул бера оласиз?

Григорий чўнтағида бўлган бэр пулини олиб, хўжайнинг узатди. Бир пачка Дон пулини у бўшашиб олди-да, бармоғини ҳўллаб санаб чиқди.

— Николай пулларидан йўқми сизда? — деб сўради.

— Йўқ.

— Эҳтимол, керенскадан бордир? Бу пулга сира ишониб бўлмайди...

— Керенска ҳам йўқ. Истасангиз, отимни қолдиришим мумкин?

Хўжайин анчагача ўйланиб турди-да, ниҳоят хомушлик билан:

— Йўқ,— деди.— Отингизни, албатта, олардим, деҳқончилик ишида отга нима етсин, бироқ ҳозирги замонага сира тўғри келмайди: ё оқлар тортиб олади уни, ё қизиллар, барибир нафи тегмайди. Ўзимда битта чўлоқ бия бор, шунданам айрилмасайдим, деб жоним ҳалак.— У жим бўлиб ўйланиб турди-да, ўзини оқламоқчи бўлгандай яна гапга тушди:— Сиз тағин, бу одам жудаям очкўз экан, деб ўйламанг, худо сақласин! Лекин ўзингиз ўйлаб кўринг, жаноби олий, хотинингиз менинида бир ой, балки кўпроқ ётади, ҳали у керак бўлади, бу керак бўлади, ҳаммаданам овқат масаласини айтинг: нон, сут, тухум, гўшт дегандай, булар ҳаммаси пулга келади ахир, гапим тўғрими? Үндан ташқари, кирини ювиш, ўзини чўмилтириш ва шунинг сингари аллақанча ишлар бор... Шу вақтгача хотиним рўзгордан бўшамасди, энди унинг ёнидан бир қарич силжимайдиган бўлади. Бу осон иш эмас! Сиз жудаям зиқналиқ қиласверманг, яна пича қўшинг. Мени кўриб турибсиз, инвалидман, бир оёғим йўқ, ишга ярамайман, менинг топганим нима бўларди? Худойим етказганини еб, нои билан квасга қаноат қилиб кунимиз ўтяпти...

Григорийнинг қони қайнаб, жаҳали чиқа бошлади.

— Мен зиқналиқ қиласвермангиз, барака топқур! Бор пулимни сенга бердим, мен пулсиз ҳам кун кўра оламан. Яна нима истайсан мендан?

— Бори шугина эмасдир! — хўжайин ишонмаган одамдай кулиб қўйди.— Оладиган маошингизга қараганда, сизда ҳозир бир халта пул бўлиши керак.

— Сен менга очишини айт,— Григорийнинг ранги оқариб кетди,— беморни уйингда олиб қолишга розимисан ё йўқ?

— Йўқ, сизки пулни юзига борадиган бўлсангиз, биз уни олиб қололмаймиз, бизга нафи йўқ.— Хўжайнинг ранжигани овозидан аниқ сезилиб турарди.— Бу ахир, ҳазилакам гапмас... Минг қилгандаям, офицернинг хотини, қўшниларимиз эшитади, сизлар

кетгандан кейин ўртоқлар келиб, мени судра-судра қилиши мумкин... Йўқ, ундай бўлса, беморингизни ола кетинг, балки, қўшнилардан бирортаси олиб қолишга рози бўлар.— У ичдан ачина-ачина, пулни Григорийга қайтиб берди-да, халтасини олиб тамаки ўрай бошлади.

Григорий шинелини кийиб, Прохорга:

— Сен Аксинья ёнидан қимирлама, мен чиқиб уй ахтараман,— деб тайинлади.

У энди эшик тутқичига қўл узатганида хўжайин уни тўхтатди.

— Сабр қилинг, жаноби олий, мунча шошасиз, ахир? Сиз нима, бемор хотинга ачинмайди, юраги тош экан деб ўйладингизми мени? Жудаям ачинаман, ўзим ҳам солдат бўлиб хизмат этганман, офицерлик ном ва даражангизни ҳурмат этаман. Хўш, ҳалиги пулга яна бирор нарса қўшиб беролмайсизми?

Бу гапдан кейин Прохор чидаб туролмади. Фазаби қўзиганидан қизариб кетиб, бақириб юборди:

— Нима қўшиб беради сенга, яна нима истайсан, чўлоқ ит! Бу оёғингни ҳам уриб синдириш керак, шуни истаяпканга ўхшайсан! Григорий Пантелеевич, буни менга қўйиб бер, итнинг боласидай қилиб калтаклайн, иннайкейин, Аксиньяни чанага соламизу кетаверамиз, минг лаънат бундай ҳаннотга!

Хўжайин Прохорнинг энтикиб айтган гапларини охиригача чурқ этмай тинглади, ниҳоят шундай деди:

— Бекорга мени хафа қиласиз, йигитлар! Ҳамжи-ҳатлик билан иш битказган яхши, сўкишиб, сан-манга бориб ўтиришнинг сира ҳожати йўқ. Хўш, менга мунча дўқ қиласан, казак бола? Мен нима, пул тўғрисида гапирдимми? Мён, бир нима қўшинглар, деганимда, пулни хаёлимгаям келтирганим йўқ. Мен бошқа нарсани айтувдим: биронта ортиқча қуролларинг, масалан, милтиқми ё тўппончаларинг йўқми, демоқчи эдим... Сиз учун бунақа нарсанинг аҳамияти йўқ-ку, лекин биз учун, айниқса ҳозирги вақтла, жудаям асқатади-да... Уйда албатта қурол бўлиши шарт! Мен гапни шу ёқقا бураётган эдим! Ҳали берган пулингизни беринг, устига битта милтиқ қўшасизу барака топ қиласиз, bemorингизни шу ерда қол-

дирасиз, биз уни ўз боламиздай парвариш қиласиз,
гап шу, мана крест!

Григорий Прохорга қаради, бўшашган овозда:

— Менинг милтифимни патронлари билан унга
бергину чиқиб чанани қўшгин,— деди.— Майли, Ак-
синья қолсин... Худо қози, йўлда қийналиб ўлишини
истамаганим учун ташлаб кетишга мажбурман!

XXVII

Бир-бирига ўхшаган ҳузур-ҳаловатсиз, бефайз
кунлар имиллаб ўтаверди. Аксинъядан ажрагандан
бери Григорий ҳеч нарсага қизиқмайдиган бўлиб қол-
ди. У эрталаб чанага ўтирап, қорга кўмилган бепоён
даштлардан ўтар, кечқурун бирон жой топиб тунага-
ни тушарди-ю, ётиб ухларди. Ҳар куни аҳвол шу эди.
Жанубга қараб сурилаётган фронтда нима бўлгани,
нима қўйгани билан мутлақо қизиқмасди. Жиддий ва
чинакам қаршилик кўрсатиш вақти ўтганини, казак-
ларда ўз станицаларини мудофаа қилиш истаги қол-
маганини Григорий тушунарди; ҳар томонлама чама-
лаб кўриб, оқ армиянинг сафари қариб қолгани, Дон-
да бардош бериб тўхтамагандан кейин Кубанда мут-
лақо тўхтаб қола олмаслигига ақли етарди...

Урушнинг охири кўриниб қолган эди. Масала яшин
тезлигига узил-кесил ҳал бўлган эди. Минг-минглаб
кубанлик казаклар фронтни ташлаб, уйларига жўнай
бошладилар. Донликлар енгилди. Жангларда қи-
рилиб, терламадан ўлиб, тўртдан бир одами қолган
Қўнгилли армия, ғалабалардан руҳланган Қизил
Армия жангчиларининг сиқувига бардош бера ол-
масди.

Қочоқлар орасида, генерал Деникин Кубань ке-
нгаш аъзоларини ваҳшийларча ўлдиргани учун Кубань
да норозилик, ғалаён кучайибди, деган овоза тарқал-
ган эди. Одамлар, Кубанда Қўнгилли армияга қарши
қўзғолон тайёрланяпти, совет аскарлари учун Кав-
казга йўл очиб бериш тўғрисида Қизил Армия вакил-
лари билан музокара олиб борилаётганмиш, деб га-
пиришарди. Айниқса, Кубань ва Терек станицалари-
нинг аҳолиси донликларга ва шунингдек қўнгиллилар-

га ёмон кўз билан қарашармиш, гўёки Кореновская ёнида Дон дивизияси билан кубанлик пиёда аскарлар ўртасида биринчи марта катта жанг бўлганмиш, деган гап одамлар оғзидан тушмасди.

Григорий тўхтаган жойларида бу гапларни зўр эътибор билан тингларди. У оқларнинг енгилиши муқаррарлигига кундан-кун аниқ ишона бошлади. Шундай бўлса ҳам у баъзан хом хаёлга берилиб: хавфнинг зўрлиги тўзиб кетган ва бир-бирлари билан ит-мушук бўлган оқларнинг интизомсиз кучларини бирлашишга, ғолибона ҳужум қилиб келаётган қизилларни тўхтатиб, улоқтириб ташлашга мажбур этса керак, деб умидвор бўларди. Бироқ Ростов шаҳри қўлдан кетгандан кейин умиди узилди, у энди: Батайск ёнида қаттиқ жанглардан сўнг қизиллар чекина бошлади, деган гапга ҳам ишонмай қўйди. Бекорчиликдан нима қилишини билмай, бирор ҳарбий қисмга қўшилгиси келиб, Прохор билан маслаҳатлашган эди, бу таклифни у қатъий рад этди.

— Сен ўзинг бира тўла ақлдан озганга ўхшайсан Григорий Пантелеевич! — деди зардаси қайнаб Прокор.— Кўра била туриб, ўзимизни оловга ташлашнинг нима ҳожати бор? Ўзинг кўриб турибсанки, масала ҳал бўлди, бекорга ўзимизни қурбон қиласмизни, ахир? Икковимиз қўшилсақ, уларнинг мушикули осон бўлади, деб ўйлайсанми? Ҳозирчалик-ку, бизга бирор индагани йўқ, мажбур қилиб сафга оляпкани ҳам йўқ, демак, вақт ғаниматда мумкин қадар тезроқ бу балодан бошимизни олиб қочишимиз керак, сен бўлса, жудаям ғалати гап қиласан! Йўқ, Пантелеевич, чоллар қатори секин-аста чекинаверганимиз маъқул. Сенминам мен шу беш йил ичидаги уруша-уруша, роса чарчаганмиз, энди бошқалар ҳам урушшиб кўрсин! Урушдан қутулармиканман, деб ўзимга-ўзим юқтириб олдиму, энди яна фронтнинг дийдорини кўрайми? Балли-е! Бу уруш шундай жонимга текканки, ҳозир ҳам эсимга тушса, кўнглим айнаб, қусгим келади. Ҳоҳласанг, ўзинг бор, мен истамайман. Сен кетадиган бўлсанг, мен госпиталга бораман, ҳаммаси жонимга тегди.

Григорий анчагача индамай қолди, ниҳоят:

— Майли, сенингча бўлсин. Кубанга борайлик-чи, у ёғини яна кўраверамиз,— деди.

Прохор ўз дарди билан овора эди: ҳар бир катта қишлоқ ё посёлкага етган заҳоти у фельдшер қидириб кетар, ҳар хил дори олиб келарди, бироқ даволаниш учун унчалик жон куйдирмасди; Григорий нега биттагина порошокни ичиб, бошқасини қорга кўмиб, босиб ташлаяпганини суриштиrsa, бутунлай тузалишга тоби йўқлиги учун шундай қилганини айтиб: «Фақат оғриғи қолса бас, мабодо медицина комиссияси қайта кўрадиган бўлса, фронтга боришдан осонгина қутуламан» дерди. Великокняжеская станицасида кўпни кўрган бир казак, ўрдакнинг оёғини қайнатиб, сувини ичишни маслаҳат берди. Ўша кундан эътиборан Прохор бирон қишлоқ ёки станицага борган заҳоти дастлаб учраган одамдан: «Азизим, менга айтиш-чи, буерда ўрдак топиладими?» — деб сўрапди. Агарда у одам бу саволдан таажжубланиб, яқин орада сув йўқлиги сабабли ўрдак ҳам йўқ, уни боқишидан наф ҳам йўқлигини айтса, Прохор қаттиқ нафратланиб: «Молдай ўсиб кетаверибсиз-да! Лоақал ўрдакнинг ғафиллашиниям эшитмаган бўлсангиз кепрак! Вой тўнкалар-эй!» — деб масхара қиларди. Сўнгра Григорийга ҳасрат қила бошларди: «Йўлимизни поп кесиб ўтган, албатта! Йўқса бирон марта омад келмасми! Қани энди, буларда ўрдак бўлса-ю, айтганини бериб, биттасини сотиб олсан ё ўғирласам, касалим тезроқ тузалармиди! Кундан-кунга зўрайиб кетяпти бу дардисар! Олдин назар-писанд қилмасдим, фақат йўлда мудрагани қўймай, безор қиларди холос, ҳозир эса, бошга битган бало бўлди! Чанада ўтиrol-маяпман!»

Прохор Григорийнинг ачинмаганини кўриб индамай қолар, баъзан қовоғини осилтириб олганича соатлаб «миқ» этмай ўтираверарди.

Эрталабдан кечгача йўл юриб зериккан Григорийнинг назарида кунлар ниҳоятда узайганга, тунларнинг узунлигидан сира тонг отмайдиганга ўхшаб кўринарди. Ўтган ҳаётини эслаш ва ҳозирги турмуши устида бош қотириш учун йўлда бемалол вақти етарди. У ўтган умрини, ҳузур-ҳаловатсиз ўтган серташ-

виш ҳаётини бирма-бир кўз олдига келтириб, узоқ ўйланиб қоларди. Чанада, тиқ этса эшитиладиган сукунат ичидаги қор босиб ётган даштга хирадашган кўзларини тикиб ўтирганда ё эса ҳавоси бузилган тиқилинч бирор ҳужрада кўзларини юмиб, тишини тишига қўйиб ётган кечалари, ҳаёли доим бир нарсада бўлар: бетоб ва беҳуш ҳолича номаълум бир қишлоқда ётган Аксиня билан Татарскда қолган оиласини ўйларди, холос... у ёқда, Донда Совет ҳокимияти ўрнатилган эди, лекин Григорий ваҳимага тушиб дамбадам ўзига-ўзи: «Наҳотки менинг касримга онамни ё Дуняшкани қийнашса?» деб савол берар, лекин ўша заҳотиёқ қизил аскарлар ҳеч кимга тегяпканий ўқ, эгаллаган станицалардаги аҳолига яхши муомала қилишяпти, деб йўлда одамлардан эшигтан гаплар эсига тушиб, ўзига тасалли берарди. Бора-бора ҳавотирланмай қўйди, мен учун онамни жавобгар қилишмасайди, деган ваҳимали фикр энди унинг учун бутунлай асоссиз ва қуруқ ҳаёлдан иборат бўлиб туюларди. Болалари эсига тушганда Григорийнинг юраги орқасига тортиб кетарди; у болаларининг терлама касали билан оғриб қолишидан қўрқарди, лекин қанчалик қўрқмасин, болаларини қанчалик яхши кўрмасин, Натальянинг вафотидан кейин энг оғир мусибат ҳам унга ўшанчалик таъсир эта олмаслигини ичидаги билар эди...

Сальск даштидаги қишловлардан бирида Проктор билан иккиси, отларга дам бермоқчи бўлишиб тўрт кун туришди. Шу тўрт кун ичидаги иккиси, энди нима қилиш керак, деб тоза бош қотиришди. Қишловга келганларининг биринчи куниёқ Проктор:

— Бизникилар Кубанда фронтни ушлаб қолармикин ё Қавказга чекинишармикин? Нима деб ўйлайсан?— деб сўради.

— Билмадим. Сенга барибир эмасми?

— Гапингни қара-ю! Нима учун менга барибир бўлсин? Бу аҳволда бизни мусулмон мамлакатигами, турклар томонигами ҳайдаб чиқаришлари мумкин, ана иннайкейин, ўша ёқда додимизни худога айтиб юраверамизми?

— Мен Деникин эмасман, буни мендан сўрама, қаергача қувиб борадилар, буни билмайман,— деди Григорий гап ёқтирмай.

— Сўраганимнинг сабаби бор; Кубань дарёси бўйида яна мудофаага ўтилади, кўкламда бош оғган томонга кетилади, деган миш-миш гап юрибди...

— Ким экан у мудофаага ўтадиган?— деб кулди Григорий.

— Казаклар билан кадетлар, бошқа ким бўларди?

— Қачон сенга ақл киради, а? Атрофингда нима бўлаётганини кўрасанми ўзинг? Ахир, ҳамма тезроқ қочиб олишнинг пайида-ю, ким мудофаа қиласди?

— Эй, биродар, ишимиз расво эканини ўзим ҳам кўриб турибману, лекин барибир ишонгим келмайди.— Прохор уҳ тортди.— Борди-ю, масалан, тўпти тор келиб, ёт элларга қочиб ўтишга тўғри келса, сен нима қиласан? Бораверасанми?

— Сен-чи?

— Сен қайга борсанг, мен ҳам ўшоққа. Ҳамма кетаверса, мен қолиб нима қиласман.

— Мен ҳам шу фикрдаман. Модомики қўйдек қочдикми, такаларга эргашиб бораверишимиз керак энди...

— Такаларинг ҳам баъзан эсини йўқотиб, боши берк кўчага кириб қолишади... Сен бунаقا масалаларни кўй! Менга тўғрисини айт: бу ёфи нима бўлади?

— Қўйсанг-чи, энди! Ўшанда кўрамиз. Ҳалитдан бош қотиришимизнинг ҳеч кераги йўқ!

— Хўп бўлмасам, омин! Сенга бошқа савол бермайман,— деб гапга кўна қолди Прохор.

Эртаси куни отларни қарашга чиққанларида у яна шу гапни очди. Гўёки, паншаха дастасини кўраётган одамдай, ўзини билмасликка олиб секингина сўради:

— Яшиллар тўғрисида ҳеч нима эшитганмисан?

— Эшитганман. Ҳўш, нима демоқчисан?

— Яшил деган нимаси? Улар ким томонда?

— Қизиллар томонида.

— Нега бўлмаса, яшил деб ном қўйишади?

— Ким билади дейсан, ўрмонда биқиниб юргани учун уларга шундай ном беришган бўлса керак.

Прохор узоқ ўйланиб қолиб:

— Биз ҳам яшил бўла қолсакмикин, а?— деб сўради.

— Бунисига тобим йўқроқ.

— Яшиллардан бошқаси йўқмики, тезроқ уйга етиб олишнинг иложини қиласидиган? Менинг учун яшилми, қўкми, ёинки сап-сариқми, барибир, ишқилиб, урушга қарши чиқса-ю, ҳаммани уй-уйига юборса бўлгани, жон деб, ўша бўёқчининг хумига тушардим...

— Сабр қил, балки ўшанақаси ҳам топилиб қолар,— деди Григорий.

Январь ойининг охирида ҳаво илиб, туман тушган куни Григорий билан Прохор Белая Глина слободасига келишди. Слободага ўн беш мингга яқин қочоқ тиқилиб қолган ва уларнинг teng ярми терлама касали билан ётар эди. Инглизча калта шинель, нимча пустин, камзул кийган казаклар кўчама-кўча изғиб уйқидиришар, отлиқ аскарлар ва аравалар ўтиб туради. Чўпдай озиб кетган ўнларча отлар ҳовлидаги охурлар ёнида бошларини қўйи солғанларича киртиллатиб похол чайнашарди; кўча-ю, тор кўчалар ташлаб кетилган чаналарга, араваларга, ўқ яшикларга тўлган. Бир кўчадан ўтаётганларида, Прохор четан деворга боғлаб қўйилган бўйдор тўриқ отга тикилиб туриб:

— Ие, бу ахир Андрюшка бўламнинг оти-ку! Демак, ҳамқишлоқларимиз шу ерда экан,— деди-ю, лип этиб отдан тушиб, хабар олгани уйга кирди.

Бир неча минутдан кейин, шинелини елкасига ташлаган ҳолда Прохорнинг бўласи ҳам қўшниси Андрей Топольсков чиқди. У Прохордан олдинроқ юриб чана ёнига келди-да, отнинг тер ҳиди уриб қолган кирқўлини Григорийга чўзиб кўришди.

— Ҳамқишлоқларимиз билан бирга келяпсанми?— деб сўради Григорий.

— Ҳа, бошга тушганини бирга кўряпмиз.

— Қийналмай келдиларингми?

— Йўл азоби ўзингга маълум... Тунаган жойларимизда одамлар ва отлар қолиб кетмоқда...

— Бизнинг қария соғ-саломатми?

Топольсков Григорийдан кўзини обқочиб уҳ тортди:

— Чатоқ, Григорий Пантелеевич, иш чатоқ... Отандан айрилдинг, кеча кечқурун жон таслим қилди, вафот этди даданг...

Григорийнинг ранги қув ўчиб:

— Кўмдингларми?— деб сўради.

— Билолмадим, бугун у ерга борганим йўқ. Қани юр, ўша уйни кўрсатиб қўяй... Үнга бур, бўла, ўнг қўлдаги муюлишдан тўртинчи уй.

Тунука томли каттакон иморат ёнига етганда Прокор девор ёнида отларни тўхтатди, бироқ Топольсков ҳовлига киришни маслаҳат берди.

— Бу ер ҳам тор, йигирматача одам бор-ку, лекин бир амаллаб сифишиасиз,— деди-да, дарвозани очгани чанадан сакраб тушди.

Печь ёқилган иссиқ уйга энг аввал Григорий кирди. Ерда аралаш-қуралаш бўлиб ётган ва ўтирган ҳам-қишлоқларини кўрди. Баъзилари оёқ кийими ва от абзалларини ямашар, учтаси (шулас орасида Пантелеїй Прокофьевич билан бирга жўнаган Бесхлебнов чол ҳам бор эди), стол ёнида атала ичиб ўтиради. Казаклар Григорийни кўриб, ўринларидан турдилар ва саломга чувиллашиб жавоб бердилар.

Григорий уй ичини кўздан кечириб, папогини оларкан:

— Дадам қани?— деб сўради.

Бесхлебов астагина қилиб:

— Шўrimиз қуриди... Пантелеїй Прокофьевич вафот этди,— деди-да, чакмон енги билан оғзини артди, қошиқни столга қўйиб чўқинди.—Кеча кечаси оламдан ўтди, худо раҳмат қилсан.

— Эшитдим. Кўмдингларми?

— Йўқ ҳали. Биз уни шу бугун кўммоқ ҳаракатидамиз, ҳозир манови хонада ётибди, совуқ жойга чиқариб қўйибмиз. Кириб кўр.— Бесхлебнов ёнбошлигидан эшигини очиб, узр сўрагандай қилиб ганирди:— Казаклар ўлик билан бир уйда тунагани унамади, ҳиди бор дейишиди, бу ер қайтага яхши... Печь ёқилмас экан.

Кенггина хонадан наша уруғи билан сичқон ҳиди келарди. Бурчагига тариқ ва наша уруғи босиб ташланган эди; скамейка устида ун ва ёғ солингган бочка-

чалар турарди. Уйнинг ўртасида, шолча устида Пантелей Прокофьевич ётарди. Григорий Бесхлебновни нари суриб, дадасининг ўлиги ёнига борди.

— Икки ҳафта касал ётди,— деди Бесхлебнов овони секин қилиб.— Мечетка ёнидаёқ терлама юқиб, бошини кўтаролмай қолди. Дадангнинг тупроғи шу ёқларда экан... Умр шуда...

Григорий энгашиб дадасига тикилди. Касал унинг афтини ўзгартириб, бутунлай ёт кишига ўхшатиб қўйган эди. Пантелей Прокофьевичнинг докадай оқарган, чўзилиб қолган юзини тикандай қаттиқ, оппоқ соқол босиб кетган, мўйлов эса ўпирилган ўрага ўхшаш оғзига шалпайиб тушганди, кўзлари чала юмуқ, кўкимтири соққаларининг қадимги жилоси, йилтирашидан асар қолмаган эди. Чолнинг остки жағи осилиб қолганлиги учун қизил рўмолча билан танғиб қўйилганди, шунинг учун оппоқ жингалак соқоли худди кумушга ўхшаб, оқариб кўринарди.

Григорий дадасини сўнгги марта яхшилаб кўрмоқчи ва қадрдон сиймони абадий эсда сақлаб қолмоқчи бўлиб, тиз чўкди-ю, бирданига чўчиб, беихтиёр жирканиб кетди: Пантелей Прокофьевичнинг мумдай қотиб қолган қонсиз юзини, кўз чуқурчаларини, ажинлар орасини бит босиб кетганди. Битлар чумоли сингари юзида ўрмалашар, соқоллари ва қошлари орасида фивирлашар, кўк чакмонининг қатирма ёқасида ғуж-ғуж бўлиб қайнашарди...

* * *

Григорий билан яна икки казак музлаган, метидай қаттиқ соғ тупроқ ерни чўкич билан ўйиб гўр қазишиди, Прохор лахтак тахталардан бир амаллаб тобут ясади. Кун қайтган маҳалда Пантелей Прокофьевични ети ёт Ставрополь тупроғига дафн қилдилар. Орадан бир соат ўтиб, слободада чироқлар ёқилгандан кейин Григорий Белая Глинадан чиқиб, Новопокровская томон жўнади.

Кореновская станицасида унинг тоби қочди. Прохор тушгача доктор ахтариб сарсон бўлди, ниҳоят алландай бир ширақайф ҳарбий врачни топди-да, зўр-

Ғатдан уни кўндириб, тушган уйларига бошлаб келди. Врач шинелини ечмасданоқ Григорийни қараб чиқди, томирини кўрди ва шубҳаланмасдан:

— Қайтарма терлама бўпсиз,— деди.— Жаноби юзбоши, сафарни тўхтатинг, маслаҳат шу, акс ҳолда, йўлда ўлиб қоласиз.

— Қизилларни кутиб ётаверайми?— деб истеҳзо аралаш кулди Григорий лабини қийшайтириб.

— Йўқ, қизиллар ҳали жуда олисда-ку?

— Олисда бўлса яқин келиб қолади...

— Буни мен ҳам тушунаман. Лекин сиз учун бу ерда қолиш яхши. Менга қолса, иккала хатарли йўлдан шунисини танлаб олардим, чунки, бунисида хавф камроқ.

— Йўқ, мен таваккал қилиб кетавераман,— деди Григорий қатъий қилиб, сўнгра гимнастёркасини кия бошлади.— Менга дори берасизми?

— Майли, билганингизни қилинг. Менинг вазифам сизга маслаҳат бериш, маслаҳатимга юрасизми, йўқми ихтиёр ўзингизда. Дори масаласига келсак, энг яхши дори — тинч ётиш, ўз-ўзингизни парвариш қилиш; сизга баъзи бир дорилардан ёзид берардиму, бироқ аптека кўчиб кетди, ўзимда хлороформ, йод ва спиртдан бўлак ҳеч нарса йўқ.

— Бўлмаса, спирт бера қолинг!

— Жоним билан. Сиз барибир йўлда ўласиз, спирт асраб қололмайди. Майли, деншигингиз мен билан борсин, минг граммча спирт бериб юбораман, мен саҳий одамман...— Врач честь берди-да, бежо қадам ташлаб чиқиб кетди.

Прохор спирт олиб келди, аллақайдан икки от қўшиладиган эски арава топиб, отларни қўшди, сўнгра уйга кириб, пичинг аралаш:

— Жаноби олийлари, файтон тайёр!— деди.

Шундай қилиб, яна ҳузур-ҳаловатсиз оғир кунлар бошланди.

Жанубдаги тоғлар этагида уйғонган баҳор кундан-кунга Кубанга яқинлашмоқда эди. Текис жойдаги даштларнинг қори ёппасига эрий бошлади. Қори кетган жойларнинг семиз қора тупроғи йилтираб кўринар, қор суви жилға-жилға бўлиб, тўрғайдай чулдираб

оқарди, из тушиб, йўллар очилган эди, умуман баҳор шарофатидан олисдаги мовий уфқлар парпиарди, Кубанинг бепоён кўм-кўк осмони эса, янада кенгайиб, шаффофтусга кирган, ҳаво ҳам илий бошлагани сезилиб турарди.

Икки кундан кейин кузги буғдой ҳам қордан озод бўлиб, қуёш юзини кўрди, ердан кўтарилиган буғ оппоқ туманга ўхшаб, экинзорлар устида сайр эта бошлади. Отлар қори эриган йўлда чилпиллатиб қадам ташлашар, тизза бўйи лой кечишар, терлаб-пишиб, бошларини эгиб чиранишарди. Прохор ишнинг кўзини билганидан уларнинг думини тугиб қўйганди; у дамбадам аравадан тушиб, ёнида борар ва оёқларини аранг лойдан тортиб пўнфилларди.

— Бу лой эмас, ўлай агар, сақичнинг ўзгинаси! Отларга ёпишса уч кунгача қуrimайди.

Григорий индамас, бадани увишиб пўстинга ўраларди-ю, аравада тек ётаверарди. Бироқ Прохор ҳам-суҳбат йўқлиги учун жуда зерикарди; Григорийнинг оёғидан ё енгидан тортиб:

— Бу ерларнинг лойи жудаям қуюқ экан! Тушиб кўргин! Қасаллик жонингга тегмадими ахир! — дерди.

— Бор-е, арвоҳ ургур! — деб шивирларди Григорий эшитилар-эшитилмас қилиб.

Йўлда учраган одамдан Прохор сўрарди:

— У ёғи бундан ҳам лойми ё шунақами?

Унга кула-кула ҳазил аралаш жавоб қайтаришарди, ўшанда Прохор тирик одамни кўриб гаплашганига суюна-суюна, анчагача индамай борарди; дамбадам отларни тўхтатиб, ўзининг маржондай терлаб-пишиб кетган пешонасини артарди. Отлиқ одамлар улардан ўзиб ўтишар, лекин Прохор аламига чидай олмай, уларни тўхтатиб салом берар, уларнинг асли қаердан ва қаерга бораётганини суриштирас ва гап охирида шундай дерди:

— Бекорга овора бўласиз. Сира юриб бўлмайди. Нега дейсизми? У ёғи жудаям ботқоқ эмиш, — йўлда учраган одамлар айтди, — отлар қорнигача ботади, арава филдираклари айланмайди, дейишади, ҳаммадан ҳам пиёдага қийинмиш: бўйи пакана бўлса, йўлда йиқилиб, лойга ботиб қолаверармиш. Ёлғон айтсан

тил тортмай ўлай! Бизни сўрайсанми? Чекинмасликка иложимиз йўқ, мен бетоб архирейни обкетяпман, у қизиллар билан бир жойда туролмайди...

Отилиқларнинг кўпиччиғланмай Прохорни койиб кетаверар, лекин баъзилари жўнаш олдидан Прохорга синчиклаб тикилишарди-да:

— Дондаги аҳмоқлар ҳам чекиндими? Станицангда ҳаммаям сенга ўхшаганми?— деб сўрашарди.

Шунга ўхшаш ва ундан ҳам аччиқ-тирсиқ гаплар билан Прохорни майна қилишарди. Фақат ўз ҳамроҳларидан ажраб қолган бир кубанлик, Прохор гапга тутиб, йўлдан қўйгани учун ростакам жаҳли чиқиб, пешонасига қамчи билан солмоқчи бўлган эди, лекин Прохор чаққонлик қилиб, бир сакрашдаёқ аравага чиқди-да, шолча тагидан карабинини олиб, тиззасига қўйди. Кубанлик сўка-сўка жўнаб қолди. Прохор овози борича хоҳолаб, кетидан бақирди:

— Бу ер сенга Царицин эмас, сен бекинадиган маккажӯхорипоялар йўқ! Тўнкага ўхшаб ўтиришини қара! Хой, аталаҳўр, кетингга қайт! Дўқ қилиб бўлдингми? Этагингни йиғиштириб ол, йўқса лойга ботасан! Кекирдагини чўзади-я, товуқ ўғриси! Вой, хотинчалиш-э! Битта текин ўқ бўлганда, дўқ қилиш қанақалигини сенга кўрсатиб қўярдим! Қамчингни ташла, эшидингми, хумпар?

Диққинафаслик ва бекорчиликдан бачканалашган Прохор, ўзини овунтириб вақт ўтказарди.

Григорий бўлса, касал теккан кундан бери ўзини тушдагидай сезар, гоҳ ҳушидан кетиб, гоҳ яна ўзига келарди. Бир куни узоқ беҳуш ётиб, ахийри кўзини очган эди, Прохор энгашиб, хиралашган кўзларига тикилди:

— Тирикмисан?— деб сўради.

Уларнинг тепасида офтоб чақнарди. Кўм-кўк осмонда бир гала қора қанот ўрдаклар гоҳ тўпланиб, гоҳ эгри-буғри узун қора чизиқ ҳосил қилиб, ғағиллашганича учиб юришарди. Илиган тупроқ билан майса ўтларнинг ҳиди кишини маст қиласарди. Григорий ўпкасини тўлатиб тез-тез нафас олар, ҳаётбахш баҳор ҳидини ичига ютарди. Прохорнинг овози қулоғига аранг эшитилар, атрофдаги тамоми нарса ноаниқ ва

өлисдан кўрингандай, жуда кичкина бўлиб кўринарди.' Орқа томонда отилаётган тўпларнинг овози узоқдан жира эшитиларди. Сал нарироқдан, филдирагига темир қоплаган араваларнинг бир меёрда шалдирагани, отларнинг пишқириб кишинагани, одамларнинг ғовурғувури қулоққа чалинарди: янги ёпилган нон ҳиди, пичан иси, отларнинг тер иси димоққа келиб уриларди. Буларнинг ҳаммаси Григорийни гангитиб қўйған, у ўзини бошқа бир оламда юргандай ҳис этарди. У бутун диққатини тўплаб, Прохорнинг овозига астойдил қулоқ солгандан кейин нима дёяётганини аранг тушунди, Прохор:

— Сут ичасанми?— деб сўраётган эди.

Григорий зўрға тилини қимирлатиб, қақраган лабларини ялади-да, мазаси таниш, қуюқина ва муздаккина нарса оғзига қуйилаётганини сезди. Бир неча қултум ютгандан кейин оғзини юмиб олди. Прохор фляганинг тиқинини тиқиб, яна устига энгашди; лекин Григорий Прохорнинг овозини эшилмаса ҳам, шамолда қовжирган лабларининг қимирлашидан:

— Ёки сени станицада қолдирайми? Қийналяпсанми, а?— деб сўраганини фаҳмлади.

Григорийнинг жони қийналиб, ваҳима ичидаганлиги юзидан билиниб турарди. У яна бир карра бутун иродасини тўплади-да:

— Жоним чиққунич... олиб юравур....— деб шивирлади.

Прохорнинг юзига тикилиб, унинг тушунганига қаноат ҳосил қилди, эси оға бошлаганини сезиб, қий-чувлар билан тўлган бу серғалва оламни унутиб ҳушдан кетаётгани учун кўнгли тинчиб, секингина кўзини юмди...

XXVIII

Абинская станицасига етгунларича йўлда нима бўлганини Григорий билмади, фақат суяк-суякларигача совуқ ўтгандан кейин қоп-қоронғи тунда кўзини очгани эсида қолган эди. Аравалар уч-тўрт қатор бўлвониб кетаётган эди. Ғовур-ғувур овозларга, филдиракларнинг тинмай шалдирашига қараганда, обоз

ниҳоятда катта бўлса керак. Григорий тушган арава обознинг ўртароғида эди. Отлар секин-аста юриб боради. Прохор лабларини чапиллатар, аҳён-аҳёнда шамоллаб хириллаб қолган овоз билан: «Но-о-о, жониворлар!»— деб, қамчи ўхталарди. Григорий қайиш қамчининг визиллашини эшитар, отлар қаттиқ юлқиниб торта бошлаганини, арава тезроқ қимирлаганини, от ёғочининг учи баъзан олдинги арзуванинг кетига тақ этиб тегиб кетганини bemalol се зарди.

Григорий зўрғатдан пўстин этагини устига тортиб ёпди-ю, чалқанчасига ётиб олди. Қоп-қора осмондаги паға-паға қора булутларни шамол жанубга ҳайдарди. Аҳён-аҳёнда булутлар ораси қитдай очилганда яккаю ягона юлдуз лип этиб кўринарди-ю, бир лаҳза сарғиши нурини сочарди, сўнгра даشتни яна зим-зиё қоронфилик босар, телеграф симларида шамол ҳуштак чалар, марвариддай майда-майда ёмғир точилари шамол аралаш сепалай бошларди.

Йўлнинг ўнг томонидан суворийлар ўта бошлади. Григорий, қадимдан қулоғи ўрганганд, казаклар аслаҳа-анжомининг бир таҳлит, бир меёрда шиқирлашини ҳамда сон-саноқсиз от туёқларининг бараварига лой чалпиллатиб кетаётганини эшитди. Чамасида икки сотняга яқин аскар ўтиб бўлса-да, отларнинг дўпир-дўпир ҳамон давом этарди; ҳар ҳолда, ўйл бўйидан ўтаётган бу қўшин бир полкдан кам эмасди. Бирданнига жимжит дашт узра йўғон овозли яккахон ашулачининг мардонавор қўшиғи жаранглаб кетди:

Қамишенка сойи бўйида
Саратовнинг бийдек чўлида...

Унга неча юзларча овозлар қўшилиб, қадимий казаклар қўшигини баравар кўтаришди, тенорнинг чиройли ва кучли товуши ҳамманикидан ҳам ошиб авжига чиқди. Басларнинг пасайиб кетган овози устидаги тенорнинг юракдан олуви қўнғироқдай товуши жаранглади, шу пайт яккахон яна олди:

Дон ва Ёйиқ, гребенликлар,
Эркинликда яшар эдилар...

Григорий, гүё юрагининг бир томири узилгандай бўшашиб кетди... Ўпкаси тўлиб, тўсатдан келган йифидан аъзойи бадани қалт-қалт қилиб, томоғига бир нима тиқилгандай нафаси бўғилиб қолди... У кўз ёшларини ютиб, яккахоннинг яна бошланишини кутар, унга эргашиб, ўспиринлик чоғида ўзи айтиб юрган шу қўшиқнинг сўзларини пичирлаб такрорларди:

Ермак ботир — Тимофеј ўғли
Казакларга шиговул эди.
Лаврентьевич ўғли Асташка
Шоввозларга ясовул эди.

Қўшиқ бошланиши билан араваларда гаплашиб ке-лаётган казаклар дарров жим бўлишди, чу-чулаган овозлар ҳам ўчи; мингларча арава-ю от товуш чи-қармасдан ажойиб сукунат ичидаги қимирларди, фақат яккахон, қўшиқнинг бошланғич сўзларини дона-дона қилиб айтаётган пайтлардагина, арава фидирларининг тиқирлагани, от туёқларининг лойда чалпиллагани сал-пал эшитиларди. Қоронги даштда асрлар си-новидан ўтган ёлғиз бир кўхна ашула ҳукмон эди. Бу қўшиқнинг оддий сўзлари бир вақтлар подшо аскарларини тутдай тўккан эркин казакларнинг довю-рак ота-боболари ҳақида ҳикоя қиласди; қароқчилик қилиб, елкаңли енгил қайиқларга тушиб, казакларнинг Дондан Волгага боргани, подшога қарашли бургут тамғали кемаларни талагани, савдогарларни, бояр ва лашкарбошиларни қўлга туширгани, Сибирни забт этганини тараннум этарди... Мана ҳозир эса, ўша эр-кин казакларнинг неваралари рус ҳалқига қарши аҳ-моқона урушда даб-дала бўлгандан кейин шарманда-ларча чекинаётуб, бу қудратли қўшиқни маъюслик билан чурқ этмай тинглашарди...

Полк ўтиб бўлди. Қўшиқ айтганлар аравалардан ўзиб, жуда олислаб кетишиди. Лекин ҳамма маҳлиё бўлганлигидан обоз ажойиб сукунат ичидаги олға сил-жир, биронта аравадан ё чу деган, ё гаплашган товуш чиқмасди. Фақат жуда олислар, қоронфилик ичидан эркин қўшиқ садоси кўтарилиб, суви тошган Дон дарё-сидай теварак-атрофга ёйиларди.

Тўпланишиб кенгаш қурдилар:
Ез ўтмоқда; қиши қиличини
Яланғочлаб босиб келмоқда.
Биродарлар, қайда қишлиймиз?
Ейнқ — жуда узоқ бу ердан,
Волга томон борсак, ўғри деб,
Айтадилар. Қозон борсакми?
Унда ёвуз подшо Иван
Васильевич Грозний тураг...

Бора-бора ашулачилар товуши эшитилмай қолди.
Лекин тенорнинг овози ҳали ҳам қўнғироқдай жаранглар, гоҳ пасайиб, гоҳ яна авжига чиқарди. Одамлар ҳали ҳам миқ этмасдан ғамгинлик билан унга қулоқ солишарди.

... Яна бир нарсани Григорий тушдагидай эс-эс биларди: аллақандай бир қоронғи уйда ўзига келди-ю. Лекин кўзини очмасданоқ, бутун вужуди билан янги солинган озода тўшакда ётганини сезди, аллақандай тахир дориларнинг ҳиди димоғига келиб урилди. Дабдурустдан у, лазаретда ётган бўлсам керак, деб ўйлади, бироқ ёнбошдаги хонадан эркакларнинг қийқириб хохолашгани, идиш-товоқ тарақлагани ҳамда ширакайф овозлар эшитилди. Аллакимнинг таниш овози ғўнғиллаб эшитиларди:

— ... Ақлингга балли! Бизнинг қисмимизни сўроғлаб топиш лозим эди, дарров ёрдам берардик. Қани, ич, мунча лаб-лунжинг осилиб кетди?!

Маст-аласт Прохор йиғламсираб, жавоб берарди:

— Худоё тавба-эй, мен қаёқдан билай? Менга осоч бўлди деб ўйлайсизми? Унга қарайман деб жонимда жон қолмади-ку! Мен уни, чақалоқдай парвариш қилиб, нон чайнаб бердим, сут ичирдим, Исо ҳурмати, рост! Нонни чайнаб-чайнаб, оғзига соламан, худо урсин! Тишларини қилич билан йириб очаман, денг. Бир куни оғзига сут қуяётсам, нафаси қайтиб ўлаёзди...
Ҳазилакам гапми!

— Уни кеча чўмилтирдингми?

— Чўмилтирдим ҳам, машинка билан соchlарини ҳам олдим, бор пулимни сутга харжладим ҳам... Ахир мен пулимга ачинаяпканим йўқ, кетса, гўрга! Ле-

кин овқатни чайнаб, қўл билан оғзига солиб едир-ганларим-чи? Сен буни осон деб ўйлайсанми? Бу тўғрида оғзиңгни очмай қўя қол, йўқса амалингга қарамай, солвэрман ҳозир!

Григорийнинг олдига Прохор, Харлампий Ермаков ҳамда шерози папоги энсасигача суриб қўйилган, лавлагидай қизариб кетган Петр Богатиров, Платон Рябчиков ва яна нотаниш икки казак киришиди.

— Кўзиня очяпти!!! — Ермаков суюнганидан бақириб юборди-да, гандираклаб Григорий томон югурди.

Ҳазилкаш Платон Рябчиков қулочларини ёйиб, қўлидаги шишани ўйнатиб, йифи аралаш бўкирарди:

— Гриша! Жонажон дўстим! Чирдаги кайф-сафоларимизни бир эслагин! Жангда жонбозлик қилганларимиз-чи? Ўша шуҳратимиз қани? Генераллар бизни расво қилди-ку? Армиямизни қандай аҳволга келтиришди?! Ҳаммасининг падарига лаънат, модаригаям! Тирикмисан? Ма, ич, дарров ўзингга келасан! Ўзиям асл спирт!

Ермаков севинчидан шира босган қоп-қора кўзларини йилтиратиб:

— Сени зўрга топдик! — деди-да, Григорий ётган каравотга ўтирди, — каравот унинг оғирлигидан чўкиб кетди.

Григорий кўзларини алантлатиб, таниш казакларни бир бошдан қараб чиқди-да:

— Қаердамиз? — деб сўради эшитилар-эшитилмас овоз билан.

— Екатеринодарни олдик! Яқинда ундан ҳам нари кетамиз! Ич, Григорий Пантелейевич! Сени ҳаммамиз яхши кўрамиз! Худо ҳақи, ўрнингдан тур, бу ётишингга тоқат қилолмайман! — Рябчиков Григорийнинг оёғига ўзини ташлади, бироқ индамай кулиб қараб турган, ҳаммага қараганда ҳушёрроқ бўлган Богатиров камаридан ушлаб уни осонгина кўтарди-ю, секингина турғизиб қўйди.

Ермаковнинг капалаги учиб:

— Қўлидан шишани ол! Тўкилади! — деб бақирдида, мастиликдан тиржайиб, оғзи қулоғига етиб, Григорийга деди: — Биласанми, биզ нега ичяпмиз? Сабаби

хунобгарчилик, тўсатдан текини топилиб, казакларга жон кирди... Қизилларга ўлжа бўлмасин деб, вино складини таладик... Бирам кўп экан-э-э-эй... Тушингдаям бунчасини кўрмайсан! Цистернага қаратা ўқ ота-вердик; ўқ тешган жойдан, найчадан оққандай, спирт қуйилади дегин. Цистернани илма-тешик қилиб юбордик, ҳар тешикнинг ёнида бир казак: бирор шапкасини, бирор сувдонини, бирор челагини тутиб туради, баъзилар ҳовучини тутиб, ўша ердаёқ симираверди... Склад қўриқлаган соқчилардан иккитасини чопиб ташладик, хуллас жудаям ғалати томоша бўлди-да! Кўз олдимда бир йигитча цистернага чиқди, от суғорадиган пақирни осонгина ботириб олмоқчи бўлди-ю, бироқ ичига тушиб кетиб, чўкиб ўлди. Складнинг поли цемент экан, оққан спирт бирпаста тиззага чиқди; одамлар спиртни кечиб юраверишди, дарёдан суз ичаётган отлар сингари энгашиб, оёқ остидаги спиртни ичвониб, ўша ердаёқ ағнайвериши... Ҳам кулгинг келади, ҳам йиғлагинг! Аллақанчасининг қулоғи остида қолади ҳали. Шундай қилиб, биз ҳам маза қилдик. Бизга унчалик кўпи керакмас, беш челак келадиган бочкани тўлғазиб олдик, шунисиям етади. Айшингни суреб қол, оғайнилар! Тинч Донни ё кўрамиз, ё йўқ! Сал бўлса Платон чўкиб ўлаёзувди. Одамлар уни ерга йиқитиб, устидан босиб ўтаверди, бечора бир-икки марта ютинди-ю, тайёр бўлди-қолди. Мен уни ўша ердан аранг судраб чиқдим...

Ҳаммасидан спирт, пиёз, тамаки ҳиди келарди. Григорий бир оз кўнгли айниганини, боши айланганини сезди-да, зўрма-зўраки жилмайди-ю, кўзини юмди.

У бир ҳафтача Екатеринодарда, Богатиревга таниш врачнинг уйида ётиб, секин-аста тузала бошлади, сўнгра Прохорнинг таъбирича, «одам бўлай деб қолди», ниҳоят чекиниш бошлангандан бери биринчи марта Абинская станицасида отга минди.

* * *

Новороссийскда эвакуация бошланган эди. Россиянинг пулдор бойлари, помешчиклари, муътабар сиёсий арбобларнинг ҳамда генералларнинг оиласи паро-

ходларга тушиб, Туркияга қочмоқда эди. Пристанларда кечаю кундуз баравар юк ортишарди. Юнкерлар ҳоммоллар қатори юк ташиб, пароход трюмларига ҳарбий анжомларни, жаноби қочоқларнинг чамадон ва сандиқларини ортишарди.

Кўнгилли армия қисмлари донликлардан ва кубанликлардан олдинроқ Новороссийскка етиб олиб, транспорт кемаларига туша бошлиди. Кўнгилли армия штаби ишнинг кўзини билиб, портда турган «Ҳиндистон императори» номли инглиз дредноутига чиқиб олди. Тоннельная ёнида жанг қизиган эди. Ўн мингларча қочоқ шаҳар кўчаларини босиб кетганди. Шаҳарга кириб келаётган ҳарбий қисмларнинг кети узилмасди. Пристанлар тирбанд, ит эгасини танимасди. Эгасиз қолган минг-минг отлар Новороссийск атрофидаги оҳак тоғларида санғиб юришарди. Пристанга туташган кўчалар казакча эгар-жабдуқ, қурол-яроғ ва ҳарбий анжомларга лиқ тўлган эди. Ҳозир бу нарсалар ҳеч кимга керак эмасди. Шаҳарда, фақат Кўнгилли армиягина пароходга тушади, донликлар билан кубанликлар эса, поход тартибида Грузияга бораверади, деган овоза тарқалган эди.

25 март куни эрталаб Григорий билан Платон Рябчиков, Иккинчи Дон корпусининг пароходга тушиш-тушмаслигини билиш учун пристанга боришиди, чунки шундан бир кун олдин казаклар орасида гўё Деникин, қурол-яроғи ва оти бўлган ҳамма донликларни Қrimга олиб ўтиш тўғрисида буйруқ берибди, деган гап тарқалган эди.

Пристани бошдан-оёқ Сальск округининг қалмоқлари босиб кетди. Улар Манич ва Салдан уюр-уюр йилқи ва тяяларини ҳайдаб, ўтовларини ҳам қолдирмай, денгиз бўйига довур ортиб келган эдилар. Григорий билан Рябчиков қўй ёғининг сучук исини ҳидлай-ҳидлай, ғуж-ғуж қалмоқлар орасидан ўтиб, тўғри лангарда турган каттакон юк пароходининг зинапояси ёнига келиб тўхташиди. Зинани Марков дивизиясининг офицерлари қаттиқ қўриқлашарди. Улар ёнида, пароходга чиқиш навбатини кутиб, донлик тўпчилар турарди. Пароходнинг уч томонида устига кўк брезент ёпилган замбараклар кўринарди. Григорий одам-

ларни турта-турта, ахийри бир амаллаб, мардона қиёфали қора мўйлов вахмистрнинг олдига борди:

— Бу қайси батарея, ҳамқишлоқ? — деб сўради.

Вахмистр Григорийга хўмрайиб, истар-истамас жавоб берди:

— Ўттиз олтинчи.

— Қаргинникими?

— Шундай.

— Бу ерда ишбоши ким?

— Ҳув ана, панжара ёнида турибди, аллақандай бир полковник.— Рябчиков Григорийнинг енгидан силтаб, фазаб билан:

— Қани кетдик бу ердан, арвоҳ урсин буларни! — деди.— Булардан маслаҳат чиқармиди? Биз уларга урушда керак бўлувдик, ҳозир уларга керагимиз йўқ...

Вахмистр илжайди, чиқишига ҳозирланиб саф бўлган тўпчиларга кўз қисиб қўйди:

— Бахтингиз бор экан, тўпчилар! Жаноби офицерларният пароходга олишмаяпти.

Пароходга одам ва юк ортилишини кузатиб турган полковник зинапоядан чақонлик билан тушиб келарди; қиммат баҳо пўстин кийган, барлари очиқ тепакал бир амалдор унинг кетидан қоқилиб-суқилиб югуради. Бу одам котик шапкасини кўксига босиб, алланималар дерди, унинг терлаган юзида, шапқўр кўзларида шу қадар ялинчоқлик бор эдики, полковник азбаройи нафратланганидан ундан юз ўгириб бақирди:

— Мен сизга бир карра айтдим-ку! Кўп хиравлик қилаславерманг, акс ҳолда сизни тушириб юборишга буйруқ бераман! Сиз эсингизни еб қопсиз! Ашқол-дашқолингизни қаерга жойлаймиз? Кўзингиз кўрми? Нима бўляпканини кўрмаяпсизми, ахир? Э, сатқайи одам кетинг! Ҳа, билганингизни қилинг, менга деса генерал Деникинга бориб арз қилинг! Йўқ, дедимми — йўқ, русча гапга тушунасизми?!

Полковник бу шилқим амалдорни койиб, Григорийнинг ёнидан ўтаётгандা, Григорий унинг йўлини тўсиб, қўлини козирёғига қилиб честь берди-да, ҳөвлиқиб:

- Офицерлар ҳам пароходга тушишидан умид қиласа бўладими? — деб сўради.
- Бу пароходга — йўқ Жой йўқ.
- Хўш, қайси пароходда жой бор?
- Эвакопунктга бориб билинг.
- Биз у ерга бордик, ҳеч ким ҳеч нарса билмайди.
- Мен ҳам билмайман, қани, йўл беринг!
- Ахир сиз ўттиз олтинчи батареяни ортапсиз-ку! Нима учун бизга мумкин эмас!
- Менга йўл беринг деялман! Мен справка буюроси эмасман! — Полковник Григорийни секингина нари сурмоқчи бўлди, бироқ у жойидан қўзғалмади, Григорийнинг кўкиш кўзларида ўт чақнаб кетди.
- Энди биз сизга керак бўлмай қолдикми? Илгари керак эдик, а? Қўлингизни олинг, барибир мени жилдиролмайсиз!
- Полковник Григорийнинг кўзига бир тикилди-да, атрофига қаради; зинапояда турган марковлик соқчилар милтиқларини чалиштириб, бостириб келаётган оломонни аранг тўсиб туришарди. Полковник Григорийдан кўзини опқочиб, ҳорғин овоз билан сўради:
- Қайси қисмдансаниз?
- Мен ўн тўққизинчи Дон корпусиданман, бошқалар ҳар хил полклардан.
- Ҳаммангиз неча кишисиниз?
- Ўнтачамиз.
- Иложини қилолмайман. Жой йўқ.
- Григорий эштилар-эштилмас қилиб:
- Сен нега лўттибозлик қиласан, абллаҳ? Текинхўр! Ҳозир бизга рухсат бер, йўқса... — деди, унинг бурун катаклари чимирилганини Рябчиков кўриб турган эди.
- «Ҳозир Гриша уни икки нимта қилади!» деб ўйлади. Рябчиков аламзада завқ билан, Марков дивнзиясининг икки соқчи офицери милтиқ қўндоқлари ила йўл очиб, оломон орасини ёриб, полковникка ёрдам бериш учун шошилиб келаётганини кўриб қолди-дэ, Григорийнинг енгидан тортди:
- У билан элакишма, Пантелеевич! Кетдик....
- Ранги оқариб кетган полковник:

— Сиз аҳмоқ экансиз! Бу қилиғингиз учун ҳали жавобгарликка тортиласиз! — деди-да, етиб келган соқчиларга Григорийни кўрсатди: — Жаноблар! Мано-ви қутурган одамни тинчтинглар! Бу ерда тартиб ўрнатиш ҳам керак, ахир! Мен комендант олдига зарур бир иш билан боришим лозим эди, бўлмағур одамлардан бўлмағур гаплар эшишиб вақтим ўтяпти... — деди-да, шоша-пиша Григорийнинг олдидан лип этиб жўнаб қолди.

Кўк суртиюгига поручиклик погони таққан, инглизча калта мўйлов қўйган бўйдор соқчи Григорийнинг олдига жуда яқин келди:

— Нега тартибни бузасиз? Сизга нима керак?

— Пароходдан жой керак, менга кераклиги шуги на холос!

— Қисмингиз қаерда?

— Билмайман.

— Ҳужжатингиз?

Лаблари қалин, пенсне таққан ёшгина иккинчи соқчи раста бўлган овози билан:

— Буни қоровулхонага юбориш керак! Ҳужжатини кўраман деб овора бўлманг, Висоцкий, — деди.

Поручик Григорийнинг ҳужжатини диққат билан ўқиб чиққандан кейин ўзига қайтиб берди.

— Ўз қисмингизни топиб олинг. Бу ердан тезроқ кетишингизни ва ишга халақит бермаслигингизни талаб этаман. Интизомсизлик қилганларни, пароходга юк ортишда халақиг берганларни, кимлигидан қатъи назар, қамоқقا олинсин, деган буйруқ бор. — Поручик лабларини маҳкам қимтиб олди, бир лаҳза жим тургандан сўнг Рябчиковга кўз қирида қараб қўйиб, Григорийнинг қулоғига шивирлади: — Сизга шундай маслаҳат беришим мумкин: ўттиз олтинчи батареянинг командири билан гаплашиб, тўпчилар қатори сафда турсангиз пароходга тушасиз.

Поручикнинг гапини эшишиб турган Рябчиков суюниб кетди:

— Дарров Қаргинга учраш, мен оёқни қўлга олиб, шерикларимиз олдига бораман. Буюм халтангдан бўлак яна нималарингни ола келайин?

— Бирга борамиз,— деди Григорий пинагини бузмасдан. Йўлда булар Семёново қишлоқлик таниш казакни учратишиди. У каттакон аравада янги ёпилган нон ортиб, устига брезент ташлаб, пристань томон бормоқда эди. Рябчиков ҳамқишлоғини чақириб, сўрашиди:

— Салом, Федор! Қаёққа обкетяпсан?

— Ҳа-а-а, Платон, Григорий Пантелеевич, салом! Үз полкимизни нон билан таъминлаш ҳаракатидамиз. Зўрғатдан ёпиб беришиди, йўқса йўлда нонсиз қолиб, аталадан бошимиз чиқмасди.

Григорий тўхтаган арава ёнига бориб:

— Нонинг тарозида тортилганми? Ёинки саналганими?— деб сўради.

— Ким уни санабди дейсиз? Сизга нон керакми?

— Қерак.

— Ол.

— Қанча олай?

— Қўтарганингча олавур, қолганиям бизга етиб ортади.

Григорийнинг буханка устига буханка олаётганини таажжубланиб томоша қилиб турган Рябчиков, ғаши келиб:

— Мунча нонни бошингга урасанми?— деб сўради.

— Қерак,— деб қисқача жавоб берди Григорий.

У аравакашдан икки дона қоп тилаб олди-да, қолларни нонга тўлғазиб, унга раҳмат айтиб хайларлашиди, сўнгра Рябчиковга буюрди:

— Қўтар, уйга оборамиз.

Рябчиков қопни орқалаётib:

— Сен бу ерда қишлиамоқчимисан?— деб сўради истеҳзо билан.

— Нон ўзим учун эмас.

— Бўйласа, кимга?

— Отга.

Рябчиков қопни шартта ерга қўйди-да, ҳанг-манг бўлиб сўради:

— Хазиллашяпсанми ўзинг?

— Йўқ, чинини айтдим.

— Демак сен... сен бир балони бошламоқчисан,

Пантелейевич! Сен шу ерда қолмоқчисан, дилингдагини топдимми?

— Тұғри, топдинг. Қани, қопни ол, кетдик. Отимга қарасам иш чатоқ, жонивор охур ёғочларини ғажиб ташлабди. От ҳали иш беради, пиёда аскар бўлишдан асрасин...

Уйга етгууларича Рябчиков индамади; у инқиллаб, орқалаган қопини у елкасидан бу елкасига оларди; кўча эшикка етганларида:

— Йигитларга айтасанми?— деб сўради-ю, лекин жавобини кутмасдан, ранжигандай:— Буни яхши ўйлаб топибсан... Хўш, биз нима бўламиз энди?— деди.

— Билганингизни қиласиз,— деди Григорий жўрттага ўзини бепарволикка солиб.— Бизни пароходга олишмас экан, ҳаммамиз учун жой йўқ экан, майли, кераги йўқ! Уларга ялиниб зарил кептими бизга! Қолаверамиз. Бахтимизни синааб кўрамиз. Кирсанг-чи, ахир нега эшикда анқайиб қолдинг?

— Бу гаплардан кейин анқайиш у ёқда турсин... Мен ҳозир эшикниам тополмай қолдим. Ана холос! Сен томдан тараша тушгандай, мени довдиратиб қўйдинг, Гриша. Бира тўласи эсим оғиб қолди. Мен бўлсам: «Бунча нонни нима қиласи?»— деб ҳайрон әдим. Йигитлар эшитса, шов-шув бошланади энди...

— Хўш, ўзинг-чи? Қолмайсанми?— деб ўсмоқчилаб сўради Григорий.

— Йўғ-эй!— сапчиб тушди Рябчиков.

— Ўйлаб кўр.

— Ўйлайдиган жойи йўқ! Иложи борида жўнаб қолганим маъқул. Каргин тўпчиларига қўшиламану, кетавераман.

— Бекор қиляпсан.

— Ана холос! Менга бу калла жудаям қимматга тушган, биродар. Бекордан-бекор қизиллар қиличи-га бошимни тутиб беришга тобим йўқ.

— Сен яхшироқ ўйлаб кўр, Платон! Бу ишнинг оқибати...

— Энди гап кетмайди! Ҳозироқ жўнайман.

Григорий хафа бўлгандай:

— Ҳа майли, ихтиёр ўзингда... Гапирмаганим бўлсин,— деди-да, харсангдан қилинган зинага қадам қўйди.

Үйда на Ермаков, на Прохор, на Богатирев бор эди. Уй бекаси, буки армани кампир, казаклар тез қайтмоқчи бўлиб чиқиб кетишганини айтди. Григорий ечинмасдан, бир буханка нонни катта-катта қилиб тўғради-да, оғилхонага, отлар ёнига кетди. Нонни баб-баравар бўлиб, ярмини ўз отига, ярмини Прохорнига берди, чеҳакни олиб энди сув келтиргани кетмоқчи эди, эшик олдидаги Рябчиков пайдо бўлди. У катта-катта қилиб бурдаланган нонни шинелининг этагига солиб олган эди. Платон Рябчиковнинг оти эгаси келганини сезиб қисқача кишинади, Платон илжайиб турган Григорийнинг ёнидан индамай ўтиб бориб, нонни охурга солди-да, Григорийга қарамасдан:

— Кўп иржаяверма, оғайни! Ишнинг кетишига қараганда мен ҳам отимнинг ғамини ейишим керак бўлиб қолди... Сен ҳали, жон деб кетяпти деб ўйладингми? Ўзимни ўзим, бўйнидан боғлаган итдай судраб, бу лаънати пароходга чиққан бўлардим, иложим йўқлигидан! Ваҳимага тушгандан кейин мажбурсан... биттагина каллам бор, шундайми? Худо кўрсатмасин, шуниям шартта кесиб ташлашса, ҳайитгача ўрнидан иккинчи калла ўсиб чиқмас дейман...

Прохор ва бошқа казаклар фақат кечга яқин уйга қайтишди. Ермаков бир шиша идишда тўла спирт, Прохор сарғиши лойқа нарса солиниб, оғзи маҳкам ёпилган банкалардан бир қопини кўтариб келишиди.

— Мана, ҳалол меҳнат қилиб олдик! Туни билан ичсанг, бемалол етади!— Ермаков мақтаниб щишани кўрсатди-да, тушунтира бошлади:— Битта ҳарбий доктор учраб, дори-дармонларини складдан пристанга ташиб беришимизни илтимос қилди. Юкчилар ташигани унамабди, фақат юнкерлар ташиётган экан, биз ҳам уларга қўшилиб ишлайвердик. Хизмат ҳақимиз эвазига доктор спирт берди, манови банкаларни бўлса, Прохор ўғирлаб олди, ёлғон айтсан, худо урсии!

— Ичидаги нима экан? — қизиқсениб сўради Рябчиков.

— Бу-чи, биродари азиз, спиртдан ҳам ўткир нарса! — Прохор банкани чайқалтириб, ёруққа тутиб кўрди, қорамтири шиша ичидаги қуюқ нарсанинг кўпирини томоша қилиб бўлгач, мағрурлик билан давом этди: — Бу, чет элдан келган энг қиммат баҳо вино! Буни фақат касалларга беришармиш, инглизча била-диган бир юнкер бола менга шундай деди. Пароходга тушамизу, аламига ичволиб: «Алвидо, жонажон ўлкам»ни айтиб, Кримга етгунча ичаверамиз, бан-каларини денгизга улоқтираверамиз.

— Ундаи бўлса, тезроқ бориб туш, пароход сени кутиб қолди, жўнаташмаяпти: «Қаҳрамонлар қаҳра-мони Прохор Зиков қаердайкин? Усиз жўнай олмай-миз!» деб ҳаммаси сенга маҳтал,— деб масхара қилди Рябчиков. Бирпас индамай тургандан сўнг, тамаки тутунидан сарғайган бармоғи билан Григорийни кўрсатди: — Мана, кетишдан бош тортяпти. Мен ҳам айнидим.

— Йўғ-э! — бақириб юборди Прохор. Эсанкираганидан у қўлидаги банкани тушириб юбораёзи.

— Нима гап ўзи? Яна нима хусусда тил бириттиринглар? — хўмрайниб сўради Ермаков Григорийга қаттиқ тикилиб.

— Кетмасликка қарор қилдик.

— Нима учун.

— Пароходда бизга жой йўқ, шунинг учун.

— Бугун бўлмаса, эртага бўлади, — деди Богатирев ишонч билан.

— Сен ўзинг пристанда бўлдингми?

— Хўш, нимайди?

— У ердаги сур-сурни кўрдингми?

— Хўш, кўрдим.

— Хўш-хўшламай ўл! Кўрган бўлсанг, гапни чўзишининг ҳожати йўқ. Мен билан Рябчиковнигина олмоқчи бўлишди, шуниям бир кўнгилли аскар айтди, Каргин тўпчиларига қўшилишимиз керак экан, бошқа йўл йўқ.

— Бу батареядагилар ҳали пароходга тушгани йўқми? — ҳовлиқиб сўради Богатирев.

Тўпчиларнинг пароходга чиқиш учун навбат кутиб турганини эшитиб, ўша заҳотиёқ йифиштирина бошлади: буюм халтасига кўйлак-иштони, ортиқча чалворлари, гимнастёркасини жойлади, нои солди-да, хайрлашди.

— Қолсанг бўларди, Петро!— деб маслаҳат берди Ермаков.— Бўлиниб кетсак яхшимас.

Богатирев индамади, герлаган қўлини унга узатиб, оstonада яна бир карра таъзим қилди:— Соғ-саломат қолинглар! Насиб бўлса, яна кўришармиз,— деди-ю, югурганича чиқиб кетди.

У кетгандан кейин уй ичига оғир сукунат чўқди. Ермаков емакхонага кириб, уй бекасидан тўртта стакан олиб келди-да, индамасдан тўртталасига спирт қўйди, стол устига каттакон мис чойнакда совуқ сув қўйиб, чўчқа мойни тўғради ва индамаганича стол ёнига ўтири-ю, тирсакларини қўйиб, бир неча минутгача оёғи остига тикилиб қолди, сўнгра чойнакнинг жўмрагидан симириб сув ичди ва хириллаган овоз билан:

— Кубаннинг ҳамма жойида сувдан керосин ҳиди келади. Нега бундай экан?— деб сўради.

Ҳеч ким унга жавоб бермади. Рябчиков тоза латта билан қиличининг терлаган қайишларини артарди, Григорий ўз қутисини титар, Прохор паришон бўлиб, деразага тикилар, шипшийдам тоғ этакларида юрган ўюр-уюр йилқиларни томоша қиларди.

— Столга яқинроқ келиб ўтиринглар, ичайлик.— Ермаков уларга қарамасдан ярим стакан спиртни кўтариб ичиб юборди, устидан сув ичди, сур мойни чайнаркан, чақнаб кетган кўзлари билан Григорийга тикилиб сўради:

— Қизил ўртоқлар бизни отиб ташламасмикин?

— Ҳаммани отиб бўпти. Бу ёқда мингдан ортиқ одам қоляпти,— деб жавоб берди Григорий.

— Мен ҳамма учун қайғуряпканим йўқ, — Ермаков кулди.— Мен ўз жонимни ўйлайман...

Устма-уст ичиб олганларидан сўнг суҳбат ҳам қизиб кетди. Сал вақтдан кейин совуқда кўкарган, қовоғи осилган Богатирев тўсатдан қайтиб келди. У

бир бўхча яп-янги инглизча шинелларни остона ёнига ташлаб, ечина бошлади.

— Сафарлари муборак! — таъзим билан ачитиб табриклади Прохор.

Богатирев еб қўйгудай бўлиб унга бир хўмрайтида, хўрсиниб:

— Энди бу Деникинлар ва бошқа ж...лар ялинса ҳам жўнамайман! Навбат кута-кута, аёзда итдан баттар совқотдим, бекорга сарсон бўлганим қолди. Энди менга навбат етганда таққа тўхтатди. Олдимда икки киши турувди, бўттасини чиқаришди, иккинчиси қолаверди. Тўпчиларнинг ярмиси қопкетди, бу қандай гап, ахир?

— Улар сендақа гўсхўрларни сувга обориб, суформай опкелишади! — Ермаков хохолаб кулди-да, шишани чайқатиб, Богатиревга стаканини тўлдириб спирт қуиди.— Ма, ич, алами босилади! Ёки ялиниб келишларини кутмоқчимикан? Деразага қара, анови генерал Врангель эмасми? Худди сенга келяпти!

Богатирев чурқ этмай спирт ичарди. Шу топда унинг кўнглига ҳазил сифмасди: Ермаков билан Рябчиков, ширақайф бўлволишиб, бечора кампирни ўлгудай ичириб маст қилишди-да, бирон жойдан гармончи топиб келиш ҳаракатига тушиб қолишиди.

— Ундан кўра станцияга боринглар,— деб маслаҳат берди Богатирев,— одамлар вагонларни очиб, олган-олганники қилишяпти. Бутун бошлиқ состав кийим-кечак билан тўла.

— Кийим-кечакни бошимизга урамизми?! — деб бақиради Ермаков, — ҳали сен обкелган шинеллар ҳам бизга етиб ортади! Ортиқчасини барибир обқўйишади. Петро! Ҳой, шўртумшуқ, гапга қулоқ сол! Биз қизилларга қўшилиш тўғрисида маслаҳатлашяпмиз, тушундингми? Ахир биз казакми ё йўқми? Агар қизиллар бизни тирик қолдирадиган бўлса, уларга қўшилиб хизмат қиласиз. Биз — Дон казакларимиз! Бегона қон аралашмаган аслзод казакмиз! Бизнинг вазифамиз — қилич ишлатиш. Биласанми, мен қандай қиличбозман? Зарбимга тўнка бас келмайди! Ўринингдан тургин, қиличимнинг дамини синаб кўрай! Ҳа-а, қўрқдингми? Биз учун қилич ишлатиш бўлса, бас, ким-

нинг калласи кетгани билан ишимиз йўқ. Гапим тўғрими, Мелехов!

— Қўйсанг-чи, ахир! — Григорий ҳорғинлик билан қўл силтади.

Ермаков қонга тўлган кўзларини ўқрайтириб, сандиқ устида ётган қиличини олмоқчи бўларди. Богатирев мулойимлик билан уни итарар:

— Жудаям ҳаддингдан ошма, Айиқполвои, йўқса бирпасда танобингни тортиб қўяман. Чамангга қараб ичгин, сен ахир офицер мансабидасан, — дерди.

— Мунақа мансабга қўйдим! Шу топда бу мансабинг бир чақага арзимай қолди. Эсингга олма! Ўзим шунақаман. Кел энди, погонларингни кесиб ташлай қолай? Петя, азизим, тўхта, тўхта, мен ҳозир поғонларни...

— Ҳали шошма, вақти келганда кесиб ташлаймиз,— деб куларди Богатирев тўполончи дўстини турткилаб.

Тонг отаргача ичишди. Қош қораймасданоқ аллақайдан нотаниш казаклар келган эди, бирининг қўлида қўшсозли гармонь бор эди. Ермаков ҳолдан кетиб йиқилгунича «Қазачокка» ўйин тушди. Уни судраб, сандиқ ёнига оборишди, шундан кейин у оёқларини кериб, чалқанчасига тушганича бошини орқага ташлаб полда ухлаб қолди, эрталабгача диққинафас базм давом этди. Базмга гасодифан аралашиб қолган нотаниш казаклардан кексарофи маст бўлиб қолиб: «Мен кумшатскаяликман!.. Станицанинг нақ ўзидан! Шундай ҳўқизларимиз бор эдикি, шохига қулочинг етмасди! Отларимиз ҳар қайсиси бир филдай эди! Мана энди рўзгорда нима қолди? Ёлғиз туллаган кўп-пак! У ҳам яқинда ўлади, чунки ейдиган нарса йўқ...»— деб йиғлавериб ҳаммани безор қилди. Қавказча йириқ чакмон кийган аллақандай бир кубанлик йигит гармончига «Наур» рақсини чалдириб, қўлларини ўйнатиб шундай рақсга тушдики, Григорийнинг назарида, гуё у кавказча этигининг тагини ифлос полга тегизмай, уй ичиди сузиб юргандай туюларди.

Казаклардан бири ярим кечада аллақайси гўрдан иккита оғзи тор, чўзинчоқ хумни кўтариб келди;

хумга ёпиширилган этикеткалар чирий деб қолган, пробкалари сурғулланган, жигар ранг сурғуч печати остида қўрғошин пломбаси осилиб турарди. Прохор бир челак келадиган хумни қўлига олволиб, этикеткасидаги ажнабийча ёзувни ўқишга уриниб, қийналганидан лабларини қимирлатарди холос. Энди уйғонган Ермаков унинг қўлидан хумни олди-да, ерга қўйиб, қиличини яланғочлади. Прохор кўз очиб юмгунча, у қияламасига қилич солиб, хумнинг оғзини бир қарич жойдан чўрт учириб юборди-да: «Идишингни тут!» деб бақири.

Қуюқ ва хушбўй ғалати винони бир неча минут ичида ичиб тамомлашди; шундан кейин Рябчиков анчагача тилини такиллатиб: «Бу вино эмас, оби ҳаёт экан! Буни фақат жон чиқар маҳалида ичиш керак, ўшандаям ҳаммага эмас, умрида карта ўйнамаган, тамаки чекмаган, хотин кўрмаган одамга берилса тузук... Умуман авлиёлар ичадиган шарбат экан!»— деб мақтovини келтириди. Бу гапдан сўнг қонда шифобахш винолар борлиги Прохорнинг эсига тушди.

— Шошма, Платон, жудаям мақтаверма! Қопимдаги вино буни бир чўқишида қочиради! Бунинг мол эмас-ку, анови мен складдан обкелганни вино деса бўлади. Болда пишган шарбат, балки ундан ҳам зўр! Буни авлиёлар эмас, фақат пошшолар ичади! Илгари буни пошшолар ичарди, энди бизга насиб қилди...— деб оғиз кўпиртиради бир банкасини очаётиди.

Ичкилик деса жонини берадиган Рябчиков банкадаги сарғиши лойқа нарсадан бир ҳўплади-ю, ўша он ранги оқариб, кўзларни олайиб кетди.

— Бу виномас, карболка-ку!— деб хириллади, стаканда қолганини жаҳл устида Прохорнинг кўйлагига сепиб юборди, гандираклай-гандираклай, коридорга чиқиб кетди.

Прохор маст-аласт гурунглашаётган казаклардан баланд келмоқчи бўлиб:

— Ёлғон айтяпти бу ифлос! Бу ахир инглиз виноси! Биринчи сорт! Унга ишонманг, биродарлар! — деб бақириди-да, бир стаканни паққос шимириб юборган эди, ранги Рябчиковнидан ҳам оқариб кетди.

Ермаков бурун катакларини кериб, Прохорнинг сузилган кўзларига тикилар ва тиқилинч қилиб сўрапди:

— Хўш, қалай экан? Пошшоҳон винонг қалай? Ут-кирми? Ширинми? Гапир тезроқ, шайтон, йўқса мана шу банкани қаллангга уриб синдираман!

Прохор ҳадеб бош чайқар, индамай азоб чекарди; ниҳоят бир кекирди-ю, чопқиллаганича Рябчиковнинг кетидан чиқиб кетди. Ермаков кулгиси қистаганидан нафаси қайтиб, Григорийга айёрлик билан кўз қисиб қўйди-да, ҳовлига чиқди. Бир минутдан сўнг у уйга қайтиб келди. Унинг қаҳқаҳаси ҳамманинг овозини босиб кетди.

— Ўзи нима гап? — ҳорғин овоз билан сўради Григорий.— Мунча хохолайсан, тентак? Ҳез туғибдими?

— Сен ўзинг бир чиқиб кўр, ўҳчишларини томоша қиласан! Биласанми улар нима ичибди?

— Нима?

— Бит ўлдирадиган инглиз дориси!

— Бекор айтибсан!

— Худо урсин! Мен ҳам складга борганимда, олдин вино деб ўйладим, лекин кейин доктордан: «Бу нима, жаноби доктор?» — деб сўрадим, — «Дори», деди. — «Ҳамма дардгаям давоми? Спирт солиб қилинганми ўзи?» — деб сўрасам: — «Йўқ, йўқ, бу мазни иттифоқ-дошларимиз юборган, бит дориси. Буни баданга суртилади, ичга истеъмол қилиш сира мумкинмас!»—деди.

— Шуни билсанг, нега уларга олдириқ айтмадинг, доғули?— деб койиди Григорий.

— Майли, қўявер, таслим бўлишдан олдин тозаланиб олишса яхши бўлади, жин урмайди!— Ермаков кулги аралаш келган кўз ёшларини артди-да, заҳарханда қилиб гапида давом этди:— Камроқ ичадиган бўлишади, столдан рюмкангни олгунингча улар ичволовиб, қараб тураверишади. Очқўзининг жазоси шу! Қани, биродар, икковимиз ичамизми ё сабр қиласлиникми? Кел энди ўз арвоҳимиз учун ҳам ичайлик!

Тонг отар маҳалида Григорий ҳовлига чиқди, қалтироқ қўллари билан тамаки ўраб чекди-да, тумандан ҳўлланган деворга орқасини бериб, узоқ туриб қолди.

Уйда мастларнинг қийқириғи, гармоннинг бўғзига

нон тиқилгандек хириллаши, бетартиб ҳуштак овозлари бир дам тинмасди; чарчаш нималигини билмайдиган йигитлар пошналари билан полни дук-дук уриб, ўйин тушишарди. Шамол лимандан пароход гудокларининг бўкирган садосини олиб келарди; пристанларда эса, одамларнинг овози бир-бирига қўшилиб кетган, говур-ғувурдан уларни ажратиб бўлмасди, фақат бақирган команда товуши, отларнинг кишнагани, паровозларнинг гудоги аниқ эшитиларди. Тоннельная станциясининг аллақайси томонида жанг бўлмоқда эди. Тўплар гумбурлар, лекин тўп садоси тинган заҳоти пулемётларнинг жон-жаҳди билан тариллагани эшитиларди. Мархот давони орқасидан отилган мушак осмон баравар кўтарилиб, ҳамма ёқ чароқлаб кетди. Унинг яшил ёғудисидан ёришган ўркачсимон тоғ чўққилиари бир дам равшан кўриниб турди-да, сўнгра март тунининг зим-зиё қоронғиси яна тоғларни қоплади, замбарак заллари янада тезлашиб, гумбурлагани янада аниқроқ эшитила бошлади.

XXIX

Денгиздан муздай, шўртанг, кучли шамол эсар эди. Шамол етти ёт бегона юртларнинг ҳидини қирғоққа олиб келарди. Бироқ донлик казаклар учун фақат шамолгина эмас, денгиз бўйидаги шамол ўйнаб турган бу диққинафас шаҳарда тамоми нарса ёт, бегона эди. Улар қўтандаги қўй сингари портга тўпланишиб, пароходга тушиш учун навбат кутишарди... Сув кўпириб қирғоққа уриларди. Булутлар орасидан иссиғи қолмаган қуёш мўралаб ерга боқарди. Рейдда турган инглиз ва француз миноносцларининг тутуни бурқсирди: сув устида афсонавий маҳлуққа ўхшаш дrenoутнинг қораси кўринарди. Унинг атрофини қоп-қора тутун қоплаган эди. Пристанларда даҳшатли сукунат ҳукм сурарди. Кечагина сўнгги юк кемаси лангар ташлаб турган жойда ҳозир, офицерча эгарлар, чамадонлар, кўрпа-ю, пўстинлар, қизил ғижим духоба қопланган стуллар, яна алланималар сузиб юрарди, буларнинг ҳаммаси шошилинчда сувга ташланган буюмлар эди...

Григорий эрталаб пристаига келди: отини Прохорга топширди-да, оломон орасидан танишларини қидириб, ваҳимали гапларга қулоқ бериб санқиб юрди. Унинг кўз олдида «Святослав» пароходининг зинапояси ёнида истеъфога чиққан бир кесса полковник, пароходдан жой берилмагани учун ўзини отиб ташлади.

Шу воқеадан бир неча минут илгари бу пакана, соч-соқоли оқарган, кўзлари йиғлайвериб шишиб кетган, қовоқлари салқиган шошма-шошар полковник—соқчилар бошлиғининг портупея қайнishiдан ушлаб, сучук тил билан унга алланима деб ялинган, бурини қоқиб, тамакидан сарғайган мўйловини, қалтираган лаби-ю, кўзларини кир дастрўмол билан артган эди, кейин бирданига ўзини-ўзи... Ўқ чиқиши билан бир эпчил казак етиб келиб, ўликнинг илиққина қўлидан кумушдай йилтироқ браунингни тортиб олди, офицерча кул ранг шинелли жасадни, тўнкани думалатгандай қилиб оёқ билан тепа-тепа, тахланган яшиклар ёнига обориб ташлашди, шундан кейин зинапоя олдинга янада кўпроқ одам тўпланиб, навбат учун ур-йиқит янада кучайди, қочоқларнинг қичқирган, бўғилган ғазабнок овози янада авжига чиқди.

Сўнгги пароход чайқала-чайқала жойидан қўзғалгандан, оломон орасидан аёлларнинг ҳўнграб йиғлаганин жазаваси тутиб чинқирган, сўкинган овозлар эшитилди... Пароходнинг бўкирган товуши ўчмай туриб, тулки тумоқ кийган қалмоқ йигит ўзини сувга ташлаб, пароход кетидан сузиб кетди.

— Тоқати тоқ бўлган-да!— деб хўрснди казаклардан бири.

— Демак, қолиши мумкин эмас экан,— деди Григорийнинг ёнида турган казак.— Демак, у қизилларга кўп ёмонлик қилган...

Григорий тишини тишига қўйиб, сузиб кетаётган қалмоқни томоша қиласарди. Унинг қўллари борган сари бўشاшиб қулоч отар, елкалари борган сари сувга чўкарди. Ивиган чакмони уни пастга тортарди. Тўлқин бошидаги малла ранг тулки тумоғини юлиб олиб орқага ташлади.

— Чўкиб ўлади энди, лаънати кофир!— ачиниб деди камзул кийган аллақандай бир чол.

Григорий шартта кетига бурилди-ю, оти ёнига кетди. Прохор ҳозир келиб турган Рябчиков ва Богатирев билан гаплашмоқда эди.

Рябчиков Григорийни кўрган заҳоти эгарда типирчилаб, сабрсизлик билан от биқинига пошиналарини ниқтаб:

— Тезроқ юр, Пантелейевич, тезроқ! — деб чақирди, лекин Григорийнинг етиб келишини кутмасдан олистандай: — Вақт ғанимаидан тезроқ кетиб олайлик. Ярим сотняга яқин казаклар тўпланди, Геленжикка жўнасак деган маслаҳат бор, ўшанақаси Грузияга ўтиб оламиз. Сен нима дейсан?! — деб яна бақирди.

Григорий қўлларини шинель чўнтакларига солиб, пристанда сангиф юрган казакларни кифти билан туртиб, индамай келарди.

Рябчиков унга яқинроқ келди-да:

— Борасанми, йўқми? — деб қистади.

— Йўқ, бормайман.

— Бизга бир лашкар старшинаси ҳамроҳ бўлди. Бу ердаги йўлларни яхши билар экан: «Кўзимни юмиб адаштирмасдан тўғри Тифлисга обораман», — дейди. Кетайлик, Гриша! Ўшанақаси турклар юртига ўтиб оламиз, нима дединг? Бир амаллаб қочиб олишимиз керак-да, ахир! Қиёмат тепамизга келиб қолди-ю, сен бўлса сувга тушган мушукдай шалпаясан холос...

— Йўқ, мен бормайман. — Григорий Прохорнинг қўлидан жиловни олди-да, чол кишидек аранг отга минди. — Бормайман. Барibir нафи йўқ. Бир оз вақтини ўтказиб юбордик... Ановини кўр!

Рябчиков бурилиб қаради-ю, аламига чидолмай, қиличининг попугини мижиғлаб, узиб олди: тоғдан цеп-цеп бўлиб қизил аскарлар тушиб келмоқда эди. Цемент заводи ёнида пулемётлар жон-жаҳди билан тариллай бошлади. Бронепоездлар цепларни тўплардан ўққа тутди.

Асланидиннинг тегирмони ёнида биринчи тўп ўқи портлади.

Чехраси очилган Григорий дадиллик билан:

— Қўшхонага кетдик, йигитлар, кетимдан қолманглар! — деб буюрди.

Бироқ, Рябчиков Григорий мингандан отнинг жило-видан ушлаб, қўрқув аралаш бақирди:

— Керак эмас! Шу ерда тураверайлик... Ажалимиз етган бўлса, эл олдида ўлганимиз маъқул...

— Э, тентак, чу, де! Ажал нимаси? Нима деб валдираяпсан ўзинг? — Григорий хуноб бўлиб, яна алланима демоқчи эди. бироқ денгиздан кўтарилган момақалдироқ сингари ваҳимали товуш унинг овозини эшилтирмай қўйди. «Ҳиндистон императори» номли инглиз дредноути иттифоқдош Россия билан видолашаётуб ўн икки дюймлик замбаракларидан ёппасиға ўт очди. Дредноут лимандан чиққан пароходларни ҳимоя қилиш учун шаҳар четига бостириб келаётган қизил ва яшилларнинг тўплари кўринган давонни мўлжалга олиб ўқ ёғдира бошлади. Пристанда уймалашган казаклар тепасидан инглиз снарядлари хунук овоз билан қалдираб ўтарди.

Богатирев ҳуркиб ўйноқилаган отининг жиловини маҳкам тортиб, гумбурлаган товуш орасидан бақирди:

— Инглиз тўпларининг овози жудаям ваҳимали экан! Лекин бекорга қизилларни безовта қилишапти! Минг отгани билан наф йўқ, фақат шовқин кўтаргани қолади...

— Билганларини қилишсин! Бизга барибир энди,— деб илжайди-да, Григорий, отини юргизиб, кўча бўйлаб кетаверди.

Унинг рўпарасидаги муюлишдан қиличларини ялан-ғочлаб олтида отлиқ қуюндай учиб чиқди. Олдинги отлиқнинг кўксисида, жароҳатдан оқсан қон сингари қилқизил бант парпираб турарди.

САҚКИЗИНЧИ ҚИСМ

Жанубдан икки кечаю кундуз сурункасига илиқ шамол эсди. Даладаги сўнгги қорлар ҳам эриб кетди. Баҳор ёғин гарчилигиде кўпирниб оққан жилғаларнинг шалдираши ҳам босилди, даштдаги жар ва сойларнинг ҳам суви тинди. Учинчи куни тонг маҳалига бориб шамол тўхтади, даштни қалин туман босди, бултурдан қолган талай ўтлар шабнамда кумушдай йилтираб кетди, қирлар, адирлар, станицалар, черков гумбазлари, осмонга бўй чўзган сарвсизмон тेраклар кўз илғамас оқиштоб туман пардаси ичидагурилмай қолди. Бепоён Дон даштларига кўм-кўк баҳор келди.

Эрталабки тумандан, Аксинья соғайгандан бери биринчи марта эшик олдига — зина пояга чиқди, шифобахш кўклам ҳавосининг ҳидидан маст бўлиб, узоқ туриб қолди. Боши айлангани, кўнгли айниганига қарамай, бир амаллаб боғдаги қудуқ ёнинг борди-да, чекакни ерга қўйиб, қудуқ тахтаси устига ўтириди.

Гўё олам бошқатдан бунёдга келгандай, кўзига бошқача, ғоят чиройли бўлиб кўринар, ўзига мафтун этарди. Аксинья ҳаяжонга тўлиб, чақнаган кўзлари ила атрофии томоша қилар, ёш боладай суюниб кўйлак бурмаларини ўйнарди. Унинг учун ҳозир туманга бурканган олис жойлар, қор суви босган боғдаги олмалар, намиққан четан девор ва унинг орқасидаги йўл, сув ювиб кетган бултурги арава излари — ҳамма нарса ниҳоятда гўзал кўринар, бутун борлиқ

қуёш нури билан тўлганга, ранг-баранг тусга кириб гул каби очилганга ўхшаб туяларди.

Туман орасидан кўринган бир парча кўм-кўк осмоннинг тиниқлигидан кўзлари қамашди; чириган похол билан илиган қора тупроқнинг иси шу қадар ёқимли ва таниш эдик, Аксинья уни тўйиб-тўйиб ҳидлади-да, лабининг бир чети билан жилмайиб қўйди; туман босган даштнинг аллақайси томонида сайдраётган тўрғайларнинг соддагина нағмаси кўнглида аллақандай ҳасрат уйғотди. Мусоғирчиликда эшигтан тўрғай ноласи таъсир этиб, Аксинъянинг юраги дукдук ура бошлади, кўзларига беихтиёр икки қатра ёш келди...

Аксинья бир ўлимдан қайтганига қувониб, ҳар бир нарсани ўз қўли билан ушлаб кўргиси келарди. Гоҳ намгарчиликда қорайиб кетган қорақат бутасини ушлагиси, гоҳ кўкимтирир пўпанак босган олма шохига юзини қўйгиси келарди; қулаган четан девордан ҳатлаб ўтса-ю, лой кечиб, йўлсиз бораверса, жарнинг нарёғидаги кети туманли уфқ билан ўпишган, нилдай ям-яшил кузги буғдои даласини томоша қилса...

Аксинья бир неча кунгача Григорийни кутиб, ана келади, мана келади, деб кўз тутди, бироқ уйга кирган қўшнилардан: уруш ҳали тамом бўлмаганини, кўпчилик казаклар Новороссийскдан денгиз орқали Қrimга жўнаганини, қолганлари эса, баъзилари Қизил Армия сафига кириб, баъзилари конга кетганини эшигтиди.

Ҳафтанинг охирида Аксинья уйга қайтишга аҳд қилди, шу орада унга ҳамроҳ ҳам топилди. Бир куни кечқурун, эшик тақиллатмасдан, уйга буқчайган бир чол кириб келди. У индамай таъзим қилиб, чоклари сўқилган, эгнига ярашмаган инглизча кир шинелни еча бошлади.

Хўжайнин ҳайрон бўлиб, чақирилмаган меҳмонни бошдан-оёқ қараб чиқди-да:

— Бу нимаси, яхши киши, салом йўқ, алиқ йўқ, тўғридан-тўғри жойлашиб олмоқчимисан? — деб сўради.

Чол чаққонлик билан шинелини ечиб, остона ёнида қоқди-да, авайлаб қозиққа осиб қўйди, сўнгра калта қилиб дукартланган оқ соқолини силаб:

— Кечирасан, худо ҳақи, кечир, биродари азиз, — деб кулимсиради, — мен ҳозирги замон шароитига қараб иш қилишга ўрганганман: олдин ечиниб, кейин тунашга рухсат сўрамасанг, уйга киргизишмайди. Ҳозир халқ жудаям қўрс, меҳмонга сира тоби йўқ...

Хўжайин бир оз бўшаши:

— Сени қаерга ётқизамиз, ахир? Мана қара, ўзимизга жуда тор, — деди.

— Менга тангадай жой бўлса етади. Манови остона тагида юмалаб ётавераман.

— Сен ўзинг кимсан, бува? Қоқларданмисан? — қизиқсиниб сўради уй бекаси.

— Ҳа, ҳа, топдинг, қоқмани. Қоча-қоча, денгизга етдим, ана ўша ёқдан секин-аста яна қайтиб келяпман, югуравериб итдай чарчадим... — деди эзма чол, остона ёнида чўнқайиб ўтираётиб.

— Хўш, сен ўзинг кимсан? Қаерликсан? — деб сурнештираверди хўжайин.

Чол чўнтагидан машиначилар ишлатадиган катта-кон қайчини олиб, уни қўлида айлантириб кўрсатди-да, ҳамон бояги кулимсирашини қўймай:

— Менинг ҳужжатим манови қайчи, — деди, — Новороссийскдан чиққанимдан бери шу иш беряпти, аслимни сўрасанг, мен Вешенская станицасидан бўламан. Денгизнинг шўр сувига тўйиб, энди ўз элимга кетяпман.

— Мен ҳам вешенскаяликман, буважон, — деди Аксинъя севинчини ичига сифдиролмай.

— Ҳали шундай дегин! Ўз ҳамқишлоғим билан учрашган жойимни қаранг! Бир ҳисобда, ҳозирги вақтда бунга таажжубланмасаям бўлади: биз ҳозир бамисоли жуҳудларга ўхшаб, ер юзига тарқалиб кетганимиз. Кубанда итга тош отсанг донлик казакка тегади. Ҳамма ёқни донликлар босиб кетди. Ўлгани, ерга кирганини-ку ҳисоби йўқ. Э, яхшилар, шу чекиниш даврида мен не-не ҳодисаларни кўрдим. Ҳалқнинг бошига тушган азобларни гапиришга тил бормайди! Ўтган куни станцияда ўтирсам, ёнимда ўтирган кўзойнакли бир бойвучча, кўзойнакдан эгнига тикилиб бит ахтаряпти. Уст-бошида фуж-фуж бит қайнайди. Қараб турсам, бармоқлари билан битни олади-ю, худди нор-

дон олмани тишилаган одамдай, юзларини буришириб ижирғанади денг. Битни ўлдираётib, баттарроқ ижирғанади, кўнгли айниганидан ўхчий дейди! Лекин бағритош қонхўр одам ўлдираётib пинагини бузмайди. Кўз олдимда шунақалардан бири уч қалмоқни чолиб ташлади-да, қиличини от ёлига артди, сўнгра ҳеч нима кўрмагандай, ёнидан папиросини олиб чекди, менга яқин келиб: «Сен нега кўзларингни чақчайтирасан, бува? Сениям бошингни олайми?»— деб сўради. «Йў-фей, болам, худо сақласин! Бошимни олганингдан кейин қандай қилиб нон чайнайман?»— дедим. Гапимга кулгиси қистаб, ўз йўлига кетаверди.

— Қон тўкиб ўрганган кишига одам ўлдириш бит ўлдиришдан ҳам осон. Инқилоб бўлгандан бери одам зоднинг қадри қолмади,—деди маънодор қилиб хўжаин.

— Ҳақ гап!— деб тасдиқлади меҳмон.— Одамзод молдан хароб, бошига нима келса, кўнишиб кетаверади. Мен ҳалиги аёлдан: «Сиз ўзингиз ким бўласиз? Уст бошингизга қарасам оддий кишиларга ўхшамайсиз», — деб сўрадим. Бечора менга қаради-ю, кўзлари жиққа ёшга тўлди: «Мен, генерал-майор Гречихиннинг хотиниман». Ана холос, ана генералу, ана майор! Бити савил қўтири мушукникиданам кўп! «Жаноби олий, агар сиз бу қонхўр маҳлуқларни битталаб ўлдирадиган бўлсангиз, Покров байрамигачаям тугатолмаймиз. Тирноғингиздан тирноқ қолмайди. Ҳаммасини бирданига мажақлаш керак!» — дедим. «Қандай қилиб?» — сўради у. Мен унга йўлини ўргатдим: — «Олдин уст-бошингизни ечинг, сўнгра қаттиқ жойга ёйиб, шишаминам эзаверинг», — дедим. Қарасам, генерал хоним, водокачка орқасига ўтди: энгашиб олиб, яшил раңг шишани кўйлаги устидан думалатяпти, бирам эпчиликминам думалатяпти, умр бўйи шу иш билан шуғулланган кишиям бунақа қилолмайди. Унинг ишига қараб туриб, ўйланиб қолдим: худойимнинг маҳлуқи кўп, энди оқсусиякларга ҳам бит-бургларини юборди, уларнинг ҳам ширин қонини сўриб кўрсин, қачонгача меҳнаткашлар қонини сўраверади деб... Худойим Микишкага ўшаган анойимас! Ўз ишини билиб қиласди. Баъзан бандаларига раҳми ке-

либ, шундай ҳаққоний ишлар қиласы, қойил қолмай иложинг йўқ...

Гапга тушиб кетган эзма машиначи уй эгаларининг астойдил қулоқ солаётганини кўриб, усталик билан овқат масаласига шама қилди:

— Яна кўп қизиқ нарсаларни гапириб берардиму, бироқ қорним очганидан кўзим юмилиб кетяпти...

Кечки овқатдан кейин ётар жойини тузатаётиб, Аксиньяга савол берди:

— Сен бу ерда кўп турмоқчимисан, элат?

— Йўқ, уйга кетмоқчиман, буважон.

— Ундаи бўлса, бирга кетамиз, йўлда зерикмаймиз.

Аксинья бажону дил рози бўлди; эрталаб иккиси уй эгалари билан хайрлашиб, даштнинг бир бурчагида қолиб кетган Ново-Михайловск посёлкасидан жўнашди.

* * *

Ўн иккинчи куни кечаси Милютин станицасига етдилар. Ялиниб-ёлвориб, сиртдан бадавлат кишиникига ўхшаш, каттакон бир уйга қўнишди. Эрталаб Аксиньянинг ҳамроҳи, йўлда қавариб-қонаб кетган оёқларига дам бериб, ҳордиқ чиқариш учун бир ҳафта шу станицада қолмоқчи бўлганини айтди. У оёғини босолмасди. Бу уйда унга лойиқ иш топилди, ишни соғиниб қолган машиначи дарҳол қайчисини ва ип тақилган кўзойнагини олиб, дераза ёнига ўрнашди-да, аллақандай бир эски нарсанинг чокини сўта бошлади.

Қизиқчи ва аскиябоз чол Аксинья билан хайрлашаётуб уни чўқинтириди ва тўсатдан кўзига ёш олди, лекин ўша заҳотиёқ кўзини артиб, ҳазил аралаш насиҳат қила бошлади:

— Йўқчилик — жоннинг азоби, лекин йўқчилик одамларни бир-бирига меҳрибон қилиб қўяди... Сенга жуда-жуда раҳмим келади... Бироқ, иложим йўқ, якка ўзинг кетасан энди, қизим: етакчинг икки оёғидан айрилди, бирон ерда билмасдан арпа нон еган бўлсам керак... Лекин бир ҳисобда, босган йўлимиз ҳам ҳазилакаммас, етмишга кирган ҳар қанақа одам бунга дош

беролмайди. Иўлинг тушса кампиримга айт: кўк каптаринг соғ-саломат, ўтга солиши — ёнмади, сувга солиши — чўмади, йўл-йўлакай яхшиларнинг кийими ни тикиб юрибди, ҳадемай уйга қайтиб келади, дегин.. Аҳмоқ ҷолинг чекинишни йиғиштириди, энди ҳужумга ўтди, қачон уйга бориб печь устига чиқиб ётарканман, деб жони ҳалак, дегин...

Аксинъя яна бир неча кун йўл юрди. Ниҳоят, йўлда тўғри келган бир аравага тушиб Боковская станицасидан Татарскка етиб олди. У қоронғи тушганда, кўча эшиги ланг очиқ қолган ўз ҳовлисига кирди, сўнгра Мелеховлар қўрасига бир қаради-ю, тўсатдан хўрлиги келиб, томоғига бир нарса тиқилгандай нафаси қайтиб кетди... Ис босиб, ҳувиллаб ётган емакхонага кирди-ю, йиғлай-йиғлай, кўпдан бери юрагида йиғилиб қолган дардларини бўшатди, сўнгра Донга бориб сув олиб келди, печни ёқди, шалвиллаган қўлларини тиззасига қўйиб, стол ёнига ўтириди. Хаёл суриб ўтириб, эшик «ғийч» этганини ҳам эшиитмади, фақат Ильинична кириб, секингина салом бергандан кейин ўзига келди.

— Салом, қўшни! Бегона юртларда жудаям узоқ қопкетдинг... — деди кампир.

Аксинъя чўчиб кетиб, унга тикилди-да, ўрнидан турди.

— Менга мунча тикиласан, нега индамайсан? Ё бирон хунук хабар обкелдингми? — Ильинична оҳисстагина стол ёнига келиб, скамейканинг четгинасига ўтириди, лекин синчков кўзларини Аксинъядан олмади.

— Йўғ-э, ҳеч қандай гап йўқ... Сизни келади деб ўйламаган эдим, хаёлим қочиб, уйга кирганингизниям пайқамабман... — деди Аксинъя шошиб қолиб.

— Жудаям озиб кетибсан, рангингда ранг қолмабди.

— Терлама касал бўлдим...

— Григорий шўрлик... У нима бўлди... Икковинг қаерда ажралишдинг? Тирикми ўзи?

Аксинъя қисқача қилиб гапириб берди. Ильинична миқ этмай ҳамма гапни эшиитди, пировардида:

— Сенинг олдингдан кетганида касал эмасмиди? — деб сўради.

— Йўқ, касал эмасди.

- Ўша кетгандан буён ҳеч гап эшитмадингми?
- Йўқ.
- Ильинична эркин нафас олди:
- Хушхабар келтирганинг учун сенга раҳмат. Қишлоқда одамлар ҳар хил бўлмағур гап тарқатиб юришибди...
- Қанақа гап? — эшитилар-эшитилмас сўради Аксинъя.
- Бекорчи гаплар... Қим ҳаммасига қулоқ солиб ўтирибди дейсан... Қишлоғимиз одамларидан ёлғиз Ванька Бесхлебнов қайтиб келди. У Григорийни Екатеринодарда касал ҳолда кўрибди, бошқаларнинг гапига ишонмайман!
- Бошқалар нима дейишади, бувижон?
- Сингин қишлоқлик бир казак бола, Григорийни Новороссийск шаҳрида қизиллар чопиб ташлади, деган эмиш. Мен яёв юриб Сингинга бордим, она қалби чидамас экан, ўша казак болани топдим. Тонди. Кўрганим йўқ, эшитганимам йўқ, деди. Яна бир кун, уни турмага қамашибди, терлама касалига йўлиқиб, қамоқда ўлибди, деган гап тарқалди...
- Ильинична бошини қути солиб, зилдай оғир ва томирлари ўйнаб кетган қўлларига узоқ тикилиб қолди. Қампирнинг лаблари маҳкам қимтинган, салқиган юзида ҳеч қандай ўзгариш кўринмасди; бироқ тўсатдан қорамагиз бетлари чўғдай қизариб, қош-қовоқлари пирпир уча бошлади. Утдай ловиллаб ёнган ёшсиз кўзларини Аксинъяга тикиб, хириллаган овоз билан шундай деди:
- Ўлганига ишонмайман! Сўнгги ўғлимдан ажрашим сира мумкинмас! Худонинг қаҳри келадиган иш қилганим йўқ!... Беш кунлигим ё бор, ё йўқ... Саноғлик куним қолди-ю, лекин дунёда мен тортмаган азоб қолмади!.. Гриша албатта тирик! Дилем башорат бериб турибди, демак, у тирик, меҳрибоним тирик!
- Аксинъя индамай, юзини четга бурди.
- Емакхона ичи анчагача жимжит бўлиб қолди, сўнгра шамол даҳлиз эшигини очиб юборди-да, Доннинг нарёғидаги теракзорда тошқин сувнинг шовиллагани, ёввойи ғозларнинг безовта бўлиб ғафиллагани эшитилди.

Аксинья эшикни беркитиб печга суюнди.

— Сиз унинг учун ташвишланманг, бувижон, — секингина деди у. — Ундай азаматни дард енголарми-ди? У жуда бақувват, метиндан. Ундайлардан ўлим қочади. У энг қаттиқ аёздаям йўлда қўлқопсиз юра-веради...

— Болаларини эсга олдими ҳеч? — ҳорғин сўради Ильинична.

— Сизниям, болаларниям кўп эслади. Айтгандай, улар соғ-саломат юришибдими?

— Юришибди туппа-тузук. Пантелей Прокофьевич бўлса, ўша ёқда қазо қилди. Мана энди ёлғиз қолдик...

Аксинья чўқиниб олди, лекин кампирнинг, эри ўл-ганлигини бу қадар вазминлик билан куюнмасдан айтганига ўзича жуда ҳайрон қолди.

Ильинична столга суюниб зўрға ўрнидан турди.

— Сеникида кўп ўтириб қолдим, қоронғиям тушди.

— Утира туринг, бувижон!

— Уйда Дуняшка ёлғиз, боришим керак. — Ильинична бошидаги рўмолини тузатаётуб, емакхонага кўз югуртириди, сўнgra юзини буриштириб: — Печканг тутар экан. Жўнаётганингда бирон кишига уйингни топшириб кетсанг бўларкан асли. Хайр, яхши қол! — деди-да, эшик тутқичидан ушлаб кетига қарамасдан, Аксиньяга тайинлади: — Жойлашиб олганингдан ке-йин бизниги кириб тур. Григорий тўғрисида бирон гап эшитсанг менга билдиргин.

Шу кундан бошлаб Мелеховлар оиласи билан Аксинья орасидаги муносабат тубдан ўзгарди. Григорийнинг ҳаёти тўғрисида хавотирланганлари уларни бир-бирларига яқин қариндош қилиб қўйди. Эртаси куни эрталаб Дуняшка, ҳовлида юрган Аксиньяни кўриб чақирди-да, четан девор ёнига югуриб борди, Аксиньянинг озғин кифтларидан қучоқлаб, меҳрибонлик билан жилмайди:

— Вой-бўй, жудаям озиб кетибсану, Ксюша! Қуруқ суюгинг қолибди.

Аксинья ҳам жилмайди, бўйи етган қизнинг қип-қизил лоладай гуллаган юзига, ҳуснига ҳаваси келиб тикилди.

— Бундай турмушдан озмоқ тугул тўзиб кетарсан, — деди.

— Кеча ойим сенинг олдингга кирдими? — негадир пичирлаб сўради Аксинъядан.

— Кирди.

— Ўзим ҳам билувдим сеникига борганини. Гришани сўрадими?

— Ҳа.

— Йиғламадими?

— Йўқ, кампирнинг чидами зўр.

Дуняшка Аксинъядан кўзини олмай ёрилиб гапира бошлиди:

— Йиғласа яхши бўларди, қайтага юрагини бўшатиб оларди... Биласанми, Қсюша, шу қиши ичи у жудаям ғалати бўп қолди, бутунлай бошқача бўп қолди. Дадамнинг хабари келганда, мен, юраги тўхтаб қолади энди, деб жудаям қўрқсан эдим, бироқ кўзидан ёш ҳам чиқмади. Фақат: «Жойи жаннатда бўлсин, азобдан қутулдй, шўрлик...» деди холос. Ўша куни кечгacha ҳеч ким билан гаплашмади. Мен у ёғидан ўтиб, бу ёғидан ўтиб, гапга солиб кўрдим — чурқ этмайди, ёнига йўлатмайди холос. Ўша куни мен бўлганимча бўлдим! Қечқурун молларнинг тагини тозалаб, қўрадан уйга қайтиб келдиму: «Ойижон, кечки овқатга бирор нарса пиширайликми?» — деб сўрадим. Ана шундан кейин кўнгли очилиб гапирди... — Дуняшка чуқур нафас олди ва аллақаёқларга тикилиб:

— Григорий ўлганми? Одамларнинг гапи ростми? — деб сўради.

— Билмайман, жонгинам.

Дуняшка синчковлик билан Аксинъяга ёндан қаради, яна хўрсиниб қўйди.

— Ойим уни соғиниб, адойитамом бўлди! Ҳар доим уни: «кенжатоим» деб тилга олади. Лекин ўлганига сира ишонмайди. Биласанми, Қсюша, агар ўлгани рост чиқса, Гришанинг ҳажрида у ҳам ўлади. Ҳозир қуруқ сояси қолган, суюнган тоғи — Григорий, фақат шунинг илинжида тирик юрибди. Шу кунларда неваралариниям ёқтирмай қўйди, ишгаям қўли бормай қолди. Ўзинг бир ўйлаб кўр, оиласиздан бир йилда тўрт киши...

Юраги эзилган Аксинья Дуняшканинг дардига малҳам бўлгиси келиб четан девордан энгашиб, уни маҳкам қучоқлади-да, юзидан ўпид олди.

Ойингни бирор нарсага алаҳситиб овунтиргин, она қизим, кўп қайғуравермасин.

— Нима билан овунтирай, ахир! — Дуняшка рў-молининг учи билан қўэ ёшини артди: — Бизникига кириб, ўзи билан гаплашсанг, анча кўнгли кўтарилади. Бизлардан аразлаб ўзингни обқочаверишинг яхшимас!

— Кираман, вақти билан, албатта кираман! — деди Аксинья.

— Эртага мен далага жўнасам керак. Аникушканинг хотини билан шериклик қўш ҳайдаб, лоақал, икки десятина бўлсаям буғдой сочмоқчимиз. Сен ҳам ўзингга пича сочиб олмайсанми?

Аксинья ғамгин жилмайди:

— Менга ким қўйибди деҳқончиликни. Уловим ҳам йўқ, керагиям йўқ бу савдони. Усиз ҳам бир куним ўтар.

— Степанингдан ҳеч дарак борми?

— Йўқ, — бепарволик билан жавоб берди Аксинья ва беихтиёр: — Унинг учун қайғураётганим ҳам йўқ, — деб юборди. Тўсатдан оғзидан чиқиб кетган бу сўздан ўзи хижолат бўлди, лекин хижолатини хаспўшлаш учун шоша-пиша: — Хайр, она қиз, мен кета қолай, бориб уйимни йифиштириш керак, — деди.

Дуняшка гўё унинг саросималикка тушганини сезмагандай, жўрттага четга қараб гапини давом эттирди:

— Бирпас сабр қил ахир, сенга бир илтимосим бор: бизга қарашиб юборолмайсанми? Ер ўтиб кетяпти, иккаламиз сепиб улгурулмасмиз, деб хавотирдаман, бутун бошлиқ қишлоқда иккита эркак бор холос, улар ҳам чўлоқ.

Аксинья бажону дил розилик берди, Дуняшка хурсанд бўлиб йифиштирингани кетди.

У кун бўйи югуриб-елиб далага жўнаш учун тайёргарлик кўрди: Аникушканинг хотинини ёнига олиб, уруғлик буғдойни элаб тозалади, сиҳмолаларни тузатди, арава ғилдиракларини мойлади, сеялкани тахт

қилиб қўйди. Кечқурун тозаланган буғдойдан пичасини рўмолига туғиб, қабристонга борди-да, Петро. Наталья ва Даръянинг қабрлари устига сочди. Дуняшкага ҳали ҳам ёш бола сингари соддалигини қўймай: эрталаб қушлар учуб келиб, бу донларни териб еяётганда, уларнинг чуғурлашган шодиёна овозидан ўликлар хушнуд бўлади, деб шонарди.

* * *

Фақат тонг отар пайтидагина Дон атрофи бир оз жимигандай бўларди. Тошқин босган ўрмонда сув шувиллар, теракларнинг оч яшил тусдаги таналарини ювиб, сув ичида қолган дараҳтларнинг учини чайқалтиради; тошқин кўллардаги қамишлар сувга салом бериб, секин-аста шитирлашарди, сув тошиб кўл бўлиб қолган жойларда ва ҳалқа бўлиб айланётган камарлар устида юлдузли осмоннинг фира-шира шуъласи акс этар ва ўша ёқдан — ёввойи ўрдакларнинг секин-аста бир-бирларини чақиришгани, эркак ўрдакларнинг уйқу аралаш чуриллашгани ва аҳён-аҳёнда тунаб қолган ўткинчи оққуларнинг қўнғироқдай жаранглаган овозлари эштиларди. Баъзан ўйноқилаб юрган балиқлар сувни шалоплатарди; танга-танга бўлиб йилтираган сув сатҳи баъзан бирданига тўлқинланар, ўшанда паррандалар безовта бўлиб, ғафиллашиб қоларди. Сўнgra, Дон атрофини яна сукунат қопларди. Лекин тонг отиб, бўр тоғларининг чўққиси қизариб, энди ёришай деганда пастдан яна шамол турарди. У кучининг борича ёпирилиб, дарё оқимиға қарши эсарди. Шундан кейин Донда одам бўйи баравар тўлқин кўтарилар, ўрмондаги тошқин сув шалоплар, дараҳтлар чайқалиб нола қиласади. Шамол кун бўйи қутуриб, ярим кечага яқин аранг тинарди. Шу аҳвол бир неча кунгача давом этди.

Даштни бошдан-оёқ кўкиш туман қоплаб олди. Ернинг тоби ўтиб кетди, кўкатлар ўсишдан тўхтади, шудгор қилинган жойлар қатқалоққа айланди. Кундан кунга ернинг нами қочарди, лекин биронта татарсклик эркак далада кўринмасди. Бутун бошлиқ қишлоқда атиги бир нечта мункайган чол қолган, уйи-

га қайтган казакларнинг ҳаммаси касал, совуқ чалған өдамлар бўлиб, ишга ярамасди, шунинг учун далада фақат аёллар билан ўспирин болаларгина ишлашарди. Ҳувиллаб қолган қишлоқда шамол қутуриб, чангларни учирар, дераза қопқоқларини тарақлатар; бостирма томларининг похолини тўзитарди. «Бу йил донсиз қоладиган бўлдик, — дерди қариялар. — Далада хотин-халаждан бошқа одам йўқ, уч уйдан биттаси уруғ сочяпти холос. Ер ўзидан ўзи ҳосил бермайди...»

Далага чиққанларининг эртаси куни, кун ботар маҳалда Аксинья ҳўқизларни суғоргани ҳовузга ҳайдаб борди. Тўғон ёнида Обнизовнинг ўн яшар ўғли, эгарлоғлик отни жиловидан ушлаб туради. От лабларини қимирлатиб ковшанарди, кул ранг духобага ўхаш тумшуғидан қатра-қатра сув томарди, отдан тушган бола эса ўйин билан овора эди: сувга кесак отарди-да, ҳалқа-ҳалқа бўлиб сув бетида тарқалган доирачаларни томоша қиласарди.

— Сен қаёққа бормоқчисан, Ванятка? — сўради Аксинья.

— Ҳеч ёққа, ойимга овқат обкелдим.

— Қишлоқда нима гап?

— Ҳеч гап йўқ. Герасим бува бугун кечаси тўрsavatminam ка-а-ат-такон зогора балиқ тутиб олди. Иннайсуғун, чекинган Фёдор Мельников қайтиб келди.

Бола оёғининг учида чўзилиб, от сувлигини солди-ю, ёлидан тутамлаб туриб, лип этиб эгарга чиқиб олди. Ҳовуз ёнидан жўнагандан у ўз ишига пишиқ ҳўжайнинлардек, отни секин юргизди, бироқ нарироқ бориб олгач, кетига бурилиб Аксинъяга бир қаради-ю, шундай тез ҳайдадики, ранги ўнгган кўк кўйлагининг орқаси шамолда ногора бўлиб кетди.

Ҳўқизлар сув ичиб бўлгунча Аксинья тўғон устига чўзилиб ётиб олди, ётган жойида қишлоққа боришга аҳд қилди. Мельников сафдаги казаклардан бўлгани учун Григорий тўғрисида бирор нарса билиши керак эди. Аксинья ҳўқизларни чайлага ҳайдаб келгаёт, Дуняшкага:

— Қишлоққа бораман, эртага барвақт қайтиб келаман, — деди.

— Нега энди?

— Ишим бор.

Эрталаб Аксинья қайтиб келди. У, қўлидаги чивиқ-ни ўйнаб, ҳўкиз қўшаётган Дуняшканинг олдига борди; бироқ унинг қошлари чимирилган, лабининг четлари буришган эди.

Аксинья қисқагина қилиб:

— Фёдор Мельников келибди. Шунга борувдим, Григорийни сўрадим. Ҳеч хабари йўқ экан, — деди-да, шартта бурилиб, сеялка ёнига кетди.

Дон сепиш тамом бўлгандан кейин Аксинья рўзгор ишлари билан шуғулланди: полизга тарвуз экди, уйини шуваб, оқлаб олди, бостирма томини похол билан қўлидан келганча ёпди. Иш билан овуниб кунлар ўтаверарди, бироқ Григорий ҳаётмикан деб хавотирланиб, Аксинья бир лаҳза тинч юролмасди. У Степани эслагиси келмасди ҳам, негадир, унинг келишидан келмаслигига кўпроқ ишонарди, лекин казаклардан биронтаси қишлоққа қайтса, олдин, Степани кўрмадингизми, деб сўрар, ана шундан кейин секин-аста уни гапга солиб Григорий тўғрисида бирор нарса билишга ҳаракат қиласди. Икковининг орасидаги алоқани қишлоқда ҳамма биларди. Ҳаттоки энг фийбатчи хотинлар ҳам ҳозир уларни оғизга олмай қўйганди, шундай бўлсада, Аксинья ўз дардини бировга айтишга уяларди, фақат уйга қайтган камгап казак Григорийни тилга олмаган тақдирдагина Аксинья кўзларини сузиб, бир оз уялинқираб: «Айтгандай, бизнинг қўшнини, Григорий Пантелеевични ўша ёқларда учратмадингизми? — деб сўрарди, — онаси шўрлик жудаям хавотир, қуруқ сояси қолди...».

Лекин Дон армияси Новороссийскда таслим бўлгандан буён ҳеч ким Григорийни ҳам, Степани ҳам кўрмаган эди. Июнь ойининг охирларида, Доннинг нариги томонидаги Колундаево қишлоғидан бўлган Степанинг полкдоши Аксинъянинг олдига кириб келди. Анигини фақат шу одам гапириб берди:

— Степан Қrimга кетди, мен сенга ростини айтипман. Пароходга тушганини ўз кўзим билан кўрдим. У билан гаплашишнинг иложи бўлмади; шундай сурсур бошландики, одамлар минди-минди бўпкетди. — Григорий тўғрисида савол берилганда дудмал қилиб:

— Пристанда кўрдим, елкасида погон, юрувди, ке-йин ҳеч учратмадим. Кўпгина офицерларни Москвага обкетишиди, ҳозир унинг қаердалигини билиб бўлмайди... — деди.

Орадан бир ҳафта ўтгач, ярадор бўлган Прохор Зиков Татарскка кириб келди. Уни Миллерово станциясидан бирорнинг аравасига солиб юборишган эди. Аксиня бу хабарни эшитган заҳоти, соғаётган сигирига бузоқни қўйиб юборди-да, йўл-йўлакай рўмолини ўраб, шоша-пиша Зиковлар қўраси томон югурди. «Ҳеч ким билмасаям Прохор билади, анигини шу билиши керак албатта! Борди-ю, Григорий ўлди, десачи? Унда нима қиласман?» деган хаёллар ичидагўлини қўксига босар, хунук хабар эшитишдан қўрқиб, тобора юришини секинлатарди.

Прохор уни даҳлизда, чўлтоқ чап қўлини орқасига яшириб, илжайиб туриб қарши олди.

— Салом ойимбека! Салом! Тирик экансан-ку! Биз бўлса, ўша посёлкада сени қулоги остида ҳолдига чиқариб юрибмиз. Ҳей, бирам оғир ётган эдингки... Хўш, терлама касали сенга ёқибдими дейман, а? Буни қара, оқ поляклар мени боплади, оғзидан қони келсин. — Прохор қўқ гимнастёркасининг тугугли енгини кўрсатди. — Хотиним буни кўриши билан дод-вой қилди, мен унга: «Йиғлама, аҳмоқ, бошқаларнинг калласини олишяпти, шундаям гинг дейишмайди, бу қўл-ку, топилмас матахмас! — дедим. — Тез кунда ёғочдан ясад беришади. Ёғоч қўлдан совуқ ўтмайди, кесилса қон чиқмайди», — дедим. Бироқ ёмони шуки, ойимбека, бир қўллаб ўрганмаган одам жудаям қийналаркан. Шимимни тугмалолмайман, ана кўргилик! Киевдан то уйимга етгунча тугмаламай юравердим. Ана шармандавозлик! Сен ҳам менда бирон камчилик кўрсанг, айбга қўшмагин тағин... Қани, кир, ўтири, меҳмон бўл. Хотиним йўқлигига гаплашиб олайлик. У дажжолни мен самогонга юбордим. Эри бир қўлидан ажраб уйга қайтса-ю, хуш кепсиз деб олдимга қўядиган ҳеч нимаси йўқ. Эрларинг йўқлигига ҳамманг ҳам шунақасан, сенларни мен ҳамма найрангларингни яхши биламан, шайтоннинг урғочилари!

— Ундан кўра менга...

— Биламан, гапириб бераман. Мана бундай таъзим қил деб тайинлади. — Прохор ҳазилакам таъзим қилди-да, бошини кўтариши билан ҳайрон бўлиб қошларини чимириди: — Ана холос! Нега йиглайсан, эси паст? Хотинларнинг ҳаммаси шунаقا думижоз: ўлса, йиглашади, тирик қолса, яна йиглашади. Арт, кўзингни артиб ол, мунча обида қиласан? Тирик дедиму сенга, тирик, соғ-саломат, бўрсиқдай семириб кетган! Новороссийскда икковимиз ўртоқ Будённийнинг Отлиқ армиясига кирдик, ўн тўртинчи дивизияга. Бизнинг Григорий Пантелеевичимиз сотняни қабул қилиб олди, уларда эскадрон дейиларкан, мен ҳам ёнида эдим; шундай қилиб, Киев томон поход тартибида юриш бошладик. Оқ поляк аглаҳларни шундай адабини бердикки, асти қўяверасан, ойимбека! Уша ёққа кетяпканимизда Григорий Пантелеевич: «Немисларни чопдим, австрияликлар бошида қиличимнинг дамини синааб кўрдим, наҳотки энди, полякларнинг калласига қиличим ўтмаса? Уларнинг калласи русларникуга қараганда хомроқ бўлса керак, кесиш ҳам осондир, шундай эмасми?» — деб менга кўз қисиб кулади дeng. Қизил Армия сафига киргандан бери у жуда ўзгариб кетди, ахтадай семириб кетди, хушчақчақлигини айтмайсанми... Лекин баъзан сан-манга борган жойларимиз ҳам бўлди... Бир куни мен унга ҳазиллашиб: «Дам олиш ҳам керак, жаноби олий, ўртоқ Мелехов!» — десам борми, кўзларини менга ўқрайтириб: «Сен бунаقا ҳазилингни қўй, йўқса, кети ёмон бўлади», — деб ўдағайлади. Қечқурун алланима тўғрисида мени ёнига чақирган эди, тилим қурғур қичиб, яна «жаноби олий» девордим... Бирданига маузерига ёпишиб қолди дeng! Ранги оқариб, бўридек тишларини тиржайтириди, оғзи тўла тиш, камида юзтacha бордир. Мен эгарга қапишиб, аранг кочиб қутулдим. Сал бўлса, шартта отиб ташларди, бу ўзи шунаقا баттол!

— Отпуска олиб, бир келиб кетса... — деб Аксинья энди оғзини очганда, Прохор унинг гапини бўлди:

— Бу тўғрида сира оғиз очма! Ўтмишдаги жиҳоятларим учун иш кўрсатиб ўзимни оқламагунча сафдан қайтмайман, дейди. Унинг учун иш кўрсатишдан осон

нарса йўқ... Бир қишлоқнинг ёнида у бизни ҳужумга олиб кирди. Кўз олдимда тўртта уланни чопиб ташлади. Бу лаънати ёшлигидан чапақай эмасми, икки ёқлама қилич солиб тўртталасиниям саранжом қилди... Жангдан кейин ўртоқ Будённий ўзи бориб унга қўл берди, эскадронига ва ўзига ташаккур билдири. Кўрдингми, Пантелевичинг ана шундай қойил қиляпти ҳозир!

Аксинья бутунлай эси оғиб тинглар эди... У фақат Мелеховлар қўрасига етгандагина ўзига келди. Даҳлизда сут сузаётган Дуняшка бошини кўтариб сўради:

— Томизфига келдингми? Обориб бераман деб эсимдан чиқибди, — деди. Лекин Аксинъянинг кўзлари севинчдан ёшланиб чақнаганини кўргач, ҳамма гапни тушунди.

Аксинья Дуняшканинг кифтига ўтдай ловиллаган юзини қўйиб, севинчидан нафаси тиқилиб шивирларди:

— Тирик экан, соғ-саломат... Салом юборибди... Югор! Тез бориб ойингга хабар қил!

II

Езга бориб, чекинган казаклардан ўтизтачаси Татарска қайтиб келди. Буларнинг кўпчилиги чоллар ва катта ёшдаги аскарлар эди, касал ва ярадорларини ҳисобга олмагандан, улар орасида ёшлар ва ўрга яшарлар йўқ эди ҳисоб. Буларнинг бир қисми Қизил Армия сафида, қолганлари Врангель полклари билан Кримга чекиниб, Донга янги поход бошланишини кутаётган эди.

Чекинганларнинг ярмидан кўпи ёт элларда абадий қолиб кетди: баъзилари терлама касалидан ўлди, баъзилари Кубандаги сўнгги жангларда ҳалок бўлди, обоздан ажралиб адашган бир неча киши Маничининг нарёғидаги даштда совқотиб ўлди, иккитаси қизиляшилларнинг қўлига тушиб, дом-дараксиз кетди... Татарскик казаклардан аллақанчаси нест-нобуд бўлган эди. Аёллар қаттиқ ваҳима ичиди интизорликда кунни кеч қилишарди, ҳар гал сигирларини подадан кутиб олиш учун чиқсанларида кафтларини пешоналарига

қилиб, олисга тикилганларича узоқ туриб қолишарди, мабодо ғира-шира кўкимтири оқшом қоронфиси чулғаган йўлда биронта кеч қолган одамнинг қораси кўринмасмикан, деб кўз тутишарди.

Уст-боши жулдур, битлаб, озиб кетган, лекин болачасини соғинган биронта казак уйга қайтиб келса борми, бутун уй ичи шодликка тўлар, югур-югур бошланарди: қоп-қора кирга ботган жаҳонгашта учун дарров сув иситишар, болалари «сан қуй, ман қила-ман» деб талашиб дадаларига хизмат қилишар, унинг ҳар бир ҳаракатини мутелик билан кузатиб туришарди, хотини эсанкираб қолганидан гоҳ столга дастурхон солмоқчи бўлар, гоҳ эрининг тоза кўйлак-иштонини олиб бергани сандиқ томон югуради. Ўша топда аксига кўйлаги тушкур ямалмаган бўлиб, бечора хотин шошганидан қўллари қалтираб игнага ип ўтказолмасди... Шундай шодиёна дақиқада ҳатто, олисдан эгасини таниб, унинг қўлларини ялаб, остонаягача эргашиб келган ити ҳам уйга кирса индашмасди; ҳаттоки, болалари бирон идишни синдиришса ёки сутни тўкиб юборишса ҳам, тўполон қилишса ҳам жазо беришмасди... Хўжайн чўмилиб, кийимини алмаштириб бўлгунича, уй ичи хотинлар билан лиқ тўларди. Уйига қайтган бу казак олдига ҳар ким ўз жонкуяринг тақдирини билгани келар ва унинг ҳар бир сўзини зўр диққат билан юрагини ҳовучлаб туриб тингларди. Сал вақтдан кейин хотинлардан биронтаси ҳовлига чиқарди-ю, кўз ёшига тўлиб-тошган юзини кафтлари билан тўсиб, кўр бўлган одам сингари, юрган йўлини билмасдан, тор кўча бўйлаб кетаверарди, ниҳоят қишлоқдаги кулбаларнинг бирида яна битта бева хотиннинг аза тутиб фарёд чеккани, унга қўшилиб йиғлаган етимчаларнинг ноласи эшитиларди. Ўша кунлари Татарскда аҳвол шундай эди: бир уйда шодлик, иккинчисида оғир мусибат...

Соқолларини олиб хийла яшарган уй эгаси эрталаб кун чиқмасдан туриб оларди-да, рўзгорини айланниб, энг аввал нимани тузатиш, нима қилиш кераклигини аниқлаб оларди-да, нонуштадан кейин дарҳол ишга тушарди. Бостирма тагида, бирор соя-салқинда ранда қиртиллагани ё эса болта тақиллагани эшити-

либ, бу ҳовлида ишсиз туролмайдиган қўли гул эркак — уй эгаси қайтиб келганидан дарак берарди. Лекин кеча эри ўлганлигини эшитган хотиннинг уйида ва ҳовлисида қабристон сукунати ҳукм сурарди. Бир кечада улғайиб эслари кирган етимчалар, ғам ўтида чурқ этмай чўзилиб ётган оналарининг бошида шумшайиб туришарди.

Ильинична казаклардан биронтасининг уйга қайтганини эшитса:

— Меники қачон келаркин? Бошқалар келяпти, меникининг дараги йўқ, — дерди.

— Ёш казакларга жавоб беришмайди, ахир, шунитушунмайсизми, ойижон? — зардаси қайнаб жавоб берарди Дуняшка.

— Нега жавоб беришмас экан? Тихон Герасимович? У Гришадан бир ёш кичик-ку!

— У ахир ярадор, ойижон!

— Ярадор-парадормас! — дерди Ильинична. — Кеча мен уни тақачининг ёнида кўрдим, балодай юрибди. Ярадор унақа бўлмайди.

— Ярадор бўлгани рост, тузалгунча дам олишга келган.

— Менинг ўғлим ярадор бўлмабдими? Аъзойи бадани илма-тешик, сенингча, унга тузалиш, дам олиш керак эмасми?

Дуняшка турли ўёл билан онасига Григорийнинг ҳозир келолмаслигини тушунтиришга уринса-да, Ильинична ҳеч қандай важни тан олмасди.

— Овозингни ўчир, эси паст! — деб жекиради у Дуняшкага. — Мен ҳам сенчалик биларман, онангга ақл ўргатишга ҳали ёшлик қиласан. Келади дедимми, демак, келади. Жўна, жўна, сен билан адидади айтишиб ўтиришга вақтим йўқ!

Кампир ўғлига мунтазир эди, уни икки кўзлаб кутар, дам-бадам эсга оларди. Борди-ю, озиб-ёзиб Мишатка гапга кирмаса, у дарҳол пўписа қила бошларди: «Сени қараб тур, даданг келганда айтаман, бирам адабингни берсинки, шумтака!» — дерди. Дера-за рўпарасидан ўтган арава ёнига янги тахталар қоқилганини кўриб: «Эгаси уйдалиги аравасидан кўриниб турибди, лекин меникидан дарак йўқ, бирор

уйдан кўнглини совутдими, билмадим...» — деб хўрсинарди. Ильинична азалдан тамаки ҳидини ёқтирас, кашандаларни доим емакхонадан қувиб чиқаради, лекин сўнгги вақтларда бу тўғридаги фикри ҳам ўзгарди: «Сен бориб, Прохорни чақириб кел, — дерди у кўпинча Дуняшкага. — Тамаки чексаям майли, гаплашиб ўтирсин, назаримда уйимиздан ўлик ҳиди келяпканга ўхшайди. Гриша хизматдан қайтса, уйимиз ҳам уйга ўхшаб казак ҳидига тўларди...» Қампир ҳар куни овқатни кўпроқ пиширади ва овқатланиб бўлганларидан кейин ортган шўрвани декчага солиб, печга қўярди. Дуняшка нега бундай қилганини сўраса, Ильинична таажжубланиб: «Обқўймасам бўладими, ахир? Балким бугун аканг келиб қолар, иссиққина тайёр турса, дарров ейверади, совуган нарсани иситиб бергунимизча, қорни оч ўтирадими қараб...» — дерди. Бир куни Дуняшка полиздан қайтгач, емакхонага кирди. Григорийнинг эски фуражкаси билан эски камзули қозиқда осиғлиқ турганини кўриб, савол назари билан онасига қаради, қампир айбдор кишидай ожизона илжайиб: «Мен илиб қўйдим, Дуняшка, сандиқдан олдим... — деди. — Ҳовлидан уйга кирганимда шунга кўзим тушса, пича овунаман... Ўзини кўргандай бўламан...»

Григорий тўғрисида она ҳасратини эртаю кеч эши тавериб Дуняшка безор бўлди. Бир куни у чидай олмасдан онасини жеркиб ташлади:

— Бир гапни ҳадеб қайтаравериш жонингизга тегмадими, ойижон? Гапиравериб ҳаммани безор қилдингиз. Қачон кўрсам: Гриша, Гриша...

— Ўз ўғлим тўғрисида гапириш нега жонимга тегсин? Олдин сен ҳам бола туғиб кўр, иннайкейин биласан... — деди секингина Ильинична.

Шу гапдан кейин қампир фуражка билан камзулни қозиқдан олиб меҳмонхонага кетди ва бир неча кунгача Дуняшканинг олдида ўғлининг номини тилга олмади. Лекин пичан ўриш пайти яқинлашганда Дуняшкага шундай деди:

— Мен Гришани эсласам жаҳлинг чиқади, хўщ, усиз нима қиласиз энди? Шунисини ўйлаб кўрдингми, эси паст? Ҳадемай ўроқ маҳали келади, лоақал

хаскашларни тузатадиган одам йўқ... Ҳамма асбоб синиб ётиди, сенминам менинг қўлимдан ҳеч нарса келмайди. Эгасиз қолгандан кейин аҳвол шу-да...»

Дуняшкага индамади. Рўзгор масаласи онасини унча ташвишлантирмаслигини у яхши биларди, бу гаплар нинг ҳаммаси фақат Григорий тўғрисида гап қўзғаш, ўзини овунтириш учун бир баҳона эканини ҳам яхши тушунарди. Ильинична ўғлини жуда-жуда соғинган ва буни ортиқ яшира олмасди. Кечқурун у овқат ҳам емади, Дуняшканинг—тобинг қочдими? — деган саволига рაъйсизгина жавоб берди:

— Мен қаридим... Гришанинг ҳажрида юрагим ёнади, холос... Шундай оғрийдики, олам қоронфилашиб, қўзимга ҳеч нарса кўринмайди, ҳамма нарсадан кечворгим келади...

Бироқ Мелеховлар қўрасида хўжайнлик қилиш Григорийга насиб бўлмади... Пичан ўриш бошланишидан олдинроқ Мишка Кошевой фронтдан қайтиб келди. Мишка узоқ қариндошларининг бириникида қўниб, эрталаб Мелеховлар уйига келди. Меҳмон боодоблик қилиб эшикни тақиллатган пайтда, Ильинична овқат пишираётган эди. Жавоб бўлавермагандан кейин Мишка ошхонага кириб, эскирган солдатча фуражкасини олди-да, Ильиничнага кулимсираб салом берди:

— Салом, Ильинична хола! Мени кутмовдингизми?

— Салом. Сени нега кутарканман, қариндошим-мидинг? Ёки бузофимга амакивачча бўласанми? — деб қўпол жавоб қилди Ильинична, нафрат билан Кошевоининг юзига тикилиб.

Бундай муомаладан заррача ранжимаган Мишка:

— Унчалик ерга урманг... Ҳар ҳолда танишлигимиз бор, — деди.

— Ҳа, таниш эдик.

— Кириб ҳол-аҳвол сўраш учун танишликнинг ўзиям кифоя. Мен сизникида турмоқчи эмасман.

— Бир ками шу қолувди, — деди-да, Ильинична меҳмондан юз ўғириб, қозон-товоқ билан овора бўлди.

Мишка унинг гапига эътибор бермасдан ошхонани дикқат билан томоша қиласади:

— Сизлардан бир хабар олай деб кирудим... Кўришмаганимизга бир йилдан ошди.

— Сени соғиниб кўзимиз учиб тургани йўқ,— деб пўнғиллади Ильинична идиш-товоқни тарақлатиб.

Меҳмонхонани йиғишираётган Дуняшка, Мишканинг товушини эшитиб, оқариб кетди, унсиз қарсурди. Курсига омонат ўтирган ҳолда, ошхонада бўлаётган можарога қимириламай қулоқ солди. Дуняшканинг гоҳ икки бети чўғдай қизарар, гоҳ ранги ўчиб, шу қадар оқариб кетардики, ингичка қирра бурнининг устига узунасига оқ чизиқ тушиб қоларди. Бечора қиз, Мишканинг дадил қадамлар билан юриб, фижирлаган курсига бориб ўтирганини ва гугурт чаққанини эшиди. Меҳмонхонага папирос тутуни кирди.

— Чол ҳам қазо қилибди, а?

— Қазо қилди.

— Григорий-чи?

Ильинична анчагача индамади, ниҳоят истар-истамас:

— Қизилларда хизмат этяпти. У ҳам сенга ўхшаб, шапкасиға юлдуз тақиб олган,— деди.

— Аллақачон тақиб олиши керак эди...

— Қачон тақишини сендан сўрамайди.

Ниҳоят Мишка:

— Евдокия Пантелеевна қани? — деб сўради, унинг хавотирлангани овозидан аниқ билиниб турарди.

— Ўйни йиғиширияпти. Жудаям саҳархез меҳмон экансан, эси бор одам сал кечроқ йўқлайди.

— Бизда эс нима қилсан. Соғингандан кейин эрта ё кеч деб ўтирмай, тўғри келавердим.

— Ҳой, Михаил, фижинимга тегмасанг бўларди кўп.

— Мен фижинингизга тегадиган бирон иш қилдими, холажон?

— Ҳа!

— Қани айтинг, нима қилибман?

— Мана шу гапларинг фижинимга тегяпти.

Дуняшка Мишканинг оғир нафас олганини ҳам эшиди. Ортиқ чидаб ўтиrolмасдан сакраб ўрнидан турди-да, юбкасини тузатиб, ошхонага кирди. Ранг-

лари саргайган, таниб бўлмайдиган даражала озиб кетган Мишка дераза ёнида папирос чекиб ўтиради. Дуняшкани кўрган заҳоти хомуш кўзлари чақнаб кетди, юзлари бир оз қизаргандай бўлди. Шоша-пиша ўрнидан туриб, хириллаб сўрашди:

— Салом!

— Салом...— деди Дуняшка секингина.

— Бор, сув обкел,— деб буюрди ўша заҳотиёқ Ильинична қизига ўқрайиб. Мишка чурқ этмади, папиросини бармоғи билан ўчириб, сўради:

— Менга мунча зарда қиласиз, холажон? Мен ни ма, арпангизни хом ўрдимми?

Ильинична, худди ари чаққандай сапчиб тушиб, унга бурилиб қаради.

— Қайси юзинг билан бизникига қелдинг ўзинг, виждонсиз?—деди.— Тағин уялмай менга савол берасан, а? Жаллод!..

— Мени нечук жаллод дейсиз?

— Асл жаллодсан! Петрони ким ўлдирди? Сен эмасми?

— Мен.

— Хўш! Шундан кейин сени ким дейиш мумкин? Тағин бизникига келиб... ўтирганингни қара... гўёки биз...— Ильиничнанинг нафаси қайтиб, дами чиқмай қолди, ниҳоят ўзига келиб, яна давом этди:— Мен унинг онасиман ахир, ё йўқми? Қайси юз билан кўзимга қарай оласан.

Мишканинг ранги оқариб кетди. Шу гапни юзига солишларини у биларди. Ҳаяжондан тили тутила-тутила:

— Тилим қисиқ эмас!— деди.— Хўш, агар Петро мени қўлга туширса, биласизми нима қиласарди? Пешонамдан ўпид қўйворарди деб ўйлайсизми? Йўқ, у мени ўлдиради. Ўша жар тепасига биз бир-биримиз билан оғиз-бурун ўшишкани борганимиз йўқ? Ўз оти билан уруш-да!

— Коршунов қудамни-чи? Беозор бир чолни ўлдиришният уруш дейиладими?

— Бўлмаса-чи?— таажжубланди Мишка.— Албатта уруш дейилади. Бу, беозорларни мен хўп биламан! Бунақа беозордан баъзиси уйида шимини ямаб ўти-

риб ҳам, позициядаги ўнта аскарга қараганда кўпроқ зиён етказиши мумкин... Казакларни бизга қарши қўзғатган худди ўша «беозор» Гришак бува бўлади. Шуларнинг касрига бошланди бу уруш! Ким бизга қарши ташвиқот юргизади? Шулар, худди ана шу беозорлар. Сен мени «жаллод» дейсан тағин... Топган жаллодингни қара-ю! Мен илгари, қўзичоқ ёки чўчқа боласини сўя олмасдим, ҳозир ҳам сўйишга қўлим бормайди. Бирор сўяётган бўлса, тепасида туролмай, қулоғимни беркитиб, қўзимам кўрмасин, қулоғимам эшитмасин деб нарироққа қочардим.

— Нега бўлмасам қудами...

— Қудам, қудам дейсиз холос! — зардаси қайнаб унинг гапини бўлди Мишка.— Унақа қудани ер ютгани яхши, фойдасидан кўра зарари кўпроқ. Мен унга айтдим: чиқ уйдан дедим, чиқмади, ётволди чўзилиб. Бу лаънати чоллардан аламзада эдим. Қоним қизишмаса, мол сўйишга қўлим бормайди, аммо, лекин, мени кечирасиз, ана шу қудангиз ва унга ўхшаш ифлос душманларни тап тортмай ўлдиравераман! Ер юзини ҳаром қилин бундай душманларга менда раҳм-шрафкат йўқ!

— Ана шу шафқатсизлигинг учун чўпдай озиб кетгансан,— ачитиб гапирди Ильинична.— Виждон азоби осон эмас...

— Виждоннинг бунга алоқаси йўқ! — беғараз илжайди Мишка.— Битта ифлос чолни деб виждон азобига тушадиган аҳмоқ мен эмас. Мени безгак қийнади, тутавериб силламни қуритди, йўқса мен уларни-чи, онажон...

— Мен сенга онамасман! — Ильинична тутақиб кетди.— Қанжиқ итни она деб чақир!

— Оғзингга қараб гапир! — деди Мишка, ғазабидан кўзларини қисиб.— Мен сенинг малайнинг эмасманки, ғиди-бидингни индамай эшитсам. Мен тўғрисини айтдим, хола. Петро учун мен жавобгармасман. Ўғлинг қидирганини топди.

— Сен қотилсан! Жаллодсан! Йўқол бу ердан, дийдорингни кўришга тобим йўқ! — деб қарғади Ильинична.

Мишка яна папирос чекди, вазминлик билан:

— Хўш, қудаваччангиз Митрий Коршунов-чи, у қотил эмасми? Григорий-чи?— деб сўради.— Ўғлинг тўғрисида нега индамайсан? Учига чиққан ҳақиқий қотил ўша бўлади!

— Ёлғон гапирма!

— Кечадан бери рост гапирадиган бўп қоганман. Қани айт-чи, у ким? Одамларимиздан қанчасининг ёстигини қуритганини биласанми ўзинг? Қани, гапир! Модомики сен урушда қатнашганларнинг барисига шунаقا лақаб қўядиган бўлсанг, демак, ҳаммамиз ҳам жаллодмиз. Масала фақат кимнинг жонини олиш ва нима учун олишда,— тагдор қилиб гапни тамомлади Мишка.

Ильинична индамади; лекин меҳмоннинг ҳаливери кетадиган сиёқи йўқлигини кўриб зарда билан:

— Бас энди! Сенминам гаплашиб ўтиришга вақтим йўқ, уйингга борсанг бўларди,— деди.

— Ўйимда сичқонлар ҳасса таяниб юришибди,— деб истеҳзоли кулди Мишка.

Бундай гаплар ва қарфишлар билан Мишкани енгиб бўлмасди. Қутурган кампирнинг ҳақоратларига эътибор берадиган нозик табиатли кишилар хилидан эмасди у. Дуняшка ўзини севишини Мишка биларди, шундан бошқасини, шу жумладан кампирниям бир пулга олмасди.

Эртаси куни эрталаб Мишка яна келди, орада ҳеч гап ўтмагандай, салом бериб, дераза ёнига ўтириди-да, Дуняшканинг ҳар бир ҳаракатини кузата бошлади.

Ильинична унинг саломига жавоб ҳам бермасдан:

— Жудаям пашшахурда бўлиб қолдинг...— деб пўнгиллади.

Дуняшка қизариб-бўзариб, кўзларини ўқрайтириб онасиға тикилди-ю, лекин индамай ерга қараб олди. Мишка кулимсираб жавоб берди:

— Сенинг олдингга келганим йўқ, Ильинична хола, бекорга хуноб бўлма.

— Менга қолса, сени уйимга асти йўлатмасдим!

— Хўш, бўлмаса, қаерга борай?— деб жиддий сўради Мишка.— Қудаваччангиз Митрийнинг дастидан сўққа бошим қолди, кимсасиз кулбада ёлғиз ўзим ўтиrolмаяппан. Сизга ёқадими, йўқми, ҳар куни

уйингизга келавераман энди, холажон,— деб гапини тамомлadi-да, оёқларини кериб, эркинроқ ўтириб олди.

Ильинична диққат билан унга тикилди. Дарҳақиқат, уни осонлик билан уйдан ҳайдашнинг иложи йўқ эди. Мишканинг буқчайинқираган қад-қомати, эгилиган боши, қимтинган лаблари ва умуман бутун вожоҳати ўтакетган қайсарлигидан далолат берарди...

Мишка кетгандан кейин Ильинична болаларни ҳовлига чиқариб, Дуняшкага шундай деди:

— Минбаъд бу уйга қадам қўймасин. Тушундингми?

Дуняшка рўйирост онасига гикилди; ғазаб билан кўзларини сузиб, ҳар бир сўзни чертиб-чертиб гапиравкан, унинг Мелеховлар зотидан эканлиги яққол-кўринди.

— Йўқ! Келаверади! Тергаб бўпсиз! Яна келади!— деди-да, ортиқ чидай олмай, фартуғи билан юзини тўсиб, даҳлизга чопиб чиқди.

Ильинична хўрсиниб қўйди-да, дераза ёнига бориб ўтирди, бошини чайқаб, хиралашган кўзларини даштга тикканича, ер билан осмон туташиб турган ердаги қуёшда кумушдай товланиб ётган шувоқзорга тикилганича узоқ тикилиб қолди.

Она-бала ярашмасдан, бир-бири билан гаплашмасдан, кечга яқин Дон бўйидаги полизнинг қулаган чептан деворини тузатмоқда эдилар. Мишка келди. У Дуняшканинг қўлидан белкуракни олиб:

— Саёз қазлаяпсан. Шамол турса, яна қулайди, — деди-да, қозиқ ўрнини кавлай бошлади; сўнгра четанларни тиклаб, қозиқларга маҳкам боғлаб бўлгандан кейин кетди. Эрталаб у янги йўнилган иккита хаскаш ва паншаҳа учун даста келтириб Мелеховлар зина-пояси олдига қўйди; сўнгра Ильиничнага салом бериб, жиддий қиёфада сўради:

— Пичан ўриш хаёлларингда борми? Одамлар аллақачон Доннинг нарёғига ўтиб олишди.

Ильинична индамади. Онаси ўрнига Дуняшка жавоб берди:

— Дарёдан қандай қилиб ўтамиш! Қайиғимиз куздан бери бостирма тагида ётибди, бутунлай қовжираб кетган.

— Кўкламда сувга солиб қўйиш керак эди,—деди Мишка танбеҳ бергандай қилиб.— Балки, тирқишлирини лослаш керакдир? Қайиқсиз ҳеч ишларинг битмайди.

Дуняшка итоаткорлик билан, онам нима деркин дегандай, Ильиничнага қаради. Қампир бу гапларнинг унга мутлақо алоқаси йўқдай, индамай хамир қорар эди.

— Ўйларингда лос борми?— деб кулимсираб сўради Мишка.

Дуняшқа омборхонага бориб, нашапоядан тушган лосдан бир қучоғини кўтариб келди.

Мишка тушгача қайиқни таҳт қилиб, ошхонага кирди.

— Қайиқни сувга ташлаб қўйдим, ивиб ётсин. Тўнкага боғлаб қўйинглар, биронтаси судраб кетмасин тағин.— Яна сўради:— Холажон, пичан ўриш масаласида нима дейсиз! Ёки қарашиборайми! Барибир, шу кунларда мен бўшман.

Ильинична боши билан Дуняшкани кўрсатиб:

— Анавундан сўра,— деди.

— Мен уй бекасидан сўраяппан.

— Мен уй бекаси бўлмай қолдим...

Дуняшқа йиғлаб юборди, меҳмонхонага кириб кетди.

— Ундаи бўлса, қарашиборишим шарт,— деди Мишка қатъий қилиб.— Дурадгорлик асбобларинг қарерда? Сизга ҳаскаш қилиб бермоқчиман, эскилари ишга ярамай қолган бўлса керак.

Мишка бостирма тагига бориб, ҳуштак чалиб, ҳаскашга тиш йўна бошлади. Қичкнотй Мишатка унинг ёнидан кетмас, унинг кўзларига жавдираб тикилар:

— Михаил амаки, менга кичкина ҳаскаш қилиб беринг,— деб ялинарди,— бошقا ҳеч кимнинг қўлидан келмайди: бувим билмайди, аммам ҳам... Ёлғиз сиз биласиз, сиз жуда устасиз!

— Албатта қилиб бераман, адаш, худо урсин, қилиб бераман, лекин шарти шуки, сал нарироқ турасан, кўзингга қипиқ тушмасин тағин,— мийигида кулиб уни алдарди Кошевой, бироқ ичида: «Жудаям ўхшайди-я, бу жинқарча... Дадасининг ўзгинаси! Қош-кўзла-

ри, устки лабини жийириши — ҳаммаси ўхшайди... Зотига тортган-да!» деб таажжубланарди.

Михайло кичкнитой ўйинчоқ хаскаш ясашга кириши-ю, бироқ уни битиролмади: бирданига лаблари кў-кариб, сарғайган юзида ғазаб ва айни замонда итоаткорлик аломати пайдо бўлди. У ҳуштак чалишини йиғиштириди, пичоқни бир четга қўйди-да, бадани увишганлигидан кифтларини қимирлатиб керишиди.

— Михайло Григорич, менга биронта шолча то-пиб кел, адаш, мен ётаман,— деб илтимос қилди.

— Нега?— қизиқсиниб сўради Мишатка.

— Касал бўлгим келди.

— Нима учун?

— Э, елим экансан-ку, мунча суриштирасан, ахир...
Касал бўладиган вақт келди, ётишим керак! Тезроқ обкел!

— Хаскашим нима бўлади?

— Кейин қилиб бераман.

Мишканинг аъзойи бадани дағ-дағ титрарди. У тишлиарини такиллатиб, Мишатка келтирган шолча устига ётди, фуражкасини бошидан олиб, юзига қўйди.

— Бирпасда касал бўлдингми?— ачиниб сўради Мишатка.

— Ҳа, касал бўлдим.

— Нега титрайсан!

— Безгагим тутиб қолди.

— Нега бўлмаса, тишингни такиллатасан?

Мишка фуражка тагидан эзма адашига кўз қирида қараб, кулиб қўйди, унинг саволларига ортиқ жавоб бермади. Мишатка Кошевойга бир қаради-ю, капалаги учиб уйга югурди.

— Бувижон? Михайл амаким бостирма тагида чўзилиб ётволди, қалт-қалт қиласди, сапчиб-сапчиб тушади!

Ильинична деразадан қаради, стол ёнига келиб, алланималар тўғрисида ўйлаб анчагача индамай турриб қолди...

Мишатка унинг енгидан тортиб, сабрсизлик билан:

— Нега гапирмайсан ахир, бувижон?— деб қистарди.

Ильинична унга бурилиб қаради ва:

— Бор, эркатойим, кўрпани обориб бер имонсизга, устига ёпсин. Уни безгак тутяпти, шунақа касал бор. Кўрпани кўтара оласанми ўзинг?— Кампир яна дे-раза олдига бориб, ҳовлига қаради-да, шоша-пиша:— Тўхта, шошмай тур! Оборма, керак эмас,— деди.

Дуняшка ўзининг барра пўстинини Кошевойнинг устига ёпиб, қулоғига энгашиб алланималар дерди...

Безгаги тарқагандан сўнг Мишка қош қорайгунча пичан ўриш тайёргарлиги билан банд бўлди. Унинг дармони қуриган, ҳаракатлари сустлашган эди, ле-кин шундайлигига қарамай Мишаткага ваъда қилган хаскашни ясаб берди.

Кечқурун Ильинична овқатни келтириб, болаларни стол ёнига ўтқазди-да. Дуняшканинг юзига қарамасдан:

— Бор, чақир ановини... оти нимайди... келиб ов-қат есин,— деди.

Мишка стол ёнига келиб, чўқинмасдан букчайиб ўтири. Тери қуриб, йўл-йўл доф тушиб қолган сап-са-риқ юзидан чарчагани билиниб турар, қошиқни оғзига олиб борганида қўли билин-билинмас қалтиради. У кўнгли тортмагани учун овқатни кам ер, аҳён-аҳёнда стол атрофидагиларга бепарволик билан шунчаки қа-раб қўярди. Лекин Ильинична «жаллоднинг» нурсиз кўзлари ҳар гал Мишаткага тикилганда, негадир, жон-ланганини, чақнаб кетганини кўриб ҳайрон бўларди, меҳр-муҳаббат ва шавқ-завқ билан яшнаган кўзлари бир дам учқунланиб яна сўнар, бироқ лабининг икки бурчидан билин-билинмас табассум анчагача кет-масди. Сўнгра у кўзини кўтариб бошқаларга қарап ва ўша заҳотиёқ юзида бепарволик аломати пайдо бўларди.

Ильинична ер тагидан секин-аста Кошевойни кузат-та бошлади ва ўшандагина унинг касалдан чўпдай озиб кетганини пайқади. Чангдан бўзариб кетган гим-настёркаси остидан қобирғалари саналиб турарди, озиб-тўзиб кетганидан икки кифтининг икки чети туриб чиққан, ёш боланикдай ингичка бўйни, сарғиш тук босган кекирдаги жуда ғалати таъсир қолдиради... Кампир «жаллоднинг» букчайган қаддига, сарғайган юзига тикилган сайин, ўзидан-ўзи ўнғайсизла-

наётанини, қалбиди иккиланиш пайдо бўлганини аниқроқ сезарди. Бирданига Ильиничнанинг қалбиди, кўзига балодай кўринган бу одамга нисбатан шундай зўр меҳр-шафқат ҳисси уйғондикки (бу оналик ҳисси энг бағритош аёлларнинг ҳам кўнглини эритиб юборади), унинг таъсири остида бир тарелка тўла сутни Мишка-нинг олдига суринг қўйди-да:

— Ол, яхшилаб қорнингни тўйғазиб ол! Бираам озиб кетибсанки, қуруқ суюгинг қолибди... Тағин куёв бўламан дейди-я! — деб қўйди.

III

Қишлоқда Кошевой билан Дуняшка тўғрисида шивир-шивир гап бошланди. Жувонлардан бири пристанда Дуняшкані қўриб: «Михайлни хизматкорликка олдингларми? Ўйларингдан кетмайди сира...» деб пи-чинг қилди.

Ильинична қизи қанчалик ялиниб-ёлворса-да: «Бу тўғрида оғзингни очма, мен сени унга бермайман! Мендан фотиҳа оламан деб овора бўлма!» дерди ўжарлик қилиб. Ниҳоят, Дуняшка, ундан бўлса Кошевоиникига кетаман, деб кийим-кечагини йиғиштира бошлагандан кейин, Ильинична ўз шахтидан тушди.

— Ўйлаб кўрсанг-чи, ахир! — ваҳимага тушиб чинқирди она.— Ёлғиз ўзим болаларни қандай эплайман? Ҳамманг қирилиб ўл дейсанми?

Лекин Дуняшка сандиқдан ўз буюмларини ола-верди:

— Ўзингиз биласиз, ойижон, аммо мен қишлоққа масхара бўлишни истамайман,— деди секингина.

Ильинична анчагача лабларини қимирлатиб турди-да, ахийри оёқларини аранг судраб тўрдаги бурчакка борди, иконани олиб:

— Нимаям дердим, она қизим... — деб шивирлади кампир.— Шу ишга аҳд қилган бўлсанг, майли, мен рози, сени худога топширдим...

Дуняшка дарҳол тиз чўқди. Ильинична унга оқ фотиҳа беради, овози титраб кетди:

— Шу икона билан бир вақтларда онам менга оқ фотиҳа берган эди... Шу аҳволингни ҳозир даданг бир кўрсайди... Эсингда борми, қайлиғинг тўғрисида нима

дегани? Қанчалик қийналганимни худойим кўриб-билиб турибди...— деди-да, индамай даҳлизга чиқиб кетди.

Кошевой черковда никоҳ ўқитмаслик учун қаллиғига қанчалик насиҳат қилиб, ялиниб-ёлворса-да, қайсар қиз ўз гапида қаттиқ туриб олди. Мишка ўз хоҳишига қарши розилик беришга мажбур бўлди. Ичида черковини ҳам, бошқасини ҳам сўка-сўка, худди дор тагига кетаётган жиноятчидай, никоҳга тайёрланди. Кечаси кимсасиз черковда поп Виссарион енг ичида никоҳлаб қўйди. Маросим тугагач, куёв билан келинни табриклиб, шундай деди:

— Мана, кўрдингизми, советчи ёш ўртоқ, турмуш шунаقا бўлади: бултур сиз ўз қўлингиз билан менинг уйимга ўт қўйиб, масалан, кулинни кўкка совурган эдингиз, бугун эса, мен сизни никоҳладим... Дарахтни кесма, бир кунмас, бир кун соясида ўтирасан, деган гап бор. Ҳар ҳолда мен хурсандман, кўзингиз очилиб, Исо черковига йўл топганингиз учун ниҳоятда хурсандман...

Буниси Мишкага жуда ботиб кетди. У боядан бери ўзининг иродасизлигидан уялиб, ўзидан нафратланиб, зўрға ўзини тутиб турган эди, энди тоқати-тоқ бўлиб, кек сақлаган попнинг юзига хўмрайиб тикилди-да, Дуняшка эшитмасин учун атайин шивирлаб, жавоб қайтарди:

— Аттанг, ўшанда қишлоқдан қочиб қутулдинг-да, йўқса сен сочи узун шайтонни уйинг билан қўшиб куйдиардим! Тушундингми энди!

Бу гапни кутмаган поп ҳанг-манг бўлиб, кўзларини пирпиратиб Мишкага тикилди, бироқ у ёш келинчакнинг енгидан тортиб, зарда билан: «Кетдик!»— деди-да, солдатча этиги билан гурс-гурс қадам ташлаб, эшикка чиқди.

Уларнинг тўйлари қизимади, самогон ичилмади, қўшиқ айтилмади. Тўйда куёв жўра бўлган Прохор Зиков эртаси куни не вақтгacha тупуриниб, Аксинъяга ҳасрат қилди.

— Эй, ойимбека, шуям тўй бўлди-ю! Михайл черковда попнинг қулоғига бир нима девди, бечора чолнинг оғзи қийшайиб кетди! Биласанми, дастурхонга нима қўйишди? Қовурилган товуқ билан қатиқ хо-

лос... Лоақал бир қултум самогон ҳам топишолмабди, жин ургурлар! Ҳм, Григорий Пантелеевич сингил-часининг тўйини бир келиб кўрса бўларди.... Сочлари-ни юларди! Йўқ, ойимбека, тамом! Мен энди бунақа янги тўйларга боришни бас қилдим. Бунақа тўйдан ит-ларнинг базми қайтага қизиқроқ бўлади, бири бири-нинг жунини юлишади, қий-чув, тўполон кўтаришади-ку, бу ерда на ичкилик, на муштлашиш, ҳеч нарса йўқ. Минг лаънат бунақа тўйга! Ишонсанг, тўйдан кейин шундай таъбим хира бўлдики, туни билан ухлом-май, бурга талагандан баттар қийналиб у ёнбошдан бу ёнбошга ағдарилиб тонг оттиридим...

Кошевой Мелеховларниги ўрнашиб олган кун-дан бошлаб рўзғорга барака кирди: қисқа вақт ичи-да у четан деворларни тузатди, даштдаги пичанни ташиб, усталик билан чиройли фарам қилиб босди; буғ-дой ўришга тайёргарлик кўриб, ўроқ машинанинг пар-рак ва қанотларини бошқатдан янгилади, хирмон жой-ни яхшилаб тозалади, шалоги чиққан эски шамол машинани тузатди, от абзалларини ямаб-ясқади, чун-ки у бир жуфт ҳўқизни отга алмаштиришни орзу этар ва бу ҳақда бир неча марта Дуняшкага: «Қандай бўл-масин, от топишимиз керак. Қана босган бу бузрук-ларга ишонсанг, она сути оғзингга келади», — деган эди. Бир куни у омборхонада ётган ультрамарин би-лан белила бўёғини кўриб, эскирганидан бўзариб кет-ган дераза қопқоқларини ўша заҳотиёқ мойлашга ки-ришди. Мелеховлар уйи ярқираган ҳаво ранг дераза-лари туфайли бирданига ёшариб кетгандай бўлди...

Мишканинг серғайрат, тиришқоқ ҳўжайин экани ҳаммага маълум бўлди. Касаллигига қарамай, бир дам бекор турмасди. Дуняшка доим унга қарашар, ҳар бир ишда ёрдамлашарди.

Эрга теккандан кейин кўп ўтмасдан унинг ҳус-ни очилиб, кифтлари билан сонлари ҳам анча тўлиш-гандай кўринарди. Кўзларининг боқиши, юриш-тури-ши, ҳатто соч тузатиши ҳам бошқача бўлиб қолди. Илгариги шўхлигидан, ёш бөладай ҳовлиқиб югуриб келиши ва бесўнақай ҳаракатларидан ҳозир асар қол-маганди. Ипакдай эшилиб, жилмайиб юрадиган бўлиб қолди, у эрига хуштор кўзи билан қарар, ундан бошқа

ҳеч нима кўзига кўринмасди. Навқирон баҳтнинг кўзи сўқир, деган гап бежиз эмас...

Лекин Ильинична кундан кунга яккаланиб қолаётганини сезиб, изтироб чека бошлади. Умр бўйи яшаган ўз уйда ортиқча одамга ўхшаб қолди. Дуняшка билан эри, гўё, бўш ётган ерга ўзлари учун янгидан иморат solaётган кишилар сингари, астойдил ишга шўнғиб кетишган эди. Улар кампир билан ҳеч маслаҳаг қилишмас, рўзғорда қилинаётган баъзи ишлар тўғрисида унинг розилигини олишмасди, ҳаттоки, икки оғиз ширин сўз билан кампирнинг кўнглини кўтаришни хаёлларига ҳам келтиришмасди. Фақат дастурхон тепасидагина эру хотин у билан учтўрт оғиз гаплашган бўлишарди холос, шундан кейин Ильинична яна ўз дардини ютиб, уйда якка қолаверарди. У қизининг баҳтиёрги учун суюнмасди, ўз уйда бегона кишининг туриши — куёвини у ҳозир ҳам бегона деб ҳисобларди — унга малол келарди. Бир йилда тўнгич ўғли, эри ва икки келинидан ажраган кампир ғамдан бутунлай қартайиб, хоктуроб бўлиб, ғариблар сингари кун кечирарди. У оғир мусибатларни бошидан кечирди, дарвоҷе, бир кишига шунчалик ғам кўплик қилмайдими, ахир! У энди ғам билан олишишга қурби келмас ва биргина умид билан яшарди: хурофотга қаттиқ берилган бу кампир Мелеховлар оиласига пашшахўрда бўлиб ўрганган ажал бу уйнинг остонасини ҳали кўп босиб ўтади, деб ишонарди. Ильинична Дуняшканинг эрга текканига кўнишиб қолган эди, фақат бир нарсани истарди: Григорий келса-ю, болаларини омон-эсон қўлига топширса, шундан кейин умрбод кўзини юмса... Узоқ умр, оғир ҳаёт, азоб-уқубатлар эвазига Ильинична абадий тинчиш ҳуқуқига эга бўлган эди...

Ёз кунлари узун, тезроқ кеч бўла қолмай безор қиласарди. Қуёшнинг иссигига чидаб бўлмасди. Бироқ унинг ҳарорати Ильиничнага таъсир этмас: зинапояда, куннинг тифида қимирламасдан ўтирас, атрофидаги ҳамма нарсага бепарво эди. Унинг илгариги ғайратидан, рўзғорпаастлигидан асар ҳам қолмаган эди. У ҳеч қандай иш қилгиси келмас, ҳамма нарсадан безганди; назарида, ҳаммаси кераксиз, овора бўлганга

арзимайдигандай туяларди, бир ҳисобда, илгариgidай меҳнат қилишга энди кучи ҳам етмасди. Кўпинча у, кўп йиллик меҳнатда ишдан чиққан қўлларига тикилиб, ўзига-ўзи: «Мана энди қўлларим ҳам меҳнатдан қутулид... Дам оладиган вақти келди... Ошимни ошадим, ёшимни яшадим, бас энди... Гришенъакни бир кўрсам, армоним йўқ...» дерди хаёлга берилиб.

Фақат бир мартагина Ильинична қадимгисидай қувонди, лекин бу ҳам узоқ давом этмади. Прохор станицадан келаётib Мелеховлар ҳовлисига кирди-да, олисдан туриб бақираверди:

— Суюнчини тайёрлайвур, Ильинична хола! Ўғлингдан хат!

Кампирнинг ранги оқариб кетди. У ўзича: хат албатта бир шум хабарни келтиради, деб ўйларди. Бироқ Прохор, хатни ўқиб бергандан кейин Ильинична азбаройи қувонгандигидан анчагача тили калимага келмай қолди. Ярми уй ичида гиларга дуойи саломлардан иборат бўлган бу қисқача хатнинг охирида Григорий, кузга яқин уйга бир келиб-кетишга ҳаракат этишини илова қилиб кетган эди. Кампирнинг қорамағиз юзидан, икки бетидаги чуқур ажинлардан кўз ёшлари тирқираб оқа бошлади. У бошини қўйи солиб, кофтасининг енги билан, ғадир-будур кафти билан юзларини артарди, бироқ ёш тўхтамай, икки бетидан оқиб, худди илиқ ёмғир сувидай этагига томчиларди. Прохор аёлларнинг кўз ёшига чидаб туролмас эди, шунинг учун у ижирганиб, зардаси қайнаб:

— Э, бувижон, жудаям хуноб қилвординг-ку! — деди.— Ҳамма кўз ёшини хотин зотига берган эканми дейман... Суюниш керак, йифи нимаси? Хайр, мен кетдим! Кўз ёшингни томоша қилишга тоқатим йўқ.

Ильинична эсини тўплаб уни тўхтатди.

— Шошма ахир, обкелган хушхабаринг учун...вой жонгинам... Вой эсим қурсин... Шошмай тур ахир, сени сийлашим керак...— деб чулдиради, кўпдан бери сандиқда сақланган бир шиша самогонни олаётib.

Прохор ўтириб, мўйловини силаб қўйди.

— Хурсандчиликка ўзинг ҳам мен билан ичасанми?— деб сўради-ю, лекин ўша заҳоти хавотир бўлиб ичидаги ўзини қойиди: «Ҳаҳ, тилим қичимай ўлсин!

Китдай нарсага фалокат босиб кампир шерик бўлса, менга йуқ ҳам бўлмайди...»

Ильинична гапига унамади. У хатни авайлаб тахлади, икона турадиган жойга қўйди, бироқ у ердан яна олди-да, бирпас ушлаб туриб, қўйнига солди-ю, кўксига маҳкам босиб қўйди.

Дуняшка даладан қайтгач, хатни узоқ ўқиди, сўнгра жилмайиб чукур нафас олди:

— Уҳ, тезроқ кела қолса эди-эй! Уни кутавериб сарғайиб сомон бўлдингиз.

Ильинична қизғангандай хатни қизининг қўлидан олди-да, яна қўйнига солиб қўйди, сўнгра жилмайиб, йилтираган сузук кўзлари билан қизига боқиб:

— Мени қўявер, бўлганим шу, бу ерда мени итмисан, одаммисан дейдиган киши йўқ, лекин кенжатоим онасини унутмабди! Ёзган қўлларидан айналай! Мени ҳурматлаб, отамнинг номи билан Ильинична деб ёзибди... Меҳрибон онажонимга, яна азиз болаларимга кўпдан-кўп салом йўллайман дебди, сениям унутмабди... Нимага куласан, а? Сенда эс йўқ, Дуняшка, қипқизил тентаксан!

— Вой тавба-эй, салгина жилмайсам нима қипти ахир, ойижон? Қаёқقا отланяпсиз?

— Полизга бораман, картошкани чопиб қўяй.

— Эртага ўзим бораман, уйда ўтирангиз бўларди. Гоҳ касалман деб инқиллайсиз, гоҳ бирданига ишга чопасиз.

— Йўқ, мен борай... Севинчим ичимга сифмаяпти, бир айланиб келай,— деб ростини айтди Ильинична ва чаққонлик билан рўмолини ўради.

Кампир полизга кетаётиб Аксинъянинг олдига кирди; аввал одоб юзасидан бошқа тўғридан гап очиб, кейин хатни кўрсатди.

— Кенжатоим хат юборибди, онам қувонсин деган-да. Отпуска олиб келмоқчи эмиш. Ма, ҳамсояжон, ўқи-чи, яна бир марта эшитай.

Ўшандан бери Аксинъя бу хатни тез-тез ўқиб берадиган дастёр бўлиб олган эди. Қечқурунлари Ильинична унинг олдига келиб, дастрўмолга яхшилаб ўралган сариқ конвертни узатар ва хўрсиниб илтимос қиласади:

— Аксинъяжон, яна бир ўқигин, негадир, бугун кўнглим ғаш, тушимгаям кирди, худди мактабга қатнаб юрган кичкинтай болалик вақтимиш...

Хат ишқаланаверганидан кейин кўк қалам билан ёзилган ҳарфлари бир-бирига қўшилиб кетган, кўп сўзлар бутунлай ажратиб бўлмайдиган даражага етганди, шундай бўлса-да, Аксинъя сира қийналмасди, чунки ўқийвериб хат унга ёд бўлиб қолган эди. Кейинчалик юпқа қофоз ҳилвираб ўқийдиган жойи қолмагандা ҳам Аксинъя тутилмасдан хатнинг бошидан то охирги сатиригача ёдаки гапириб бераверарди.

Икки ҳафтадан кейин Ильинична тоби қочганлигини сезди. Ўша куни Дуняшка хирмонда банд бўлгани учун Ильинична уни ишдан олиб қолишини истамади, лекин овқат пиширишга ўзининг ҳам қурби келмади.

— Мен бугун туролмайман. Ўзинг бир амалларсан,— деди қизига.

— Қатингиз оғрияпти, ойижон?

Ильинична эски кофтасининг бурмаларини текислади, ерга қараб жавоб берди:

— Ҳамма ёғим оғрийди... Танамда соғ жойим қолмаганга ўхшайди. Ёшлигимда даданг раҳматлик, жаҳли чиқиб, мени ура бошларди... Муштиям чўяндан баттар эди... Бир ҳафтагача сулайиб ётардим. Ҳозир ҳам худди ўшанга ўхшаб ҳамма ёғим зирқирайди, худди бирор ўласи қилиб калтаклагандай...

— Михайлни фельшерга юборсакмикан?

— Кераги йўқ, бир амаллаб туриб кетарман.

Эртаси куни Ильинична ҳақиқатан ҳам ўрнидан туриб ҳовлинин айланиб юрди, бироқ кечга томон яна ётиб қолди. Юзлари бир оз шишинқираб, кўзларининг остида халтачалар пайдо бўлди. Кечаси у бир неча марта тирсагини тираб, баланд ёстиқдан бошини кўтарди, ҳаво етишмаганидан тез-тез нафас ола бошлади. Ниҳоят, нафас қисиши қўйди. У энди чалқанчасига тинчгина ёта олар, ҳатто ўрнидан туришга ҳам қурби ётарди. Шу аҳволда бир неча кунгача хомуш бўлиб, жимгина ётаверди. У ёлғизликни ёқтиради. Аксинъя келиб гапга солган чоқларда, унга тўмтоқ қилиб жавоб қайтарар ва у чиқиб кетгандан кейин эркин нафас

оларди. Болалар эртадан кечгача ҳовлида бўлиб миясини ачитмаганига, Дуняшканинг кириб, гапга солавериб безовта қилмаганига кампир хурсанд эди. У энди ҳеч кимнинг ачинишига, ҳеч қандай тасаллига муҳтоҷ эмасди. Ўз бошидан ўтган бирталай нарсаларни эслаш учун якка қолишга муҳтоҷ бўлиб қолган эди. Шунинг учун у кўзларини сал-пал юмиб, соатларча қимир этмай ётарди, фақат щишинқираган бармоқлари кўрпани тимирскилар ва бутун ҳаёти шу соатларда кўз ўнгидан ўтарди.

Қизиги шуки, кампир ўз ҳаётининг шунчалик беҳуда, шунчалик тез ўтиб кетганини энди англади; шу қадар оғир, қайғули воқеалар кўп эдики, буларни эслашга тоғдай юрак керак эди. Ильинична негадир, дамбадам Григорийни эслайверар, хаёлан у билан бирга бўларди. Балки, уруш бошлангандан бери ўғлининг тақдиди учун доим хавотир олавериб, унинг илинжида юргани, қолган умри фақат шунга боғлиқ экани бунга сабабдир. Ёинки, тўнғич ўғли билан эрини секинаста унута бошлаган бўлиши ҳам мумкин. Лекин кампир ўлганларни унчалик эсламас, уларни кўз олдига келтирмоқчи бўлса-да, аниқ тасаввур эта олмасди. У ўзининг ўшлиқ даврини, эри билан кечирган ҳаётини эслашга унчалик орзуманд эмасди. Ҳаммаси ўтди-кетди, энди эслашнинг кераги ҳам йўқ, ўйлаган билан барибири, дардига малҳам бўлолмасди. То сўнгги вақтларгача у, ўтган умрини эсларкан, порлоқ хотиралар орасига ҳеч қандай икир-чикирни аралаштирумасликка ҳаракат қиласди. Аммо «кенжатойини» эса, худди ёнида тургандай, аниқ ва равшан тасаввур этарди. Лекин уни ўйлаши биланоқ, дарров юраги ура бошлаганини сезарди. Унинг кетидан нафаси қисиб, юзи кўкариб қетар ва шу аҳволда анчагача беҳуш ётарди, ниҳоят, ўзига келиб, яна уни ўйларди. Ахир, сўнгги ўғлини она унута оладими ҳеч...

Бир куни Ильинична меҳмонхонада ётар эди. Айни туш пайти, ҳовлига офтоб тушиб, чарақлаб туради. Жануб томонда, кўз қамаштирувчи кўм-кўк осмоннинг бир бурчидаги шамол тўзитиб юборган баҳайбат оппоқ булутлар сузиб юришади. Оғир сукунатни фақат бир хилда чириллашган чигирткаларнинг овози бузар, ки-

шининг уйқусини келтиради. Дераза остида, пойдервогра тақалиб ўсган шўра аралаш ёввойи сули билан тўнғизтароқни офтоб қовжирата олмаган эди, чигирткалар шу кўкатлар орасига кириб олиб чийиллашади. Йльинична уларнинг узлуксиз чириллашига қулоқ соларкан, қуёш ҳароратидан исиган кўкатлар ҳиди меҳмонхонага кирганини сезди-ю, ўша заҳотиёқ унинг кўз ўнгида: август офтобида қақраган жазирама дашт, буғдойи ўриб олинган анғиз, кўкиш туман сингари нозик пардага бурканган мовий осмон намоён бўлди...

Хаёлан у, шувоқ ўт босган уватда ўтлаб юрган ҳўкизларни, устига чодир қурилган аравани яққол кўрар, чигирткаларнинг чириллаганини аниқ эшитар, шувоқнинг тахир ва аччиқ ҳидини ютиб нафас олгандай бўларди... Бирданига ўша ёқда ўзини ҳам кўриб қолди: қад-қомати келишган, ёш, чиройли келин... Ана, арава томон шошиб-пишиб кетяпти. Ўрилган буғдой поялари оёғи остида шитирлайди, болдиirlарини қитиқлади, иссиқ шамол юбкасига қистирилган жиққа ҳўл кўйлагининг елкаларини қуритади, бўйинни ачиштиради. Юзлари бўриқиб кетган, қон юргурганидан қулоқлари шанғиллади. У сутга тўлишган, таранг бўлиб кетган бўлиқ кўксини қўли билан босиб боради, бирданига чинқириб йиғлаган чақалоқ товушини эшишиб, юришини тезлатади, йўл-йўлакай ёқа тугмаларини еча бошлияди.

Унинг шамолда қовжираган лаблари жилмаяди, аравага осилган беланчакдан қорача чақалюғини — Гришаткасини олади. Бўйнидаги крестнинг терлаб ҳўл бўлган боғичини тишлаб туриб, чақалоққа эмчак беради ва: «Онанг тасаддуқ бўлсин! Ўзимнинг эркатой ўғлим! Онанг сени оч қолдирди-я...»— деб шивирлайди. Гришатка ҳали ҳам ўпкасини тутолмай энтикиб-энтикиб сўради ва энди чиққан тишлари билан эмчагини тишлаб олади. Ёнларida эса, қора мўйловли йигит — Гришатканинг дадаси чалғи ўроқни қайрамоқда. Эрининг қисилган киприклари остидан жилмайиб турган кўзларининг ҳаво ранг соққаларини ҳам, истеҳзоли кулишини ҳам у киприклари остидан бемалол кўриб турибди... Бирданига иссиқдан нафаси оғирлашади, пе-

шонасидан тер қуйнб, бетларини қитиқлайди, кўзла-
ри тиниб, оламни қоронфилик босади...

Кампир кўзини очди, кўз ёшларидан жиққа ҳўл бўл-
ган юзини қўли билан силаб кўрди, нафаси қаттиқ қи-
сиб қолганидан гоҳ худ, гоҳ бехуд бўлиб анча вақтга-
ча қимирламай ётди.

Кечқурун қизи эри билан уйқуга кетганиларидан
кейин, у сўнгги кучини тўплаб ўриидан турди-да, ҳов-
лига чиқди. Аксинья подадан йўқолган сигирини алла-
маҳалгача қидириб, уйига қайтиб келаётганда Ильи-
ничнага кўзи тушди; кампир битта-битта қадам қўйиб,
гандираклаганича ғарам томонга ўтди. Аксинья: « Ка-
сал ҳолига бу ёқда нима қилиб юрибди? » деб ҳай-
рон бўлди-да, оҳиста Мелеховлар ғарамига туташган
четан девор ёнига ўтиб, ғарам томонга қаради. Тўлин
ой нурини сочар, даштдан шабада эсарди. Тош увал
билан шиббаланган теп-текис хирмон жойга ғарамда-
ги пичаннинг сояси тушиб турарди. Ильинична ғовга
қўлларини тираган ҳолда даштга боқар, олисдан худ-
ди юлдуз сингари милтиллаб кўринган ўроқчилар гул-
ханига тикиларди. Аксинья ойнинг зангори ёруғида
унинг салқиган юзини, қорашиб рўмоли остидан чиқиб
қолган бир тутам оппоқ сочини бемалол кўрарди.

Ильинична кўм-кўк тун қўйнида ётган даштга узоқ
тикилиб қолди, ишоят гўё ўғли ёнида тургандай, эши-
тилар-эшитилмас қилиб чақирди:

— Гришенька! Жонгинам! — деди-ю, индамай қол-
ди, сўнгра хириллаган йўғонроқ овоз билан: — Нури-
дийдам!.. — дегани эшитилди.

Кўнгли вайрон бўлган Аксинъяни ваҳим босиб, қат-
тиқ сесканди-ю, ўша заҳотиёқ четан ёнидан шартта бу-
рилиб уйига кетди.

Ўша кечаси Ильинична вақт-соати яқин қолганини,
ажал тепасига келганини англади. Тонг ёришганда
сандиқни очиб, Григорийнинг кўйлагини олди-да, тах-
лаб ёстиғи тагига қўйди; ўзининг ўлимлигини — сўнг-
ги нафаси чиққандан кейин ўраб-чирмашадиган кийим-
ларини таҳт қилди.

Эрталаб Дуняшка ҳар доимгисидай онасини кўрга-
ли кирди. Ильинична ёстиқ тагидан Григорийнинг тах-
лоғлиқ кўйлагини олиб, индамай Дуняшкага узатди.

— Бу нима? — таажжубланиб сўради қизи...

— Гришанинг кўйлаги... Эрингга бер, кийсин, эгнидаги кўйлаги эскириб, тердан чириб кетгандир... — деди Ильинична эшитилар-эшитилмас.

Дуняшка сандиқ устида ётган қора юбкани, кўйлакни, матодан қилинган шиппакни кўрд", булар ҳаммаси ўликка кийгизиладиган нарсалар эди,— кўрди-ю, ранги қув ўчиб кетди.

— Сизга нима бўлди, ойижон, ҳалитдан ўлимли-гингиzioni тайёрлаб қўйибсиз? Исо ҳурмати, яшириб қўйинг! Худойим меҳрибон, ҳали кўп йил умр кўрасиз!

— Йўқ, вақт-соатим яқин... — шивирлади Ильинична.— Навбат менга келди... Болаларни эҳтиёт қил, Гриша қайтгунча, уларга бош бўласан... Мен уни кўролмайдиганга ўхшайман... Оҳ, кўролмайдиган!..

Ильинична кўз ёшини Дуняшкага кўрсатмаслиқ учун деворга ўгирилиб, юзини рўмоли билан тўсиб олди.

Уч кундан кейин у вафот этди. Тенгқур кампирлар унинг жасадини ювдилар, ўлимлигини кийгизиб, меҳмонхонадаги стол устига ётқиздилар. Кечқурун марҳума билан видолашгани Аксинья келди. Бу ётган кичкинтой жасаднинг чироий очилган жиддий юзини кўриб, у ҳайрон бўлди, уни қадимги такаббур ва мардонавор Ильиничнага зўрға ўхшата олди. Аксинья марҳуманинг муздай пешонасидан ўпаётиб, оппоқ дуррачаси остидан чиқиб турган бир тола таниш оқ сочига ҳамда келинчакларникдай кунгирадор кичкина қулоғига кўзи тушди.

Дуняшканинг розилиги билан Аксинья болаларни ўз уйига олиб кетди. Иккала бола ҳам ўликдан қўрқиб, индамас бўлиб қолишган эди; Аксинья уларни тўйғизиб, ёнида олиб ётди. Иккиси икки ёқдан миқ этмай унинг пинжига тиқилишарди; Аксинья жонажон кишининг фарзандларини қучоқларкан, кўнглида ғалати бир ҳиссиёт уйғонганлигини сезарди. Болаларни бирон нарса билан юпатиш, бувилари ўлганини эсларидан чиқариш учун, болалик чоғида эшишган эртакни секингина бошлади. У овозини пасайтириб қўшиқ айтиётгандай чўзиб, шўрлик етимча Ванюшка тўғрисидаги эртакни тамомлади:

Гўзал оққувлар,
Қанотларингга
Мени олинглар,
Она юртимга
Элтиб қўйинглар...

Эртак тугамай турибоқ болалар бир меёрда пишиллаб тинчгина уйқуга кетиши. Мишатка каравот четида, Аксинъянинг кифтига юзини тақаб олганича ухлаб ётарди. Аксинъя кифтини оҳиста қимирлатиб, унинг ноқулай қайрилиб қолган бошини тўғрилаб қўйди-ю, бирданига юраги ҳасрат ўтида ёна бошлаганини, томоғига бир нарса тиқилгандай нафаси қисганини сезди. Хўрлиги келиб, энтика-энтика, ҳўнграб йиғлади. Аксинъя кўз ёшларини ҳам артиб ололмасди, чунки унинг икки қўлида Григорийнинг икки боласи ухлаб ётар, шуларни уйғотгиси келмасди.

IV

Ильиничнанинг вафотидан кейин уйда яккаю ягона хўжайнин бўлиб қолган Кошевой, рўзгорни қайтадан тиклаш, уни янада кенгайтириш учун энди астойдия жон куйдириб ишлаш ўрнига, қайтага бўшашиб қолди. Кундан-кунга ишга қўли бормас, кўпинча уйда турмасди, кечқурунлари эса, алламаҳалгача зинапояда ўтипар, папирос чекар, аллақандай ўйларга чўмиб хаёл сурарди. Дуняшка эрининг айниб қолганини сезмаслиги мумкин эмасди. Илгари чарчаш нималигини билмай, жон-жаҳди билан ишга ёпишадиган Мишканинг кўпинча бекордан-бекорга болтани ё рандани улоқтириб, бир четга чиқиб дам олганини кўриб, Дуняшка ҳайрон бўларди. Далада кузги жавдар сепаётганларида ҳам шу аҳвол такрорланди: Мишка икки марта бориб келмасданоқ ҳўқизларини тўхтатиб тамаки ўрашга кириши, шудгорда ўтириб олиб, пешонасини тириштириб тамаки тутата бошлади.

Отасига ўхшаб рўзғор ишларида фаҳми-фаросати кучли бўлган Дуняшка кети нима бўлишини ўйлаб ваҳимага тушди: «Ғайрати узоққа бормади... Ё қасали бор, ё дангасалик қиласпти. Бундай эр билан бо-

шим балога қолади-ю! Худди бирорларнинг эшигига юрган одамга ўхшайди: тушгача тамаки чекади, кечгача ивирсийди, бу аҳволда иш бўлармиди... Жигига тегмасдан, ётиғи билан гаплашиб олишим керак, аҳвол шу бўлса, рўзғорни ташлаб қўйса, йўқчиликдан бошимиз чиқмаслиги турган гап...»

Бир куни Дуняшка секин-аста сўради:

— Сенга нима бўлди ўзи, Миша, ёки касал енгиб қўйдими?

— Касал нима қилсин менда! Бу ерда соппа-соғ одамнинг ҳам юраги қон бўлар,— деб Мишка пўнғиллади-да, ҳўқизларни юргизиб сеялка кетидан кетди.

Дуняшка ҳадеб суриштираверишни ўзига эп кўрмади, чунки у, эрга таълим бериш хотин кишининг иши эмас, деб биларди. Бошланган гап шундайлигича қолаверди.

Дуняшканинг гумони бутунлай ўринисиз эди. Мишканинг илгаригидай астойдил жон куйдириб ишлашига халақит берган бирдан-бир сабаб, кўнгли алағдалиги эди. У округда чиқадиган газетадан фронт сводкаларини ўқиган сайин, хизматдан бўшаб уйга қайтган қизил аскар — казакларнинг ҳикояларини кечқурулари эшигтан сайин, ўзининг баравақт қайтганига, ҳозир қишлоқда юрадиган вақт эмаслигига кундан-кун кўпроқ қаноат ҳосил қиласарди. «Мен шошибман, хўжалик билан шуғулланишга ҳали вақт бор экан...» деб пушаймон ерди Мишка. Айниқса-қишлоқ аҳолисининг кайфияти унӣ кўпроқ ташвишга солганди: баъзилари очиқдан-очиқ, Совет ҳокимияти қишгача қолмайди, Врангель Таврия ўлкасидан чиқибди, Махно билан бирлика Ростовга яқинлашибди, иттифоқдошлар Новороссийск портига каттакон десант туширишибди, деб гапиришарди. Қишлоқда бир-биридан бемаъни мишмиш гаплар юрарди. Концентрация лагерларидан ва конлардан қайтиб, ёз бўйи уйларида мазали овқатдан семириб кетган казаклар бошқаларга аралашмасди, туни билан самогонхўрлик қилиб, алланималар тўғрисида гаплашишар, Мишкани кўрганларида, ҳеч нарсадан хабари йўқ кишилардай, жўрттага ўзларини бепарволикка солиб: «Газеталарни ўқияпсанми, Кошево? Бизгаям гапириб берсанг-чи, Врангелни қачон бир

ҶАКИК қилишармиш? Иттифоқчилар яна ҳужум бошлади дейишади, түғрими ё қуруқ гапми?»— деб ғалати саводлар беришарди.

Иттифоқ бир куни — шанба оқшоми Прохор Зиков келди. Мишка даладан эндигина қайтиб, зина олдиди ювинмоқда эди. Дуняшка кўзадан қўлига сув қуяр, эрининг офтобда қорайган ингичка бўйнига жилмайиб тикиларди. Прохор сўрашиб бўлгандан кейин зинанинг пастки поғонасига ўтириб:

— Григорий Пантелеевичдан дарак борми?— деб сўради.

— Йўқ, — деб жавоб берди Дуняшка, — хат ёзмаяпти:

— Сен уни соғиниб қолдингми?— Мишка юзу қўлларини артиб, кулмасдан Прохорнинг кўзига тикилди.

Прохор хўрсинди, қўли йўқ енгини тузатиб қўйди.

— Бўлмаса-чи! Урушнинг бошидан охиригача бирга азоб тортганмиз.

— Яна бирга тортмоқчимисиз?

— Нимани?

— Хизмат азобини.

— У билан мен ўз хизматимизни адо этиб бўлганмиз.

— Мен, яна бирга хизмат қилгинг келиб кўзинг учиб уни кутяпсанми, деб ўйлабман, — ҳали ҳам кулмасдан, жиддий гапирди Мишка.— Совет ҳокимиятига қарши яна жанг қилмоқчисилар шекилли...

— Йўқ, бу бекорчи гап, Михайл,— деди Прохор ранжиб.

— Нега бекорчи бўлсин? Қишлоқдаги миш-миш гапларнинг ҳаммасидан хабарим бор.

— Мен гапирдимми? Бирон жойда оғзимдан чиққанини эшилдингми ўзинг?

— Сен эмас, сен билан Григорийга ўхшаганлар; «ўз одамларини» икки кўзлаб кутаётганлар гапирди.

— Менинг кутадиган учақа «одамларим» йўқ, мен учун барибир.

— Худди шу гапинг, барибир деганинг ёмон-да. Қани, уйга кирайлик, хафа бўлма, мен ҳазиллашдим холос.

Прохор оёғи тортмаса ҳам зинапоядан чиқиб, даҳлиз остонасига қадам қўйди:

— Ҳазилинг ҳам, биродар, одамга ботиб кетади...— деди.— Ўтган ишларни унутиш керак. Қилмишим учун мен ўзимни оқлаб олдим.

Мишка стол ёнига ўтиаркан:

— Ўтган ишни унутиб бўлмайди,— деди совуққина қилиб.— Қани, ўтири, биз билан овқатлангин.

— Раҳмат. Албатта, ҳаммасини унутиш қийин. Мана, мен қўлимдан айрилдим, шунчалик унутай деб ҳаракат қилсан ҳам, ҳеч унутиб бўлмаяпти, дамбадам эсимга тушаверади бу савил.

Дуняшка дастурхонга овқат қўяётиб, эрига қарамасдан савол берди:

— Сенингча, оқларда бўлганларга умрбод кечирим йўқми?

— Сен нима, кечирилади деб ўйловдингми?

— Мен ўтган ишга салавот, деб ўйловдим.

— Ижилдагина шундай дейилади,— совуққина деди Мишка.— Менимча, ҳар бир киши ўз қилмишига яраша жавоб бериши керак.

— Ҳукумат бу ҳақда ҳеч нарса дегани йўқ,— деди Дуняшка секингина қилиб.

У бегона одамнинг олдидаги эри билан айтишиб ўтиришни истамаса-да, Мишканинг Прохорга қалтис ҳазил қилгани, акасини очиқдан-очиқ ёмон кўргани учун ундан ранжиган эди.

— Ҳукумат сенга буни гапириб ўтирмайди, сен билан маслаҳатлашадиган иши ҳам йўқ, оқларда хизмат қилган одам жавоб бериши шарт.

— Мундан чиқди, мен ҳам жавоб берар эканманда?— қизиқсиниб сўради Прохор.

— Сен аммамнинг бузофисан: қорнинг тўйганига суюниб юравергансан. Деншиклар билан ишимиз йўқ, лекин Григорий уйга қайтгач, жавоб бериши керак. Биз ундан нега қўзғолонга аралашганини суриштирамиз, албатта.

— Сен суриштирасанми ҳали?— Дуняшка кўзларини чақнатиб, кўзадаги сутни столга қўйди.

— Мен ҳам суриштираман,— деди Мишка пинагини бузмай.

— Бу сенинг ишингмас... Сенсиз ҳам суриштиради-
ғанлар топилиб қолади. Қизил Армиядаги хизмати
учун унинг гуноҳи кечирилади...

Дуняшканинг товуши титраб чиқарди. У стол ёни-
га ўтириб, фартуғ бурмаларини бармоғи билан текис-
ларди. Мишка бўлса, гўё хотинининг қаттиқ ҳаяжон-
ланганини сезмаган кишидай, вазминлик билан боя-
гисидай давом эттириди.

— Мениям суриштиргим, билгим келади. Лекиң
кечириш масаласида ҳали шошмаслик керак... Кечи-
ришга арзийдиган иш кўрсатдимикин — олдин шуни
билиш лозим. У кўп одамларимизнинг қонини тўк-
кан. Тарозига солиб кўрайлик-чи, палланинг қайси то-
мони босади...

Шундай қилиб, Дуняшка билан Мишка бирга тур-
муш қурганларидан бери ораларига биринчи марта
совуқчилик тушди. Емакхонага оғир сукунат чўқди.
Мишка чурқ этмай сут ҳўплар, аҳён-аҳёнда сочиқ
билан лабларини артарди. Прохор тамаки тортар,
Дуняшкага қараб-қараб қўярди. Ниҳоят, у рўзғор иш-
лари тўғрисида гап очди. Яна ярим соатча ўтириб,
кетар олдидা сўради:

— Кирилл Громов келибди. Эшиттингми?

— Йўқ. Қаёқларда юрган экан?

— Қизиллар орасида. У ҳам Биринчи Отлиқ Ар-
мияда бўпти.

— Генерал Мамонтовда хизмат этган ўша Громов
эмасми?

— Худди ўша.

— Бир вақтлар чапдаст жангчи эди,— деб истеҳзэ¹
аралаш кулди Мишка.

— Гўрдами! Талон-торожга чапдаст эди холос. Бу-
нақа ишга қўли чаққон.

— Эшитишинга қараганда у асиrlарни раҳмсиз
суратда қиличдан ўтказганмиш. Фақат ботинка учун
солдатни ўлдиаркаркан. Ўлдиаркану, ботинкасини ки-
йиб юравераркан.

— Бу гапни мен ҳам эшитгандим,— тасдиқлади
Прохор.

— Уни ҳам кечириш керакмй?— деб сўради Миши-
ка айёрлик қилиб.— Худо, масалан, душманларни

кечирган ва бизгаям кечирмоқни амр қилғанми, ё?

— Нима дейишимни билмай қолдим... Ундан ниша талаб этиш мумкин, ахир?

— Лекин мен талаб эта оламан. Шундай талаб этардимки, шундан кейин асфаласофилинга кетарди! Барибир у осон қутуолмайди. Вёшкида Донечка бор, жазосини беради ҳали.

Прохор илжайди:

— Даравоқе, букри одам ўлганда тузалади, деган гап рост гап. У Қизил Армия сафида юриб ҳам ўғрилик мол орттириб қайтди. Хотини менинг хотинимга мақтаниб, унга аллақандай пальто, аллақанча кўйлаклар ва бошқа буюмлар обкелганини гапириб берибди. У Маслакнинг бригадасида экан, ўша ердан тўғри уйга келаверибди. Қочиб келгани кўриниб турибди, ёнида қуроли ҳам бор.

— Қанақа қурол экан? — қизиқсиниб сўради Мишка.

— Қанақалиги маълум: калта карабин, наган, балки бошқа нарсаям бордир.

— Қишлоқ Советига бориб, рўйхатдан ўтдими, билмадингми?

Прохор кулиб қўл силтади:

— Бўйнидан боғласанг ҳам у ерга бормас! Билишмча, у қочиб келган, бугун-эрта уйдан жўнаб қолади. Қирилл шунаقا одам, авзойи бузуқ, яна урушга отлангани билиниб турибди, сен бўлса мендан гумонсираб юрибсан. Йўқ, биродар, мен уришиб бўлдим, жуда тўйдим.

Салдан кейин Прохор кетди. Бирпастдан кейин Мишка ҳам ҳовлига чиқди. Дуняшка болаларга овқат едириб, энди кетмоқчи бўлиб турганда, Мишка қайтиб келди. Унинг қўлида mata билан ўралган аллақандай нарса бор эди.

— Қайси гўрда юрувдинг? — деб дағаллик билан сўради Дуняшка.

— Сепимни обкелгани борувдим, — деб жилмайди Мишка.

Кошевоӣ авайлаб ўраб қўйилган милтиқни, патрон тўла ўқдон, наган ва иккита гранатани олди.

Ҳаммасини скамейкага қўйиб, ликопчага авайлаб керосин қўйди.

— Қаёқдан опкелдинг? — деб сўради Дуняшка қошлари билан қуролларини кўрсатиб.

— Ўзимники, фронтдан обкелганман.

— Қаерга яшириб қўювдинг?

— Қаерга яширмайин, ишқилиб авайлаб сақладим.

— Сен ҳали, шунақа хуфия ишларим бор дегин...

Бир оғиз менга айтмайсан ҳам. Ўз хотинингдан сир сақлайсанми, а?

Мишка ўзини бепарволикка өолиб, хушомадгўйлик билан:

— Буни билишнинг сенга ҳеч кераги борми, Дуняшқажон? Бу хотинларнинг ишимас-ку. Қўёвур, бу матахнинг уйда тургани яхши, ортиқчалик қилмайди, — деди.

— Хўш, бу матахни нега уйга обкелдинг? Ўзинг-ку, закончисан, ҳаммасини биласан... Бунинг учун қонун олдида сени жавобгарликка тортишмайдими?

Мишканинг қовоғи осилиб кетди.

— Сенда эс йўқ! — деди у.—Агар Кирюша Громов уйига қурол обкелса, Совет ҳокимиятига зарар бўлади, лекин мен обкелсан, Совет ҳокимияти учун фойда. Тушуняпсанми ўзинг? Ким мени жавобгар қилиши мумкин? Бўлмағур гаплар билан миямни ачитасан холос, ундан кўра ётиб ухла!

Мишка ўз билгича, бирдан-бир тўғри хулосага келган эди: модомики, урушда жон сақлаб қолган оқлар қурол билан уйга қайта бошлаган экан, демак унинг ҳам ҳушёр бўлиши керак. У милтиқ билан наганни яхшилаб тозалади-да, эрталаб тонг ёришганда пиёда Бешенскаяга жўнади.

Дуняшка сумкага йўлозиқ солаётib алам қилганидан зарда билан гапирди:

— Мени қачонгача индамай куйдирасан? Гапирсанг-чи, ахир, нима иш билан кетяпсан, қачон келасан? Шуям турмуш бўлдими? Қетишга отланибди-ю, бир оғиз гап қилмайди-я!.. Эрмисан ё келиб-кетиб юрадиган жазманмисан?

— Вёшкага кетяппан, комиссиядан ўтмоқчиман,

сенга яна нима дейишим мумкин? Қайтганимда ҳам-
масини эшитасан.

Мишка сумкасини авайлаб, Дон бўйига тушди,
қайиққа ўтириди-да, уни тез ҳайдаб, нариги қирғоқ
томон сузиб кетди.

* * *

Вешенскаяда, Мишка тиббий комиссиядан ўтган-
дан кейин доктор қисқача қилиб шундай деди:

— Азиз ўртоқ, Қизил Армия сафида хизмат этиш-
га сиз ярамайсиз. Сизни безгак енгиб қўйибди.
Даволаниш керак, йўқса, оқибати ёмон бўлади.
Сиздақалар Қизил Армияга керакмас.

— Хўш, қанақаси керак? Икки йил хизмат қилиб,
энди керак бўлмай қолдимми?

— Аввало соғлом кишилар керак. Соғайгани-
нгиздан кейин сиз хам керак бўласиз. Манови рецепт-
ни олинг, аптекадан хин дори оласиз.

— Шун-да-а-ай, тушунарли.— Кошевой, худди
хомутдан ҳурккан асов от сингари бош ирғаб гимнас-
тёркасини кияр, ёқасидан бошини чиқаролмай
ижирғанарди; шимини кўчага чиқиб тугмалади-да,
тўғри округ партия комитетига кетди...

...Мишка қишлоқ ревкомининг раиси сифатида
Татарскка қайтди. Хотини билан наридан-бери
сўрашиб:

— Ана энди кўрамиз!— деб қўйди.

— Нима гап ўзи? — таажжубланиб сўради Дун-
яшка.

— Ўша гап.

— Гапирсанг-чи, нима ахир?

— Мени раис қилиб тайинлашди. Тушундингми?

Дуняшка хуноб бўлиб қарс урди. У эрига бир
нима айтмоқчи эди, бироқ у гапига қулоқ солмас-
дан ойнага қараб, ранги ўнгган мөш ранг гимнас-
тёркасини, камарини тузатди-ю, Совет идорасига
кетди.

Киш бошидан бўён ревком раиси Михеев эди.
Бу чол шапкўр, қулоғи оғир бўлиб, ўз вазифасидан
ўзи сиқилиб юарди; шунинг учун Кошевой унинг

ўрнига тайинланганини эшитиб, ниҳоятда хурсанд бўлди.

— Қоғозлар мана, садағанг кетай, мана бу қишлоқнинг печати, ҳаммасини ол, барака топкур,— дерди чол астойдил суюниб, гоҳ чўқиниб, гоҳ қўлларини ишқалаб.— Ёшим етмишдан ошиб, умримда амалдор бўлмаган одам эдим, қариганимда шу савдо бошимга тушди... Бу иш сендақа ёшларга ярашади, менга ким қўйибди буни! Кўзим хира, қулоғим оғир бўлса. Худога ибодат қилиб тйнчгина ўтирадиган чоғимда мени раис қилиб қўйишиди...

Мишка станица ревкомидан келган ҳамма йўл-йўриқ ва буйруқларни наридан-бери кўриб чиқди-да:

— Секретарь қани? — деб сўради.

— А?

— Э, гумроҳ, сөкремтарь қаёқда деб сўраяппан?

— Секретарь? Жавдар сочяпти. У, қора боскур, бу ерга ҳафтада бир келади, холос. Баъзан станицадан қоғоз келса, ўқийдиган одам йўқ, искович итминам қидирсанг ҳам уни тополмайсан. Муҳим бир қоғоз бир неча кунгача ўқилмай қолиб кетади. Мен бўлсам, саводхонмасман «Аранг қўл қўя оламан, ўқишни-ку бутунлай билмайман. Фақат печать босишини биламан, холос.

Кошевой қошларини чимириб, ифлос бўлиб кетган ревком идорасини кўздан кечирар, пашша ўтириб кетган биттагина эски плакатни томоша қиласарди.

Чол кутилмаганда ишдан бўшагани учун шу қадар суюндики, ҳатто, латтага ўралган печатни Кошевойга топшираётуб, асқия қилишга ботинди:

— Мендаги жамоат мулки шугина холос, маблағдан бир пул ҳам йўқ, атаман чўқмори масаласига келганда, Совет ҳукумати даврида бу нарса бекор қилинган. Истасанг ҳассамни беришим мумкин,— деди-да, тиҳсиз оғзини очиб илжайганича, кафтда ишқаланавериб силлиқ бўлиб кетган шумтол ҳассани унга узатди.

Бироқ Кошевойнинг ҳазилга тоби йўқ эди. У ревкомнинг қаровсизликдан аянч аҳволга тушган бефайз идорасини яна бир карра кўздан кечирди, қовоғини солиб чуқур нафас олди.

— Бува, ҳамма иш қабул қилинди, деб ҳисеоблай-миз. Энди бу ердан дарров туёғингни шиқиллатиб қол,— ўқрайган кўзлари билан имлаб, чолга эшикни кўрсатди.

Сўнгра у стол ёнига ўтириди, икки тирсагини столнинг икки четига тираганича, иягини олға чиқарип, тишини тишига маҳкам босиб, узоқ ўтириди. «Тавба, одам деган ҳам шу қадар пастлашиб кетадими: атрофда нима бўляятгани билан ишим бўлмасдан бош кўтартмай ер чуқлаб юраверибман-а...» У ўзидан хафа бўлиб, газаб билан ўрнидан турди-да, гимнастёркасини тузатди, тишини тишига қўйиб туриб бўшлиққа қараб:

— Шошмай туринглар ҳали, мунофиқлар, Совет ҳукумати қанақалигини мен сизларга кўрсатиб қўяман!— деди.

Занжиринни солиб эшикни зич ёпди-да, майдон ичи билан тўғри уйига кетди. Черков олдидা Обнизовнинг боласини кўриб, менсимай бош қимирлатиб ўтиб кетди, бирданига алланима эсига тушиб, кетига бурилди-да, уни чақирди:

— Ҳой Андрюшка! Шошма, бу ёққа кел!

Оқ-сариқ тортинчоқ бола индамай ўнииг ёнига келди. Мишка катталар қатори у билан қўл бериб кўришди.

— Қаёққа кетяпсан? Нариги томонгами? Демак, ўйнагани чиқибсан-да, а? Иш биланми? Мен сендан бир нарса сўрамоқчи эдим: сен илгари ибтидоий мактабда ўқиганмидинг? Ўқигансан, а? Жуда яхши. Идора ишини биласанми?

— Қанақа иш?

— Росмана иш-да. Ҳар хил кирди-чиқди қоғозларни биласанми?

— Нима деяпсан ўзинг, ўртоқ Кошевой?

— Шунаقا қоғозлар бўлади-ку, шуларни биласанми? Масалан, кириб-чиқиб турадиган турли қоғозлар бўлади.— Мишка қандай қилиб тушунтиришини билмасдан нуқул бармоқларини қимирлатарди; боланииг жавобини кутиб ўтирасдан қатъий қилиб шундай деди:— Ҳа, майли, билмасанг, кейин ўрганиб кетасан. Мен ҳозир қишлоқ ревкомининг

раисиман, саводли бола бўлганинг учун сени секретарлик вазифасига тайинлайман. Ревком биносига бориб, ишларни пойлаб ўтиргин, ҳаммаси столда очиқ-очиқ ётибди, мен тезда қайтаман. Тушундингми?

— Ўртоқ Кошевой!

Мишка қўл силтаб, сабрсизлик билан:

— У ёини кейин гаплашамиз, бориб вазифангни бажар,— деди-да, бир текис қадам ташлаб, секин-секин кетаверди.

Мишка уйда янги чалворини кийиб, наганни чўн-такка солди, ойнага қараб фуражкасини тузатаркан, хотинига тайинлади:

— Бир жойга борадиган ишим бор. Мабодо бироров раис қани деб сўраса, тез келади, дегин.

Раислик амали сипогарчиликни талаб этарди... Мишка шошмасдан, вазминлик билан қадам ташларди; юриши ҳам шу қадар сунъий эдики, ҳамқишлоқлардан баъзи бирорвлар, уни кўриб тўхташар, кетидан кулиб қараб қолишарди. Прохор Зиков тор кўчада унга рўпара келиб, ҳазил аралаш иззату икром билан кетига чекинди:

— Бу нимаси, Михайл? Байрам бўлмаса ҳам парадга тайёрлангандай, ясаниб олибсан... Яна қайлиқ кўргани кетяпсанми ўзинг?— деб сўради.

— Шунга ўхшаш гап,— деди Мишка тагдор қилиб.

Громовлар қўрасининг дарвозасига етгач, тўхтамасдан тамаки халтасини олиш учун чўнтакка қўл солди, кўзи кенг қўрада, қўрадаги иморатларда, уй деразаларида эди.

Кирилл Громовнинг онаси эндигина даҳлиздан чиқиб келаётганди. Бир тоғора майда қилиб тўғралган ошқовоқни белини буқолмай аранг кўтариб келмоқда эди. Мишка ҳурматини бажо келтириб у билан сўрашди-да, зинапояга қадам қўйди.

— Кирилл уйдами, хола?

— Уйда, уйда, киравур,— четланиб йўл берди кампир.

Мишка қоронғи даҳлизга кирди, қоронғида пай-паслаб эшик тутқичини топди.

Кирилл эшикни очди-да, орқага бир қадам ташлади. Соқол-мўйлови топ-тоза қилиб қирилган, ширакайф Кирилл, Мишкага бошдан-оёқ бир кўз ташлади-ю, пинагина бузмай кулимсираб:

— Яна бир аскар бола келди!— деди.— Қани кир, Кошевой, ўтири, меҳмон бўл. Биз бўлса, бу ерда қитдай-қитдайдан тортиб, вақт ўтказяпмиз...

— Нону туз билан қитдай ароққа нима етсин.— Мишка хўжайин билан қўл бериб кўришаркан, стол атрофида ўтирганларга разм солиб чиқди.

Унинг келиши томдан тараша тушгандай бўлди. Михайлга нотаниш, кифтлари кенг, тўрда ўтирган казак савол назари билан Кириллга қаради-да, олдидағи стаканни суриб қўйди. Столнинг нариги томонида ўтирган, Коршуновларнинг чатишган қариндоши— Семён Ахваткин бўлса, тумтайиб четга қараб олди.

Хўжайин Мишкани дастурхонга таклиф этди.

— Меҳмондўстлигинг учун раҳмат.

— Йўқ, ўтири, биз билан ичмасанг, хафа бўламиз.

Мишка стол ёнига ўтириди. Хўжайин қўлидан бир стакан самогонни олиб, бош қимирлатди:

— Эсон-омон қайтганинг учун, Кирилл Иванович!

— Раҳмат. Ўзинг қачон армиядан қайтдинг?

— Анча бўлди. Ўрнашиб олдим энди.

— Ўрнашиб ҳам опсан, уйланиб ҳам опсан, деб эшидим, ростми? Ие, бу қанақа муғомбирлик? Ич ҳаммасини!

— Кўнгил тортмаяпти. Сенда ишим бор.

— Қўйсанг-чи! Мен билан бугун ҳазиллашма! Бугун менга ҳеч қанақа гап кетмайди. Бугун мен дўстларим билан хурсандчилик қилмоқчиман. Ишинг бўлса эртага келгин.

Мишка ўрнидан турди, қизишмасдан, жилмайиб деди:

— Узи арзимайдиган иш-ку, лекин жудаем зарилда. Бирпасга эшикка чиқайлик.

Кирилл ингичка қилиб бураган қора мўйловини силаб, бирпас ўйланиб қолди-да, ахийри ўрнидан турди.

- Шу ерда гапираверсанг бўлмайдими? Улфатчиликни бузишнинг нима кераги бор?
- Йўқ, юр чиқайлик, — вазминлик билан қатъий қилиб гапирди Мишка.
- Чиқа қолсанг-чи, ахир, мунча савдолашасан?— деди яғрини кенг нотаниш казак.
- Кирилл ноилож ошхонага чиқди. Печь ёнида ивирсиб юрган хотинининг қулоғига:
- Эшикка чиқиб тур, Катерина!— деб шивирлади-да, курсига ўтираётib сўради: — Хўш нима гап?
- Уйга қайтганингга неча кун бўлди?
- Нимайди?
- Неча кундан бери уйда турибсан деб сўраяпман?
- Тўрт кун бўлди шекилли.
- Ревкомга учрашдингми?
- Ҳозирчалик йўқ.
- Вёшкига бориб военкоматга йўлиқиши хаёлингда борми?
- Нега гапни айлантирасан? Иш билан келган бўлсанг, ишдан гапиргин-да!
- Ҳалиям мен сенга ишдан гапиряпман.
- Үндай бўлса, туёғингни шиқиллат! Сен ўзинг ким эдинг-ку, мени сўроқ қилишни сенга ким қўйибди?
- Мен ревком раисиман. Қисмдан берилган гувоҳномангни кўрсат.
- Ҳали шундай дегин?— ҳанг-манг бўлиб чўзиб гапирди Кирилл ва мошдай очилган ўткир кўзлари билан Мишканинг кўзига тикилди.— Гап бу ёқда дегин!
- Ҳа, шу ёқда. Гувоҳномангни кўрсат!
- Шу бугун Совет идорасига обориб кўрсатаман.
- Ҳозир кўрсат!
- Уни аллақаергаям яшириб қўювдим.
- Топ.
- Йўқ, ҳозир қидирмайман. Яхшиси уйингга жўна, Михаил, бекорга жанжал чиқади.
- Сенга жанжал нималигини кўрсатиб қўяман...— Мишка қўлини ўнг чўнтағига солди. — Қийин!
- Қўй, Михаил! Яхшиси мени ўз ҳолимга қўй...
- Қетдик, деяппан сенга!

— Қаёққа?

— Ревкомга.

— Негадир, боргим келмаяпти.— Кирилл, ранги оқарыб кетган бўлса-да, истеҳзо билан кулиб гапи-рарди.

Мишка ўзини чапга олиб туриб, чўнтағидан наганини чиқарди-да, тепкисини кўтариб қўйди.

— Юрасанми, йўқми?— деб сўради у секингина.

Кирилл индамай меҳмонхонага кириб кетмоқчи бўлган эди, Мишка йўлини тўсди-да, кўзи билан даҳлиз эшигини имлаб кўрсатди.

— Оғайнилар!— деб олифтагарчилик билан ба-қирди Кирилл.— Мени қамоққа олишди чофи! Ўзла-ринг бемалол ичаверинглар!

Меҳмонхона эшиги ланг очилиб кетди, Ахваткин остонага энди қадам қўймоқчи бўлганда, унга ўқталган наганни кўриб, дарров ўзини кесаки орқасига олди.

— Юр,— буюрди Мишка Кириллга.

Кирилл лапанглаб эшик томон юрди, имиллаб ҳал-қани ушлади, тўсатдан бир сакраб даҳлиздан чиқ-ди-ю, сиртқи эшикни тарақлатиб ёлганича зинадан сакраб қочди. Ҳовли бўйлаб энгашиб қочаётган Кирилл боққа етгунча, Кошевой икки марта ўқ узди, ле-кин тегиза олмади. Мишка наганни букилган чап қўлининг тирсагига қўйиб, оёқларини кериб, яхшилаб мўлжалга олди. Учинчи ўқдан кейин Кирилл қоқил-гандай бўлди-ю, лекин ўзини ўнглаб, четан девордан ирғиб ўтди. Мишка зинапоядан чопиб тушди. Унинг кетидан, уйдан «пақ» этиб милтиқ товуши эшитилди. Ўқ қарсиллаб, рўпарадаги оқланган омборхона дево-рига тегди, сувоқлар кўчиб ерга дув тўкилди.

Кирилл ўқдек учиб борарди. Унинг энгашган гав-даси ям-яшил олмазор орасида лип-лип этиб кўриниб кетарди. Мишка четан девордан ошиб тушаётib йи-қилди ва ётган жойида, қочиб кетаётган Кириллга қарата ўстма-уст икки ўқ узди-да, бурилиб уй томон қаради. Уйнинг эшиги ланг очиқ эди. Кириллнинг она-си зинада туриб, кафтини пешонасига қилиб боқ-қа тикиларди. «У билан гаплашиб ўтирмасдан жойида отиб ташлаш керак эди» пушаймон еб ўйларди Мишка-

У яна бирпас четан девор тагида уй томонга тикилиб ётди, беихтиёр тиззасига ёпишган лойни то-залай бошлади, ниҳоят ўрнидан турди-да, аранг че-тандан ошиб тушди, наган оғзини ерга қаратиб тўғри уйига кетди.

V

Кирилл Громовнинг кетидан Ахваткин билан Ко-шевой кўрган, нотаниш казак ҳам ғойиб бўлишди. Кечаси яна икки казак қишлоқдан жўнаб қолди. Ве-шенскаядан Татарска Дончеканинг отряди келди. Казаклардан баъзиларини қамоқقا олишди, ўз қис-мидан ҳужжатсиз қайтган тўрт кишини Вешенская-даги штраф ротасига жўнатишиди.

Кошевой эрталабдан кечгача ревкомдан бўшамас, қоронги тушгандагина уйга қайтарди, ўқланган ми-тигини каравоти ёнига, наганини ёстиқ тагига қўйиб, ечинмасдан ётарди. Кирилл воқеасидан кейин орадан уч кун ўтгач, у Дуняшкага:

— Даҳлизда ёта қолайлик,— деб таклиф этди.

— Нега энди?— деди таажжубланиб Дуняшка.

— Деразадан ўқ отишлари мумкин. Каравот де-раза ёнида.

Дуняшка индамасдан каравотни даҳлизга кўчир-ди, кечаси:

— Шу аҳволда, қуён сингари бекиниб умримиз ўтадими энди? Ҳадемай қиш келади, биз даҳлизда ёта-верамиزمи?— деб сўради.

— Ҳали қишга узоқ, ҳозирча шундай қилишга мажбурмиз.

— Бу «ҳозирча» қачон тамом бўлади, ахир?

— Қиришкани саранжом қилганимдан кейин.

— У сенга кўксини тутиб берадиган анойимас.

— Бир кунмас, бир кун тутиб беради,— дадил жа-воб берди Мишка.

Бироқ Мишканинг ўйлагани тўғри чиқмади. Дон-нинг нариги томонида, аллақайси ерда ўз шериклари билан бекиниб юрган Кирилл Громов, Махнонинг яқин келганини, унинг илфор отряди Краснокут станицасига кирганини эшишиб, Доннинг ўнг қир-

ғоғига ўтади. Кечаси у Татарскка кириб, тасодифан Прохор Зиковни учратади ва унга: «Мендан Кошевойга қуюқ салом айт, меҳмонга келаман, албатта мени кутсин»,— деб тайинлайди. Эрталаб Прохор Кирилл билан кечаси учрашганини ва унинг гапларини Мишкага етказди.

— Майли, келсин. Бир карра қочиб қутулди, иккинчи марта қутулоғмайди. Бунақа одамлар билан қандай муомала қилиш кераклигини энди ўргандим, бу сабоги учун раҳмат,— деди Мишка, Прохор гапини тугатгандан кейин.

Ҳақиқатан ҳам Махно Юқори Дон округининг чегарасидан ўтган эди. Вешенскаядан унга қарши юборилған бир батальон пиёда аскарни Қоньков қишлоғи ёнидаги қисқа жангда тор-мор қилди, бироқ у округ марказига бормасдан Миллерово станцияси томон юрди, Миллеровонинг шимолроғидан темир йўлни кесиб ўтиб, Старобельск томонга кетди. Энг актив оқ гвардиячи казаклар унга қўшилди, бироқ кўпчилик казаклар, нима бўлишини кутиб, уйларидан силжимади.

Кошевой қишлоқда бўлаётган ишларни доим кўз остига олиб юрар, ҳали ҳам сергаклик билан ҳаёт кециради. Лекин Татарскда тирикчиликнинг мазаси қочган эди. Казаклар қийинчилик билан кун кечиргандари учун Совет ҳукуматини аямай сўкишарди. Матлубот жамияти томонидан яқинда очилган кичкина дўкончада ҳеч нарса йўқ эди. Совун, қанд, туз, керосин, гугурт, махорка, арава мойи сингари энг зарил моллар дорига топилмасди, бўм-бўш токчаларида фақат қиммат баҳо асмол папироси билан баъзи бир темир-терсак буюмлардан бошқа ҳеч нарса кўринмас, олуви бўлмаганидан булар ҳам ойлаб чанг босиб ётарди.

Кечалари керосин ўрнига, эритилган сариқ мой ва мол ёғини ликопчага солиб ёқишарди. Махорка ўрнига жайдари, қўлбола тамаки чекишарди. Гугурт йўқлиги учун тош чақмоқ ва темирчилар наридан-бери ясаган пўлат чақмоқ ҳаммага расм бўлган эди. Пилик тезроқ тутасин учун уни кунгабоқар поясининг кулида қайнатишарди, шундай бўлса-да, ўрганмаганликдан, ўт ёқинш масаласида жуда қийналишарди. Қўй

пинча Мишка кечқурунлари ревкомдан уйга қайтаёт-
ганида бирор тор кўчага тўпланиб олишган кашандар-
ларни кўрар, уларнинг эшитилар-эшитилмас онадан
сўкишганини: «Совет ҳукумати, оловингдан бер!» деб
ёппасига чақмоқ тошларини чирсиллатгани устидан
чиқарди. Ниҳоят, бирортасининг пилигига учқун тегиб
тутай бошларди, дарҳол ҳаммаси ёпирилиб уни пуф-
лашарди, тамакиларини тутатиб олгач, индамай чўн-
қайиб ўтиришарди-да, олди-қочди гапга ўтишарди.
Тамаки ўрашга қоғоз ҳам топилмасди. Кашандалар
черков қоровулхонасида сақланган метрика дафтари-
ларини ўғирлаб кетишиди, уни ҳам чекиб бўлганла-
ридан кейин, уйда ётган эски дарсликларни, ҳатто
қарияларнинг диний китобларини ҳам қолдирмай, та-
макига ишлатиб юборишиди.

Прохор Мелеховлар ҳовлисига тез-тез келиб тураг,
Мишкадан доим тамаки ўрашга қоғоз олар ва ҳас-
рат қиласарди:

— Хотинимнинг сандиқ қолқоғига эски газеталар
ёпиширилган эди, ҳаммасини кўчириб чекиб тамом-
ладим. Янги ривоят номли муқаддас китоб бор эди,
униям чеквордим. Эски ривоятни чеквордим. Саҳоба-
лари қурсин, шунаقا ривоятлардан кўпроқ ёзмаган
экан-да... Хотинимда бир сажара бор эди: қариндошу
уругнинг ҳаммаси ёзилган, — ўлигиям, тиригиям, —
униям тамомладим. Илож бўлмагандан кейин нима
қилиш мумкин: карам баргига ёки отқулоққа ўраб
чекаманми? Йўқ, Михаил, қандай бўлмасин, менга
газета бер. Мен чекмасам, туролмайман. Герман уру-
шида мен баъзан ўз паёгимни ним чорак маҳоркага
алиштириб чекардим.

Уша йили кузда Татарскдагиларнинг кўрган куни-
га одам ачинарди... Араваларнинг ғилдираги мойлан-
магани учун ғичирлаб безор қиласар, чарм асбоблар ва
пойабзаллар ёғланмаганидан қовжираб ёрилаверарди,
ҳаммасидан ҳам туз йўқлиги ёмон эди. Татарсклик-
лар Вешенскаяга бориб, семиз қўйларини беш қадоқ
тузга алмаштиришар ва бундай қаҳатчилик учун Совет
ҳукуматини йўл-йўлакай сўка-сўка уйга қайти-
шарди. Бу дардисар тузнинг дастидан Мишка кўп гап
эшилди... Иттифоқо бир куни қариялар Советга ке-

лишди. Улар раис билан сиполарча сўрашиб, шапка-ларини олиб, скамейкага қатор ўтиришди.

— Туз йўқ, жаноби раис,— деди қариялардан бири.
— Ҳозир, жаноблар йўқ,— тўғрилаб қўйди Мишка.
— Кечирасан, тилимиз ўрганиб қолган-да... Жанобларсиз яшаш мумкину, тузсиз яшаб бўлмас экан.

— Хўш, нима демоқчисиз қариялар?
— Сен, раис, илтимос қилиб кўр, туз юборишсин.
Маничдан ҳўқиз билан ташиб келтиришимиз амри ма-ҳол.

— Мен бу ҳақда округга маълум қилганман. У ердагилар билишади. Яқин орада юборишлари керак.
— Туяning думи ерга текканда,— деди чоллардан бири ерга қараб.

Мишка тутақиб ўрнидан турди. Азбаройи жаҳли чиққанлигидан қизариб-бўзариб, чўнтақларини афда-риб кўрсатди.

— Менда туз йўқ. Қўрдингизми? Енимда туз олиб юрмайман, йўқни йўндиришга қурбим ҳам келмайди. Тушундингизми, қариялар?

Бирпастлик сукунатдан кейин Чумаков деган сўқир чол соғ кўзи билан ҳаммага қараб олиб:

— Бу туз қаёққа кетди ўзи?— деди.— Илгари, эс-ки ҳукумат даврида туз демаганинг тоғ-тоғ бўлиб ётарди, ҳеч ким бу ҳақда гапирмасдиям, ҳозир бир қайнатим тузга зормиз...

— Бунга бизнинг ҳукуматимиз айбдор эмас,— деди Мишка хийла ўзини босиб.— Бунинг учун фақат сизларнинг собиқ ҳукуматингиз — кадетлар ҳукумати айбдор! Улар юрт бошига шундай харобгарчилик келтиридки, ҳатто тузни нима билан ташиб олишимизни билмаймиз! Темир йўлларнинг ҳаммаси вайрон, вагон-лар ҳам...

Михаил қарияларга: оқлар чекинаётиб, давлат мулкини барбод қилганини, заводларни портлатиб, складларга ўт қўйиб кетганини гапириб берди. Уруш даврида ўз кўзи билан кўрганларини, баъзи бир эшитган нарсаларини мисол келтирас, жонажон Совет ҳукуматига бўлган норозиликни рад этиш учун холис ният билан баъзи нарсаларни ичидан тўқирди. Бу ҳукуматни душман маломатидан ҳимоя қилиш мақса-

дида Кошевой гапига ёлғонни ҳам аралаштираверарди ва ўзича ичида: «Пича ёлғон гапирсам ҳеч бокиси йўқ. Оқларнинг ҳаммаси аблаҳ, барибир, аблаҳлиги ни қўймайди, лекин биз учун ёлғонниям фойдаси тегиши мумкин...» деб ўйларди.

— ...Сиз, нима, бу буржуйларни анойи деб ўйлайсизми? Улар аҳмоқ эмас! Улар олдинроқ Россияядаги жами қанд ва тузни тўплаб, минг-минг пудлаб Қrimга жўнатишиди, у ердан пароходларга ортишиб, чет мамлакатларга сотгани юборишиди,— деб кўзларини чақнатиб гапиради Мишка.

— Улар ҳамма мазутниям обкетишдими?— ишонгиси келмай сўради сўқир Чумаков.

— Бўлмаса-чи! Чумаковга қолсин деб ташлаб кетармиди, бува? Сен ва сенга ўхшаш меҳнаткаш халқни улар бошига урадими? Улар мазутни кимга пуллашни яхши билади! Агар олиб кетишининг иложини топишса, ҳеч нарса қолдиришмасди, бу ерда халқ очликдан қирилса, қайтага суюнишади.

— Бу гапинг тўғри,— деб маъқуллади қариялардан бири.— Бойларнинг ҳаммаси шунаقا — ўлгудай очкўз. Қадимдан маълумки, одам қанчалик бойиса, шунчалик очкўз бўлади. Дастрлабки чекиниш бошланган кунлари Вёшкида бир бой, рўзгорида бор ҳамма нарсасини, ипидан игнасиғача қолдирмай аравага босади; шу пайт қизиллар Вёшкига яқин келиб қолади, лекин бой қўрадан қўзғалмайди: эгнида пўстин, қўлида омбир — уйда зир югуриб, девордаги михларни суғуради, денг. «Бу лаънатиларга битта михниям қолдирмайман!»— дейди. Бойлар шунаقا, мазутни обкетганига таажжубланмасаям бўлади.

Сұҳбат охирида Макаев деған чол беғаразлик билан:

— Хўш, тузсиз нима қиламиш энди?— деб савол берди.

— Ишчиларимиз яқин орада тузни керагича қазлаб беришади, бироқ ҳозирчалик Маничга араваларни юбориш керак,— деб маслаҳат берди Мишка.

— Халқ унамайди, у ёққа боришга тоби йўқ. У ердаги қалмоқлар бевош, кўлдан туз қазитмайди, ҳўқизларимизни тортиб олади. Мейинг битта танишим

ўша ердан ёлгиз қамчи билан қайтди. Кечаси Вели-кокняжеск томондан қуролланган уч отлиқ қалмоқ келиб, ҳўқизларини ҳайдаб кетишибди, кекирдагини кўрсатиб: «Дамингни чиқарма, йўқса, каллангдан ажрайсан...» — дейишибди. Жонидан тўйган одам боради у ёқقا!

— Сабр қилиш керак,— деб чуқур нафас олди Чумаков.

Мишка қарияларни бир амаллаб тинчита олди-ю, лекин уйда яна туз масаласи қўзғалиб, Дуняшка билан айтишиб қолди. Умуман, эр билан хотин орасига аллақандай совуқчилик тушган эди...

Бу нарсанинг бошланишига, тунови куни Прохорнинг олдида Григорийдан гап очилганлиги сабаб бўлган эди, бу гап ўшандан бери эсдан чиқмасди. Бир куни кечқурун Мишка овқат тепасида:

— Қарам шўрвангнинг тузи паст, хотин, — деди. — Паст бўлса, туз соласан, шўр бўлса, товонига қолласан, қабилидан бўпти-да!

— Бу ҳукуматнинг даврида овқат шўр бўлиб бўпти. Биласанми, уйда қанча тузимиз қолди?

— Хўш?

— Икки қайнатим.

— Иш чатоқ,— деб хўрсинди Мишка.

— Одамлар ёз куниёқ Маничга бориб туз ғамлаб олишди, сенинг бўлса бу тўғрида ўйлашга вақting йўқ,— деб гина қилди Дуняшка.

— Мен нимани қўшиб боришим мумкин эди? Уйланганимнинг биринчи йилиёқ хотинимни аравага қўшсам уят бўларди, новвосларнинг аҳволи ўзингга маълум...

— Ҳазилни йифиштири! Олдин тузсиз овқатни ичиб кўргин, иннайкейин ҳазиллашарсан!

— Мунча менга заҳрингни сочасан? Мен сенга тузни қайдан оламан ахир? Хотин зоти жудаям ғалати бўлади-да... Йўқни йўнсанг ҳам топасан, деб туриб олишади. Ҳеч ерда туз бўлмаса, нима қилай ахир, минг лаънат-эй, бунақа тузга!

— Одамлар ҳўқиз билан Маничга боришди. Ана ҳозир уларда туз ҳам бор, бошқасиям, бизнинг кунимиз тузсиз чучмал овқатга қолди энди.

— Бир амаллаб кунимиз ўтар, Дуня. Тез кунда туз юборишлири керак. Бизда туз сероб!
— Сизларда ҳаммасиям сероб.
— Сизларинг ким?
— Қизиллар.
— Сен қанақасисан?

— Мен шунақасиман. «Бизда ҳамма нарса сероб бўлади, ҳаммамиз тенг, бадавлат яшаймиз...» деб вай-сашгани қани? Мана сиз айтган бадавлат турмуш: лоақал шўрвага солиш учун туз топилмайди!

Мишка ваҳимага тушиб хотинига қаради, ранги оқариб кетди.

— Сенга нима бўлди, Дуняха? Нима деяпсан ўзинг? Шундай дейишга қандай тилинг боради?

Бироқ Дуняшка тўнини тескари кийиб олган эди: унинг ҳам жаҳли чиқиб, зардаси қайнаганидан ранги оқариб кетганди: бора-бора овози борича қичқириб гапира бошлади:

— Нега тилим бормас экан? Хўш, кўзингни нега олайтирасан? Тузсиз овқатдан одамларнинг милклари шишиб кетяпканини биласанми, раис? Одамлар туз ўрнига нима ишлатяпканини биласанми ўзинг? Нечеаев қўргонининг нарёғидаги шўр тупроқни кавлаб олиб, овқатларига солишаётчи... Шуни эшитганмисан?

— Кўп бақираверма, эшитганман... Хўш, иннай-кейин нима бўпти?

Дуняшка қўлини қўлига уриб қарсиллатди:

— Яна нимасини айтай?

— Бу қийинчиликларга бир амаллаб чидаш керакми, ахир?

— Бўлмасам, ўзинг чидайвер!

— Мен-ку, чидай оламан, лекин сен... Сендаги Мелеховлар мафкураси ҳозир очиқдан-очиқ хуруж қилди...

— У қанақа мафкура экан?

— Аксилинқилобий мафкура, тушундингми? — де-ди-да, Мишка ўрнидан турди. У кўзини ердан олмас, хотинига қарагиси келмасди; лаблари пир-пир учча бошлаб яна гапирди: — Агар шунақа гаплар яна оғзингдан чиқадиган бўлса, сен билан турмуш қилолмайман, шуни билиб қўй! Бу — душманнинг гапи...

Дуняшка бир нима деб эътиroz қилмоқчи эди, бироқ Мишка кўзларини олайтириб, муштини кўрсатди:

— Гапирма!.. — деб ўшқирди у.

Дуняшка пинагини бузмай, эрига астойдил тикилиб қараб қолди, салдан кейин ўзини босиб, шўх-шўх гапира бошлади:

— Ҳа, майли, арзимаган нарсага ғижиллашиб ўтирибмиз... Тузсиз ҳам кунимиз ўтади! — У бирпас жимиб қолди-да, сўнгра Мишкага ёқсан қадимги майин табассуми билан жилмайиб деди: — Ҳафа бўлма, Миша! Биз, хотинлар, шунақамиз, хотин кишининг ҳар бир гапига хафа бўлаверсанг, бошинг хафачиликдан чиқмай қолади. Кетини ўйламасдан гапираверамиз... Сен квас ичасанми ё қатиқ солиб берайми?

Ёшлигига қарамай, турмуш икир-чикирларини кўравериб пишган Дуняшка, жанжал пайтида қачон қаттиқ туриш, қачон бўйсуниш кераклигини яхши биларди...

Шу воқеадан кейин, орадан икки ҳафтача ўтгач, Григорийдан хат келди. Ў Врангелга қарши жангда ярадор бўлганини, тузалгандан сўнг хизматдан озод бўлиш эҳтимоли борлиги тўғрисида ёзган эди. Дуняшка хатнинг мазмунини эрига билдириб, секингина сўради:

— Акам уйга қайтса, нима қиламиз, Миша?

— Менинг уйимга кўчиб ўтамиз. Бу ерда ўзи тураверсин. Майдада-чуйдани бўлиб оламиз.

— Ҳа, бирга туришимиз мумкин эмас. Билишимча, у Аксиньяни олса керак.

— Мумкин бўлгандаям мен, барибир, аканг билан бир уйда туролмайман,— деди Мишка тўсатдан.

Дуняшка ҳайрон бўлиб, қошларини чимирди:

— Нима учун, Миша?

— Ўзинг биласан-ку.

— Оқларда хизмат қўлгани учунми?

— Ҳа, шунинг учун.

— Сен уни бирам ёмон кўриб қолдингки... Бир вақтлар қандай дўст эдингиз!

— Мен унинг нимасини яхши қўрай? Дўст эдик, дўстлигимиз тамом бўлди.

Дуняшка чарх айлантиради. Филдираги бир меёрда ғувилларди. Бирданига или узилди. Дуняшка кафти билан филдиракни тўхтатди, ипни улаётиб эрига қарамасдан савол берди:

— У келса, оқларда хизмат қилгани учун нима қилишади?

— Суд қилишади. Трибуналга беришади.

— Суд қандай жазога ҳукм қилиши мумкин?

— Унисини билмайман, мен судьямасман.

— Улим жазосигаям ҳукм қилиши мумкинми?

Мишка Мишатка билан Полюшка ётган каравотга қаради, уларнинг бир текис нафас олишига қулоқ солди-да, овозини пасайтириб:

— Мумкин,— деди.

Дуняшка бошқа ҳеч гап сўрамади. Эрталаб сигирни соғиб бўлгандан кейин, Аксинъянинг уйига кирди.

— Яқинда Гриша келади, суюнчи олгани келдим.

Аксинъя индамасдан, бир декча сувни печнинг қўрхонасига қўйди-да, қўлларини кўксига босди. Дуняшка унинг юзи лоладай яшнаганини кўриб:

— Жудаям суюнма.— деди.— Эрим, аканг суддан қутулолмайди, дейди. Қанчага кесишини худо билади ҳали.

Аксинъянинг шодиёна чақнаган намли қўзларида ваҳим аломати кўриниб кетди.

— Нега энди судга тушаркан?— энтикиб сўради Аксинъя, лекин азбаройи бўشاшиб кетганидан жилмайган лабларини ҳам йиғишириб ололмади.

— Қўзголон учун, бошқа ишлари учун.

— Бекорчи гап! Уни судга беришмайди. Сенинг Михаилинг ҳеч нарса билмайди, фолбинлигини қара-ю!

— Балки, беришмас.— Дуняшка жим бўлиб қолди, сўнгра ютиниб олиб, шундай деди:— У акамни кўрарга кўзи йўқ... Шунинг учун кўнглим жойида эмас, лекин ўзига айттолмайман. Акамга бирам ачинаманки! Яна ярадор бўпти... Бечоранинг боши азобдан чиқмади ҳеч...

— Ишқилиб келсин-чи! Болаларни оламизу, бир ёққа йўқоламиз,— ҳаяжонланиб деди Аксинъя.

У негадир, бошидан рўмолини олиб, яна қайта ўради, ўзидан-ўзи идиш-товоқларни у ёқдан бу ёққа

олиб қўйди, бироқ ҳовлиққан юрагини, кучли ҳаяжонини боса олмади.

Аксинья скамейкага ўтириб, эскирган фартуфининг бурмаларини тиззаси устида текислай бошлаганди, Дуняшка унинг қўллари қалтираганини пайқади.

Дуняшканинг томоғига бир нарса келиб тиқилгандай бўлди. У ёлғиз ўзи қолиб, тўйгунча йиғлагиси келарди.

— Онам бечора уни кўролмади...— деди у эшити лар-эшитилмас.— Мен кета қолай. Печь ёқишим ке рак.

Даҳлизга чиққанларидан кейин Аксинья шошиб пишиб унинг бўйнидан ўпди, қўлидан ушлаб яна ўпди.

— Ишқилиб, суюндингми?— товушини йўғон қилиб энтика-энтика сўради Дуняшка.

— Андак суюндим, сал-пал...— деди Аксинья, у кўзларига ёш келганини ҳазил билан, жилмайиш билан яшиromoқчи бўларди.

VI

Григорий хизматдан бўшаган қизил командир бўлгани учун унга Миллерово станциясида арава беришди. Уйга қайтишда у йўл-йўлакай, ҳар бир украин слободасида отларни алмаштириб, бир сутка деганда Юқори Дон округининг чегарасига етди. Биринчи казаклар қишлоғида ревком раиси — яқинда армиядан қайтган ёш қизил аскар унга:

— Ҳўқиз аравада кетишга тўғри келади, ўртоқ командир,— деди.— Бутун қишлоқда биттагина от бор, унинг ҳам бир оёғи чўлоқ. Чекинищ вақтида ҳамма отни Кубанда қолдиришиб қайтишибди булар.

Григорий столни чертиб, хушчақчақ раиснинг ўйноқи кўзларига тикилиб қаради-да:

— Ўша от билан бир амаллаб етиб олмасмиканман?— деб сўради.

— Етиб ололмайсиз. Бир ҳафта юрсангиз ҳам барибир етолмайсиз. Қўп ташвишланманг, жуда семиз, йўрга ҳўқизларимиз бор; биз Вешенскаяга арава жўнатмоқчимиз, урушдан кейин бу ерда қолиб кетган

телефон симларни обориб ташлаши керак; сизга қулай бўлади: йўл-йўлакай арава алмаштириб юрмасдан, тўғри уйингизга етиб оласиз.— Раис кулиб туриб айёрлик билан чап кўзини қисиб давом этди:— Сизга энг яхши ҳўкизларимизни берамиз, ёшгина бева жувон аравакаш бўлади... Қишлоғимизда битта ғалатиси бор, тушингиздаям бунақа савилни кўрмагансиз! Йўлда вақтичоғлиқ билан уйингизга қандай етганингизни билмай қоласиз. Менинг ҳам бошимдан ўтган, ҳарбийларга нима зариллигини яхши биламан...

Григорий чурқ этмай, ўзича ўйлаб кўрди: бошқа бирор йўловчи арава кутиш — бемаънилик, пиёда юрай деса — ораси узоқ. Ҳўқиз аравада бўлса ҳам кетишдан бошқа чора йўқ.

Бир соатдан кейин арава келди. Шалоги чиқсан эски араванинг ғилдираклари ғичиллаб нола қиласади, кетинги катагининг ёғочлари тилка-тилка бўлиб кетган, арава устига пичан палапартиш босилгани учун ерга осилиб ётарди. Григорий араванинг аҳволини кўриб: «Урушнинг оқибати шу-да!» деб ғижинди. Аравакаш хотин қамчини қимирлатиб, ҳўкизлар ёнида келарди. У ҳақиқатан ҳам чиройли, қад-қомати келишган ғалати жувон эди. Фақат кўксининг ҳаддан ташқари катталиги бўйига ярашмасди, дум-думалоқ иягидаги эгри чандиги юзини ўйноқи хотинларнига ўҳшатиб қўйган, қаншар атрофидаги тариқдай майда, тилладай йилтироқ сепкиллари қорачадан келган қип-қизил юзини қаримсиқ қилиб кўрсатарди.

Жувон рўмолини тузатаркан, Григорийга зеҳн солиб тикилди:

— Сени обкетишим керакми?— деб сўради.

• Григорий зинадан туриб, шинелининг барларини ўраб олди.

— Мени. Симни ортдингми?

— Мен ҳали уларга ортиб ҳам берайми?— деб бақириб казак аёл.— Ҳар куни арава қўш, ҳар кун ишла! Мен уларга анойи бўлдимми? Қерак бўлса, симни ўзлари ортсин, бўлмаса шундай жўнайвераман.

У ўрам-ўрам симларни аравага ортар, раис билан бақириб сўкишар, лекин ғазабланмасди, ора-сира Григорийга ер тагидан қараб-қараб қўярди. Раис бу

ёшгина жувонни астойдил завқланиб томоша қилар-кан, дам-бадам ҳазиллашиб куларди. Баъзан Григорийга: «Бизда шунаقا аёллар бор! Сен бўлса, гапимга ишонмадинг!»— дегандай кўз қисарди.

Қишлоқнинг нарёғидаги бўзарган кузги дашт жуда-жуда олисларгача чўзилиб кетган. Шудгорлардан кўтарилигган кўкимтири турун йўл устидан сузиб ўтади. Қўшчилар қуриган янтоқ билан ўрилган буғдой илдизларини ёқишмоқда. Тутун ҳиди Григорийнинг хаёлида мунгли хотираларни уйғотди: у ҳам бир вақтлар химсасиз даштда кузги шудгор қилган, кечалари қоп-қора осмонга, йилтироқ юлдузларга тикилган, баландлардан учиб ўтган гала фозларнинг қийқириғига қулоқ солган эди-ку... У безовталаниб пичан устида у ёнбошдан бу ёнбошга ағдарилди-да, аравакаш аёлга ёндан қаради.

- Неча ёшга кирдинг, ойимтилла?
- Олтмишга бориб қолдим,— бир кўзи билан кулиб, нозу ишва билан жавоб берди жувон.
 - Ҳазиллашмасдан ростини айт.
 - Йигирма бирга қадам қўйдим.
 - Бевамисан?
 - Беваман.
 - Эрингни нима қилдинг?
 - Ўлдиришди.
 - Қачон?
 - Бир йилдан ошди.
 - Қўзғолонда ҳалок бўлдими?
 - Ундан кейин, кузга яқин.
 - Қандай тирикчилик қиляпсан?
 - Бир амаллаб.
 - Зерикмайсанми?
- Жувон унга қаттиқ тикилди-да, кулгисини яшириш учун рўмолини лабларига суриб қўйди. У гапира бошлаганда овози секинлашиб, аллақандай янги интонация пайдо бўлди:
 - Иш кўп, зерикишга вақтим йўқ.
 - Эрсиз зерикмайсанми, ахир?
 - Мен қайнанам билан тураман, рўзғорда ишдан қўлим бўшамайди.
 - Эрсиз қандай чидай оласан?

У Григорийга бурилиб қаради. Қорамағиздан келган ёноқлари қизарип кетди, кўзлари учқунланиб яна сўнди.

— Нимани сўраяпсан ўзинг?

— Нимани бўларди, ўшани-да...

Жувон рўмолини лабидан суреб қўйди-да, чўзиб-гапирди:

— Э, бунақа матаҳ топилади! Йигит зотига қаҳатчилик келгани йўқ...— деди-да, бир дам жимиб яна давом этди:— Мен эрга тегиб, эру хотинлик гаштини тузуккина суролмадим ҳам. Бир ойгина турмуш қилганимдан кейин, эримни аскарлик хизматига олиб кетишиди. Эрсиз бир амаллаб иложини қиляппан. Ҳозир яхши бўлди, ёш-ёш казак йигитлар кўпайди, илгари қийин эди. Ҳўк, жонивор! Эй, аскар бола, гап кўп, кўмир оз! Умрим шундай ўтяпти.

Григорийнинг дами ичига тушиб кетди. Шу тариқа гап ташлагани учун энди пушаймон еди.

Катта-катта семиз ҳўқизлар ҳали ҳам боягисидай бир меёрда қадам ташлашар, эгри-буғри одимлар билан олға интилишарди. Биттасининг ўнг шохи бир вақтлар синган бўлиб, манглайига қараб қийшайиб ўсганди. Григорий тирсагини тираб, кўзини юмиб жим ётарди. У ёщлик чоғида ва кейинчалиқ, йигитлик маҳалида ўзи ишлатган ҳўқизларни бирма-бир кўзи олдига келтиради. Ҳаммаси ҳар хил эди: туси ҳам, соҳти ҳам, турқи ҳам бир-бирига ўхшамас, ҳатто шохларининг шакли бир-бириникидан тафовут қиласарди. Қадимда Мелеховлар қўрасида худди шу ҳўқизга ўхшашиб шохлари ёнига қайрилган бир ҳўқиз бўлгувчи эди. У жудаям асов, бадфеъл эди; қонга тўлган кўз соққаларини доим олайтириб кўз қирида тикилар, орқадан келган одамни тепмоқчи бўларди; кўпинча у, далада айни иш қизиган кезларда, кечалари молларни ўтга қўйиб юбориши билан уйга қараб жўнаб қоларди, баъзан ундан ҳам баттар қилиқ чиқариб, ўрмон орасида ёки олисдаги жарлардан бирида писиб юраверарди. Григорий отга миниб, кун бўйи даштма-дашт уни излар ва ниҳоят, топишдан бутунлай умидини узганда, тўсатдан бирон жар тагида ёки ёввойи тоғолча буталари орасида, ё эса ёввойи олма тагида, сояда ётгани-

ни кўриб қоларди. Бу якка шохли махлуқ шу қадар муғомбир эдики, шохидан арқонни шипириб ташлашни, кечаси молхона эшигининг занжирини шохи билан илиб очишни биларди, ташқарига чиқиб қолгандан кейин, Дондан сузib ўтарди-ю, яйловда санғиб юраверарди. Уша кезларда бу ҳўқиз Григорийни кўп сарсону саргардон қилган эди...

— Анови шохи синган ҳўқизинг қанақа, ювошми? — деб сўради Григорий.

— Ювош. Нимайди?

— Шундай, ўзим.

— Оғзига сув олволган одамнинг «шундай» деганига ҳам шукур қилиш керак,— истеҳзо билан кулди аравакаш жувон.

Григорий индамади. У урушдан олдинги даврни ўйлар: тинч турмуш, осойишта меҳнат — урушга алоқаси бўлмаган жами нарсалар тўғрисида роҳатланиб хаёл сурарди, лекин етти йилдан бери чўзилиб жонига теккан бу уруш тўғрисида сира ўйлагиси келмасди, чунки у эсига тушса, унинг бирон эпизоди кўз олдига келса, юраги орқасига тортиб, ўзидан-ўзи хуноб бўлаверарди.

У энди урушиб бўлди. Шунча урушгани ҳам етар. У қўлларининг чигилини ёзиб ишга киришиш, болалири билан, Аксинъя билан тинчгина яшаш учун уйга қайтаётган эди. У фронтда юрган вақтидаёқ Аксинъяни уйига обкелишга, болаларини унинг қўлига топширишга, доим у билан бирга бўлишга аҳд қилган эди. Бу масалани ҳам бир ёқлик қилиш керак эди, қанчалик тезроқ ҳал қилинса, шунчалик яхши бўларди.

Григорий ширин хаёллар оғушида борар, уйга ергандан кейин шинель ва этикларини ечиб ташлаб, дарров кенггина чориқ кийиб олишини, казаклар одати бўйича, оқ пайпоқлар ичига чалворининг почаларини сүқиб, иссиққина курткаси устидан хонаки чакмон кийиб, далага жўнашини кўз олдига келтиради. Қани энди, омоч қулоғидан ушласа-ю, нам эгат ичи билан қўш кетидан бораверса, ҳайдалган ернинг ажойиб намхуш ҳидини, омоч тиши кесиб кетган кўкатларнинг аччиқ исини исказверса... Ёт элларда тупроқ ҳам, кўкатлар ҳам бошқачароқ ҳид беради. У Польшада,

Украинада ва Қримда кўқимтири шувоқ баргини неча марта кафтида ишқалаб, исказ кўрган, ғамгин хаёл ичидаги: «Йўқ, сира ўхшамайди, бутунлай бошқа...»— деган эди.

Аравакаш жувон зериккан, унинг гаплашгиси келарди. У ҳўқизларни ўз ҳолига қўйиб, қулайроқ ўтириб олди-да, қамчининг чарм шокиласини ўйнаб, ер тагидан Григорийга тикила бошлади, унинг жиддий юзига, чала юмуқ кўзларига қаради. «Сочлари оқарган бўлса ҳам ўзи уччалик қари эмас. Бир оз девонафеъл экан,— деб ўйларди у.— Ҳадеб кўзини сузади, нега сузаркан энди? Ўзиям уззукун аравадан чиқмаган ахтадай силласи қуриб, адойи тамом бўпти... Лекин кўриниши чаккимас... Фақат соchlари оқаргани, мўйловигача оқ босиб кетгани бўлмаса, ўзи бинойидай. Нега мунча ўйларкин? Олдин бир оз гап ташлагандай бўлди-ю, кейин яна жимиб қолди, негадир ҳўқизни сўради холос. Гаплашишга гап тополмаяпти-микин? Ёки, юраги бормаяпкан бўлса-чи? Йўқ, унақага сира ўхшамайди. Кўзлари жуда ўткир. Йўқ, асл казак, фақат бир оз ғалатилиги бор холос... Индамасанг, индамай ўтиравур буқчайиб! Сени деб ўлиб турганим йўқ! Индамасликни мендан ўрган! Хотинингни соғиниб жонинг ҳалак. Индамасанг, сатқайи саримга!»

У араванинг ён тахтасига орқасини тираб олди-да, хиргойи қилиб ашула бошлади.

Григорий бошини кўтариб қўёшга қаради. Ҳали кун эрта эди. Йўл бўйида шумшайиб турган бултурги оқ карракнинг сояси ярим қадамча жойга энди чўзилганди; ҳар ҳолда, соат иккidan ошган эмасди.

Дашт маҳлиё бўлган каби суқунат оғушида ётарди. Қуёш унча қизитмас, майнин шабада қовжираган сапсариқ ўтларни оҳиста тебратарди. Бутун теварак-атрофда на қушларнинг сайрагани ва на юронқозиқнинг чийиллагани эшитиларди! Оч-кўк тусга кирган осмон қўйнида парвоз этувчи калхату бургутлардан дарак йўқ эди. Фақат бир мартагина қорайган сояйўлни кесиб ўтди; Григорий бошини кўтармасданоқ, каттақон парранданинг оғир-оғир қанот қоқишини эшилди: қўқ тувалоқ қанотлари остидаги оппоқ парларини қуёшда йилтиратиб учиб ўтди-да, олисдаги

тепа ёнига — қуёш тушмаган жарлик бора-бора бинафшасимон қоронғилик билан қўшилиб кетган жойга бориб қўнди. Григорий илгари фақат кечки куз маҳалидагина даштнинг нақадар оғир ва ҳазин сукунага чўмганини кўрган эди. Ўшанда унинг назарида, ҳатто олисда шамол думалатиб кетаётган ковракнинг ҳам шитирлагани қулоққа киргандай туюларди.

Йўлнинг поёни кўринмас — сира тугамайдиганга ўхшарди. У ён бағир бўйлаб илон изидек чўзилар, сойликка тушиб, яна қир устига кўтарилади. Қаёққа қарасанг, кўз илғамас, бепоён кимсасиз дашт, йилки боқадиган ажойиб яйлов.

Григорий жар ёқасида ўсган бир туп заранг дарахтини томоша қиласарди. Дастлабки совуқ урган барглари, худди қип-қизил чўғ сингари йилтиради.

Аравакаш жувон Григорийнинг кифтига қамчи билан астагина туртиб сўради:

— Амаки, отинг нима?

Григорий сесканиб тушди, унга ўгирилиб қаради. Жувон четга қараб ўтиради.

— Григорий. Сеники-чи?

— Менинг отим от...

— Ундан дегандан кўра индамай ўтиравер.

— Индамай ўтиравериш жонимга тегди! Эрталабдан бери индамай ўтириб, томофим қақраб кетди. Сен нега мунчалик хафасан, Гриша амаки?

— Нимасига суюнишим керак?

— Уйингга қайтаяпсан, хурсанд бўлишинг керак.

— Хурсандчилик даври ўтиб кетди — қаридим.

— Қариган эмиш, ҳали бинойидайсан. Менга айт-чи, ўзинг ёшу, нега ҳалитдан соchlаринг оқариб кетди?

— Ҳаммасини билишинг шартми?.. Турмушнинг яхшилигидан оқарган бўлса керак.

— Уйланганмисан ўзинг, Гриша амаки?

— Уйланганман. Сен ҳам тезроқ эрга тегишинг керак.

— Нега энди тезроқ дейсан?

— Жудаям ўйноқи экансан...

— Ўйноқи бўлсам ёмонми?

— Баъзан ёмон бўлади. Мен сендақа бир хотинни

билардим, у ҳам бева эди, қичиқлик қила-қила, ахий-ри бурни ўпирилиб тушди...

— Худоё тавба, жудаям қўрқитвординг-эй! — деб ёлғондақасига чўзиб қичқирди у, лекин ўша заҳотиёқ очифини айтди: — Беваларда шундай гап бор: чумчуқ-дан қўрқсанг, тариқ экма!

Григорий унга тикилди. У майдада оппоқ тишларини кўрсатиб, унсиз куларди. Очилиб қолган устки лаби пир-пир учар, киприклари остида кўзларининг ажинаси ўйнаб туарди. Григорий беихтиёр илжайди-да, қўлини унинг тирсиллаган иссиқ тиззасига қўйди.

— Эй бечора, пешонанг жудаям шўрлик экан! — ачиниб гапирди Григорий. — Ёшинг йигирмадан ошар-ошмас, турмуш сени адойи тамом қилиби.

Кўз очиб юмгунча жувоннинг шўхлигидан асар қолмади. У Григорийнинг қўлини итариб ташлади ва шу қадар қизариб кетдик, ҳатто қаншаридаги сепкиллари ҳам кўринмай қолди.

— Сен уйга борганингда ўз хотинингга ачингин, тузумки? Сенсиз ҳам менга ачинадиганлар кўп!

— Нега жаҳлимг чиқди, шошмасанг-чи, ахир?

— Гапирма-э!

— Мен сенга раҳмим келгани учун айтдим.

— Раҳмингминам қўшилиб қўшмозор бўл-эй, сендақа... — эркакчасига болохонадор қилиб сўкди, кўзлари аланг-жаланг бўлиб кетди.

Григорий қошларини чимириди-ю, уялинқираб мин-фирлади:

— Жудаям ҳаддан оширвординг-ку, яхши эмас! Одам деган мунчалик енгил бўлмайди.

— Ўзинг қанақасан? Шинель кийган битлиқи авлиёсан холос! Биламан сизларни! Эрга тег, унда-ю, мундай деб насиҳат қиласан-менга, ўзинг қачондан бери оғир бўлволдинг?

— Яқиндан бери,— деб кулди Григорий.

— Нега бўлмаса, менга насиҳат қиласан? Менга насиҳат қиладиган қайнанам бор.

— Вой жинни-е, мунча тутақишиласан, бўлди энди! Мен пайрави келганда бир гапирдим-қўйдим-да,— бўш келиб гапирди Григорий.— Ановини қара: га-

пимиздан қўрқиб ҳўқизлар йўлдан четга чиқиб кетди.

Григорий ўрнашиб ўтираётиб, кўз қирида шўх жувонга қаради-ю, унинг кўзлари ёшланганини кўрди. Ўнгайсизланиб дили сиёҳ бўлиб кетди: «Ўзимга ўзим дардисар орттирдим! Хотин зоти доим шунақа...» — деб пушаймон еди.

У шинель барини юзига ёпиб чалқанчасига ётиб олди-да, дарров уйқуга кетди, қоронғи тушгандағина кўзини очди. Оқшом қоронғисида юлдузлар гирашира йилтирашарди. Хушбўй пичан ҳиди кўнгилни очарди.

— Ҳўқизларни хашаклатиб олиш керак,— деди жувон.

— Майли бўлмаса, тўхтатайлик.

Григорий ҳўқизларни ўзи аравадан чиқарди, сумкасидан бир банка гўшт консерва, нон олди, қуруқ бурган ўтдан бир қучогини териб келди-да, аравадан сал нарироққа ўт ёқди.

— Қани ўтир, овқатланиб олайлик, жаҳлингдан тушсанг бўлар энди, оти от қиз.

Жувон гулхан ёнига келиб ўтирди, сумкани қоқиб нон ҳамда эскириб, сарғайиб кетган бир бўлак сур мойни олди. Овқат тепасида учалик гапиришмади, тинчгина еб ўтиришди. Сўнгра, жувон аравага чиқиб ётди, Григорий гулхан ўчиб қолмасин деб тезак қалади-да, солдатчасига гулхан ёнига узала ётди. У сумкасини бош остига қўйиб, милт-милт қилиб турган юлдузлар тўла осмонга тикилганича болалари тўрисида, Аксинъя тўғрисида ўйлай бошлади, ниҳоят ухлаб қолди, лекин хотин кишининг шивирлаган овозидан уйғониб кетди.

— Ухляйпсанми, аскар бола? Ухляйпсанми ё уйғоқмисан?

Григорий бошини кўтарди. Ҳамроҳи тирсагига тиранниб, аравадан энгашиб уни чақиради. Сўнаётган гулхан шуъласи пастдан ёритиб тургани учун юзи чўғдай яшнаб кўринар, четига тўр тутилган рўмоли ва оппоқ тишлари садафдай товланиб кўзни қамаштиради. Орадан ҳеч гап ўтмагандай, у қошларини учириб яна жилмайди:

— Совқотиб қолмасанг деб хавотирдаман. Ер муз-
дай. Агар совқотган бўлсанг, ёнимга кела қол. Пўс-
тиним бирам иссиқки, жонинг киради! Келасанми?

Григорий ўйланиб туриб чуқур нафас олди.

— Раҳмат, ойим қиз. Бир-икки йил илгари бўлган-
да бошқа гап эди... Олов ёнида совқотмасман.

У ҳам чуқур нафас олиб:

— Ихтиёр ўзингда,— деди-да, пўстинини бошигача
буркаб олди.

Бирпасдан кейин Григорий туриб майдада-чўйдала-
рини йигиштира бошлади. У тонг отгунча Татарскка
етиб олиш учун пиёда жўнашга аҳд қилган эди. Ҳар-
бий хизматдан қайтиб келаётган командир бўла туриб,
куппа-кундуз ҳўқиз аравада уйига кириб боришга но-
мус қиласди. Буни кўрган одамлар уни гап-сўз қили-
ши, кулиши мумкин...

У аравакаш жувонни уйғотди:

— Мен пиёда кетаман. Даشتда ёлғиз қолишга
қўрқмайсанми?

— Йўқ, мен унақа қўрқоқлардан эмасман, қишлоқ
ҳам узоқ эмас. Эрталабгача сабринг чидамаяптими?

— Топдинг. Хайр, оти от қиз, яхши-ёмон гапирган
бўлсан хафа бўлма!

Григорий ўйлга тушиб, шинелининг ёқасини кўта-
риб олди. Биринчи қор учқуни кипригига қўнди. Гри-
горийнинг назарида шимол ёқдан турган шамолнинг
муздай нафаси аралаш ёқимли қор ҳиди келганга ўх-
шаб туюлди.

* * *

Қошевой станицадан кечқурун қайтди. Дуняша
унинг дарвоза олдига келиб тўхтаганини деразадач
кўриб, рўмолини елкасига ташлади-да, югуриб ҳов-
лига чиқди.

У кўча эшик олдидаги эрига:

— Эрталаб Григорий келди,— деди-ю, хавотир-
ланиб унинг юзига тикилди.

— Ҳурсандчилик билан табриклайман,— сиполик
билан мийифида кулиб қўйди Мишка.

У лабларини қимтиб емакхонага кирди. Икки лунжидай нарса нари бориб, бери келиб турарди. Григорийнинг тиззасида, аммаси ясантириб қўйган Полюшка ўтиради. Григорий қизини авайлаб ерга қўйди-да, қорайган қўлларини чўзиб, жилмайганича куёви томон борди. У Михаил билан қучоқлашиб қўришмоқчи эди, бироқ унинг қўзлари ўқрайган, қовоги солинганини қўриб шахтидан қайтди.

— Салом, Миша!

— Салом.

— Кўришмаганимизгаям талай вақт бўлди! Назаримда юз йил ўтганга ўхшайди.

— Ҳа, талай вақт бўлди... Хуш келибсан!

— Раҳмат. Уруғ-аймоқ бўлибмиз-да, а?

— Шундай бўлди... Юзинг нега қонаяпти?

— Зарари йўқ, шошганимдан устара билан кесиб олдим.

Иккиси стол ёнига бориб ўтиришди, ўнғайсизланиб, ётсирашиб, бир-бирига индамай тикилиб қолишиди. Уларнинг гаплашадиган гали кўп эди, бироқ ҳозир вақти эмасди. Михаил ўзини босиб олиб, вазминлик билан рўзгор масаласи, қишлоқдаги ўзгаришлар тўғрисида гапира бошлади.

Григорий деразага қараб, биринчи қор босган ерни, шипшийдам олма шохларини томоша қиласади. У Михаил билан бундай учрашувни кутмаган, ўзича буни бошқачароқ тасаввур этиб юрган эди...

Бир оздан сўнг Михаил эшикка чиқди. Даҳлизда пичноқни яхшилаб қайради-да, Дуняшкага:

— Биронта кишини чақириб тўқли сўйдирмоқчиман,— деди.— Ҳўжайнини тузукроқ зиёфат қилиш керак, ахир! Самогон топиб кел. Шошма, олдин Прохорникига кир, унга айтгинки, тупканинг тагидан бўлсаям самогон топиб келсин. Сендан кўра бу ишга ўша эпчил. Овқатга таклиф этгин.

Дуняшка суюнганидан лоладай яшнаб, миннатдорлик билан эрига жимгина қараб қўйди... Прохорникига кетаётуб: «Балки, тинч-тотув бўлиб кетишар... Урушдан қутулишди, энди нимани талашишади? Ишқилиб, икковигаям худо инсоф берсан!»— умид билан ўйларди у.

Орадан ярим соат вақт ўтар-ўтмас, Прохор ҳаллос-
лаб югуриб келди.

— Григорий Пантелеевич! Қадрдон дўстим! Сен билан кўришишдан умид узувдим,— ингичка, йиғло-
қи овоз билан қичқирди Прохор, остонаяга қоқилиб ке-
тиб, сал бўлса, қарийб бир челяк самогон солинган кў-
зани синдиради.

Григорийни қучоқлаётуб, пиқирлаб йиғлади, мушти билан кўз ёшини артиб олди. Григорийнинг томоғига бир нарса тиқилғандай бўлди-ю, бироқ у ўзини босиб олди, азбаройи таъсиранганидан содик ординареци-
нинг кифтига қўпоплик билан қоқиб қўйиб, пойма-
пой гапира бошлади:

— Ахийри кўришдик, а... Сени кўрганимга хурсанд-
ман, Прохор, ниҳоятда хурсандман! Эҳе, қария, нега
кўз ёши қиласан? Турмуш енгиб қўйдими? Винтларинг
бўшашиб қолдими? Қўлинг тузукми? Иккинчисини хо-
тининг синдирганича йўқми ҳали?

Прохор бурнини қоқди, нимча пўстинини ечди.

— Хотинимминам ҳозир жудаям иноқмиз. Мана иккинчи қўлим, ҳалиям соппа-соғ, оқ поляклар син-
дирган манависи бўлса, тагидан ўса бошлади,
худо урсин, рост! Бир йилдан кейин панжа битади,—
қадимги одати бўйича Прохор гап сотишга тушди,
қўли йўқ енгини ўйнатиб.

Уруш уларни гапни ҳазилга бурвориб ўзини ову-
тишга, нонга туз сепиб еган каби, суҳбатга ҳам ҳазил
аралаштиришга ўргатган эди; шунинг учун Григорий
ҳазил аралаш савол бера бошлади:

— Турмушинг қалай, қариган така? Иргишлиб
юрибсанми?

— Қарияликка яраша турмуш секин-аста ўтятти.

— Мен йўғимда яна илаштирмадингми?

— Нимани?

— Булбулни, бултур қишда тутволувдинг-ку?

— Пантелеевич! Худо сақласин! Шу топда унақа
матони бошимга ураманми? Бир қўллик ногиронга
булбул энди тутқизиб бўпти! Бу энди сенга яраша-
ди: ёшсан, бўйдоқсан... Менинг шартим кетиб, пар-
тим қолди, бору йўғимни йигиштириб хотинимга топ-
широқчиман ҳали, тутантириққа ишлатар...

Икки дўст, эски окондош ўртоқлар яна юз кўришганига қувонишиб, бир-бирларига узоқ тикилиб жилмайишарди.

— Бутунлай келдингми? — сўради Прохор.

— Бутунлай. Бутунлай бўшадим.

— Қайси даражага кўтарилидинг?

— Полк командирининг ёрдамчиси эдим.

— Нима учун сенга тез жавоб беришди?

Григорийнинг қовоғи осилиб кетди:

— Керак бўлмай қолдим, — қисқагина жавоб қилди.

— Сабаб?

— Билмадим. Эски ишлар сабаб бўлса керак.

— Сен ахир, Особий отдел қошидаги офицерларни чириқдан ўтказадиган комиссиядан ўтгансан-ку, эски ишлар нимаси тағин?

— Ўтиш бошқа...

— Михаил қани?

— Қўрада. Молларга қарайпти.

Прохор Григорийга яқинроқ ўтирди-да, овозини пасайтириб:

— Бир ой муқаддам Платон Рябчиковни отишди,— деди.

— Йўғ-эй!?

— Худо урсин!

Даҳлиз эшиги ғичиллади.

— Қейин гаплашамиз,— деб шивирлади-да, Прохор овозини баланд қилиб:— Қани бўлмаса, ўртоқ командир, шундай зўр хурсандчилик учун ичамиэми? Михаилни чақириб келайми?— деди.

— Бор, чақир.

Дуняшка дастурхон ёзди. У қандай қилиб акасини хурсанд этишини билмасди: тоза сочиқ келтириб, унинг тиззасига қўйди, тузланган тарвуз солингган тарелкани унга яқинроқ суриб, стаканни тўрт-беш марта қайта-қайта артди... Синглиси уни «сиз»лаб гапиргани учун ўзича кулиб қўйди.

Михаил дастурхон тепасида анчагача миқ этмай, Григорийнинг гапига қулоқ солиб ўтираверди. У кам ичар, кўнгли төртмасди. Аммо лекин Прохор бўлса,

стаканни тўлғазиб пайдарпай ичарди, борган сайн қизариб, дам-бадам мўйловини силарди.

Дуняшка болаларни овқатлантириб, ётқизиб бўлгач, бир лаган пишган қўй гўштини столга қўйиб, Григорийнинг қулоғига шивирлади:

— Акажон, мен бориб Аксинъяни чақириб келсам майлими, нима дейсиз?

Григорий бош қимирлатиб розилик берди. Унинг назарida, бутун оқшом кўнгли алағда бўлиб аранг ўтирганини ҳеч ким сезмаётгандай туюлса ҳам Дуняшка, тиқ этган товушга акаси ҳадисирааб қулоқ солганини, кўз қирида эшикка қараб-қараб қўйганини кўрган эди. Дуняшка ҳаддан зиёда ҳушёр ва зийрак бўлгани учун унинг ўткир кўзларидан ҳеч нарса қочиб қутулолмасди...

— Анави кубанлик Терешченко ҳалиям взвод командирими?— деб сўради Прохор, қўлидаги стаканни худди бирор тортисиб олаётгандай маҳкам чанглалаб.

— Львов ёнида ҳалок бўлди.

— Жойи жаннатда бўлсин. Яхши одам эди.— Прохор нари-бери чўқиниб, яна стаканга ёпишди. Кошевоининг заҳарханда қилиб илжайганини пайқамади ҳам.

— Анови-чи, ҳалиги, фамилияси ғалати одам? Ўнг ёнбошда турадиган бор-ку, ҳаҳ, падарига лаънат, тилим учиди турибди, Май-Борода? Ҳўппа семиз ас-киябоз хохол-чи, Броди шаҳри ёнида поляк офицерни икки нимта қилган, ўша тирик борми?

— Отдай. Уни пулемёт эскадронига олишди.

— Отингни кимга топшириб келдинг?

— Менга бошқа от беришганди.

— Оқ қашқани нима қилдинг?

— Ўқ парчаси тегиб ўлди.

— Жангдами?

— Бир қишлоқчада эдик, тўп отишмаси бошланиб, мирохурнинг қўлида ўлди.

— Аттанг! Топилмайдиган от эди-да!— Прохор хўрсинар, яна стаканга ёпишарди.

Даҳлиз эшигининг лўқидони шарақ этиб очилди. Григорий сесканиб тушди. Аксинъя остоонадан ўтиб, эшитилар-эшитилмас салом берди-да, катта очилган

йилтироқ кўзларини Григорийдан олмасдан энтикиб рўмолини еча бошлади. У стол қошига бориб, Дуняшка билан ёнма-ён ўтиради. Унинг қош ва киприкларига, оппоқ юзига қўнган майда-майда қор учқунлари эрий бошлади. Кўзларини юмиб, юзини кафти билан артди-да, чуқур нафас олди, шундан кейингина бошини кўтариб, ҳаяжондан қорайган теран кўзлари ила Григорийга қарашга журъат этди.

— Эй, ҳамсоя! Қсюша! Бирга чекиниб, битларга ем бўлган ҳамроҳим... Сен бечорани биз Кубанга ташлаб кетганимиз, а? Бошқа иложимиз ҳам йўқ эди-да!— Прохор унга стакан тутди, ичидағи самогони чайқалиб столга томди.— Ол, Григорий Пантелеевич учун ичсан! Эсон-омон келгани учун табрикли... Қалай, гапим тўғри чиқдими: эсон-омон уйга қайтади девдимми сенга? Ана, келди, оловур, нархи бир сўм йигирма тийин! Аразлаган боладай ўтиришини қара!

Григорий кўзи билан имлаб Прохорни кўрсатди:

— У кўп ичиб қўйди, ҳамсоя, гапига қулоқ солма.

Аксинья Григорийга ва Дуняшкага таъзим қилди, бироқ қўллари қалтираганини сездирмаслик учун стаканини столдан салгина кўтарди, холос.

— Хуш келибсиз, Григорий Пантелеевич, табриклиман, сениям табриклайман, Дуняшка, шодиёналиқ билан табриклайман.

Прохор Михайлнинг биқинига туртиб, хохолаб кулди:

— Сени нима билан табриклайлик? Қайгу биланми?

Аксинья қизариб кетди, ҳаттоки қулоқларининг кичкинтой солинчоқлари ҳам чўғдай қизарди, бироқ у ғазаб билан Прохорга қаттиқ тикилиб туриб, шундай жавоб берди:

— Мениям шодлик билан... Анчайин шодлик эмас бу!

Аксиньянинг бу жавобидан Прохор енгилиб, унинг юрагига қойил бўлди:

— Кўтар-э, барака топкур, тагида бир томчиям қолмасин! Ўғил болача гап қилган одам, ўғил болачасига ичишниям билиши керак! Тагида қолдиргандан кўра, мени ўтмас пичноқ билан сўйган яхши.

Аксинъя меҳмондорчиликда унчалик узоқ ўтирма-ди, одоб нуқтаи назаридан қанча керак бўлса, ўшан-ча ўтириди холос. Шу вақт ичидаги у икки-уч марта, фа-қат кўз қиридагина ўз ошиқига қарай олди. У ўзини мажбур этиб бошқаларга қарап, Григорийнинг кўзи-дан кўзини обқочарди, чунки бир ёқдан бошқаларга сир бой бериб қўйишдан қўрқса, иккинчи ёқдан, бош-қаларни деб, унга бепарво кўринишдан ҳайиқарди. Фақат бир марта гина Григорий унинг осто надан ту-риб рўйи рост ошиқона вафодорлик билан боққанини кўрди ва ўшандәёқ нима демоқчилигини англа ганди.

Григорий Аксинъяни кузатгани чиқди. Қайфи ошиб қолган Прохор унинг кетидан бақириб қолди:

— Узоқ юрма! Ҳаммасини ичиб қўямиз!

Григорий даҳлизда Аксинъянинг пешонасидан, лаб-ларидан ўпиди:

— Аҳвол қалай, Ксюша? — деб сўради.

— Гапирсам, тамом бўлмайди... Эртага келасанми?

— Келаман.

Аксинъя уйга тезроқ етишга шошар, худди уйидаги зарил иши бор одамдай тез-тез юради; фақат уйи-нинг олдига етгандагина қадамини секинлатиб, ғи-чирлаган зинапоядан оҳиста чиқа бошлади. У ўз севинчи, ўз ўйлари билан танҳо қолишини, кутилмаган баҳт тўғрисида ширин хаёл суришни истарди.

У кофтасини ва рўмолини ечди, чироқ ёқмасдан меҳмонхонага ўтди. Қопқоғи ёпилмаган деразадан уй-га туннинг бинафшасимон ёруғи тушиб турарди. Печь токчасининг орқасида чигиртка чирилларди. Аксинъя ўз одати бўйича ойнага қаради, лекин қоронғида ўз аксини кўрмаса ҳам соchlарини тузатди, муслин кофтасининг кўкрак бурмаларини текислади, сўнгра дераза ёнига бориб, ҳорғинлик билан скамейкага ўтириди.

Аксинъянинг ўйлаган ўйлари, орзу ва умидлари кў-пинча рўёбга чиқмай юраги безиллаб қолгани учунми, негадир, севинчга тўлган кўнглига ҳар доимгидаёт, яна ғулгула тушди. Бундан буёқ турмуши қайси шаклда қарор топади? Қелажаги нима бўлади? Бу баҳтсиз жу-воннинг қора баҳти кечикиб очилган бўлса-чи?

Оқшомдан бери ҳаяжон ичидаги ҳолдан тойган, дили вайрон Аксинъя, бетини қиров босган муздай ойна-

га қўйиб, бир оз ғамгин ва ҳорғин кўзларини қор ша-рофатидан фира-шира ёришган қоронгиликка тиккани-ча узоқ ўтириб қолди.

* * *

Григорий стол ёнига келиб ўтирди, стаканни тўл-ғазиб самогон қўйди-да, бир кўтаришда ичиб юборди.
— Яхши эканми?— қизиқсиниб сўради Прохор.
— Ажратолмадим. Кўпдан бери ичганим шу.
— Николайницидан қолишмайди, худо урсии! — деб мақтади Прохор, гандираклаб кетиб, Михайлни қу-чоқлади.— Сен, Миша, ичкилик нима-ю, магзава ни-ма — ажратолмайсан, аммо ичкилик масаласини мен-дан сўрайвер! Дунёда мен кўрмаган вино қолмади! Бир хил вино борки, пробкасини очар-очмас, шишадан кўпик отилиб чиқади, худди қутурган итнинг оғзидан чиқсан кўпикдай, тепамда худо турибди, ёлғони йўқ! Польшада фронтни ёриб ўтиб, Семён Михайлович билан оқ поляклар устига от қўйдигу, бир ҳамлада помешчик қўргонини забт этдик, қўргон ўртасида ик-ки қаватли уй, қўраси тўла лиқ-лиқ қорамол, ҳовлида ғуж-ғуж парранда—оёқ қўядиган жой йўқ, хуллас, бу помешчик пошшодай яшар экан. Бир гала офицерлар, бизнинг келишимиздан бехабар, хўжайн билан айни кайф-сафо қилишаётган пайтда бизнинг взвод қўргонга бостириб кирди. Ҳаммасини зинада, боғда қиличдан ўтказдик, биттасини асир қилиб олдик. Жудаям димоғдор офицер экан, бироқ қўлга тушгандан кейин мўйловлари шалпайиб, сувга тушган мушукдай шум-шайиб қолди. Григорий Пантелеевични шошилинч суратда штабга чақиришди денг, ўзлигўзимиз хўжайн бўлволдик, пастки хонасига кирдик, қарасак, кат-такон столга дастурхон ёзилган, дастурхонда тамомий нарсадан бор! Қараб туравердик, ўлгудай оч бўлсак ҳам ейишга қўрқамиз. «Борди-ю, ҳаммаси заҳарланган бўлса-чи?» деб гумон қиласиз. Асиrimiz бало-қазодек тикилиб турибди денг. «Е!» деб буюрдик унга. Егиси келмасаям тушираверди. «Ич!» дедик. Ичаверди. Ҳар лагандан бир луқмадан егиздик, ҳар шишадан бир стакандан ичкиздик. Лаънати ейвериб, ичавериб,

кўз олдимиизда шишиб кетди, уни кўрган сайн оғзимиздан сўлагимиз оқади денг. Қараб турсак, офицер ўлмайдиган, ана иннайкейин, биз ҳам киришдик. Еганимизча едик, кўпирадиган винодан тўйиб ичволдик. Бирданига офицернинг мазаси қочиб икки ёғидан баравар кета бошлади. «Бизниям худо урди энди! Бу абллаҳ бизни алдаб заҳарланган овқатни еяверибди», деган хаёлда капалагимиз учиб кетди. Бўғзига қилич қададик, у бўлса жон ҳалпида: «Ҳеч гап йўқ, панлар, мен сизларнинг қистовингиз билан овқатни кўп еб қўйибман, овқат заҳарланган эмас, сира шубҳаланманг!»— дейди. Шундан кейин биз яна винога ёпиша кетдик. Пробкасини очсанг, милтиқдай пақиллаб отилади, кўпириб-тошиб чиқади, четдан қараган одамнинг капалаги учади! Уша винонинг кайфидан мен кечаси уч марта отдан қуладим! Эгарга ўтиришим билан шамол учиргандай учиб тушаман. Ана шунаقا винони ҳар кун эрталаб наҳорга бир-икки стакандан ичиб турсанг, юз йил умр кўрасан, лекин бу аҳволда қандай узоқ яшаш мумкин? Масалан, шуям ичкилик бўйтими? Ичкилик эмас, заҳар! Манови савилни ичаверсанг ажалингдан бурун қулогинг остингда қолади...— Прохор бош иргатиб, кўзгадаги самогонни кўрсатди-ю, тағин бир стакани тўлғазиб қуиди.

Дуняшка болалар билан меҳмонхонага ухлагани чиқиб кетди, бир оздан кейин Прохор ҳам ўрнидан тўрди. Гандираклай-гандираклай пўстинини кифтига ташлади-да:

— Кўза қолсин, бўш идишни кўтариб юришга тобим йўқ...— деди.— Уйга киришим билан хотиним қийноққа солади мени энди. Бунақага уста! Тили заҳар, бунақа сўзларни қаёқдан ўрганади, а? Ўзим ҳам билмайман! Уйга кайф билан бордимми, у дарров сайрашга тушади, масалан, шундай бошлайди: «Пияниста кўппак, қўлсиз маймоқ, фалону пиставон!» Мен бўлсам, ҳовлиқмасдан, секин-аста уқтира бошлайман: «Ҳой, мияси айниган алвасти, итдан тарқаган қанжиқ, сен ўзинг пияниста кўппакни, қўли йўқ итни бирон жойда кўрганмисан? Унақанги маҳлуқ оламда йўқ»,— дейман. Бу гапига жавоб берсам, иккинчисини бошлайди, иккинчисини рад этсам, учинчиси, шу аҳволда

оппоқ тонг отгунча туни билан можаро... Баъзи вақтда унинг гапларидан безор бўлиб, бостирма тагига бориб ухлайман, баъзан кайфим ошиб келсам ҳам индамайди, қарғамайди ҳам, ана ўшанда сира ухломайман, худо урсин! Назаримда бир нарса етишмаганга ўхшайди, баданларим қичишаверади, ухлай олмайман, вассалом! Ноилож хотинчамни секин узволаман, яна бошлайди, мени шундай қарғайдики, кўзларимдан ўт чақнаб кетади! Бу хотин эмас, шайтоннинг урғочиси, лекин илож йўқ, чидашга мажбурман, қайтага жаҳли чиққани яхши: жон-жаҳди билан ишлайдиган бўлади, гапим тўғрими? Хайр, мен кетдим, яхши ётинглар! Бугун уни безовта қилмасдан тўғри бориб охурга тушиб ёта қолсаммикин, а?

— Уйингга етиб ололасанми? — кулиб сўради Григорий.

— Эмаклаб бўлсаям етиб оламан! Ёки мени казак эмас деяпсанми, Пантелеевич? Бу гапинг жудаям ботиб кетди-ку...

— Ундай бўлса, сени худога топширдим!

Григорий дўстини кўча эшиккача кузатиб қўйди-да, эмакхонага қайтиб келди.

— Хўш, Михаил, гаплашиб оламизми?

— Майли.

Иккиси столнинг икки ёғида бир-бирига бетма-бет ўтиришар, индашмасди. Ниҳоят, Григорий гап бошлади:

— Орамиз тузук эмас... Буни авзойингдан кўриб турбман. Келганим сенга ёқмаяпти шекилли? Ёки мен янглишдимми?

— Йўқ, топдинг, ёқмаяпти.

— Нима учун?

— Ортиқча ташвиш.

— Мен ўз кунимни ўзим кўрмоқчиман.

— Гап унда эмас.

— Бўлмаса нимада?

— Сен билан мен бир-биримизга душманмиз.

— Душман эдик.

— Афтидан, душманлигимизча қоладиган кўрина-
миз.

— Тушунолмадим. Нимага энди?

- Сен ишончли киши эмассан.
- Йўқ, ундаи эмас. Ҳеч асоссиз гапиряпсан!
- Йўқ, асоссиз эмас. Шундай вақтда сенга нима сабабдан жавоб беришди? Очигини айт?
- Билмадим.
- Йўқ, биласану айтгинг келмайди! Сенга ишонишмаган, шундайми?
- Ишонишмаган бўлса, бир эскадронни менга бериб қўйишмасди.
- Дастребки пайтда шундай қилиб кўришган, сени армияда қолдиришмагани, масала равшанлигини кўрсатади, биродар!
- Ўзинг менга ишонасанми?— рўйи рост тикилиб сўради Григорий.
- Йўқ! Бўрини қанчалик боқмагин, барибир, одамга эл бўлмайди.
- Сен бугун кўпроқ ичиб қўйдинг, Михаил...
- Бекор айтибсан! Сенчалик маст эмасман. У ердаки сенга ишонишмадими, демак, бу ерда ҳам сенга унчалик ишонч бўлмайди, шуни билиб қўй!
- Григорий индамади. Тарелкадаги тузланган бодрингдан бир тўғрамини имиллаб олди, чайнаб-чайнаб туфлаб ташлади.
- Хотиним сенга Қирюша Громов воқеасини гапириб бердими?— деб сўради Михаил.
- Ҳа.
- Ўнинг келганиям менга ёқмовди. Эшитган заҳотим, ўша куниёқ...
- Григорийнинг ранги оқариб, кўзлари олайиб кетди.
- Мени Қирюша Громовга тенг қилмоқчимисан!
- Бақирма. Ундан ниманг ортиқ?
- Олдин билиб...
- Билишнинг кераги йўқ. Ҳаммаси маълум. Иннайкейин, Митка Қоршунов кириб келади, унгаям суюнайми? Йўқ, қораларингни кўрсатмасаларинг қайтага яхши бўларди.
- Сен учун яхши бўлардими?
- Мен учун ҳам, халқ учун ҳам яхши бўларди, тинчгина яшарди.
- Сен мени улар билан тенглаштирма!

— Мен сенга ҳали айтдим-ку, Григорий, хафа бўлиш керакмас: сен улардан яхшимаёсан, қайтага баттарсан, улардан кўра хавфлироқсан.

— Нимам хавфли? Нима деб валдираяпсан ўзинг?

— Улар оддий казак, сен бўлсанг бутун қўзғолонга раҳбарлик қилгансан.

— Мен раҳбарлик қилганмасман, мен фақат дивизия командири бўлганман холос.

— Озмунча гапми?

— Озми, кўпми, масала унда эмас... Агар ўша кечаси базмда қизил аскарлар мени ўлдирмоқчи бўлишмаганда, балки қўзғолонга қатнашмасдим ҳам.

— Офицер бўлмаганингда ҳеч ким сенга қўл теккизмасди ҳам.

— Агар мени ҳарбий хизматга олишмаганда, офицер бўлмасдим... Бу жуда эски гап!

— Ҳа, жуда эски ва ярамас гап!

— Энди буни ҳадеб чайнайверишнинг кераги йўқ, вақти ўтди.

Иккиси индамай тамаки чекишиди. Кошевой тирноғи билан тамаки кулини туширди:

— Қанақа ботирлик қилганингни биламан, ҳаммасини эшитганман. Жангчиларимиздан кўпининг ёстиғини сен қуритгансан, шунинг учун сени кўришга кўзим йўқ... Бу нарса ҳеч вақт эсдан чиқмайди.

Григорий мийигида кулиб қўйди.

— Кўнгилга туғиб қўйибсан-да! Сен ҳам акам Петрони ўлдиргансан, бироқ мен буни эсингга соляпканим йўқ... Ўтган гапни эсга олаверадиган бўлсак, итмушук бўлиб яашага тўғри келади.

— Ўлдирганим рост, тоняпканим йўқ! Ўшанда сени қўлга туширсам, сениям жойлаб қўя қолардим.

— Мен бўлсам, Усть-Хоперда Иван Алексеевич нинг асири олинганини эшитгач, сениям қўлга тушган гумон қилиб, казаклар сени отиб ташлашидан қўрққанимдан роса юргурган эдим... Мундан чиқди, бекорга овора бўлган эканман.

— Сендақа жонкуярни қара-ю! Агар сизлар енгиб, шу топда кадетлар ҳукумати бўлгандами, мен билан бундай гаплашиб ўтирасдинг ҳам... Елкамнинг те-

рисидан тасма тилиб олардинг! Энди мўминтой бўлиб қопсан...

— Балки, бошқа биронтаси тасма тилмаса, аммо мен қўлимни сенга теккизиб ҳаром қилмасдим.

— Демак, иккимиз икки хил одам... Мен умр бўйи душманни ўлдириб, қўлимни ҳаром қилишдан ҳазар қилган эмасман, агар зарил бўлса, ҳозир ҳам қараб ўтирумайман.— Михайл қолган самогонни стаканларга қуиб сўради:— Ичасанми?

— Майли, ичайлик, бу тўғрида гаплашиш учун етарли даражада маст бўлмаганга ўхшаймиз...

Иккиси сўзсиз коса уриштириб ичишди. Григорий столга кўксини тираб, кўз қисиб Михайлга тикилар, мўйловини бурарди.

— Нимага мунчалик қўрқасан, Михайл? Яна Совет ҳукуматига қарши чиқади деб хавотирдамисан?

— Мен ҳеч нарсадан қўрқмайман, лекин ҳар ҳолда, шуни биламанки, бирон фавро чиқиб қолса, сен дарҳол нариги томонга ўтиб оласан.

— Мен ўша ёқдаёқ полякларга ўтиб кетишим мумкин эди, шундай эмасми? Бир қисм аскаримиз улар томон ўтиб кетди.

— Сен пайт тополмадингми?

— Йўқ, истамадим. Мен хизмат қилиб бўлдим, менда ҳеч кимнинг ҳақи қолмади. Энди ҳеч кимга хизмат қилмайман. Урушдан тоза чарчаганман, жонимдан тўйганман, уруш деса юрагим безиллайди. Ҳаммасидан безор бўлганман: революциядан ҳам, контреволюциядан ҳам. Менга қолса ҳаммаси... жаҳаннамга кетсин! Ўз болаларим олдида тинч яшамоқчиман, рўзгор ишлари билан шуғулланмоқчиман, орзуим шугина холос. Гапимга ишон, Михайл, мен сенга юракдан чиқариб, ростини айтяпман!

Бироқ қанчалик куиб-пишиб гапирмасин, барibir, Кошевой ишонмади, ўз фикрида қолаверди. Григорий буни тушуниб, дами ичига тушиб кетди. У ўзини ўзи еб қўйиш даражасига етганини бирданига сезиб қолди. Унинг олдида нега ўзини оқлашга уринди-юнимани исботламоқчи бўлди? Мастиликда шу гапдан оғиз очиб, Михайлдан аҳмоқона ваъз эшитиш, дакки

еёишининг нима кераги бор эди! Эсиз одам!.. Григорий ўрнидан турди.

— Бу бемаъни гапларни тамомлайлик! Етар энди! Пировардида сенга шуни айтмоқчиман: агар ҳукумат гирибонимдан олиб судрамаса, мен унга қарши чиқмайман, борди-ю, гирибонимдан оладиган бўлса, ўзимни ҳимоя қиласман! Ҳар ҳолда мен Платон Рябчиков сингари қўзғолон учун бошини тутиб берадиган анойимасман.

— Бу қанақаси тағин!

— Шундай. Менинг Қизил Армиядаги хизматларимни, ўша ерда ярадор бўлганларимният ҳисобга олишсин, қўзғолонда иштирок этганим учун, майли, қамалишга розиман, лекин бунинг учун отишадиган бўлса, кечирасиз, азизим! Буниси жуда ортиқча бўлади!

Михаил нафрат билан кулди.

— Талабинг жудаям қизиқ! Ревтрибунал ёйинки Чека сендан: нимани хоҳлайсан, нимани йўқ, деб сўрамайди, сен билан савдолашиб ўтирумайди ҳам. Жиноят қилдингми, ўшанга яраша жазони пича қўшим-часи билан олаверасан. Эски қарзларни батамом узиш керак!

— Ундай бўлса, кўрамиз.

— Кўрамиз, албатта.

Григорий камарини, кўйлагини ечди, инқиллаб этигини торта бошлади.

У этигининг кўчган таг чармини астойдил синчик-лаб кўздан кечираркан:

— Рўзгорни бўламиزم? — деб сўради.

— Сен билан менинг бўладиган нарсамиз йўқ: ўйимнинг шикаст-реҳтини тузатаману, кўчиб ўтаман,

— Ҳа, ҳар ҳолда бошқа-бошқа турганимиз маъқул. Сен билан мен чиқишлоғмаймиз.

— Чиқишлоғмаймиз,— тасдиқлади Михаил.

— Менинг тўғримда шундай фикрда эканингни сира ўйламовдим... Нимаям дейман энди...

— Мен тўғрисини айтдим. Дилемдагини юзингга айтдим-қўйдим. Вешенскаяга қачон борасан?

— Шу яқин кунларда борарман.

— Шу яқин кунлардамас, эртага боришинг керак.

— Мен қирқ чақирим пиёда юриб келдим, оёқларим қаварган, эртага дам олай, индинга бориб рўйхатдан ўтаман.

— Дарҳол рўйхатдан ўтилсин, деган бўйруқ бор. Эртагаёқ жўна!

— Бир кунгина дам олсан, нима қилади? Қочиб кетмасман ахир!

— Ким билсин нима қилишингни. Сен учун жавобгар бўлишни истамайман.

— Жудаям аblaҳ бўп кетибсан-ку, Михайл!— со-биқ дўстининг хўмрайган башарасига ҳайрон бўлиб тикилди Григорий.

— Оғзингга қараб гапир! Мен бунақа гапга чидаб ўргангандан эмасман...— Михайл нафасини ростлаб олди:— Офицерча қилиқларни йиғиштириш керак! Эртагаёқ жўнайсан, яхшиликча бормасанг, соқчи билан жўнатаман. Тушундингми?

— Энди ҳаммасига тушундим...— Григорий кетаётган Михайлнинг орқасидан нафрат билан тикилиб турди-да, ечинмасдан каравотга чўзилди.

Оқибат шу бўлиши муқаррар эди, энди хафа бўлишдан наф йўқ... Хўш, нимасига уни қучоқ очиб кутиб олиш керак экан? Қайси асosга суюниб у, Қизил Армия сафида қисқа вақт ҳалол хизмат қилганим учун ўтмишдаги ҳамма гуноҳларим ювилиб кетади, деб ўйлаган экан? Балки, Михайл ҳақлидир: ҳаммаси кечирилмайди, эски қарзларни батамом тўлаш керак дегани, тўғри эмасмикин?..

... Григорий тушида бепоён даштни кўрди: полк кенг ёйилиб, ҳужумга тайёрланган эмиш... У от устида, айили тортилмагани эсига тушиши биланоқ, олислан: «Эскадро-о-он!» деган чўзиқ команда овози эшитилади. У бор оғирилиғи билан чап узангига оёқ қўйган ҳамон бирданига остидаги эгар оғиб кетади... Үялиб кетади-ю, уни бирдан ваҳим босиб, отдан сакраб тушади, айилини тортиб олмоқчи бўлади, бироқ ўша онда олислаб кетаётган от түёқларининг ола-тасири қулоғига киради. Полк уни кутмасданоқ ҳужумга от қўяди..

Григорий ёнбошдан ёнбошга ағдарилди, ўзининг хириллаб инграган товушидан уйғониб кетди.

Дераза ортида ғира-шира тонг ёришган эди. Кеча-

си шамол дераза қопқоини очиб юборган бўлса керак, қирор босган ойнадан чақнаб турган яшил ой ўроғи кўринарди. Григорий тимирскилай-тимирскилай та-маки халтасини топди, ўраб чекди. Ҳали ҳам юраги ўйнаб, гупиллаб уради. У чалқанчасига ётиб илжайди: «Тушга ҳар бало киравераркан! Аттанг, жангда қатнашолмадим-да...» Лекин ўша субҳидам пайтида Григорий, бунақа ҳужумларни тушида ҳам, ўнгидаги ҳам ҳали кўп кўришини мутлақо ўйламаган эди.

VII

Дуняшка эрта турди, сигир соғиш керак эди. Григорий емакхонада у ёқдан-бу ёққа юрар, секин-аста йўталиб қўярди. Дуняшка болаларнинг устини ёпди, нари-бери кийиниб емакхонага чиқди. Григорий шинелини тугмалаётганди.

- Саҳарлаб қаёққа отланяпсиз, акажон?
- Қишлоқни айланиб чиқай, кўргим келди.
- Олдин нонушта қилиб, иннакейин...
- Истамайман, бошим оғрияпти...
- Нонуштага етиб келасизми? Мен ҳозир печга ўтқалайман.

— Мени кутманглар, тез қайтмайман.

Григорий кўчага чиқди. Жанубдан рутубат ара-лаш илиқ шамол эсар, ер бир оз эрий бошлаган эди. Этик пошналарига қор аралаш лой ёпишарди. Гри-горий секин-аста қадам қўйиб, қишлоқ маркази томон бораркан, худди бегона юртга келиб қолган мусофири-дай, ёшлиқ чоғидан бери унга таниш бўлган уйларни, омборхоналарни диққат билан кўздан кечирарди. Майдондаги бойларнинг уйлари, дўконлари вайрон бўлиб, кўмирга айланиб ётарди (бултур Кошевой бу иморатларга ўт қўйганди), черков девори нураб қолган, кўп жойидан ўпирилган эди. «Ғиштини одамлар ташиб печга ишлатишган», деб ўйлади Григорий пинагини бузмасдан. Боягисидай пастаккина черков ердан аранг қад кўтариб туарди. Кўпдан бери мойланмаган тунука томи занглаб сарғайиб қолган, деворлари захлаб, қора-қура доғ босиб кетганди, сувоги кўчган жойларидан, фипитлари қип-қизил бўлиб чиқиб ётарди.

Кўчаларда ҳеч ким кўринмасди. Қудуқ ёнида икитами-учта қовоғи шишган хотин ўйлиқди холос. Григорий ёнларидан ўтаётганда улар танимагандай, индамасдан таъзим қилишар ва кетидан анчагача тикилиб қолишаради.

«Қабристонга бориб, онам билан Натальянинг қабридан хабар олишим керак» деб ўйлади-да, Григорий қабристонга бориладиган тор кўчага бурилди, лекин бир оз юргандан кейин тўхтади. Усиз ҳам шу топда дили вайрон, кўнгли ғаш эди. «Кейинчалик борарман,— деган қарор билан Прохорникига йўл олди.— Ўлганларга барибир эсмасми, мен бордим нима-ю, бормадим нима? Ҳозир улар тинчгина ётибди. Абадий кўз юмишган. Гўрлари устида бир қават қор. Ер совуқ бўлса керак, ости муздай, албатта... Оlamга келиб узоқ умр кўрмай ўтдилар. Ҳаммаси ёнма-ён ётишибди энди: хотиним ҳам, онам ҳам, Петро билан Дарья ҳам... Бутун оила қабристонга кўчиб ўтиб, ёнма-ён ётишибди. Уларга яхши, лекин отам шўрлик ёлғиз ўзи ёт элда қолиб кетди. Ётлар орасида ётиш қийин...» Григорий ортиқ атрофига қарамас, оёғи остига, сал-пал эрий бошлаган оппоқ ва юмшоқ қорга тикилганича индамай қадам қўярди, қор ҳам шу қадар юмшоқ ва маин эдики, босганда унинг бор-йўқлиги сезилмас, ҳаттоқи оёқ тагида ғирчилламас эди ҳам.

Ниҳоят, Григорий болалари тўғрисида ўйланиб кетди. Иккала бола ҳам, ёшлигига қарамай катталар сингари жиддий, индамас бўлиб олган, оналари бор вақтдагига қараганда бутунлай ўзгариб кетган эди. Мусибат уларни кўп нарсадан маҳрум этганди. Улар юрак олдириб қўйишган. Нега бўлмасам кеча Полюшка уни кўрганда йиғлаб юборди? Болалар ҳеч вақт дадаси билан кўришганда йиғламайди, бу уларнинг аҳвол-руҳиясига сира тўғри келмайди. Нимани ўйлаган бўлиши мумкин? Дадаси уни қўлига олганда қўрқанидан кўзлари нега олайиб кетди? Балки у, дадам ўлган, энди қайтиб келмайди, деб юрган бўлса-ю, бирданига уни кўриб қўрқиб кетдимикан? Ҳар ҳолда у, яъни Григорий, болалар олдида айбдор эмас, фақат бир нарсани Аксиньяга тайинлаб қўйиши зарил: уларга эртаю-кеч ғамхўрлик қилсин, она ўринига она бўлиш

учун, ҳаракат этсин. Ҳар ҳолда улар ўгай онага ўрганиб кетиши мумкин... Аксинья хушфеъл, ширин сўз, кўнгли юмшоқ аёл. Дадасини севиб, болаларини ташлаб қўймас, ахир.

Бу ҳақда ўйлашнинг ўзи оғир, ниҳоятда оғир, ҳазилакам масала эмасди. Турмуш унинг ўйлаганидан бутунлай бошқача, жуда мураккаб экани энди маълум бўлди. Яқиндагина у ёш бола сингари аҳмақона хом хаёлга берилиб, уйга қайтиши билан шинелини ечиб чакмон кийиши биланоқ: иш юришиб кетади, на суриштирадиган бор, на ўтмишни юзига соладиган, деб ўйлаган, фақат дехқончилик билан шуғулланиб, болачақадан бошқасини ўйламай, тинчгина умр кечириши мўлжаллаган эди. Бироқ ҳақиқат унинг ўйлаганича бўлиб чиқмади.

Григорий Зиковлар қўрасининг ёлғиз ошиқ-мошиқда илиниб турган кўча эшигини астагина очди. Таги ейилган маймоқ пийма кийган, тумофини кўзигача бостириб олган Прохор сут соғиладиган бўш челакни қўлида ликиллатиб, пинагини бузмай зина томон бормоқда эди. Оппоқ сут томчиларининг қорга саҳрагани кўринмасди.

— Салом, ўртоқ командир, яхши ётиб турдингизми?

— Худога шукур.

— Бош оғриқ қиласакмикан девдим, каллам худди ана шу челақдай бўм-бўш.

— Бош оғриғига мен ҳам талабгор, лекин челягинги нега бўш? Сигирни ўзинг соғдингими?

Прохор бошини силкитиб, тумофини энсасига сурис қўйди. Ўшандан кейингина Григорий унинг афт башараси ҳаддан ташқари тумтайганлигини кўрди.

— Ўзим соғмасам, опалар келиб соғиб берармиди менга! Шундай соғдимки, лаънати хотинимнинг кўзи мошдай очилади энди. Бу соғишимдан кейин сигир ич оғриғига мубтало бўлмаса гўргайди!...— Прохор зарда билан челакни улоқтириб юборди-да:— Қани юр, уйга кирайлик,— деди.

— Хотининг борми ўзи?— иккиланиб сўради Григорий.

— Хотинимни ажина чалиб кетди! Тонг отмай туриб йиғиштиринди-ю, ёввойи тоғолча кесгани Кружилинга жўнаб қолди. Сизларнидан келдиму, қолдим балога! Оғзига келганини айтиб алжирайверди-алжирайверди, бирданига сапчиб турди-ю: «Тоғолчага бораман, Максаевнинг келинлари кетяпти, мен ҳам бораман!»— деди. «Менга десанг, нашвотига бор, тўрт томонинг катта кўча!» дедим ичимда, кейин туриб печни ёқдим, сигир соққани кетдим. Соғмай ўлай! Бир қўлда бунақа ишни эплаш осон деб ўйлайсанми?

— Биронта аёлни чақирсанг бўлмасмиди, тентақ?

— Бузоқни тентак деса бўлади, чунки у қор ёқ-қунча онасини эмгани-эмган, мен шу ёшга кириб тентаклик қилган эмасман. Ўзим эпларман деб ўйладимда! Эпламай ўлай! Эмаклаб, сигирнинг у ёғидан ўтиб, бу ёғидан ўтиб, соғмоқчи бўлдим, ҳаром ўлгур, сира тек турмайди, тепади холос. Ҳуркмасин деб тумоғимниям олиб ташладим, барибир йўлатмайди. Соғиб бўлгунимча, кўйлагим тердан ивиб кетди, энди челакни тагидан олмоқчи бўлиб, қўл узатарманми, бир тепдики, челак у ёққа кетди, мен бу ёққа бориб тушдим. Ана сигир соғиш. Бу сигирмас, шохлик шайтон! Тумшуғига тупурдиму келавердим. Сутсиз ҳам куним ўтаверади. Бош оғриғи қиласизми?

— Борми ўзи?

— Бир шишагина бор. Бекитиб қўйибман.

— Бемалол етади.

— Қани кир, меҳмон бўласан. Қуймоқ пиширайми?

Кўз очиб юмгунча тайёр қиласман.

Григорий ёғ тўғради, уй эгасига қарашиб, ўчоқقا ўт ёқишиди. Иккиси тикилиб, товада пишиллаб эриётган пушти ранг ёғ парчаларини томоша қиласарди. Прохор иконалар орқасидан чанг босган шишани олди.

— Хотинимдан яширадиган ҳамма нарсани шу ерда сақлайман,— деб гапни лўнда қилди у.

Улар исиб кетган кичкина ҳужрада ичишиб, тамадди қилишиб, секин-секин гаплашиб ўтиришиди.

Ахир Григорий ўз дардини Прохорга ёрилмаса, кимга ёрилади? У узун серпай оёқларини барала кериб стол ёнида ўтирас, хириллаган йўғон овози зўрга эшитиларди:

— ... Армияда юрганимдаям, йўлда келаётib ҳам, деҳқончилик билан шуғулланишни, бу лаънати урушдан нарироқда — бола-чақам ёнида дам олишнигина ўйловдим. Ахир, етти йил муттасил отдан тушмадима, ҳазилакам гапми бу? Ҳатто тушимдаям доим шу фалокатни кўраман: гоҳ мени ўлдиришади, гоҳ мен бирорвни ўлдираётган бўламан... Лекин, Прохор, менинг ўйлаганларим рўёбга чиқмайдиганга ўхшайди... Афтидан, ер ҳайдаш менгамас, бошқаларга насиб бўладиган кўринади...

— Кечак Михаил билан гаплашдингми?

— Гаплашмаган гап қолмади.

— Нима дейди?

Григорий бармоқларини панжара қилиб кўрсатди:

— Дўстлигимизнинг оқибати шу бўлди. Оқларга хизмат қилганимни юзимга соляпти, янги ҳукуматда қасди бор, унга қарши чиқиш учун қўйнида пичоқ асраб юрибди, деб гумон қиласпти. Қўзғолон кўтаради деб хавотир, мен энди қўзғолонни бошимга ураманми, кошки шунисини тушунса, бу аҳмоқ.

— У менгаям шу тўғрида гапиравди.

Григорий, энсаси қотиб кулди.

— Польшага кетаётганимизда Украинада бир хоҳол қишлоқни мудофаа қилиш учун биздан қурол сўратди. Бандитлар босқинчилик қилиб, молларини сўйиб, уларни тинчитмас экан. Полк командири,— гап тепасида мен ҳам бор эдим,— унга шундай деди: «Қуролни берамизу, лекин ўзларинг ҳам бандитларга қўшилиб кетасанлар-да! Хоҳол кулди: «Олдин сиз қуролни бериб кўринг-чи, ўшанда биз бандитларнигина эмас, сизларни ҳам қишлоғимизга йўлатмаймиз»,— деди. Мен ҳам ҳозир ўша хоҳол сингари ўлланиб қолдим: иложи бўлса оқларниям, қизилларниям Татарска йўлатмасак, жудаям яхши бўларди. Меним учун ҳаммаси бир гўр, қайнағам Митъка Коршунов нимаю Михаил Кошевой нима — фарқи йўқ. У мени, ўтакет-ган оқлар тарафдори, уларсиз яшай олмайди, деб ўйлади. Аҳмоқона хаёл! Мен уларга тарафдормишман, балли-эй! Яқинда, Қrimга бостириб кираётганимизда корниловчи бир офицер билан тўқнашиб қолдим: инглиззасига мўйлов қўйибди-ю, мўйлови бурнидан оқ-

қан мишиққа ўхшаб кўринади, ўзи абжир, ғалати полковник экан, мен шу қадар ғазаб билан қилич солдимики, юрагим қинидан чиқиб кетаёзди! Бечора полковник бир палла калласи ва яримта фуражкаси билан қолаверди... оппоқ офицерча кокардаси учиб кетди... Мана менинг оқларга тарафдорлигим! Улар бошимга не-не кунларни солишган. Бу лаънати офицерлик даражасига мен қонимни тўкиб эришганман, бироқ офицерлар орасида ўзимни доим бегона ҳис қилганман. У абраҳлар мени одам қатори кўришмасди, мен билан қўл бериб кўришишга ҳазар қилишарди, шунчалик гапдан кейин мен уларга хизмат қилгунча... Онаизорлари ни... Бу тўғрида гапирсанг, хуноб бўласан холос! Мен уларнинг ҳукуматини тиклаб берайинми тағин! Фицхалауров сингари генералларни яна бошимизга олиб келайинми, а? Бунинг мазасини бир татигланман, мана бир йилдан бери ҳиқиҷоқ азобини тортияпман, етар энди, кўзим мошдай очилди, ҳаммасини кўравериб, бошдан кечиравериб, мулла бўлдим!

Прохор қайноқ ёққа нон ботириб гапира бошлади:

— Ҳеч қандай қўзғолон бўлмайди. Аввало, казакларнинг баракаси учди, тирик қолганлари саводхон бўлиб олишди. Бир-бирлари билан урушиб, қон тўкиша-тўкиша, ахийри ҳаммаларининг ақли кирди, қўйдан ҳам ювощ бўлволишли, энди уларни арқонга борлаб судрасанг, ҳам қўзғолондан қочади. Бир томондан халқ тинч турмушни соғинган. Бу йил ёзда одамлар ишга қандай ёпишганини бир кўрсайдинг: ғарам-ғарам пичан ғамлашди, ғаллани, бир дон қўймай йифиб олишди, ўлган-йтганига қарамай ер ҳайдашади, дон сочишади, худди юз йил умр кўрадигандай жон куйдиришади! Йўқ, қўзғолон тўғрисида оғиз очмасаям бўлади! Бекорчи гап. Шундай деймизу, аммо лекин казакларнинг ичидагини ким билади, яна бир балони бошлашиям мумкин...

— Қанақа балони бошлаши мумкин? Нима деяпсан ўзинг?

— Қўшниларимиз бошлабди-ку...

— Нима?

— Нима дейди-я, тағин. Қўзғолон! Воронеж губернасида, Богучарнинг нарёғида қўзғолон кўтарилибди.

— Ёлғон гап!

— Нега ёлғон бўлсин, кеча милиционер ошнамдан эшигдим. Уларни ўша томонга жўнатмоқчи эмиш.

— Қайси жойда бошланибди, анигини билмадингми?

— Монастиршинада, Сухой Донецда, Пасекада, Эски ва янги Қалитвада, яна қаерлардаям. Жудаям улкан қўзғолон эмиш.

— Кечада менга шуни нега айтмадинг, нодон?

— Михайлнинг олдида айтгим келмади, айтардимаму, лекин шу гапдан оғиз очилса, кўнглим гум кетади. Қўзғолон деган сўзни эшитишга тобим қолмабди,— деди Прохор энсаси қотиб.

Григорийнинг қовоқлари уйилиб кетди. Узоқ ўйланниб туриб:

— Хунук гап,— деди.

— Сенга унинг алоқаси йўқ. Хоҳоллар бош қотирсин, сенга нима? Думлари боплаб тугилгандан кейин қўзғолон кўтариш қанақалигини билишади. Сен билан менга ҳеч алоқаси йўқ. Мен хоҳоллар учун заррача ачинмайман.

— Энди менга қийин бўлади.

— Нимага?

— Нимага бўларди? Агар Округ ҳукуматиям Кошевои сингари, менинг тўғримда ёмон фикрда бўлса, жазодан қутулиб бўпман. Ёнгинамизда қўзғолон, мен бўлсан, собиқ офицер, бунинг устига, қўзғолончи... Тушундингми энди?

Прохор кавшанмай қўйди, ўйланиб қолди. Бундай фикр унинг миясига сира келмаган эди. Самогон кайф қилганлигидан гангид, қанча ўйласа ҳам бу гапнинг тагига етолмасди.

— Қўзғолон у ёқда, сен бу ёқда, ахир сенга нима алоқаси бор, Пантелеевич?— ҳайрон бўлиб сўради у.

Григорий энсаси қотганидан, юзларини бужмайтириди, лекин индамади. Бу янгилик унга ёмон таъсир этгани, ваҳимага тушгани кўриниб турарди. Прохор стакан узатган эди, бироқ Григорий унинг қўлини қайтариб, қатъийлик билан:

— Ортиқ ичмайман,— деди.

— Яна биттадан ичсак, ҳеч нима қилмас? Ич, Григорий Пантелейевич, йиқилгунингча ичавер. Бу роҳатижон дунёда самогон ичишдан бошқа ишимиз қолмади.

— Ўзинг ич йиқилгунча. Усиз ҳам миям гангиган, ичсам бир балога гирифтор бўламан... Мен бугун Вёшкига бориб рўйхатдан ўтишим керак.

Прохор унга астойдил тикилиб қаради. Григорийнинг офтоб олган, шамол ялаган юзи бўриқиб кетган, ловилларди, фақат орқага қаратса тараган соchlарининг остидан териси оқариб кўринарди. Кўпни кўрган, уруш азобларини бирга тортавериб Прохор билан акауқадай бўлиб кетган бу одам ҳозир ҳам пинагини бузмасди. Сал-пал шишинқираган кўzlари ҳорғинлик билан хўмрайиб қаради.

— Борди-ю, ҳалигидақа... қамаб қўйишса... қўрқмайсанми? — деб сўради Прохор.

— Худди шунисидан қўрқаман-да, ошна! Умримда турма бетини кўрганмасман, ўлимдан мунчалик қўрқмайман. Ўйлаб турсам, бу кўргиликдан ҳам қутулмайдиганга ўхшайман.

— Бекорга уйга қайтдинг-да,— ачиниб гапирди Прохор.

— Уйга қайтмай, қайга бораман, ахир?

— Бу фалвалар тинчигунча бирон шаҳарда туриб, кутиш керак эди, ана иннайкейин, келаверардинг.

Григорий қўл силтаб кулиб юборди:

— Буни менга гапира кўрма! Кутиш ва қувиб етиш — оламда энг ярамас нарса. Болаларимни қолдириб қайга бора олардим?

— Гапингни қара! Болаларинг сенсиз ҳам бир кунини кўриб келди-ку! Кейинроқ уларни олиб, кетардинг-да, жононингният ёнингга олволардинг. Айтгандай, сенга айтаман деб эсимдан чиқибди! Урушдан олдин сен билан Аксинья хизмат қилган хўжайининг оламдан ўтибди, отасиям ўлибди, боласиям.

— Листницкийларми?

— Ҳа. Худди шулар. Менинг бўлам Захар чекиниш даврида ёш Листницкийга деншиклик қилиб, доим билла бўлган, ўша гапириб берди: чол Морозов станицасида терлама касалидан ўлибди, уғли Екатеринодар

гача борибди, бироқ хотинининг генерал Покровский билан юрганига чидолмай, ўзини ўзи отиб қўйибди.

— Арвоҳ урсин уларни, қўявер,— деди Григорий бепарволик билан.— Не-не яхши одамларнинг ўлганига ачинаман холос, буларга ҳеч ким қайғурмайди.— У ўрнидан туриб шинелини кийди, эшик тутқичидан ушлаб туриб, ўйланқираб гапирди:— Лекин тўғрисини айтсам, ёш Листницкий билан бизнинг Кошевой сингари кишиларга доим ҳавасим келарди... Улар учун ҳамма нарса олдиндан ойдай равшан эди, менга алҳолгача ҳамма нарса туманли. Иккаласининг ҳам ўз йўли бор: шундай каттакон тўғри йўлки, боши ҳам маълум, охири ҳам, мен шўрлик ўн еттинчи йилдан бери сўқмоқ йўлдан чиқолмайман, маст одамга ўхшаб гандираклайман холос... Оқлардан кечдим, қизилларга қўшилолмадим, худди сув бетида қалқиган тезакдай сузуб юрибман... Биласанми, Прохор, агар мен охиригача Қизил Армия сафида қолганимда эди, эҳтимол, ишим анча тузук бўларми? Олдин мен Совет ҳукумати учун қанчалик жон кўйдириб хизмат қилганимни бошқалар билмасаям, сен яхши биласан-ку, кейин ҳаммаси остин-устун бўлди кетди... Оқлар орасида мен бегона эдим, уларнинг қўмондонлиги доим мендан шубҳаланаарди. Бу табиий нарса, қандай қилиб бошқача бўлиши мумкин? Ахир мен деҳқон боласи, саводсиз казак бўлсаму, қандай қилиб улар мени яқин кўрсин? Улар менга ишонишмасди! Кейин қизиллар орасида яна шу аҳвол юз берди. Мен кўр эмасман, эскадрондаги комиссар билан коммунистлар менга қайси кўз билан қараганини кўриб турдим... Жангда мендан кўзини олишмасди, ҳар бир қадамимни кузатиб юришарди ва албатта: «Э-э, аплаҳ, казакдан чиқсан оқ офицер, бизга панд бериб кетмасайди» деб гумонсираганларига сира шубҳам йўқ. Мен буни сездиму бирданига кўнглим совий бошлади. Бу қадар ишончсизликка чидаб юраверишга тоқатим қолмади. Қизийверса ахiri тош ҳам тарс ёрилади-да. Яхшики, менга жавоб беришди. Ҳар ҳолда у машмаша тезроқ бирёқлик бўлади-ку.— У хириллаб йўталди-да, жим бўлиб қолди, сўнгра Прохорга қарамасдан, бошқача овоз билан:— Меҳмон қилганинг учун раҳмат,— деди.—

Мен кетдим. Соғ бўл. Агар кечгача қайтсам, олдингга кираман. Шишани беркитиб қўй, хотининг келиб кўрса, това билан уриб бошингни ёради.

Прохор уни кузатиб чиқди, даҳлиизда қулогига шивирлади:

— Ҳой, Пантелевич, ҳушёр бўл, бир балога гирифтор қилишмасин тағин!

— Ҳушёр бўламан,— сустгина жавоб берди Григорий.

У уйига кирмасдан тўғри Дон бўйига тушди-да, аллакимнинг пристанъ ёнига боғлаб қўйилган қайиғини ечди, ичига йифилган сувни ҳовучлаб олиб ташлади, четан деворнинг қозигини суғуриб олди-да, сув четидаги музларни синдириб, нариги қирғоқча жўнади.

Тўқ-яшил бўлиб кўпирган тўлқинларни шамол Дон бўйлаб ғарб томонга думалатиб оқизиб бораради. Камарлар атрофидаги, қирғоқ яқинидаги тип-тиниқ юпқа музларни тўлқин синдирав, яшил ипакдай майин сув кўкатларини алғоқ-далғоқ қиласади. Музларнинг қисирлаган товуши, тўлқин суви юваётган қирғоқ шағалларининг шувиллаши дарё бўйидан келиб турарди, лекин дарёнинг ўртасида, тез оқар жойида бўлса, фаяқат қайиқнинг чап томонига урилган сувнинг биқиралиши билан ўрмонда қутурган шамолнинг ғувиллашидан бошқа овоз эшитилмасди.

Григорий қайиқни ярмигача сувдан тортиб олди, ўтириб этигини ечди, йўл юриш осон бўлсин учун пайтаваларини бошқатдан яхшилаб ўради.

Тушга яқин у Вешенскаяга келди.

Округ ҳарбий комисариатида одам гавжум эди. Телефонлар жингирлагани, эшиклар тарақлагани, бўлмалардан ёзув машинкаларнинг чиқирлагани эшитилар, қуролланган одамлар узлуксиз кириб-чиқиб туришарди. Коридорда йигирматача қизил аскар қўй терисидан белбурма пўстин кийган пакана одамини ўртага олволиб, алланима деб чуғурлашар ва хохолаб кулишарди. Григорий коридордан кетаётганда икки қизил аскар энг четдаги хонадан станок пулемётини судраб чиқди. Унинг ғилдиракчалари, тахтаси ғадир-бўдур бўлиб кетган полда дукур-дукур қилиб, ғилдираб бораради. Пулемётчилардан бири — новча

бўйли семиз йигит — ҳазиллашиб: «Ҳой штраф рота, четга чиқ, йўқса, тагида қоласан!»— деб бақираварди.

«Дарвоқе, чиндан ҳам булар қўзғолонга қарши отланяпканга ўхшайди», деб ўйланиб қолди Григорий.

Рўйхатдан ўтишда уни кўп тутишмади. Военкомат секретари наридан-бери гувоҳномасини қайд этди-да:

— Донечка ҳузуридаги сиёсий бюрога¹ кирасиз. Собиқ офицерлардан бўлганингиз учун сиз уларнинг рўйхатидан ўтишингиз керак,— деди.

— Хўп бўлади,— Григорий честь берди, лекин юрагига ғулғула тушганини сездирмади.

Майдонда ўйланиб тўхталиб қолди. Ҳозир сиёсий бюрога бориш керак, лекин боришга оёғи тортмас, юраги чопмасди. «Қамаб қўйишади!» дерди кўнгли унга: Григорий ваҳим ичидა қолиб, нафратига чидоммай, сесканарди. У мактаб девори ёнида, тинган кўзлари билан гўнг босган ерга тикилар ва ўзини қўллари боғлиқ, ифлос зинадан подвалга тушиб келаётган ҳолда кўрарди, кетидаги соқчи, наганнинг ғадир-будур дастасидан маҳкам ушлаган... Григорий муштларини маҳкам қисди-да, ўйнаб чиққан кўм-кўк томирларига қаради. Шу қўллар боғланадими ҳали? Қон гуп этиб юзига тепди. Йўқ, бугун у ерга бормайди! Эртага марҳамат, бориши мумкин, бугун у қишлоққа қайтади, бир кунни болалари билан ўтказади, Аксиньяни кўради, эрталаб Вешенскаяга қайтиб келади. У фақат бир кунга уйига бориб қайтади, албатта қайтиб келади. Эртага нима бўлса бўлар, лекин бугун эмас.

— Ҳа-а, Мелехов, кўпдан бери қорангни кўрсатмайсан бу...

Григорий бурилиб қаради. Петронинг полкдоши, Дон армияси 28-нчи қўзғолончи полкнинг собиқ командири Яков Фомин унинг ёнига келаётган эди.

Ҳозир у илгари Григорий кўрган бесўнақай, беўхшов кийинадиган ўша атаманли Фоминга сира ўхшамасди. Икки йилнинг орасида бутунлай ўзгариб

¹ 1920—21 йилларда округ ва уезд чека органларини сиёсий бюро деб аталарди. (Авт.)

кетганди: ихчам қилиб тикилган суворийча шинель эннига ярашган, новвот ранг мўйловлари шопдай қилиб буралган эди; унинг қад-қомати, олифтачасига қадам ташлаши, мағуруона илжайиши ва бутун ва-жоҳатидан манманлик, шуҳратпарастлик ҳиди келиб турарди.

— Қайси шамол учирив келди?— деб сўради у Григорийнинг қўлини сиқиб, чақчайган кўк кўзлари билан унинг кўзига тикилиб.

— Хизматдан озод бўлиб, военкоматга учрашгани келувдим.

— Қачон келдинг?

— Кечаш.

— Аканг Петро Пантелеевич тез-тез эсимга тушиб туради. Яхши казак эди, бекорга нобуд бўлди.... Иккавимиз қалин оғайнини эдик. Бултур сизлар чакки қўзғолон кўтардинглар, керак эмасди, Мелехов. Қатта хато қилдинглар!

Григорий индамай тураверишга уялиб:

— Ҳа, казаклар хато қилди,— деди.

— Сен қайси қисмда бўлдинг?

— Биринчи Суворий Армияда.

— Вазифанг?

— Эскадрон командири.

— Ҳо! Мен ҳам ҳозир эскадрон командириман.

Шу ерда бизнинг ўз соқчи эскадронимиз бор.— У, у ёқ-бу ёғига қараб қўйди-да, овозини пасайтириб:— Қани юр, нарироқ борайлик-чи, сен мени бир оз кузатиб қўясан, бу ерда одам кўп экан, гаплашгани қўйишмайди,— деди.

Иккиси кўча бўйлаб кетишли; Фомин кўз қирида Григорийга қараб-қараб қўярди.

— Уйда турмоқчимисан энди?— сўради у.

— Бошқа қайга боришим мумкин? Уйда...

— Рўзғор билан шуғулланасанми?

— Ҳа.

Фомин ачинган бўлиб бош чайқади, чуқур нафас олди:

— Ёмон вақтда уйга қайтибсан, Мелехов, чакки қайтибсан, эй ука... Яна бир-икки йил юра турсанг бўларди.

— Сабаб?

У Григорийнинг тирсагидан ушлади, сал-пал энгашиб қулоғига шивирлади:

— Округ нотинч. Фалла мажбуриятидан казаклар жудаям норози. Бугун қўзголонни бостиришга жўнаяпмиз. Яхиси, сен бу ердан кет, тезроқ қорангни ў chir. Петро билан мен қалин оғайни эдим, шунинг учун сенга шу маслаҳатни беряпман, тезроқ жўнаб қол!

— Жўнайдиган жой қолмади.

— Ҳой, қўзингни оч! Сиёсий бюро офицерларни қамоққа ола бошлади, шунисини сенга эшиитириб қўймоқчи бўлиб гапиряпман. Шу ҳафта Дударевкадан учта подхорунжийни олиб келишди, Решетовкадан яна биттасини, Доннинг нариги ёғидан бўлса-ку, тўда-тўда қилиб ҳайдаб келишяпти, ҳатто амали йўқ оддий казакларният текширишга тушишди. Уёғини ўзинг топиб олавер, Григорий Пантелеевич.

— Маслаҳат берганинг учун раҳмат, бироқ мен ҳеч ёққа кетмайман,— деди Григорий ўжарлик билан.

— Ихтиёр ўзингда.

Фомин бошқа гапга ўтиб, округдаги аҳвол, округ бошлиқлари ҳамда округ ҳарбий комиссари Шахаев билан муносабати тўғрисида сўзлай бошлади. Бироқ Григорий ўз ташвиши, ўз ўйлари билан бўлиб, унга унчалик қулоқ солмасди. Уч маҳаллани босиб ўтганларидан кейин Фомин тўхтади.

— Мен бир жойга учрашишим керак... Ҳозирча хайр,— деди-ю, қўлини кубанкасига қилиб, Григорий билан совуққина хайларшиди-да, яп-янги елка қайишларини фижирлатиб, одамнинг кулгисини қистатадиган такаббурлик билан тор кўчага кириб кетди.

Григорий унинг кетидан қараб турди-да, изига қайтди. Сиёсий бюро жойлашган икки қаватлик иморатнинг харсанг зинасидан чиқаркан, «Бир ёғлик қиласидиган бўлсанг, тезроқ қил, нимасига чўзасан буни? Нима бўлса пешонангдан кўр, Григорий, гуноҳ иш қилишни билган азамат, энди жазос тан бериши керак!» деб ўйлади.

Эрталаб соат саккизга яқин Аксинья печнинг қўрини олди, чўғдай қизариб, терлаб пишган юзини этағи билан арта-арта, скемайкага ўтириди. У қозонтовоқдан барвақт қутулиш учун тонг отмай туриб олганди; товуқ гўшти солиб угра пиширди, юпқа қилди, пишлоқ солинган чучварага анча қаймоқ солиб, яхшироқ қовурилсин учун уни ўтга қўйди; бунақа чучварани Григорий яхши кўрганини у биларди, шунинг учун байрам кунига муносиб таомлар тайёрлаб, ўз ошиқини меҳмон қилиш ниятида эди.

Бирор баҳона билан Мелеховларниги боргиси келарди, бирпасгина бўлса-да, ўша уйда бўлишни, лоақал кўз қирида бўлсаям Григорийни кўришни истарди. Севгани шу ерда, бир қадам жойда бўлса-ю, уни кўролмаса, бу қандай гап? Лекин Аксинья оғирлик қилиб ўзини босди, бормади. У ахир ёш бола эмаски, чопқиллаб кетаверса... Бу ўшдаги аёлга бачканалик, енгилтаклик мутлақо ярашмайди.

Аксинья ҳар доимгисидан ҳам ортиқча ҳафсала билан юз-қўлларини яхшилаб ювди, тоза кўйлагини, баҳя тикилган яп-янги ички юбкасини кийди. Қопқоғи очилган сандиқ ёнида «нимани кийсам экан?» деган хаёлда узоқ ўйланиб қолди. Бегойи куни ясанай деса қўни-қўшнидан истиҳола қиласи, шу оддий иш кийимида юраверишга кўнгли бўлмасди. Қайси бирини кийшини билмай боши қотган Аксинья ҳадеб юзини бужмайтирас, дазмолланган юбкаларни бирма-бир олиб кўрарди. Ниҳоят у, тўқ-кўқ юбкаси билан қора тўр тутилган ҳаво ранг кофтасини шартта олди. Бисотидаги кийимларнинг энг яхшиси шу эди. Қўшнилар нима деса дер, шуниям мулоҳазасига бориб ўтирсинми? Улар учун бугун бегойи кун бўлса, унинг учун — байрам. Аксинья нарибери кийиниб ўзини ойнага солди. Таажжублангандай, лабларида билинар-билинмас табасум пайдо бўлди: аллакимнинг ўйноқи кўзлари ойнадан тикилиб, ҳизланиб қараб турарди. Аксинья диққат билан ўз юзини кўриб чиқди-да кўнгли жойига тушиб эркин нафас олди. Йўқ, ҳуснига футур етмабди ҳали! Ҳали кўп йигит уни кўрганда маҳлиё бўлади.

кўзларини мужгон қилиб, кетидан узоқ тикилиб қолади!

Ойна олдида юбкасини тузатаркан овозини чиқариб: «Мана мен, Григорий Пантелеевич, кўзингни оч!..»— деди, лекин қизара бошлаганини сезиб, эшитилар-эшитилмас кулиб қўйди. Бироқ чакка соchlariга битта-яримта оқ оралаганини кўриб пинагини бузмасдан, шартта-шартта юлиб ташлади. Григорий соchlari оқарганини кўрмаслиги, ёши анчага борганини сезмаслиги керак. Аксинья унинг кўзига етти йил илгаригидай ёш кўринишни истарди.

Тушгача у бир амаллаб уйда ўтириди, лекин тушдан кейин сабри чидамай, эчки тивитидан тўқилган оппоқ рўмолини елкасига ташлади-ю, Мелеховларникига борди. Дуняшка уйда ёлғиз эди. Аксинья у билан кўришиб:

— Овқатланганингиз йўқми?— деб сўради.

— Бу дайдиларнинг дастидан вақтида овқат еб ҳам бўлмайди! Эрим Советда, Гриша бўлса, станицага кетган. Болаларни тўйғизиб, катталарни кутяпман.

Аксинья ўзини бепарволикка солиб, тарвузи қўлтиридан тушганлигини сира сездирмасдан:

— Мен бўлсан, ҳамманг уйдасан, деб ўйловдим,— деди.— Ахир Гриша... Григорий Пантелеевич қачон қайтади? Бугунми?

Дуняшка ясанган ҳамсоясига бир қараб олди-да, сустгина жавоб қилди:

— У рўйхатдан ўтмоқчи эди.

— Қачон қайтишини айтувдими?

Дуняшканинг кўзлари ёшланди, тутилиб-тутилиб:

— Роса вақтини топиб... келибсан... Билмайсанки, қайтиб келадими, йўқми, балки, бутунлай келмас...— деб гинахонлик қилди.

— Нима? Бутунлай келмас?

— Михаил, уни станицада қамоқقا олишади, дейди...— Дуняшка аламига чидолмай йифлаб юборди, кўз ёшларини артаётуб бақирди:— Қуриб кетсин бу турмуш! Бу машмашалар қачон тамом бўлади, ахир? У кетгандан бери болалари кўз очгани қўймайди: «Дадам қаерга кетди, қачон келади?» деб сўрашади холос.

Мен қайдам билай? Икковиниям ҳовлига ҳайдадим,
ўзимнинг юрагим қон бўлиб турганда... Бу қандай қар-
ғиши теккан турмуш, а? Бирпас ҳаловат йўқ, дод дегинг
келади!

Аксинья, гўё ташвишланишга арзимайдиган ан-
чайин масала устида гап бораётгандай бепарволик
билан:

— Кечасиям қайтмаса, эртага ўзим станицага бо-
риб, нималигини билиб келаман,— деди пинагини
бузмасдан.

Дуняшка унинг вазминлигига ҳайрон қолиб хўр-
синди:

— Чамамда энди уни кутиб ўтиришдан наф йўқ.
Шўринг қурғур ўз оёғи билан келиб балога рўпара
бўлди-я!

— Ҳозирчалик ҳеч гап йўқ. Ҳадеб йиғлайверма-
санг-чи, ахир болалар сезиб қолади... Яхши қол!

* * *

Григорий кеч қайтди. Уйда бирпас туриб, Аксинья
олдига борди.

Узун кун бўйи хавотирланиб юргани учун Аксинья
уни ўзи истаганидек хурсанд бўлиб кутиб ололмади.
Кечга яқин у, кун бўйи қаттиқ ишлаган одамдай,
шалвайиб қолган эди. Кутавериб чарчаб, силласи қури-
ган ҳолда каравотга чўзилганди; энди мудроқ босганда,
дераза тагида оёқ товушини эшишиб, қиз боладай
чаққон иргиб турди.

— Нега Вёшкига кетяпганингни менга айтма-
динг?— деб сўради у Григорийни қучоқлаб, шинелла-
рини ечаркан.

— Шошганимдан айтишгаям улгуrolмадим.

— Дуняшка билан иккимиз икки ёқда, энди қайт-
майди, деб роса йиғладик.

Григорий мулойимгина илжайди:

— Йўқ, ҳозирчалик иш у даражага етгани йўқ,—
деди-ю, жимиб қолди, яна такрорлади:— Ҳозирчалик
йўқ...

Оқсоқланиб бориб стол ёнига ўтирди. Очиқ эшикдан
меҳмонхонанинг ичи, бурчакдаги кенг ёғоч каравот,

сандиқ кўринар, унинг жез қопланган сирти йилт-йилт қиласарди. Бу ердаги ҳамма нарса қадимгисича, йигитлик чоғида, Степан уйда йўқлинига кирган вақтларида уй ичи қандай бўлса, шундоқлигича қолган эди; гўё ойлар ва йиллар бу уйни четлаб ўтгандай, унда биронта ўзгариш рўй бермаган эди; ҳаттоқи илгариги ҳиди ҳам сақланиб қолганди: ачиган хамиртуруш ҳиди, янги ювилган полнинг иси аралаш чўл ялпизнинг билинар-билинмас бўйи димоқقا уриларди. Григорийнинг назарида, яқиндагина охирги марта, тонг маҳалида шу уйдан чиққандай эди, ваҳоланки орадан кўп вақт ўтиб кетган эди.

У хўрсингиси келса ҳам нафасини ютди-да, шошимасдан тамаки ўрай бошлади, бироқ негадир, қўллари қалтираб, тамакини тиззасига тўкиб юборди.

Аксинья шоша-пиша дастурхон ёзди. Совуб қолган уграни иситиш керак эди. Чопиб бориб бостиридан пайраҳа олиб келди-да, ранги оқарган, ҳаллослаган ҳолда ўчаққа ўт ёқди. У учқуни чарсиллаган чўғни пуфлаётib ҳам, индамай тамаки тутатиб, букчайиб ўтирган Григорийдан кўзини олмасди.

— У ердаги ишларинг нима бўлди? Ҳаммасини тўғриладингми?

— Ҳаммаси жойида.

— Нега бўлмасам, Дуняшка: Григорийни албатта қамашади, деб ҳовлиқди? Мениям қўрқитворди, жон-поним чиқиб кетди.

Григорий афтини бужмайтириб, жаҳл билан папиросини ерга ташлади:

— Эри қулоғига қуйган. Бу гап Михайлдан чиқиши мумкин, бошимни балога қўймоқчи бўлган ҳам ўша.

Аксинья стол ёнига борди. Григорий унинг қўлидан ушлади.

— Ростини айтсам,— деди Григорий пастдан унинг қўзларига тикилиб,— ишларим унчалик яхши эмас. Ўша сиёсий бюргора кетаётib у ердан соғ чиқишимга ўзимнинг ҳам кўзим етмовди. Минг қилганда-ям мен қўзғолонда дивизия командири бўлганман, юзбоши деган номим бор. Мендақаларни ҳозир бир бошдан териб олишяпти.

— Улар сенга нима дейишиди?

— Анкета беришди, тўлғазасан деб. Шунақа қоғоз бор: ҳамма хизматларингни шунга ёзишинг керак. Менинг саводим ўзингга маълум. Умримда мунчалик кўп ёзганмасман, икки соат қадалиб ўтириб, бошимдан ўтганларни батамом ёздим. Сўнгра, яна иккитаси уйга кириб келди, қўзғолон тўғрисида сўрамаган гапи қолмади. Ҳайтовур, бинойидай одамлар экан. Каттаси: «Чой ичасизми?Faқат сахарин солинган»,— деди. Ичимда: «Чойга бало борми шу топда! Олдингиздан эсон-омон чиқиб кетсам ҳам гўргайди», деб қўйдим.— Григорий бир дам жим бўлиб, аллакимдан жиркангандай гапини тамомлади:— Юракданам худо берган экан ўзи... капалагим учиб кетди-я!

Григорий ўша ерда, Вешенскаяда қўрқиб кетгани ва ўзини босиб ололмагани учун ўзини ўзи еб қўйгиси келарди. Йўқ нарсага ваҳимага тушганини ўйласа, баттар хуноб бўларди. Бекорга шунчалик хавотирланганлари ҳозир қулгили кўринар, ўзидан ўзи уяларди. У кела-келгунча йўлда шу нарсани ўйлаб келганди ва балки, шунинг учун ҳам ҳозир Аксиньяга гапираётиб, ўзини ўзи масхара қилар, қўрқанлигини ҳаддан зиёда бўрттириб кўрсатишга уринарди.

Аксинья унинг ҳикоясини охиригача диққат билан тинглади, сўнгра, қўлларини Григорийнинг қўлидан аста чиқариб олиб, печь ёнига борди. Оловни тузатаётib сўради:

— Кети нима бўлади энди?

— Бир ҳафтадан кейин яна бориб қайд эттиришим керак.

— Сени, барибир, қамашади деб ўйлайсанми?

— Ҳа, афтидан, шунга ўхшаб қолди. Ахийри қамашади.

— Энди нима қиласиз? Қандай яшаймиз, Гриша?

— Билмайман. Ке, кейинроқ гаплашармиз буни. Ювенишга сувинг борми?

Иккиси овқатлангани ўтириди. Аксинья яна ўзини эрталабgidай баҳтиёр ҳис қила бошлади, чунки Григорий шу ерда, ёнгинасида эди; энди ундан кўзини олмасдан, биронтаси кўриб қолади деб истиҳола қил-

масдан тўйгунича тикилиши, кўнглидаги дардини яширмасдан, қизармасдан кўз орқали бемалол ифода этиши мумкин эди. Уни ниҳоятда соғинганди, эркала-тишга ўрганмаган ана шу каттакон қўлларнинг бир силашига бадани интизор эди! Аксинья овқатга қарамас, сал-пал олға энгашган ҳолда Григорийнинг зўр бериб овқат ейшини томоша қиласди, хиралашган кўзлари билан унинг юзига, гимнастёркасининг қотирма ёқаси қисиб турган қорамтир бўйнига, кенг кифтларига, стол устида ётган қўлларига завқланиб тикиларди... Ундан анқиган бўйларни, фақат ўзига хос тер билан тамакининг ўткир исини Аксинья орзиқиб ҳидлар ва бу ҳидлар қадимдан таниш ва ёқимли бўлгани учун ҳидлаб тўймасди. Агар унинг кўзини боғлаб қўйилса ўз Григорийсини мингларча эркаклар орасидан фақат ҳидидан ажратиб ола биларди... Аксиньянинг икки бети чўғдай ёнар, юраги гупиллаб уради. Шу оқшом унга тузукроқ хизмат қилолмади ҳам, чунки у Григорийга маҳлиё бўлиб ҳамма нарсани унутиб қўйганди. Лекин Григорий илтифот талаб этмасди: нонни ўзи кесди, у ёқбу ёқقا кўз югуртириб, печь токласидан туздонни топди, ўзи туриб яна бир тарелка угра қўйиб келди.

— Улгудай қорним оч,— деди Григорий узр сўра-тандай илжайиб.— Эрталабдан бери оч-наҳор юрибман.

Фақат шу гапдан кейин Аксиньянинг ўз вазифаси эсига тушиб, ўрнидан иргиб турди.

— Вой, шўрим қурсин! Пишлоқ чучвара билан юпқа бутунлай эсимдан чиқибди-я! Товуқ гўштидан ол, бемалол оловур! Қорнингни яхшилаб тўйғизгин, женгинам! Ҳозир ҳаммасини олиб келаман.

Григорий бир ҳафтадан бери туз тотмаган одамдай, овқатдан бошини кўтармай, чангини чиқариб туширади. Унга ол-ол қилишнинг ҳожати ҳам йўқ эди. Аксинья сабр қилиб анчагача кутди, ниҳоят чидай олмай, унинг ёнига бориб ўтириди-ю, чап қўли билан Григорийнинг бошини ўзига яқинроқ тортиб, ўнг қўлига гул тикилган тоза сочиқни олди-ю, севганининг ёғ юқ-қан лабу даҳанини артиб қўйди-да, нафас чиқармай, кўзларини шу қадар чирт юмиб олдики, кўз ўнгидаги

чақнаб кетгандай бўлди, сўнгра лабини унинг лабларига қўйиб, маҳкам сўрди.

Бир ҳисобда, инсон ўзини баҳтли ҳис этмоғи учун кўп нарса керак ҳам эмас. Шу оқшом Аксинья умуман баҳтиёр эди.

IX

Кошевой билан бир уйда туриш Григорий учун жуда оғир эди. Уларнинг муносабатлари қандайлиги биринчи куниёқ маълум бўлиб, ортиқ гаплашадиган гап қолмаган, энди гаплашишнинг фойдаси ҳам йўқ эди. Авзойига қараганда, Михаил ҳам Григорийни кўргиси келмасди. Михаил икки дурадгор ёллаб, уйининг ремонтини тезлатиб юборганди; усталар чирий бошлаган том страпилларини алмаштиришар, қийшайган бир деворини тезлашар, янги пешайвон, янги ром ва эщиклар қилишарди.

Григорий Вешенскаядан қайтгач, қишлоқ ревкомига бориб, военкомат қайд этган ҳарбий ҳужжатларини Кошевойга кўрсатди-да, хайрлашмасдан чиқиб кетди. У болаларини, баъзи бир буюмларини олиб, Аксиньянига кўчиб ўтди, Дуняшка уни кузатаётуб ийғлади.

— Ақажон, мендан хафа бўлманг, менда заррача айб йўқ,— деди жавдираган кўзлари билан акасига тикилиб.

— Сендан нега хафа бўлай, Дуня? Йўқ, йўқ, асло хаёлингга келтирма,— деб тасалли берди синглисига Григорий.— Тез-тез кириб биздан хабар олиб тур... Бутун авлодимиздан сенга жон куйдирадиган ёлғиз мен қолдим. Мен доим сенга ачинардим, ҳозир... Эринг масаласига келганда, у бошқа гап. Сен билан мен бир-биirimizдан сира кечмаймиз.

— Яқинда биз уйни бўшшатамиз, хафа бўлма,— деди Дуняшка.

— Ҳеч кераги йўқ!— деди Григорий хуноб бўлиб.— Лоақал кўкламгача шу уйда тураверинглар. Менга ҳеч қандай оғирлиги йўқ, болаларим билан Аксиньянига сифиб кетавераман.

— Уни олмоқчимисан, Гриша?

— Кейинчалик кўрамиз,— мужмал қилиб жавоб берди Григорий.

— Тезроқ олавур, акажон, яхши аёл,— деди Дуняшка қатъий қилиб.— Раҳматлик онажоним, Григорий фақат Аксиньяга уйланиши керак, дерди. Сўнгги кунлари уни жудаям яхши кўриб қолувди, ўлишидан бурунроқ унинг олдига тез-тез кириб туарди.

— Сен мени авраяпсан чофи,— деди Григорий кулимсираб.— Унга уйланмай, бошқа кимга уйланардим? Ёинки Андрюниха момога уйланади деб ўйладингми?

Татарскда Андрюнихадан кексароқ кампир йўқ эди, ёши юздан ошганига анча бўлганди; шунинг учун Дуняшка бу мункайган момонинг кичкина гавдасини кўз олдига келтириб, кулиб юборди:

— Гапингни қара-ю, акажон! Мен сўрадим холос. Ўзинг бу ҳақда оғиз очмаганингдан кейин, сўрадимда!

— Ҳеч кимни тўйга чақирмасам ҳам, сени албатта чақираман.— Григорий ҳазиллашиб, синглисининг кифтига қоқиб қўйди-да, енгил тортиб ўз ҳовлисидан чиқиб кетди.

Сирасини айтганда, Григорий учун ҳозир қаерда туришнинг аҳамияти йўқ эди, фақат тинч, хотиржам яшашнигина истарди. Лекин у бундай хотиржамликдан маҳрум эди... Юраги сиқилиб, кўнгли фаш бўлиб, бир неча кунни бекорчиликда ўтказди. Аксиньянинг қўрасида баъзи бир нарсага қўл урмоқчи бўлиб кўрди-ю, бироқ ўша заҳотиёқ ҳеч иш қилолмаслигини сезди. Юрагига ҳеч нарса сифмасди. Тақдирининг номаълумлиги уни азоблар, яшашга халақит берарди; у доим қамалиши тўғрисида ўйлар, энг ками турма жазоси билан қутулиши, йўқса, отиб ташлашлари ҳам мумкинлиги тўғрисидаги ўй бирпас ҳам миясидан чиқиб кетмасди.

Аксинья кечалари уйғонганида унинг уйғоқ ётганини кўрарди. Одатда у қўлларини бошига қилиб, қорон-ғиликка тикилиб чалқанчасига ётарди, кўзлари совуқ, ғазабга тўлган бўларди. Аксинья у нимани ўйлаётганини биларди. Лекин бирор ёрдам кўрсатишга ожиз эди. Унинг қийналганини кўриб ўзи ҳам қийналар ва

бирга турмуш қуриш тўғрисидаги орзу-тилаклари-нинг яна рўёбга чиқмаслигига ақли етиб жигар-бағри эзиларди, лекин бу тўғрида Григорийга савол бермасди. Ўзи ҳал қиласин деб ташлаб қўйган эди. Фақат бир мартагина кечаси уйғониб, қип-қизил тамаки чўғига кўзи тушганда сўради холос:

— Гриша, ҳалиям ухламабсан... Замона тинчигунча қишлоқдан кета турсанг бўлармиди, а? Ёки иккамиз ҳам бирон ёққа қочганимиз тузукми?

Григорий меҳрибонлик билан унинг оёқларига кўрпа ёпди-да, раъисизгина жавоб қилди:

— Ўйлаб кўраман. Сен ухла.

— Ҳаммаси тинчигандан кейин яна шу ерга қайтиб келардик, нима дединг?

У яна гўё ҳеч қандай қарорга келмаган одамдай, мужмал қилиб жавоб берди:

— Қўрайлик-чи, кети нима бўларкан. Ухла, Қсюша,— деди-да, унинг пешонасидан, ипакдай майин кифтидан лаб учи билан оҳистагина ўпиб қўйди.

Лекин ўзи аллақачоноқ бир фикрга келиб, энди Вещенскаяга бормасликка қарор қилган эди. Ўтган сафар уни сиёсий бюрода қабул қилган киши энди бекорга кутиб овора бўлади. Ўшанда стол ёнида шинелини елкасига ташлаб ўтирган, ёлғондакамига эснаб, суюкларини қисирлатиб керишган бу одам Григорийнинг қўзғолон тўғрисидаги гапларини тинглаган эди. Унақа гапларни энди эшитиб бўпти. Айтадиган гап қолмади.

Григорий сиёсий бюрога бориши лозим бўлган куни қишлоқдан кетишга, шароит талаб этса, узоқ вақт қорасини кўрсатмасликка қарор қилди. Қаерга боришини ҳали ўзи билмас, лекин кетишга маҳкам бел боғлаганди На отилишга, на турмага тушишга тоби бор эди! Ўйлаб-ўйлаб шунга аҳд қилган бўлса-да, олдиндан буни Аксиньяга айтгиси келмади. Бусиз ҳам Аксинья хафагарчиликдан боши чиқмай зўрға юрибди, сўнгги кунларини заҳарлашнинг нима кераги бор? Буни фақат охирги куни — жўнар пайтида айтиш керак, ҳозир тинчгина ухлайверсинг, қўлтиғига кириб олиб ётаверсинг. Аксинья кўпинча: «Сенинг қанотинг остида маза қилиб ухлайман»,— дерди. Майли, ҳозир-

чалик ухлайверсин. Унинг пинжига кириб ётиш ҳам яқинда барҳам топади.

Григорий эрталабки пайтларда болаларга қарап, кейин бекорчиликдан зерикиб қишлоқни айланарди. Одамларга аралашса кўнгли очиларди.

Бир куни Прохор Никита Мельниковникига тўпла-нишни, ҳарбий хизматда бирга бўлган казак йигитлар билан ичкилик қилишни таклиф этди. Григорий сира унамади. У ҳамқишлоқларининг ғалла солиғидан норозилигини, ўтиришда муқаррар шундан гап очилишини биларди. Шунинг учун шубҳа остида қолишини истамас, ҳаттоки, танишлари билан учрашганда сиёсатдан гап очилишидан қўрқарди. Шунчалик сиёсатга аралашгани ҳам етар, ахийри бошига бало бўлди.

Григорийни эҳтиёткор ва пишиқ бўлишга мажбур этган яна бир нарса — белгиланган миқдорда ғалла топшириш иши жудаям сусайиб кетгани эди; шу муносабат билан чоллардан уч кишини гаров тариқасида қамоққа олинган эди, солиқ отрядидан икки соқчи уларни Вешенскаяга ҳайдаб кетганди.

Эртасига Григорий матлубот жамияти дўкони олдиди, Қизил Армия сафидан яқинда қайтган собиқ тўпчи Захар Крамсковни кўриб қолди. У ниҳоятда маст, гандираклаб аранг қадам қўярди, лекин Григорийнинг ёнига келаётib, лой тегиб булғанган курткасини тутгималаб олди-да, хириллаб:

— Салом бердик, Григорий Пантелейевич! — деди.

— Салом,— Григорий чорпаҳилдан келган бақувват тўпчининг куракдай кафтини қисди.

— Таняпсанми?

— Бўлмаса-чи!

— Бултур бизнинг батарея Боковская ёнида жонингга оро киргани эсингдами? Агар биз бўлмасак отлиқ аскарларинг тутдай тўкиларди. Ушанда биз қизилларни роса қирганмиз-да! Олдин тўғри ўқ билан, кейин шрапнель билан... Биринчи тўпнинг мўлжалчиси мен эдим. Мен! — Захар ўз кўксига мушт билан уриб мақтанди.

Григорий у ёқ-бу ёғига кўз ташлаб қўйди, нарироқда ғир тўп казак уларга қараб, гапларига қулоқ со-

либ туришарди. Григорийнинг лаблари титради, ғазабидан оппоқ зич тишлари иржайиб кетди.

— Маст бўпқопсан,— деди у овозини секин чиқарib, тишларини очмасдан.— Бориб ухла, кўп алжийверма.

— Йўқ, мен мастмасман!— деб бақирди кайфи ошиб қолган тўпчи.— Эҳтимол, мен аламига ичгандирман! Уйга қайтиб қарасам, ҳамма ёқ расвойи жаҳон! Қазакларга кун йўқ, казакларнинг ўзи ҳам йўқ! Қирқ пуд ғалла солишибди, бу қанақаси, а? Донни улар экибдимики, менга жарима солиша-ди? Улар дон нима-ю, қаерда битишини билишар-микин?

У қонга тўлган маъносиз кўзларини бақрайтириб тикилди-да, бехосдан гандираклаб кетиб, Григорийни айиқдай қучоқлаб олди, унинг юзига ачиган самогон ҳиди гуп этиб урилди.

— Сен нега ҳошиясиз чалвор кийиб олдинг, Григорий Пантелеевич? Мужикларга қўшилдингми? Йў-ўқ, юбормаймиз! Эй, садағанг кетай, Пантелеевич. Яна бошқатдан жант қилиш керак! Яна бултурги шиорни ўртага ташлаш керак: Битсин коммуна, яшасин Совет ҳукумати!

Григорий уни қаттиқ итариб ташлади-да:

— Уйингга жўна ҳозир, абраҳ, пияниста! Оғзинг-дан чиқсан гапни биласанми ўзинг?— деб шивирлади.

Крамсков қўлинни олфа қилиб, тамакидан сарғайиб кетган панжаларини тарвайтириб, фулдирай бошлади:

— Гапим ножёя бўлса, кечиргин. Мени кечирасану, бироқ командирим бўлганлигинг учун сенга ростини айтяпман... Ўз командиримсан, ўз отамдай ишонаман сенга: қайтадан уришиш керак!

Григорий индамай бурилди-да, майдон ичи билан уйига кетди. Кечгача шу аҳмақона учрашувнинг таъсири остида юрди: Крамсковнинг маст-аласт бақирганлари, унга хайриҳоҳлик билан индамай қараб турган казакларнинг илжайганлари ҳадеб эсига тушаверди: «Йўқ, тезроқ кетиш керак! Охири ёмон бўлиши мумкин...» деб ўйланарди у.

Вешенскаяга шанба куни бориши лозим эди. Уч кун-

дан кейин туғилиб ўсган ўз қишлоғидан жұнаши керак әди, бироқ бошқача бўлиб чиқди: пайшанбага ўтар кечаси, Григорий энди ётмоқчи бўлиб турганда, эшикни аллаким қаттиқ тақиллатди. Аксинья даҳлизга чиқди. Григорий унинг: «Ким у?» деб сўраганини эшилди-ю, лекин жавоб берган овозни эшитолмади. Шундай бўлса ҳам юрагига аллақандай ғулғула тушиб, каравотдан туриб, дераза ёнига борди. Даҳлиз эшигининг лўқидони шарақлаб очилди. Уйга Дуняшка кирди. Григорий унинг юзи оқариб кетганини кўрди-ю, ҳеч нарса сўрамасданоқ папоги билан шинелини скамейкадан олди...

— Акажон...

— Нима?— деб секин сўради Григорий шинель енгига қўлини суқа ётиб.

Дуняшка энтикиб, шоша-пиша:

— Акажон, ҳозир қоч!— деди.— Станицадан тўрт отлиқ бизникига кириб келди. Даҳлизда ўтиришибди... Улар шивирлашиб гаплашди-ю, лекин мен эшилдим... Эшик орқасида туриб ҳамма гапни эшилдим... Михаил, Григорийни қамаш керак, деди... Сенинг тўрингда гапириб берди... Тезроқ қоч!

Григорий югуриб бориб уни қучоқлади-да, пешонасидан ўпди.

— Раҳмат, синглим! Уйга қайт тезроқ, йўқлигингни билиб қолишади. Хайр.— Аксиньяга бурилди:— Нон бер! Тезроқ! Озгина бўлса, етади, буханкани нима қиласман?

Ана шундай қилиб беш-тўрт кунлик тинч турмуши ҳам тугади... У жангга кирган одамдай тез ва дадил ҳаракат қиласарди, меҳмонхонага кириб ухлаб ётган болаларини ўпди. Аксиньяни қучоқлади.

— Хайр! Қаердалигимни яқинда биласан. Прохор хабарини етказади. Болаларни сенга топширдим. Эшикни беркитиб ол. Сўрашса, Вёшкига кетди, дегин. Хайр энди, қайтурма, Қсюша!— Уни ўпди, илиқ ва шўртанг кўз ёшлари лабига текканини сезди.

Аксиньяни юпатиш, ёки унинг уқувсиз ва поймапой гапларига қулоқ солиш учун вақти йўқ әди. Бўйнидан қучоқлаган ёрининг қўлларини оҳиста олиб қўйди-да, даҳлизга чиқди, эшикка қулоқ солиб кўрди-

да, шартта очди. У қоронғига ўрганиш учун бир дам кўзини юмиб турди.

Аксинъя олдин Григорийнинг оёқлари остида қор ғарчиллаганини бемалол эшишиб турди. Унинг ҳар қадами юрагига болғадек уриларди. Сўнгра қадам то-вуши босилди, четан девор қасирлагани эшитилди. Ниҳоят, бутунлай жимжит бўлди-қолди; фақат Дон-нинг нарғидаги ўрмонда шамол гувилларди. Аксинъя шамол орасидан бирон товуш келармикан деб астой-дил қулоқ солди-ю, лекин ҳеч нарса эшитилмади. У совқота бошлади. Емакхонага кириб чироқни ўчирди.

X

1920 йилнинг кеч кузида, ғалла топшириш иши су-сайиб кетгани сабабли уни ундириш учун отрядлар тузилгандан кейин, Дон казаклари орасида норозилик кучайди. Дон вилоятининг юқори станицаларида — Шумилин, Қазанск, Мигулин, Мешков, Елан, Славгород, Вешенская ва бошқа станицаларда қуролланган бандалар пайдо бўлди. Бу — кулак ва бадавлат казакларнинг Совет ҳукумати томонидан тузилган ғалла отрядларига, белгиланган миқдорда ғалла топшириш чораларига қарши жавоби эди.

Кўпинча бу бандитлар тўдаси беш-йигирма кишидан иборат бўлиб, ўтмишда фаол оқ гвардиячи бўлган маҳаллий казаклардан ташкил топганди. Улар орасида: ўн саккиз ва ўн тўққизинчи йилларда жазо отрядларида хизмат этганлар, сентябрь ойида мобилизациядан қочиб қолган содиқ Дон армиясининг урядниклари, вахмистр ва подхорунжийлари, бултур Юқори Дон округида қўзғолон кўтарилилганда жанг қилиб, асир қизил аскарларни отиб ном чиқарган қўзғолончилар, умуман, Совет ҳокимиятини жон-жаҳди билан ёмон кўрган одамлар бор эди.

Улар қишлоқлардаги ғалла отрядларига ҳужум қилишар, дон ортиб ғалла пунктига кетаётган араваларни тўсишар, коммунистларни ҳамда Совет ҳукуматига содиқ бўлган партиясиз казакларни ўлдиришарди.

Бандит тўдаларини йўқ қилиш вазифаси, Вешенс-
каяда ва Базки қишлоғида жойлашган Юқори Дон
округининг соқчи батальонига юкланган эди. Бироқ,
кенг ўлка бўйлаб изғиб юрган бу тўдаларни тор-мор
этишга қаратилган чоралар натижа бермади, чунки
биринчидан, маҳаллий аҳоли бандитларга хайриҳоҳ
бўлиб, уларни озиқ-овқат билан таъминлар, қизил
аскар қисмларининг ҳаракати тўғрисида огоҳланти-
риб, қочганларини яшириб турарди, иккинчидан, ба-
тальон командири Капарин, ўзи собиқ чор армияси-
нинг штабс-капитани ва эсер бўлганлигидан, Юқори
Донда энди ташкил топиб келаётган аксилиниқилобий
кучларни тор-мор қилишни истамас ва бунга ҳар хил
йўллар билан халақит берарди. Фақат онда-сонда бир
марта, ўшанда ҳам, округ партия комитети раисининг
талаби билан бандитларга тўсатдан ҳужум қилиб қо-
лар, лекин сал орада яна Вешенскаяга қайтиб келар:
кучларни ҳар ёққа таратиб юбориб, бекорга таваккал-
чилик қилишни истамайман, Вешенскаяни, округ идора-
лари билан омборларини ёлғиз ташлаб кетолмай-
ман, деб важ қиласарди. Тўрт юзга яқин аскари, ўн
тўрт пулемёти бор батальон гарнizon хизматини адо
этарди: қизил аскарлар қамоққа олинган кимсаларга
соқчилик қилишар, сув ташишар, ўрмонга бориб ўтин
кесишарди, бундан ташқари, меҳнат мажбурияти
бўйича, эман дараҳтининг сиёҳ бўладиган ёнғонини тे-
риб сиёҳ қилишарди. Батальон округнинг хилма-хил
ташкилот ва идораларини ўтин, сиёҳ билан мўл-кўл
таъминлаш билан овора эди, округда эса бандит тўда-
ларининг сони кундан-кунга кўпаймоқда эди. Фақат
декабрь ойидагина, Юқори Дон округи билан тулаш-
ган Воронеж губерниясининг Богучар уездидаги катта
қўзғолон кўтарилигандан кейингина, сиёҳ ва ўтин тай-
ёрлаш иши ноилож тўхтатилди, Дон области қўймон-
донининг буйруғига мувофиқ, уч рота аскар ва пуле-
мёт взводидан иборат бўлган батальон соқчи эскадрон
ва 12-нчи ғалла йиғувчи полкнинг 1-нчи батальони
ҳамда иккита кичкина қўриқчи отряди билан бирга
қўзғолонни бостиришга жўнатилган эди.

Сухой Донец қишлоғи ёнидаги жангда Яков Фо-
мин командаси остидаги Вешенская эскадрони қўзғо-

лончиларга ёнбошдан ҳужум қилиб, уларни янчиб ташлаб, қочишга мажбур этди ва кетидан қувлаб бир юз етмиштасасини қиличдан ўтказди, батальондан фақат уч кишигина ўлди. Эскадрондагиларнинг деярли ҳаммаси Доннинг юқори станицаларида турилган казаклар эди. Улар бу ерда ҳам қадимги казак одатини қилишди: эскадрондаги икки коммунистнинг норозилик билдиришига қарамай, жангчиларнинг ярмига яқини эски шинель ва эски пўстинларини ташлаб, ўлган қўзғолончиларнинг ошланган асл пўстинларини кийиб олишди.

Қўзғолон бостирилиб, орадан бир неча кун ўтгандан кейин эскадрон Казанск станицасига чақириб олинди. Фомин ҳарбий хизмат мاشаққатларидан ҳордиқ чиқариб, Казанскда кайф-сафога берилиб кетди. Ўлгудай хотинбоз, ўшук ва улфатчиликни яхши кўрадиган бу одам туни билан йўқолиб тонготар маҳалида қўшхонага қайтарди. Фомин билан қалин оғайнини бўлган жангчилар кечқурун ўз командирларининг этиклари мойланганини кўриб, бир-бирларига кўз қисишаарди:

— Бизнинг айғир яна модабозлик қилгани кетяпти! Тонг отмай қайтмайди энди.

Агар Фомин самогон борлигини, ичкилик бўлишининг дарагини эшитса, комиссарга ва политрукка билдиrmай, экскадрондаги таниш казаклариниiga ҳам бораверарди. Бу аҳвол тез-тез бўлиб турарди. Лекин сал орадаёқ бу лобар командир зерикиб, қош-қовоғи осилиб, майшатпарастликни йиғишириб қўйди. У энди кечқурун баланд пошнали олифта этигини ярқиратиб мойламас, ҳар кун соқол олишни ҳам тарк этган эди, ўз экскадронида хизмат этган шу қишлоқлик казакларнинг қўшхонасига ҳам аҳён-аҳёнда, ичкиси келганда борар, ўшанда ҳам кўп гапирмасди.

Вешенскаядан отряд командирига қуйидаги маълумот келган кундан бошлаб Фоминнинг феъли айниб қолганди: Дончеканининг сиёсий бюроси, Усть-Медведица округига туташган Михайловкадаги соқчи батальон ўз командири Вакулин билан бирга қўзғолон кўтарди, деб қисқача хабар қилган эди.

Вакулин Фоминнинг ҳам сафдоши, ҳам дўсти эди.

Илгари иккови Миронов корпусида бирга хизмат этганди, Саранскдан Донга бирга қайтишган, Будённий суворийлари фитначи Миронов корпусини қуршаб олганда қуролларини баравар топширишган эди. Фомин билан Вакулин ўртасидаги дўстона муносабат сўнгги вақтгача давом этиб келганди. Яқиндагина, сентябрнинг бошларида Вакулин Вешенскаяга келган эди. Ўшандаёқ у эски дўстига: «Комиссарлар елкамизга миниб олди, дэҳқонларни ғалла мажбурияти билан хонавайрон қилишяпти, мамлакатни ҳалокатга элтишяпти»,—деб ҳасрат қилган, аلامидан тишларини фижирлатган эди. Фомин дилида Вакулиннинг фикрларига қўшилса ҳам, лекин доғулилил қилиб сир бой бермаганди, зотан, ўзининг ақли калта бўлса ҳам шу доғулилиги, устомонлиги билан шайтонга дарс бера оларди. Умуман, у эҳтиёткор, пишиқ эди, ҳеч шошмас, дабдурустдан «ҳа», «ё» йўқ демас эди. Бироқ, Вакулиннинг қўзғолон кўтарганини эшитгандан кейин аввалги эҳтиёткорлигидан асар қолмади. Бир куни кечқурун, эскадрон Вешенскаядан жўнаш олдида эскадронликлар взвод командири Алферовникига тўпланишиди. От сугориладиган каттакон челақда тўла самогон келтирилганди. Стол атрофида суҳбат қизиган эди. Фомин ҳам шу базмда иштирок этди; у индамай, гап ўғирлаб ўтирас ва индамай, чеълакдан самогон олиб шимиради. Лекин жангчилардан бири Сухое Донец ёнида қандай ҳужум қилинганини эслаб гапира бошлаганда, Фомин хомушлиқ билан мўйловини бураб унинг сўзини бўлди:

— Хохолларнинг адабини берганимиз рост, бироқ ўзимиз ҳам яқиндавойвойламасак гўргайди, йигитлар... Вешенскаяга қайтганимизда, масалан, ғалла отрядлари оиласизда бор дон-дунимизни олиб кетганини кўрсак, нима қиласиз? Казанскликлар бу отрядлардан жудаям норози. Омборда бир дон қолдирмай шипириб олишяпти...

Ҳамма жим бўлиб қолди, Фомин ўз эскадрон жангчиларини кўздан кечириб, зўрма-зўраки илжайди:

— Ҳазиллашиб гапирдим... Ҳушёр бўлинг тағин шу гапни сақич қилиб чайнаб юрманглар, ҳазилнинг

кети зилга айланиши мумкин,— деб тайинлади.

Вешенскаяга қайтганларидан сўнг Фомин ярим взвод аскарни ёнига олиб уйига — ўз қишлоғи Рубежнийга жўнади. Дарвоза ёнида, қўрага кирмасдан отдан тушди-да жиловни қизил аскарлардан бирига бериб, уйга кирди.

У хотини билан бош қимиirlатиб совуққина сўрашди, онасиға икки букилиб таъзим қилди-да, қўл бериб эъзоз-икром билан кўришди, болаларини қучоқлади.

У табуреткага ўтириб қиличини икки тиззаси орасига оларкан:

— Дадам қани? — деб сўради.

— Тегирмонга кетди, — деди кампир ва ўғлига қаради-ю, қаҳр билан: — Шапкангни олсанг-чи, кофир! — деб буюрди. — Иконалар тагида шапка билан ўтириш мумкинми? Ҳой, Яков, бошинг оғирлик қилаёт-ганга ўхшайди...

Фомин истар-истамас жилмайди-да, кубанкасини бошидан олди, лекин ечинмади.

— Нега ечинмайсан?

— Мен сизни бир кўриб кетгани келдим, хизматдан сира қўл бўшамайди.

— Биламиз хизматинг қанақалигини... — деди кампир ўғлининг саёклигига, Вешенскаяда хотинбозлик билан шуғулланганига шама қилиб.

Бу гап Рубежнийга аллақачон ёйилган эди.

Фоминнинг бевақт қариган, ранг-рўйи бир ҳолатда бечора хотини қайнанасига қўрқа-писа бир қаради-ю, пеъ ёнига кетди. Қандай қилиб бўлса-да, эрига ёқиш, унинг кўнглини олиш, лоақал бир кулиб боқишига мусассар бўлиш учун, шўрлик хотин пеъ тагидан латтани олди-да, чўкка тушиб икки бўкилганича эрининг этигига ёпишган лойларни тозалай бошлади.

— Этигинг бирам асл эканки, Яша... Жудаям лойга ботибсан... Мен ҳозир артаман, топ-тоза бўлади! — деб эшитилар-эшитилмас шивирлар, бошини кўтармасдан эрининг оёғи атрофида чўккалаб юарди.

Фомин кўпдан бери хотини билан бир ёстиқقا бош қўймас, ёшлигида яхши кўрган бу аёлни ҳозир мут-

лақо севмасди, фақат унга бир оз ачинарди холос. Лекин хотини уни яхши кўрар ва кўнглида, бир кунмас, бир кун яна қайтиб келади, деган умид билан унинг ҳамма кирдикорларини кечираади. Неча йиллардан бери рўзфорга ўзи қарап, болаларни тарбиялар, ишқилиб, қаҳрли қайнанага ёкиш учун уринарди. Дала ишлари бутунлай унинг бўйнида эди. Оғир меҳнат, иккинчи болани туққандан кейин касалга чалиниш натижасида йилдан-йилга соғлигининг мазаси қоча бошлади. У озиб-тўзиб, юзларидаги қон қолмади. Бемаҳал қариб, юзларини ажин босиб кетди. Кўзлари касал бўлиб қолган эсли ҳайвоннинг кўзига ўхшаб итоаткорона мўлтираб қолди. Бу қадар тез қарий бошлаганини, кундан-кунга соғлигини йўқотаётганини ўзи сезмасди, ҳали ҳам алланимадан умидвор бўлиб, ойда-йилда бир келадиган чиройли эрининг юзига муҳаббат ва завқ билан тикилиб тўймасди.

Фомин бўлса, баланддан пастга — қул каби буқчайган хотинининг елкасига, кофтасини тутиб чиққан озғин куракларига, этик лойларини зўр бериб тозалаётган қалтироқ қўлларига қарап ва ўзича: «Шум хотин бўпти-ю! Бир вақтлар мен шу алвасти билан бир тўшакда ётганман, а... Лекин ўзи жудаям қарибди... Нега бунчалик қариганига ҳайронман!» деб ўйланарди.

— Бўлди, кўп тозалайверма! Барibir яна лой қиласман,— деди у энсаси қотиб, сўнгра оёғини хотинининг қўлидан тортиб олди.

Хотин аранг қаддини ростлаб ўрнидан турди. Сарфайган бетларига бир оз қон юргурган эди. Унинг эрга тикилган намли кўзлари шу қадар меҳр-муҳаббат, вафодорлик туйғулари билан тўлган эдики, Фомин бунга тоқат қилолмай, юзини тескари ўгириб, онасидан гап сўради.

- Турмушларинг қалай?
- Қадимгидай,— деди она қовоғини солиб.
- Қишлоққа ғалла отряди келдими?
- Куни кеча Нижне-Кривскийга жўнаб кетди.
- Бизнинг уйдан ғалла олишдими?
- Олишди. Қанча дон олишди, Давидушка?

Дадасига ўхшаган, кўзлари ҳам худди дадасини-
кидай кўм-кўк ўн тўрт яшар бола жавоб берди:

— Бувам ёnlарида эди, қанчалигини ўша киши билади. Ўн қоп бўлса керак.

— Шун-да-а-ай...— Фомин ўрнидан туриб, ўғлига қаради, портупеяларини тузатиб қўйди.— Кимнинг донини олишяпканини уларга айтдингларми?— деб сўради-ю, ранги оқариб кетди.

Кампир қўл силтаб истеҳзоли кулиб қўйди:

— Улар сени назаригаям илмайди! Каттакони шундай деди: «Кимлигидан қатъи назар, ҳамма ортиқча донини топшириши лозим. Фомин тугул, округ раиси ҳам топширишга мажбур, ортиқча донни олаверамиз!» Шуни деб омборхоналарни тита бошлади.

— Мен улар билан орани очди қиламан, онажон! Албатта очди қиламан!— деб пўнғиллади Фомин, уйдагилар билан нари-бсри хайрлашиб чиқиб кетди.

Фомин уйига бориб келгандан кейин ўз эскадронидаги жангчиларнинг кайфиятини секин-аста ўрганза бошлади, натижада, кўпчилиги фалла мажбуриятидан норози эканини сал орадаёқ билиб олди. Қишлоқ ва станицалардан жангчилар олдига хотинлари, узоқ ва яқин қариндошлари келиб-кетиб туришарди; улар ғадла отрядлари уйларини тинтиганини, уруғлик ва егуликдан бўлак ҳамма дон-дунни олиб кетганини галириб беришарди. Натижа шу бўлдики, январь ойининг охирларида Базки қишлоғида ўтказилган гарнизон мажлисида, округ ҳарбий комиссари Шахаев нутқ сўзлаётган пайтда эскадрон жангчилари очиқдан-очиқ гавро кўтириши. Улар орасидан:

— Фалла отрядларини йўқотинг!

— Дон олиш тўхтатилсан!

— Битсин ғалла комиссарлари!— деган овозлар эшитилди.

Соқчи рота қизил аскарлари уларга жавобан:

— Аксилинқилобчилар!

— Бу аглаҳларни қуролсизлантириш керак!— деб бақирдилар.

Мажлис тўс-тўполон ичидаги узоқ давом этди. Гарнизондаги коммунистлардан бири ҳаяжонланиб Фоминга таклиф этди:

— Сен чиқиб гапиришинг керак, ўртоқ Фомин! Уни қара, эскадронингдаги одамлар нималар деяпти ўзи?

Фомин билинار-билинмас мийигида қулди.

— Мен партиясизман, ахир улар менга қулоқ солармиди?

У сўзга чиқмади ва мажлис тугамасданоқ, батальон командири Капарин билан бирга чиқиб кетди. Вешенскаяга келаётib рўй берган вазият ҳақида йўлда гап очилиб, иккови бирпасда оғиз-бурун ўпишиб кетди. Бир ҳафтадан кейин Капарин Фомин турган кўшхонага келиб, овлоқда гаплашди:

— Ҳозир бош кўтарадиган пайт, агар биз ҳозир қўзғолмасак, кейин ҳеч қачон қўзғололмаймиз, шуни билиб қўй, Яков Ефимович! Вақт ғанимат. Ҳозир айни қулай пайт. Қазақлар бизга эргашади. Округда сенинг обрўйинг зўр. Аҳолининг кайфияти ҳам бизгә жуда қўл келади. Нега индамайсан? Иккиланама!

— Бунинг нимасига иккиланади? — Фомин шошмасдан, ҳар бир сўзни чўзиб, ер остидан қараб гапиради. — Масала ҳал бўлган. Фақат шундай план тузишимиз керакки, кетидан ишқали чиқмасин, гафлатда қолишин. Мана шу ёғини гаплашиб олайлик.

Фомин билан Капарин орасидаги ғалати дўстликдан баъзилар шубҳаланиб юрарди. Батальондаги коммунистлардан бир нечаси уларнинг кетидан тушиб пойлашди, ўз гумонларини Дончека сиёсий бюросининг бошлиғи Артемьевга ва воеёнком Шахаевга айтишди.

— Оғзи куйган одам қатиқниям пуфлаб ичади, — деб қулди Артемьев. — Капарин ўлгудай қўрқоқ одам, қайси юрак билан журъат эта олади? Лекин Фоминдан кўз-қулоқ бўлиб турамиз, албатта; кўпдан бери уни кўз тагига олиб юрибмиз, бироқ Фоминнинг ҳам қарши чиқишига кўзим етмайди. Ҳаммаси бекорчи гаплар, — деди у қатъий қилиб.

Бироқ кўз-қулоқ бўладиган вақт ўтганди: фитначилар тил бириткириб бир қарорга келишган эди. Қўзғолон 12 март куни эрталаб соат саккизда бошланиши керак эди. Белгиланган режага кўра Фомин шу куни эрталаб от совутиш баҳонаси билан эскадронни тўла қуролланган ҳолда станицадан олиб чиқиши,

сўнгра станица четида жойлашган пулемёт взводига ҳужум қилиб, пулемётларни қўлга олиши ва ундан кейин округ идораларида «тозалаш» ўтказиш учун соҳчи ротага ёрдам кўрсатиши лозим эди.

Капарин ўз батальонидаги одамларнинг ҳаммаси уни қўллаб-қувватлашига ишонмасди. Бу тўғрида ўз фикрини Фоминга айтганида у диққат билан тинглади-да:

— Пулемётларни қўлга олволсак бўлди, сенинг батальонингни бирпастда танобини тортиб қўямиз...— деди.

Фомин билан Капаринни қанчалик назорат қилиш масин, барибир, натижа чиқмади. Иккиси камдан-кам, фақат иш вақтидагина учрашарди; лекин февраль ойининг охирларида, бир куни кечаси патруль уларни кўчада бирга кетаётганини кўрди. Фомин эгарлоғлиқ отини етаклаб олган, Капарин унинг ёнида эди. Патрулнинг: «Ким у?» деган овозига, Капарин: «Ошина» деб жавоб берди. Иккиси Капаринникига киришди. Фомин отини зинапоя панжарасига боғлади. Уйда чироқ ёқишишмади. Эрталаб соат учдан ошганда Фомин эшикка чиқди-да, отига миниб ўз қўшхонасига кетди.

Фақат шу нарсагина аниқланди холос.

Округ ҳарбий комиссари Шахаев Фомин билан Капарин ҳақидаги ўз шубҳаларини шифрли телеграмма орқали Дон обlastининг қўмондонига маълум қилди. Бир неча кундан сўнг қўмондондан жавоб келди, унда, Фомин билан Капаринни ишдан бўшатиб, қамоққа олишга ижозат берилган эди.

Округ партия комитетининг бюро мажлисида, округ ҳарбий комиссариатининг буйруғига биноан Фомин Новочеркаск шаҳрига, ҳарбий қўмондон ихтиёрига юборилсан, эскадрон командирлигини ўз муовини Овчинниковга топширишни унга таклиф этилсан, деб қарор қилинганди; ўша куниёқ эскадронни, бандитлар пайдо бўпти, деган баҳона билан Казанскаяга жўнатиш ва ундан кейин ҳамма фитначиларни қамоққа олиш мўлжалланганди. Фоминнинг қамоққа олинганилиги билиниб қолса, эскадронда қўзғолон кўтарилиши эҳтимоли борлиги учун уни станицадан жўнатишга қарор қилинганди. Соқчилар батальонининг иккинчи

рота командири коммунист Ткаченкога, батальондаги ҳамма коммунистларга ҳамда взвод командирларига қўзғолон чиқиш эҳтимоли борлигини айтиб, огоҳлантириб қўйишини, станицадаги ротани ва пулемёт взводини жанговар ҳолатга келтириш топширилган эди.

Эртасига эрталаб Фомин буйруқни олди.

— Қани бўлмаса, эскадронни қабул қил, Овчинников. Мен Новочеркасска жўнайман,— деди у пинагини бузмасдан.— Ҳисобот ишлариниям кўриб чиқсанми?

Ҳеч ким огоҳлантирмаган, ҳеч гапдан хабари йўқ взвод командири — партиясиз Овчинников қоғоз ўқишга тушиб кетди.

Фомин пайт топиб, Қапаринга қўйидагича хат ёзди: «Бугун қўзғаламиз. Мени ишдан олишмоқчи. Тайёр бўл!» Даҳлизда хатни ординарецига бериб, қулогига шивирлади:

— Хатни оғзингга сол. От чоптирасдан тўғри Қапарин олдига борасан, тушундингми? Чопмасдан. Йўлда биронтаси тўхтатса, хатни ютиб юборгин. Ўз қўлига топшириб, дарров изингга қайт.

Овчинников Казанскка жўнаш тўғрисида буйруқ олгандан кейин эскадронни черков майдонида саф тортқизганда Фомин отда унинг ёнига келди:

— Эскадрон билан хайрлашишга рухсат эт.

— Марҳамат, лекин қисқароқ бўлсин, бизни йўлдан қўйманг.

Фомин эскадрон олдига ўтди, ўйноқлаган отининг жиловидан тортиб жангчиларга мурожаат қилди:

— Ўртоқлар, ҳаммангиз мени биласиз. Нима учун доим курашиб келганимни яхши биласиз. Мен ҳамиша сизлар билан бирга бўлдим. Лекин эндиликда мен, казакларнинг таланганини, умуман деҳқонларнинг таланганини кўриб, чидаб туролмайман. Мана шунинг учун мени бўшатишди. Мени нима қилишларини биламан. Шунинг учун сизлар билан видолашмоқчиман.

Қий-чув овозлар Фоминнинг гапини бирпас бўлиб қўйди: у узангида тик турволиб, овози борича бақириб гапира бошлади:

— Агар сиз таланишдан, босқинчилликдан халос бўлишни истасангиз, фалла отрядларини бу ердан ҳай-

данг, ғалла комиссари Мурзовни, военком Шахаевни ва ҳамма комиссарларни ўлдиринг! Булар бизнинг Донга келиб...

Фоминнинг сўнгги сўзларини қий·чувлар босиб кетди. Пайт пойлаб туриб, йўғон овоз билан команда берди:

— Ўнг ёқдан учтадан бўлиб, шагом арш!

Эскадрон миқ этмай командани бажарди. Бундай ҳодисадан ҳанг·манг бўлган Овчинников Фомин ёнига от чоптириб келди.

— Қаёққа, ўртоқ Фомин!

Бироқ Фомин бурилиб қарамади ҳам, уни майна қилиб кулди-да:

— Черковни бир айланіб келамиз...— деб жавоб берди.

Ана шундан кейингина Овчинников шу тўрт·беш минут ичида қандай ҳодиса юз берганини тушунди. У колоннадан ўзини четга олди; политрук, комиссар муовини ҳамда биттагина қизил аскар унга қўшилди. Улар икки юз қадамча жойга борганда Фомин пайқаб қолди. Отини буриб чақирди:

— Овчинников! Тўхта!

Йўртиб кетаётган тўрт отлиқ отларни ҳайдади. Туёқлар остидан тўрт томонга эриган қор парчалари сачрай бошлади.

— Милтиқлар шайлансин!— деб команда берди Фомин.— Овчинниковни тутинглар!.. Биринчи взвод! Кетидан от сол!..

Палапартиш ўқ товуши эшитилди. Биринчи взводдан ўн олти киши уларни қувиб кетди. Шу орада Фомин қолганларни икки группага ажратди: бир группага учинчи взвод командирини бош қилиб, пулемётчилар взводини қуролсизлантириш учун жўнатди, иккинчисига ўзи бош бўлиб, станицанинг шимол томонидаги собиқ отхоналарга жойлашган соқчи рота томон от қўйди.

Биринчи группа ҳавога қаратса ўқ отиб, қиличларни яланглатиб катта кўчадан от чоптириб бораради. Исёнчилар йўлда учраган тўрт коммунистни қиличдан ўтказиб, шоша·пиша станицанинг четида саф бўлиб

олишди-да, овоз чиқармасдан, уйлардан чопиб чиқа бошлаган пулемётчилар устига ҳужум қилишиди.

Пулемётчилар взводи турган уй энг чеккада эди. Бу уй билан энг четки қўраларнинг ораси юз саржиндан ошмасди. Манглайдан пулемёт ўтига дуч келган исёнчилар шартта кетларига бурилиб қочишиди. Улардан уч киши яқиндаги тор кўчага етолмай отдан қулади. Пулемётчиларни гафлатда қолдириб босиши нияти пучга чиқди. Иккинчи марта ҳужум қилишга исёнчиларнинг юраги бўлмади. Учинчи взвод командири Чумаков ўз группасини пана жойга олиб ўтди; у отдан тушмасдан фиштин иморат бурчагидан оҳиста мўралаб қаради-ю:

— Яна иккита «максимни» судраб чиқишиди,— деди. Сўнгра папоги билан пешона терларини артди:— Йигитлар, кетимиизга қайтганимиз маъқул!.. Керак бўлса, пулемётчиларни Фомин ўзи тутиб олсин. Нечта одам қорда қопкетди, учтами? Аҳвол шундай бўлгандан кейин ўзиям уриниб кўрсин.

Станицанинг шимол тарафида қасира-қусур бошланган ҳамоноқ, рота командири Ткаченко уйдан чопиб чиқди-ю, йўл-йўлакай кийиниб, казарма томон югорди. Казарма ёнида ўттизга яқин қизил аскар саф тортиб турарди. Улар нима гаплигини билолмай, рота командирига устма-уст савол беришди.

— Қим отяпти?

— Нима гап ўзи?

Ткаченко чурқ этмай, саволларга ҳам жавоб бермасдан, казармадан олдинма-кейин чопиб чиқаётган қизил аскарларни сафга тиза берди. Округ идораларида ишлаётган бир неча коммунист у билан бир вақтда етиб келиб, сафга кирди. Олатасир отилган пулемёт товуши станицанинг ҳар ёғидан эшитиларди. Станицанинг фарб томонида қўл гранатаси гумбурлаб портлади. Ткаченко ярим сотня суворийнинг қилич яланғочлаб казарма томон от чоптириб келаётганини кўрди-да, шошмасдан наганини филофидан олди. У команда бермасданоқ сафда турган қизил аскарлар бирданига жимиб, милтиқларини отишга шайладилар.

— Эй, булар ўзимизнинг одамлар-ку! Уни қаранглар, бизнинг комбат Қапарин келяпти!— деб бақириди бир қизил аскар.

Отлиқлар кўчадан чиққан заҳотиёқ от бўйнига энгашганларича казарма томон от чоптириб келишаверди.

— Яқин келтирма!— деб бақирди Ткаченко.

Бараварига отилган ўқ товуши унинг овозини эшитирмай қўйди. Зич турган қизил аскарлар сафидан юз қадамча нарироқда тўрт киши отдан қулади, қолганлари отларининг бошини орқага буриб, тумтарақай қочди. Уларнинг кетидан устма-уст узилган ўқларнинг қасира-қусури эшитилди. Авзойига қараганда енгил ярадор бўлган бир отлиқ, эгардан учиб тушди-ю, бироқ жиловни қўйвормади; ўқдай учиб кетаётган отнинг ёнида ўн саржин жойгача судралиб бораверди, ниҳоят, у оёққа турди-ю, узангига тармасиб, кўз очиб юмгунча яна отга миниб олди-да, жиловни қаттиқ силтаб, отни шартта бурди-ю, торкўчага кириб кўринмай кетди.

Биринчи взводдаги эскадрончилар Овчинниковни қувалай-кувалай бекорга овора бўлиб станицага қайтишди. Комиссар Шахаевни қидиришдан ҳам натижажа чиқмади. На кимсасиз қолган военкоматда, ва на уйда топишолмади. У отишма товушини эшитиши билан Донга тушиб, муз устидан ўрмонга чопиб ўтган, ўшанақаси Базки қишлоғига бориб, эртасига Бешенскаядан эллик чақирим наридаги Усть-Хопер станицасига етиб олган эди.

Раҳбар ходимларнинг кўпчилиги вақтида яшириниб олишганди. Уларни қидириш хавфли эди, чунки пулемёт взводининг қизил аскарлари қўл пулемётлар билан станицанинг марказига яқинлашиб, майдонга туташган ҳамма кўчаларни ўққа тутиб турардилар.

Эскадрончилар одам овлашни тўхтатиб Донга тушишди ва ўша ердан боя Овчинниковнинг кетидан от қўйишган черков майдонига чиқишли. Бирпасда ўша ерга ҳамма фоминчилар тўпланиши. Улар яна саф бўлишди, Фомин соқчилар қўйишни буюрди, қолганларга қўшхоналарга боришга ижозат берди, лекин отларнинг эгарини олманглар, деб тайинлади.

Фомин билан Капарин ҳамда взвод командирлари энг четдаги ўйлардан бирида холи қолишли.

Капарин дармони қуриганидан курсига ўзини ташлади-ю:

— Иш расво бўлди!— деб қичқириб юборди умидсизланиб.

— Ҳа, станицаники ололмадик, демак, бу ерда узоқ туролмаймиз,— деди Фомин секингина.

— Яков Ефимович, бу ердан кетиш керак, округда айланиб юраверамиз. Энди нимасидан қўрқамиз? Қайга борсанг ҳам бир ўлим. Казакларни қўзғатамиз, ана иннайкейин, станица ҳам бизники, бошқаси ҳам,— деди Чумаков.

Фомин индамай унга бир қаради-да, Капаринга ўгирилиб боқди.

— Одам ҳам шунчалик шалпаядими, жаноби олий? Мишифингни артиб ол! Аввало, мингашма, мингашганингдан кейинвой дема. Бирга бошладикми. энди охиригача баравар тортишасан бу юкни. Фикрингни айт, станицадан кетганимиз маъқулми ёки яна бир карра уриниб кўрсакмикин?

Чумаков тўсатдан:

— Бошқалар уриниб кўрсин! Мен пулемётга қарши бориб бўпман. Бемаъни ҳаракат,— деди.

— Овсзингни ўчир, мен сендан сўраётганим йўқ.— Фомин Чумаковга тикилган эди, у ерга қараб олди.

Бирпас жим қолишгандан кейин Капарин:

— Ҳа, энди иккинчи марта овора бўлишдан ҳеч қандай наф йўқ,— деди.— Улар қурол жиҳатидан биздан устун. Уларда ўн тўрт пулемёт бор, бизда лоақал битта ҳам йўқ. Уларнинг одамлари ҳам кўп... Бу ердан кетиб, казаклар қўзғолонини уюштиришимиз керак. Буларга мадад етиб келгунча бутун округ қўзғолон ичидаги бўлади. Бутун умидимиз шунда.

Фомин анчагача чурқ этмай ўтириди, ниҳоят:

— Бошқа илож йўқ, шунга қарор қиласми,— деди.— Взвод командирлари! Ҳозир бориб, ўқ-анжомларни текширинг: кимда қанча патрон борлигини сабаб чиқинг. Қатъян буюраман: беҳудага биронта ўқ отилмасин. Қимики бунга бўйсунмаса, ўз қўлим билан чопиб ташлайман. Жангчиларга шуни тайинлаб қўйинг.— У бир дам индамай турди-да, аламига чидолмай, забардаст мушти билан столни урди.— Ат-

танг, п... пулемёт бўлмади-да! Ҳамма касофатга сен сабаб, Чумаков! Лоақал тўрттасини қўлга туширганимизда ҳам!.. Энди улар бизни станицадан ҳайдайди... Қани, тарқалинг! Агар бу кечада тинч қўйишса, шўерда тунаимизу, тонг отиши билан йўлга чиқиб, округни чарх урамиз.

Кечаси тинч ўтди. Вешенскаянинг бир четида қўзғолон кўтарган эскадрон, нариги четида соқчи ротава унга қўшилган коммунистлар билан комсомоллар турар эди. Душманлар орасини фақат иккита маҳалла ажратиб турарди, лекин иккала томон ҳам кечаси хуруж қилишга журъат этолмасди.

Фитначи эскадрон эрталаб станицани жангсиз бўшатиб, шарқи-жануб томон жўнаб кетди.

XI

Григорий уйдан кетгач, дастлабки уч ҳафтани Елан станицасининг Юқори Кривск қишлоғидаги ёзтаниши, полкдоши бўлган бир казакникида ўтказди. Кейин Горбатов қишлоғига бориб, Аксиньянинг узоқ қариндошиникида бир ойдан ортиқроқ истиқомат қилди.

У куни билан меҳмонхонада ётар, фақат кечалари ҳовлига чиқарди. Гўё турмага тушган одамдай кун кечирарди. Григорий хафақонликдан, бекорчиликдан зерикиб, ўзини қайга уришини билмасди. Ҳадеб уйга қайтгиси, болаларини ва Аксиньяни кўргиси келаверарди. Қўпинча, кўзига уйқу келмаган тунлари у шинелини кийиб, Татарскка жўнашга аҳд қиласарди, бироқ ўйлаб кўриб, яна ечинар ва уҳ тортиб, ўзини каравотга ташларди-ю, мукка тушиб ётарди. Шу тахлит кун кечириш унинг учун охири чинакам азобга айланди. Аксиньянинг тоғавачаси бўлган уй эгаси Григорийга раҳми келса-да, бироқ, қочоқ кишини уйида узоқ сақлаш унга оғирлик қиласар эди. Бир куни Григорий кечки овқатдан кейин ёз бўлмасига кирганида, эр-хотиннинг гапларини эшитиб қолди. Хотини чийиллаб сўради:

— Ахир, бу қачон тамом бўлади?

— Нима? Нима деяпсан ўзинг?— деб ўғон овоз билан сўради хўжайн.

— Анови текинхўрни қачон йўқотасан?

— Овозингни ўчир!

— Ўчирмайман! Бор-йўқ донимиз тугай деб қолса-ю, сен анови барзангини эртаю-кеч боқиб ўтиранг. Мен сендан шуни сўраяпман: қочонгача боқасан? Борди-ю, Совет пайқаб қолса-чи? Калламизни олади-я, болаларимиз етим қолади!

— Овозингни ўчир, Авдотья!

— Ўчирмайман! Болаларимиз бор ахир! Бор-йўғи йигирма пудга етар-етмас дон қопти-ю, сен бу текинхўрни уйингда боқасан! У киминг бўлади? Туғишган укангми? Қудангми! Бўлангми! Сенга ҳеч қандай қариндошлиги йўқ! Етти ёт, бегона, шўрвасининг шўрваси! Сен бўлса ҳадеб егизасан, ичкизасан. Ҳув мохов кал! Кўп акиллайверма, йўқса эртагаёқ ўзим Советга бориб, уйингда кимни асраб ўтирганингни айтиб бераман.

Эртасига хўжайин Григорийнинг олдига кирдида, ерга қараб гапира бошлади:

— Григорий Пантелеевич! Мендан хафа бўлсанг ҳам айтишга мажбурман: меникida туришинг энди мумкинмас... Мен сени ҳурмат қиласман, марҳум отангни танирдим, яхши кўрардим, бироқ ҳозир сенга овқат бериш малол келиб қолди... Бунинг устига, ҳукумат сенинг бу ердалигининг билиб қолмасайди деб хавотирдаман. Истаган жойингга бор. Менинг бола-чақам бор. Сени деб бошимдан айрилишга тобим йўқ. Исо ҳақи, кецирасан, бизни бу ташвишдан қутқазмасанг бўлмайди...

— Яхши,— деди Григорий қисқагина қилиб.— Нону тузларинг учун, уйингдан жой берганинг учун раҳмат. Сенга малол келганини ўзим ҳам кўриб туриман, бироқ қайга бораман? Йўлим берк.

— Қайга борсанг, боргин.

— Хўп. Бугун кетаман. Менга қилган яхшиликларинг учун раҳмат, Артамон Васильевич.

— Арзимайди, миннатдорчиликка арзимайди.

— Мен бу яхшилигининг эсимдан чиқармайман. Балки, бир кунмас-бир кун мен ҳам қайтарарман.

Хўжайин таъсирланиб Григорийнинг кифтига қоқди.

— Нимасини гапирасан, ука! Менга қолса яна иккі ой турсаң ҳам майлийди, хотиним кўнмаяпти, ҳар куни қарғайди лаънати! Мен — казак, сен ҳам казаксан, Григорий Пантелеевич; икковимиз ҳам Совет ҳукуматига қаршимиз, шунинг учун сенга йўл кўрсатай: бугун Ягодний қишлоғига жўнайсан, у ерда менинг қудам бор, у сени қабул қиласди. Менинг номидан: Артамон айтди дегин, сени ўз ўғлидай кўриб, қўлидан келгунча овқат бериб асрасин. У ёнини ўзимиз ҳисоблашамиз. Лекин сен бугундан қолмай жўнагин. Сени энди сақлаб туролмайман, бир ёқдан хотиним баланд келяпти, иккинчи ёқдан Совет билиб қолади, деб хавотирдаман... Шунча турганинг ҳам бўлар, Григорий Пантелеевич. Мен ҳам қўрқиб қолдим, эчкига жон қайғу деган гап бор...

Ярим кечада Григорий қишлоқдан чиқиб йўлга тушди. Лекин тепаликдаги шамол тегирмонига етмасданоқ, қайси гўрданам тўсатдан уч отлиқ пайдо бўлиб уни тўхтатди:

— Тўхта, итвачча! Кимсан?

Григорийнинг юраги «шиф» этиб кетди. У индамай тўхтади. Қочишнинг иложи йўқ эди. Йўл бўйида на жар ва на бирон туп дараҳт бор, ҳамма ёқ шипшийдам дашт. Қани, икки қадам юриб кўрсин-чи!

— Коммунистмисан? Қайт кетингга, онаизорингни! Тезроқ қимирила.

Иккинчи одам Григорийнинг устига оти билан бостириб келиб:

— Қўлларингни чиқар! Чўнталингдан ол қўлларингни! Чиқар деяпман сенга, йўқса, каллангни оламан!

Григорий индамай қўлларини шинель чўнталидан чиқарди, лекин нима ҳодиса рўй берганини ва булар кимлигини ҳали ҳам тушунолмай:

— Қаёққа юрай!— деб сўради.

— Қишлоқقا. Изингга қайт.

Отлиқлардан биттаси унқ қишлоққа ҳайдаб кетди, ўтлоқда улардан иккитаси ажралиб, катта йўлга тушиб кетган эди. Григорий индамай келарди. Йўлга чиққандан кейин, у юришини секинлатиб сўради:

— Менга қара, амаки, сизлар ким бўласиз?

— Юр-юр! Гаплашма! Қўлларингни орқангга қил, эшиитдингми?

Григорий индамасдан бўйсунди. Бирпасдан кейин яна сўради:

— Айта қол, кимсизлар?

— Православлармиз.

— Мен ҳам эски мазҳаб одами эмасман.

— Яхши бўпти.

— Мени қаёққа обкетяпсан?

— Командир олдига. Юр, аблаҳ, солиб қоламан шу...

Конвоир қиличининг учи билан Григорийни секин туртди. Ўткир қилиб чархланган муздай пўлат қиличининг тифи Гиригорийнинг бўйнига, шинель ёқаси билан папоги орасидаги очиқ жойга теккан заҳоти бадани сесканиб, қўрқиб кетди, кейин ғазаби келиб тишини тишига қўйди: Григорий ёқасини кўтариб олди, сал-пал бурилиб конвоирга қаради-да, ижирғаниб:

— Ҳазиллашма! Эшиитдингми? Манови ўйинчоқни қўлингдан тортиб олмайин тағин...— деди.

— Юр, аблаҳ, гапирма! Тортиб олишни кўрсатиб қўярман сенга! Қўлларингни орқага қил!

Григорий икки қадам жойгача индамай борди-да, яна гапирди:

— Ҳалиям индаганим йўқ, сўқаверма кўп. Тасқарага амал тегиб...

— Кетингга қарама!

— Ҳалиям қарагим йўқ.

— Гапирма, тезроқ юр!

Григорий киприкларига ёпишган қор учқунларини артаркан:

— Бўлмасам чопақолайми?— деб сўради.

Конвоир индамай отини ниқтади. Тердан ва тунги намгарчиликдан жиққа ҳўл бўлган от тўши билан Григорийни орқасидан туртиб юборди, оёғи тагидаги эриган қорни туёғи билан чалпиллатиб сачратди:

— Секинроқ!— деб бақирди Григорий кифтларини от ёлига тираб.

— Юр деяпман, қанжиқ... тилингни тий, йўқса, йўлдаёқ бир ёқлик қилиб, қараб туравераман. Буна-

қага қўлим жуда чаққон. Яна овозингни чиқарсанг, кўрасан!

Қишлоққа етгунларича чурқ этмай боришиди. Энг четки ҳовли ёнида у отини тўхтатиб:

— Манови эшикка кир,— деди.

Григорий ланг очиқ дарвозадан ичкари кирди. Ҳовлининг этак томонида тунука томли каттакон уй кўринарди. Бостирма тагида отлар пишқиришар, курсиллатиб ҳашак ейишарди. Зинапоя олдида олтича қуролли киши турарди. Конвоир қиличини филофига солди, отдан тушаётиб:

— Зинадан тўғри чиқиб уйга кирасан, чап қўлдаги биринчи эшик,— деди.— Кетингга қарамасдан юр демид сенга, неча марта такрорлашим керак, оғзингга, бўғзингга!..

Григорий зинапоядан секин-аста чиқа бошлади. Панжара ёнида турган, будённийча шапка, суворийчаузун шинель кийган одам:

— Тутиб олдингларми?— деб сўради.

— Ҳа, тутиб олдик,— деб жавоб берди Григорийни ҳайдаб келган ҳалиги отлиқ хириллаган овоз билан.— Шамол тегирмони ёнида қўлга туширдик.

— Ячейка секретарими, ким экан ўзи?

— Қим билади, дейсан. Қандайдир бир аглаҳ-да, кимлигини ҳозир биламиз.

Григорий даҳлизда жўрттага имиллаб, эс-ҳушини йиғишириб олишга ҳаракат қиласар ва ўзича: «Булар ё бандитлар, ё вёшкилик чекистлар, менга найранг қилиб, лақиллатишяпти. Қўлга тушдим! Аҳмоқ бўлиб қўлга тушдим» деб ўйланарди.

Григорий эшикни очиши билан дафъатан Фоминга кўзи тушди. У стол ёнида ўтиради, ҳарбийча кийинган аллақанча нотаниш кишилар атрофини ўраб олган эди. Каравот устига шинелу пўстинлар уйиб ташланган, карабинлар скамейкага қатор қилиб суюб қўйилганди; скамейка устида қиличлар, ўқдонлар, сумка ва хуржуналар тартибсиз ҳолда ётарди. Одамлар, шинелу абзаллардан терлаган от ҳиди келиб турар эди.

Григорий папофини бошидан олиб секингина:

— Саломатмисиз?— деб сўрашиди.

— Мелехов! Ана холос! Даشت кенгу йўли тор, де-

ган гап ҳаққос рост экан! Үлмаган қулга яна кўришиш насиб бўлди! Қаёқлардан сўрай? Ечин, ўтири,— Фомин ўрнидан турди, Григорийнинг ёнига бориб, қўл берди.— Бу ёқларда нима қилиб адашиб юрибсан?

— Иш билан юрибман.

— Қанақа иш? Жудаям олисга ишинг тушибди...— Фомин Григорийга синчковлаб тикилди.— Ростини айт, бу ёқларда қочиб юрибсанми?

— Ростиям шу,— ноилож жилмайиб жавоб берди Григорий.

— Йигитларим сени қаерда ушлашди?

— Қишлоқдан чиқаверишда.

— Қаёққа кетятувдинг?

— Бошим оққан томонга...

Фомин яна бир карра Григорийнинг кўзига астойдил тикилди-да, илжайди.

— Хаёлингда сен: «Мени тутиб олиб Вёшкига жўнатишади»,— деб ўйлаётгандирсан? Йўқ, биродар, у ёқда йўл берк... Кўрқма! Биз Совет ҳукуматига хизмат қилишни йиғишитирдик. Чиқишолмадик...

— Талоқ хатимизниям овлодик...— деб дўриллади печь ёнида тамаки тортиб ўтирган ўрта яшар казак.

Стол атрофида ўтирганлардан бири кулиб юборди.

— Менинг тўғримда сен ҳеч гап эшитмадингми?— деб сўради Фомин.

— Йўқ.

— Ундан бўлса, ўтири, гаплашамиз. Меҳмонга шўрва, гўшт кёлтиринг!

Григорий Фоминнинг биронта гапига ишонмасди. У вазминлик билан, ранги оқарган ҳолда ечинди ва стол ёнига келиб ўтирди. Тамаки хумор қилиб чеккиси келди-ю, бироқ икки кундан бери тамакиси йўқлиги эсига тушди.

— Чекадиган нарса топиладими?— деб сўради у Фоминдан.

Фомин мамнуният билан чарм портсигарини унга тутди. Григорийнинг папирос олаётган бармоқлари билинар-билинмас қалтираганини Фомин пайқади-да, яна мийигида кулиб қўйди.

— Биз Совет ҳукуматига қарши қўзғалдик. Биз — халқ тарафдоримиз, ғалла развёрсткасига ҳамда ко-

миссарларга қаршимиз. Улар бизни кўлдан бери лақиллатамиз. Тушундингми, Мелехов?

Григорий индамади. У папиросни ёндириб, бир неча марта устма-уст сўрди. Боши сал-пал айланиб, кўнгли айнай бошлади. Сўнгги бир ой ичидаги овқатининг тайини бўлмагани учун анча дармони қуриган эди; лекин буни ўзи ҳозиргина сезди. Папиросни ўчириб, овқатга ёпиша кетди. Фомин унга қўзғолон тўғрисида гапириб берди; бу санқишлиарни у дабдабали ном билан «рейд» деб атарди. Григорий индамай қулоқ солар, чала пишган ёғли қўй гўшти билан нонни чайнамасдан ютарди.

— Аммо лекин жудаям озиб кетибсан,— деб бефараз кулиб қўйди Фомин.

Григорий қорни тўйганлигидан кекира-кекира:

— Турган жойим қайнанамники эмасди-да,— деб пўнгиллади.

— Афтинг ҳам айтиб турибди. Бемалол туширавер, қорнингга сиққанича еявер. Биз унақа нокаслардан эмасмиз, олавер.

— Раҳмат. Энди бир чексам девдим...— Григорий тутилган папиросдан олди, скамейкада турган декча ёнига бориб, ёғоч қопқоғини сурниб қўйди-да, сув олди. Сув муздай, тами бир оз шўртангроқ эди. Қорни тўйиб, кўнгли жойига тушган Григорий икки кружка сувни энтикиб-энтикиб ичди, шундан кейин роҳатланиб папирос чекди.

— Казаклар бизга у қадар хайриҳоҳ билдиришмаяпти,— деб гапида давом этди Фомин Григорийнинг ёнига ўтириб.— Бултурги қўзғолондан кейин ҳаммаси юрагини олдириб қўйибди... Лекин кўнгиллилар йўқ эмас. Қирқ киши бизга қўшилди. Бироқ бу билан ишимиз битмайди. Бизга бутун округ қўзғалиши, ҳатто қўшни Хопер, Усть-Медведица округлари ҳам бош кўтариб, кўмаклашивориши керак. Ана ўшандада биз Совет ҳукумати билан орани очди қила оламиз.

Стол атрофидагилар шанғиллашиб гаплашиб ўтирап эдилар. Григорий, Фоминнинг гапларини тинглар, ҳамроҳларига кўз қирида назар ташлаб ўтиради. Биронтаси ҳам таниш эмасди. Григорий ҳали ҳам Фо-

минга ишонмас, назарида, у найранг ишлатаётгандай туюларди, шунинг учун ҳар эҳтимолга қарши индамасди. Бироқ индамай ўтираверишнинг ҳам иложи йўқ эди.

— Ўртоқ Фомин, бу гапларни менга чиндан галираётган бўлсанг, айт-чи, нима қилмоқчисанлар? Янгидан уруш бошламоқчимисанлар?— деб сўради Григорий, босиб келаётган мудроқни аранг енгиб.

— Ҳали сенга айтдим-ку буни.

— Ҳукуматни ўзгартирасизми?

— Ҳа.

— Қейин қандай ҳукумат ўрнатилади?

— Ўзимизнинг ҳукумат, казакларники!

— Яна атаманларникими?

— Йўқ, атаманлар масаласида бир оз сабр қила-
миз. Ҳалқ қайси ҳукуматни сайласа, ўшани ўрнатамиз. Лекин бунга вақт бор ҳали, шошиб керакмас,
сиёсат масаласи билан менинг ишим йўқ, чунки мен
ҳарбий кишиман, менинг вазифам — комиссар ва
коммунистларни қириш, қанақа ҳукумат кераклигини
менинг штаб бошлиғим Капарин сенга гапириб бе-
риши мумкин. Бунақа ишга унинг суяги йўқ. Мияси
бутун, саводхон.— Фомин энгашиб, Григорийнинг қу-
логига шивирлади:— Собиқ чор армиясининг штабс-
капитани. Ниҳоятда ақлли одам! У ҳозир меҳмонхо-
нада ухляяпти, чамамда бир оз тоби қочганга ўхшай-
ди, қаттиқчилик кўрмаган-да, ҳар кун олис йўл бо-
самиз.

Даҳлиздан ғовур-ғувур овоз, дупур-дупур оёқ то-
вushi, аллакимнинг инграгани, яна аллакимнинг: «Сол
тумшуғига» дегани эшитилди. Стол атрофидагилар
бирданига жимиб қолишиди. Фомин ҳадиксираб эшик-
ка қаради. Аллаким эшикни ланг очиб юборди. Оппоқ
буғ ер бағирлаб уйга ёпирилиб кирди. Мош ранг пах-
талик эски пийма кийган новча бўйли, бош яланг
одам елкасига тушган мушт зарбидан олға энгашган
ҳолда бир неча қадамгача туртилиб, учиб борди-да,
печь қиррасига кифтиши қаттиқ уриб тўхтади. Даҳлиз
эшигини ёпаётib аллаким мағруона овоз билан:

— Яна биттасини қабул қилинглар!— деб бақирди.
Фомин ўрнидан туриб камарини тузатди.

— Сен кимсан? — деб сўради у дўқ билан.

Пахталик камзул кийган одам энтикиб, бошини силади, куракларини қимирлатмоқчи бўлди-ю, бироқ жони оғриганидан юзи бужмайиб кетди. Уни оғир нарса билан,— афтидан, милтиқ қўндоғи билан,— умурткасига урган бўлсалар керак.

— Нега индамайсан? Тилдан қолдингми? Кимсан ўзинг, гапирсанг-чи!

— Қизил аскар.

— Қайси қисмдан?

— Ўн иккинчи фалла йиғувчи полқдан.

— Э-ҳе, мана ўлжа! — деб кулди стол ёнида ўтирганлардан бири.

Фомин сўроқни давом эттириди:

— Бу ерда нима қилиб юрувдинг?

— Қўриқчи отряди... бизни шу ёқса юборди...

— Тушундим. Қишлоқقا неча киши бўлиб келдинглар?

— Ўн тўрт киши.

— Шерикларинг қаерда?

Қизил аскар индамади, лабларини аранг қимирлатиб оғзини очди. Томоғида бир нима қулдураб, оғзининг чап бурчидан иягига қон сизиб оқди. У лабларини қўли билан артди, кафтига қаради-ю, қонни кўриб, уни шимига артди.

У оғзидаги қонни құлтиллатиб ютаркан, аранг гапиравди:

— Бу аблаҳ сизнинг одамингиз... ўпкамни туширди...

— Қўрқма! Ўзимиз даволаймиз! — калака қилиб кулди гирдиғумдан келган казак, шерикларига кўқисиб.

— Бошқалар қани? — деб иккинчи марта сўради Фомин.

— Еланга кетишди, обоз билан.

— Сен қаерликсан? Қайси юртда туғилгансан?

Қизил аскар жавдираб турган ҳаво ранг кўзларини Фоминга тикиди, оёғи тагига лахта қон туфлади-да, энди тиниқ ва йўғон овозда жавоб берди.

— Псков губернасида.

— Псковлик, московлик..., бунақаларни кўп кўр-

ганмиз...— деб кулди Фомин.— Бирорнинг донига қўз тикиб, олис жойга адашиб кепқопсан, бола... Гап та- мом! Сени нима қилиш керак, а?

— Мени қўйвориш керак.

— Жудаям содда экансан... Ростдан ҳам буни қўй- ворсакмикин а, йигитлар? Сиз нима дейсиз?— Фомин мийифида кулиб, стол ёнидагиларга мурожаат қилди.

Боядан бери разм солиб ўтирган Григорий, шамол ялаган қўнғир башараларнинг тагдор қилиб сал-пал илжайишганини кўрди.

— Олдин бизда бир-икки ой хизмат қилсин, иннай- кейин, уйига — хотинчасининг ёнига кетаверсин,— деди фоминчилардан бири.

— Айтгандай, ростдан ҳам бизда хизмат қилавер- майсанми?— деб сўради Фомин, кулгисини яширишга уриниб.— Сенга от, эгар берамиз, пийма ўрнига қўнжи кенг янги этик берамиз... Командирларинг сиз- ларни тузукроқ таъмин этмабдиям. Шуям устивош- ми? Ҳамма ёқ эриб ётса-ю, сен пийма кийиб юрсанг? Бизга қўшила қол, а?

Казаклардан бири жўрттага ингичка овоз билан пицинг аралаш гапирди:

— Бу ўзи мужик, умрида от минмаган-ку!

Қизил аскар индамади. У орқасини печга суюб, рав- шанлашган қўzlари билан ҳаммага бирма-бир қараб чиқди. Жони оғриганига чидолмай ора-сира юзини бужмайтирас, нафас олишга қийналганидан оғзини калпа-калпа очарди.

— Бизда қоласанми, йўқми?— сўради Фомин.

— Сизлар кимсиз ўзингиз?

— Бизми?— Фомин қошини камон қилиб, мўйло- вини силади.— Биз, меҳнаткаш халқнинг жангчиларимиз. Биз коммунистлар билан комиссарлар зулмiga қарши бош кўтарганимиз, бизлар ана шунаقا одам- лармиз.

Шу гапдан кейин қизил аскарнинг юзида табассум пайдо бўлганини Григорий кўрди.

— Ҳали шунаقا одамлармиз денг... Мен бўлсам бу қанақа одамлар экан деб ҳайронман.— Асир қонга бўялган тишларини кўрсатиб илжаяр, гўё бу янгилик- дан суюнгандай гапиради, бироқ унинг овози шу қа-

дар дадил эдики, буни эшитган ҳамон ҳаммасининг қулоғи динг бўлди.— Демак, сизнингча, халқ жангчилари, а? Шунда-а-й. Лекин бизнингча, анчайин бандитларсиз. Мен ҳали сизларга хизмат этаманми, а? Ҳазил ҳам эви билан-да!

— Қараб турсам гапга чечан кўринасан...— Фомин кўзларини сузуб калта савол берди:— Коммунистмисан?

— Йўғ-э! Партиясизман.

— Лақиллатяпсан.

— Азбаройи шифо, партиясизман!

Фомин йўталди ва стол томон сурилиб:

— Чумаков! Буни саранжом қил,— деди.

— Мени ўлдиришдан нима фойда? Ҳеч қандай жиноятим ўйқ,— деди қизил аскар овозини секин чиқариб.

Биронтаси ҷурқ этмади. Енгиз чарм нимча кийган, чиройли норғил казак — Чумаков имиллаб ўрнидан турди-да, орқага қаратса таралган сип-силлиқ малла сочини силади.

— Бу вазифа жудаям жонимга тегди,— деди-да, скамейка устида уйилиб ётган қиличлар орасидан ўзиникини ажратиб олди, бош бармоғи билан қилич давмини кўра бошлади.

— Ўзинг саранжом қилишинг шарт эмас. Ҳовлидаги йигитларингга топшир,— деб маслаҳат берди Фомин.

Чумаков ўқрайиб қизил аскарни кўздан кечирди.

— Олдимга туш, азизим.

Қизил аскар пеъ ёнидан гандираклаб кетиб, буқчайган ҳолда эшик томон юрди, қадам босган жойларига ивиган пиймасининг изи тушиб қолди.

Чумаков асир кетидан бораркан, жўрттага минифиллаб нолир эди:

— Уйга кираётиб оёғингният артмабсан! Ҳамма ёқни из, лой қилвординг... Ўзинг ҳам жуда ифлос экансан, биродар!

— Тайинлаб қўй, буни тор кўчага ёки ғарам ортига олиб ўтишсин. Уйдан нарироқ оборишигин, ўйқса уй эгаси хафа бўлади!— бақириб қолди Фомин Чумаковнинг кетидан.

Фомин Григорийнинг ёнига келиб ўтириди-да:

— Судимиз қалай экан?— деб сўради.

— Бирпаслик экан,— кўзини обқочиб жавоб берди Григорий.

Фомин чуқур нафас олди.

— Бошқа иложимиз йўқ. Ҳозир шундай бўлиши керак.— У яна бир нима демоқчи эди, бироқ зинапоя томонда тапир-тупур оёқ товуши, аллакимнинг чинқиргани ва ёлғиз ўқ қарсиллагани эшитилди.

— Қутуриб ўлгурлар, нима қилишяпти?— деб бақирди жаҳл билан Фомин.

Стол ёнида ўтирганлардан биттаси иргиб турди-да, эшикни бир тепиб очворди.

— Нима гап ўзи?!— деб ҳовлига қараб бақирди у.

Чумаков ҳовлиқиб кириб гапириди:

— Бирам чаққон эканки! Вой фалокат-эй! Зинанинг устидан ташлаб қочди-я! Ўқ ишлатишга мажбур бўлдим. Йигитлар ўша ёқда уни саранжомлашяпти...

— Бориб айт, қўрадан тор кўчага судраб чиқишин.

— Айтдим, Яков Фимович.

Уй ичи бирпас жимжит бўлиб қолди. Ниҳоят, аллаким эснаб савол берди:

— Ҳаво қалай, Чумаков? Ёмғир қўйгани йўқми ҳали?

— Ҳаво булут.

— Агар ёмғир ёғса, сўнгги қорниям ювиб кетади.

— Сенга қор керакмиди?

— Менга керак эмас-ку, лекин лой кечишга тобим йўқ.

Григорий каравот ёнига бориб папофини олди.

— Қаёққа?— деб сўради Фомин.

— Ёзилиб келаман.

Григорий пешайвонга чиқди. Булутлар орасидан мўралаган ой ғира-шира нур сочарди. Қенг ҳовли, омборхона томлари, осмонга қад кўтарган шипшийдам теракларнинг учлари, охур ёнида устига ёпқич ташланган отлар — ҳаммаси, туннинг кўкиштоб қоронғисида ғира-шира кўринарди. Зинапоядан бир неча саржин нарироқда, халқоб бўлиб қолган йилтироқ сувга боши билан тушганича, ҳалиги қизил аскар ётарди.

Унинг тепасида уч казак энганиб олиб, секин гаплашарди. Улар ўлик ёнида аллақандай нарса билан банд эдилар.

— Ҳалиям нафаси бор, худо урсин! — деди биттаси аччиғланиб. — Ҳой, қўлинг сингур, қилич солиш шунаقا бўладими? Бошини ол, девдим-ку сенга! Ошмаган хамирга ўхшамай кет!

Григорийни ҳайдаб келган казакнинг хираллаган овози эшитилди:

— Үлади! Питирлаб-питирлаб, барибир, ўлади... Бошидан кўтаришворсанг-чи, ахир! Сира ечолмаяпман. Сочидан кўтар, ҳа, балли. Энди ушлаб тур.

Сув чўлп этди. Ўлик тепасида турганлардан бири қаддини ростлади. Хиралдоқ казак чўккалаб ўтирган ҳолда, ўликнинг эгнидаги пахталикни инқиллаб еча бошлади. Бирпасдан кейин яна овози чиқди:

— Менинг қўлим енгил, шунинг учун у тезда жон бермади. Илгари уйда чўчқа сўйганимдаям кўпинча шундай бўларди... Ушлаб тур, қўйворма! Шайтон!.. Мен сенга айтсам, кабанин бўғизлайман, шу, пичофим то қулоғига бориб тақалгандаям, лаънати ўрнидан турволиб қўрани гир айланаверади. Анчагача йиқилмайди! Ҳамма ёфи қон, лекин бигиллаб юраверади. Нафас ололмасаям жони чиқмайди. Бунинг сабаби шуки, қўлим енгил. Бўлди энди, ташла уни... Ҳалиям нафаси борми? Жудаям қаттиқ экану. Бўйнидан то суягида довур бўғизладим-а.

Учинчи казак қизил аскардан шилиб олинган пахталикни қулочида ёйиб кўрди-да:

— Чап томонини қонга булабмиз... — деди. — Қўлга ёпишади, туф-эй, ушлагани жирканади киши!

— Ишқаласа кетади. Ёғ эмас-ку, — деди пинагини бузмасдан хиралдоқ казак ва яна чўнқайиб ўтириди. — Ишқаланар ёки ювилар — ҳеч боқиси йўқ.

Биринчи казак норози бўлиб:

— Сен нима, шиминиям ечиб олмоқчимисан? — деб сўради.

Хиралдоқ казак унга кескин жавоб қайтарди:

— Мабодо шошаётган бўлсанг отлар ёнига бора-вер, сенсиз ҳам ишимиз битади! Шундай буюм нобуд бўлаверсинми?

Григорий шартта бурилди-ю, уйга кирди.

Фомин унга синчков назар билан бир тикилди-да, ўрнидан турди:

— Юр, меҳмонхонага кирайлик, бу ерда вағир-үгур қилишиб, гаплашгани қўйишмайди,— деди.

Печи қизиган кенг меҳмонхонада сичқон ҳиди, наша уруғининг иси келарди. Мош ранг френч кийган, ўрта бўйли бир одам каравотда чўзилиб ётарди. Унинг сийрак соchlари ҳурпайган, майдада парлар ёпишган эди. У жилдсиз кир ёстиққа бетини маҳкам босиб ухлаб ётарди. Кўпдан бери соқоли олинмаган қонсиз юзини осма лампа ёритиб турарди.

Фомин уни уйғотди:

— Тур, Капарин. Меҳмон келди. Бу ўзимизга қаражали одам — Мелехов Григорий, ахборинг учун, ўзи собиқ юзбоши.

Капарин оёқларини каравотдан осилтириб, қўллари билан юзини ишқалади-да, ўрнидан турди. Сал энгашиб Григорийнинг қўлинни қисди:

— Фоят хурсандман. Штабс-капитан Капарин..

Фомин мамнуният билан Григорийга курси қўйди, ўзи сандиққа ўтириди. Қизил аскарни бўғизлаб ўлдирилганлиги Григорийга ёмон таъсир этганини унинг авзойидан пайқаган эди, шунинг учун:

— Сен, қўлга тушган ҳар бир кишини шундай қилишаркан, деб ўйлама тағин,— деди.— Бу тентак фалла отрядидан экан. Бунақаларга ва комиссарларга омон йўқ, бошқаларни доим озод қиласиз. Кеча, масалан, учта милиционерни тутиб келишди; оту эгарларини, қуролларини олиб, ўзларини қўйвордик. Унақаларни ўлдириб зарил кептими бизга.

Григорий чурқ этмади. У қўлларини тиззасига қўйганича ўз ташвишини ўйларди. Фоминнинг гаплари қулоғига, гўё тушдагидай эшитиларди.

— ...Хозирча шу хилда урушяпмиз,— деб гапида давом этди Фомин.— Ҳар ҳолда казакларни қўзғатсан керак, деб ўйлаймиз. Совет ҳукумати узоқ яшай олмайди. Эшишишимга қараганда, яна ҳамма ёқда уруш бошланибди. Ҳамма ёқда қўзғолон: Сибирдаям, Украинасадаям, ҳаттоқи, Петрограднинг ўзидаям. Бутун

флот қўзғолон кўтарибди, ҳалиги крепостда... ҳаҳ, оти қурғур...

— Кронштадтда,— деб луқма солди Қапарин.

Григорий бошини кўтарди, хаёл обқочиб, бақрайган кўрмас кўзлари билан Фоминга, ундан кейин Қапаринга қаради.

— Ма, чек,— деб Фомин партсигарини узатди. — Масала шундай, Петроградни олишибди, Москвага яқинлашиб қолишибди. Ҳамма ёқда шунаقا тўполон! Биз ҳам иш кўрсатишимиш керак... Қазакларни қўзғатамизу, Совет ҳукуматини ағдариб ташлаймиз, у ёғига кадетлар ёрдамлашиб юборишса борми, ишларимиз ўнгидан келди дейвер. Майли, кадетларнинг билимдон кишилари ҳукумат тепасида бўла қолсин, биз улардан ёрдамимизни аямаймиз. — У тўхтаб қолди, сўнgra Григорийдан сўради: — Сенингча, қандай бўларкин, Мелехов, борди-ю, кадетлар Қора денгиздан туриб ҳужум бошлашса, биз улар билан қўшилсак, бу ёқдан туриб қўзғолон кўтарганимизни инобатга олишармикин? Қапарин, албатта инобатга олишади, дейди. Наҳотки улар, ўн саккизинчи йили йигирма саккизинчи полкни фронтдан олиб кетганимни, Совет ҳукуматига атиги икки йил хизмат қилганимни юзимга солиша...

«Ҳо, гап тагида гап бор экану! Ақли калта бўлсаям айёрликка уста...» кўнглидан ўтказиб қўйди Григорий беихтиёр жилмайиб. Фомин ундан жавоб кўтарди. Бу масала кўпдан бери унинг миясини қотириб юрган бўлса керак. Григорий, рўйхуш бермай, жавоб қилди:

— Бу жуда чалкаш масала.

— Албатта, албатта,— деб маъқуллади Фомин.— Мен гап келгани учун айтдим, холос. Кейинчалик бир гап бўлар, ҳозир биз ҳаракат қилишимиз, ичкаридан туриб коммунистларни қиришимиз лозим. Барибир, биз уларни кўз очгани қўймаймиз! Улар пиёда аскарларни аравага солиб, бизнинг кетимиздан қувиб етмоқчи бўладилар. Майлига, қувлаб кўришсин. Уларга суворий қисм мададга етиб келгунча, биз бутун округни оёққа турғизамиз!

Григорий яна оёғи остига тикилиб, яна ўйга чўмди.
Капарин узр сўраб, каравотга чўзилди.

— Жудаям чарчабман. Манзил оралари ниҳоятда олис, кам ухлаймиз, — деди Капарин, ожизона илжайиб.

— Биз ҳам ётайлик энди. — Фомин ўрнидан туриб сўлақмондай қўлини Григорийнинг кифтига қўйди. — Балли, Мелехов, ўша Вёшкида айтган гапларимни қулоқса олганинг учун раҳмат! Ўшанда қочмаганингда сени аллақачон отиб ташлашарди. Ётардинг ҳозир Вёшкининг аллақайси бир култепасида, тирноқларига ириб-чириб кетарди. Мен буни фолбинданам яхши биламан. Хўш, нимага қарор қилдинг? Гапир, иннайкейин ётайлик.

— Нимани гапираман?

— Бизга қўшиласанми, ё!.. Ахир, умр бўйи ҳар кимларнинг ҳужрасида беркиниб юриш қийин.

Григорий шу саволни кутгајди. Уч йўлдан бирини танлаб олиши керак эди: ё қишлоқма-қишлоқ дайдиб очлигига, зерикиб ўлганига қарамай дайдиб юриш, уй эгаси ҳукуматга тутиб бергунча сиғинди бўлиб ҳаёт кечириш, ёки ўз оёғи билан сиёсий бюргога бориб тавба қилиш, ё эса Фоминга қўшилиш. Григорий ахийри танлади.

Оқшомдан бери у биринчи марта Фоминнинг юзига рўйи рост тикилди, лабларини қийшайтириб илжайди-ю, шундай деди:

— Менда илож йўқ, эртакдаги паҳлавонларнинг куни бошимга келган: чапга юрсанг — отингдан ажрайсан, ўнгга юрсанг — каллангдан... Уч йўл бор, лекин учаласининг ҳам охиривой...

— Бу ишга эртакни аралаштиrmай танлайвер. Эртак айтишни кейинроқса қолдираильик.

— Борарга жой қолмади, шунинг учун бирини танладим.

— Хўш?

— Сенинг шайкангга кираман.

Фомин нохушланиб, афтини бужмайтириди, мўйловини тишлади:

— Сен бу гапни оғзингга олма. Нима учун шайка дейсан? Бу лақабни бизга коммунистлар берган, сен-

дан шу гап чиқмаслиги керак әди, соддагинаси — қўзғолончилар. Қисқаси ва анифи шу.

Унинг нохушлигидан бирпастдаёқ асар қолмади. У Григорийнинг қарорини эшишиб, ниҳоятда суюнган әди, буни яшира олмади: ҳовлиқиб қўлини қўлига ишқалай бошлади:

— Сонимизга сон қўшилди! Эшигингми, штабс-капитан? Сенга взвод берамиз, Мелехов, взвод командирлигини истамасанг, Капарин билан бирга бўлиб штабни терватаверасан. Сенга ўз отимни бераман. Ўзимда яна бошқаси бор.

XII

Тонготарга яқин аёз турди. Халқоб сувлар бетини юпқа муз қоплади. Қор ҳам қотиб, ғарчиллайдиган бўлди. Сидирғасига қумоқ қор босиб ётган ерларда от туёқларидан думалоқ излар тушиб кўмилиб қоларди, бироқ кеча ҳаво илиган маҳалда қори эриб, бултурги жонсиз кўқатлар очилиб қолган яйдоқ ерларда от туёқлари сал-пал ботар ва қарсиллагани эшитиларди.

Қишлоқнинг нарёғида Фомин отряди поход тартибida колонна бўлиб саф тортмоқда. Олдинда катта йўлдан жўнатилган олти отлиқнинг қораси олисда липиллаб кўринарди.

Фомин Григорийнинг ёнига келди-да:

— Мана менинг лашкарим! — деди. — Бу йигитлар билан тоғни талқон қилса бўлади!

Григорий колоннани кўздан кечирди-да, маъюс бўлиб ўйланиб қолди: «Шу аскарларинг билан менинг Будённий қўшинидаги эскадронимга рўпара бўлганингда, ярим соат ичидаги ҳаммангни бурда-бурда қилардим!»

Фомин қамчиси билан сафдагиларни кўрсатиб:

— Кўриниши қалай? — деб сўради.

— Асиrlарни ўлдиришга уста, ўлганларни шилиб олишгаям эпчил экан, лекин жангда қанақалигини билолмадим, — совуққина қилиб жавоб берди Григорий.

Фомин эгарда шамолга тескари ўгирилиб папирос чекди-да:

— Ҳали жангда кўрасан уларни. Одамларимнинг кўпчилиги иш кўрган, булар ҳеч вақт дард қолдирмайди, — деди.

Озиқ-овқат ва ўқ-дори ортилган олтита қўш отли арава колоннанинг ўртасига олинди. Фомин от қўйиб, колоннага юришга команда берди. Дўнгда у яна Григорийнинг ёнига келиб:

— Отим қалай? Ҷадими? — деб сўради.

— Яхши экан.

Улар анчагача ёнма-ён, индамай кетаверишди, ниҳоят Григорий сўради:

— Татарска бориш ниятинг йўқми?

— Уйдагиларингни соғиндингми?

— Кўргим келувди.

— Балки, борармиз ҳам. Ҳозир Чирга бурилиб у ердаги казакларни йўлга солсак, бир оз қўзғатиб кўрсан девдим.

Бироқ казакларнинг «қўзғалишга» унчалик тобла-ри йўқ эди... Дастрлабки уч-тўрт кун ичидаёқ Григорий буни англади. Фомин бирон қишлоқ ё станицани қўлга олгандан кейин дарҳол аҳолини мажлисга тўплашни буюрарди. Қўпинча ўзи сўзга чиқар, баъзан унинг ўрнига Капарин гапиради. Иккиси ҳам казакларни қурол кўтариб чиқишига даъват этар: «Совет ҳукумати деҳқонларни эзяпти», «агар Совет ҳукумати ағдарилимаса, ҳамма хонавайрон бўлади» деб гапиради. Фомин Капарин сингари унчалик саводхон, гапга чечан бўлмаса-да, казакларга тушунарли тилда, узундан-узоқ гапиради. Умуман нутқини ҳар доим ёд олволган қуйидаги жумлалар билан тамомларди: «Бугундан эътиборан биз, сизларни фалла развёрсткасидан озод этамиз. Бугундан бошлаб сиз қабул пунктига дон топширишни тўхтатинг. Текинхўр коммунистларни қачонгача боқасиз ахир? Сизнинг донлагеризни еб улар жудаям семириб кетишиди, лекин бундай текинхўрликка барҳам берилди. Сиз — озод кишиларсиз! Кўлга қурол олиб, бизнинг ҳукуматимизни қўллаб-қувватланг! Ура, казаклар!»

Бироқ казаклар ерга қараб олиб чурқ этишмасди, аммо лекин хотинлар оғзига келганини шартта-шартта гапираверишарди. Зич бўлиб турган аёллар тўпи-

дан аччиқ саволлар тушар, қийқириқлар эшитиларди:

— Ҳукуматинг яхши бўлса, бизга совун ола келдингми?

— Ҳукуматинг қани ўзи, хуржунга соловолганмисан?

— Ҳадемай, уйма-уй кириб тиланчилик қиласиз, а?

— Уларда қилич бор. Эгасидан сўрамасданоқ товуқларнинг калласини олиб, қорин тўйғизишади ҳали!

— Дон топширма деганингиз нимаси? Бугун сиз бу ердасиз, эртага қайси гўрда, балога биз қолайликми?

— Эрларимизни сизга бермаймиз! Ўзларинг урушаверинглар!

Аёллар яна шунга ўхшаш аччиқ-аччиқ сўзларни айтиб, овзлари борича тутақиб бақиришарди, чунки, улар уруш йиллари давомида ҳеч кимга ишонмайдиган бўлиб қолишган, яна уруш бошланишидан қўрқишишар, шунинг учун эрларининг этагига жон-жаҳдлари билан ёпишишарди.

Фомин пинагини бузмасдан уларнинг тутуриқсиз қий-чувига қулоқ солиб тураверарди. Бу гаплар унинг учун бир пул эди. У тўполон босилиши билан казакларга мурожаат қиласарди. Лекин улар маъноли қилиб калтагина жавоб беришарди:

— Бизни кўп қистайверманг, ўртоқ Фомин, шунча уришганимиз ҳам етар.

— Ўн тўққизинчи йили қўзғолон кўтариб кўрганимиз!

— Қўзғолон кўтарадиган ҳолимиз ҳам йўқ, керагиям йўқ. Ҳозирчалик тинчмиз.

— Ҳадемай, дон-дун экадиган вақт келади, урушга бало борми?

Бир куни йиғинда орқада турганлардан биттаси:

— Энди тилинг чиқиб қопти-да! Ўн тўққизинчи йили биз қўзғолон кўтарганда, сен қаёқда юрувдинг? Эсинг кечроқ кирибди, Фомиң! — деб бақирди.

Григорий, Фоминнинг ранги ўзгарганини кўрди, бироқ у ўзини босиб, индамай қўя қолди.

Бир ҳафтача Фомин мажлисларда уни қўллаб-қувватлашдан бош тортган қазайларнинг айтган кал-

та-култа гапларини ва эътиrozларини умуман қизишмасдан тинглади; ҳаттоқи аёлларнинг қийқиргани, қарғашлари ҳам унга унчалик таъсир этмасди. «Зарари йўқ, ахири кўндирамиз!» — деб мақтанаради у миёнфидаги кулиб. Бироқ казаклар оммасининг кўпчилиги, асосий қисми ундан юз ўғирганини кўргач, мажлисда чиқиб гапирганларга нисбатан тўнини тескари кийиб олди. Энди у отдан тушмасдан нутқ сўзларди, насиҳат қилишни йиғиштириб қўйиб, дўққа кўчганди. Барibir, дўқдан ҳам натижа чиқмади: Фомин, ишонганд тоғим, деб юрган казаклар унинг нутқини индамай тинглашарди-да, миқ этмай тарқалиб кетаверишарди.

Бир қишлоқда унинг нутқига жавобан бир казак аёл сўзга чиқди. Баланд бўйли, суяклари йўғон ва келишган бу бева хотин қўлларини эркакчасига пахса қилиб, эркакча овоз билан гапиради. Чечак излари қолган кепчикдай чўтири юзидан аламзадалиги, ҳеч нарсадан тоймаслиги кўриниб тураг, сиртига қайрилган қалин лабларида нафрат аралаш истеҳзоли кулги ўйнарди. Қип-қизил семиз қўлини бигиз қилиб, от устида тошдай қотиб қолган Фоминни кўрсатар, оғзидан аччиқ сўзлар отилиб чиқарди:

— Сен бу ерда нега фитна қўзғаяпсан, а? Казакларимизни яна қайси жарга итариб юбормоқчисан? Бу лаънати урушда бева қолган хотинлар камлик қилдими? Шунча болаларнинг етим қолгани етмайдими? Бошимизга яна бир балони обкелмоқчимисан? Рубежни қишлоғидан чиқиб ҳаммани озод қиласиган бу қанақа подшо экан ўзи? Олдин сен ўз уйингга бориб тартиб ўрнатгин, шикаст-реҳтини тузатгин, иннайкейин келиб, қайси ҳукумат керак, қайсиси керак эмаслигини бизга ўргатарсан! Уйингда хотининг туну кун меҳнатдан бош кўтармайди-ю, бошқаларни ўргатганига ўлайми! Сен мўйловингга зеб бериб отда юришни, халқ орасида ифво тарқатишни биласан, холос. Агар шаммол деворларингни тираб турмаганда уйинг савил аллақачон қулаган бўларди. Сендаqa таълим берувчи-ни қара-ю! Хўш, нега индамайсан, малла мушук, ёки гапим нотўғрими?

Оломон пиқиллаб кулди. Кулги товуши «гурр» этиб

бир кўтарили-ю, яна босилди. Фоминнинг эгар қошида турган чап қўли аста-секин жиловни тимирскилар, ғазаби қайнаганидан юзи қорайиб кетган эди. лекин у чурқ этмас, бу ноқулай аҳволдан қутулиш учун обрў кетказмайдиган жавоб қидиарди.

Лекин ғазаби қайнаган бева аёл ҳали ҳам бўш келмасди;

— Сенинг ҳукуматинг қанақа ўзи? Унинг нимасини биз қўллаб-қувватларканмиз?

У икки қўлини белига тираб олди-да, йўғон сонларини ликиллатиб секин-аста Фомин томон бораверди. Казаклар кулгиларини яшириб, кулиб турган кўзларини ердан олмай унга йўл беришди... Улар бир-бirlарини туртиб, ўзларини четга олишар, гўё бирор ўйин тушадигандек, ўртани очиб, доирани кенгайтиришарди...

— Сенинг ҳукуматинг кетингда доим эргашиб юради,— йўғон овоз билан давом этди бева.— Бир жойда бир соатдан ортиқ яшай олмайди! Бугун отда, эртага қарабсанки лойга ағнаб ётибди. Сен шунақа одамсан, ҳукуматингниям аҳволи шу-да!

Фомин жон-жаҳди билан отининг биқинига ниқтаб, оломон устига бостириб келаверди. Одамлар «дув» қочиб четга чиқишиди. Каттакон доира ўртасида ёлғиз бева хотин қолди. Кўпни кўрган кампир отнинг иржайган тишларига, ранги ўчган Фоминнинг башарасига пинагини бузмай рўйи рост қараб тураверди.

Фомин унинг устига от солиб, қамчисини баланд қўтарди:

— Овозингни ўчир, чўтири ялмоғиз!.. Бу ерда нега ташвиқот юргизяпсан?

Довюрак аёлнинг қоқ тепасида от тишларини иржайтириб осмонга сапчиди: сувлиғидан оч-яшил кўпик отилиб, беванинг қора рўмолига томди, ундан бетига тушди. Бева кўпикни қўли билан сидириб ташлаб, бир қадам орқага тисарилди.

— Сен гапирсанг майли-ю, биз гапирсак алам қиласдими!— деб бақирди у ғазабидан чақнаган кўзларини Фоминга ўқрайтириб.

Фомин уни урмади. Қамчи ўқталиб бақирди:

— Ҳаҳ, большевик абраҳ! Мен ҳозир адабингни бераман! Этагингни кўтартириб шомпол билан савалатаман, бирпасда ақлинг киради-қолади!

Бева хотин икки қадам кетига чекинди-ю, бирданига Фоминга орқасини ўғириб энгашди-да, юбка этагини кўтарди.

— Мановини кўрганмисан ўзинг, мишиқи паҳлавон?— деб чинқирди-да, қаддини ростлаб, кўз очиб юмгуンча яна Фоминга бетма-бет бўлиб олди.— Мени-я? Мени калтаклатмоқчимисан? Ҳали ёшлиқ қиласан!..

Фомин жаҳл билан тупуринди, ўйноқилаб тисланган отининг жиловини тортиди.

— Этагингни ёп, қисир байтал! Семизлигинги пеш қилмоқчимисан?— деди-да, сипоргачиликни қўлдан бермасликка ҳаракат қилиб, қовоғи осилган ҳолда отини бурди.

Оломоннинг пиқирлаб кулгани эшитиларди. Фоминчилардан бири шарманда бўлган ўз командири учун орияти келиб, беванинг ёнига югуриб келди-да, милтиқ қўндоғи билан урмоқчи бўлди, бироқ бўйи ундан икки қарич баландроқ бир казак норғил кифтини қалқон қилиб аёлни тўсди, маънодор қилиб, босиқ овоз билан:

— Бунга тегма! — деди.

Ҳамқишлоқларидан яна уч киши келиб, беванинг суриси чиқардилар. Сочлари ҳурпайган ёшроғи фоминчи қазакнинг қулоғига:

— Мунча ўшқирасан, хўш? Хотин кишини уриш осон, ҳунаринг бўлса, ҳув анови дўнгда кўрсат, қўралар панасида ботирлик қилишга ҳаммаям уста...— деб шивирлади.

Фомин отини юргизиб четан девор ёнига борди, узангиди тикка турволиб:

— Казаклар! Яхшироқ ўйлаб кўринглар!— деб бақирди тарқала бошлаган оломонга қараб.— Ҳозир яхшиликча сўраяпмиз, бир ҳафтадан кейин қайтиб келамиз, ўшанда сизлар билан бошқача гаплашамиз.

Негадир, унинг чеҳраси очилиб, кулди, турган жойида ўйноқлаган отини жиловидан тортиб яна бақирди:

— Биз сиз айтган қўрқоқлардан эмасмиз! Буна-
ка... (бир неча беҳаё сўзлар оғзидан чиқди) хотин-
лар билан бизни қўрқита олмайсиз! Биз чўтириниям,
бошқасиниям кўп кўрганмиз! Яна қайтиб келамиз,
ўшандаям ҳеч ким ўз ихтиёри билан отрядимизга
ёзилмаса, ёш казакларнинг ҳаммасини мажбуран
сафарбар қиласиз. Шуни билиб қўйинг! Сизлар би-
лан аді-бади айтишиб, қош-қовоғингизга қараб ўти-
ришга вақтимиз йўқ!

Бир лаҳза тўхтаб қолган оломон орасидан кулги
кўтарилиди, вагир-вуғур овозлар эшитилди. Фомин
ҳали ҳам илжайишини қўймай:

— Отланинг! — деб команда берди.

Григорий кулгиси қистаганидан шолғомдай қиза-
риб, ўз взводи ёнига от чоптириб кетди.

Лой йўлдачувалиб кетаётган Фомин отряди дўнг-
га чиқди, нодўст қишлоқ ҳам кўзга кўринмай қолди;
лекин Григорий ҳамон жилмаяр: «Яхшиям биз ка-
заклар хушчақчақ одамлармиз. Уйимиз фам-фуссадан
кўра кўпроқ ҳазилкашлик, асқиябозлик билан обод.
Агар ҳамма жиддий бўлволгандами, худо кўрсатма-
син, бундай турмушдан одамлар аллақачон ўзини
осиб ўлдирган бўларди...» деб ўйларди. Анчагача
димоги чоғ бўлиб юрди, лекин манзилга бориб отдан
тушилгандагина Григорийни ваҳима босиб, казаклар-
ни қўзгата олишларига шубҳалана бошлади, Фо-
миннинг нияти муқаррар пучга чиқишини ўйлаб қолди.

XIII

Баҳор келди. Офтоб борган сари қиздира бошла-
ди. Дўнгларнинг жануб томонидаги қорлар эриб кет-
ди; бултурги ўтлардан қўнғир тусга кирган ерларни
туш маҳалида бинафша ранг тиниқ буғ тумани қоп-
ларди. Офтобрўя жойларда, қўрғонлар атрофида,
соғ тупроқ ер тагидан чиқиб қолган харсанг тошлар
панасида тупроқдан ниш уриб чиқсан дастлабки
зағзағ ўтнинг ям-яшил найчаси кўринарди. Зағча-
лар одам юрмай қўйған қишки йўлларни ташлаб хир-
мон жойларга, қор суви тўпланган кузги экинзорлар-
га учиб ўтишганди. Жар ва чуқурликлардаги қўкиш

қор ҳали ҳам эриб эримай, қолиб қолмай, билчиллаб ётарди; ўша ёқлардан ҳали ҳам муздай шамол келарди, лекин шунга қарамай, қор тагидан эриб турага, кўзга кўринмас жилғалар шилдираб оқар, ўрмондаги тераклар танаси нозик яшил тусга кириб, баҳор ҳавосида ўзларини кўз-кўз қилишарди.

Дала ишлари яқинлашган сари Фоминнинг тўдасидан футур кета бошлади. Ҳар тунаганда эрталаб бир-икки кишининг қочиб кетгани маълум бўларди; бир куни ярим взводга яқин одам бирданига қочди: саккиз киши оту қуроллари билан таслим бўлгани Вешенскаяга жўнади. Ер ҳайдаш, дон сочиш пайти келиб, ер одамларни ишга чорларди; фоминчиларнинг кўпчилиги курашдан ҳеч нарса чиқмаслигига кўзлари етиб, бандадан яширинча уйларига жўнаб қолишарди. Фақат қайтиши мумкин бўлмаган, Совет ҳокимияти олдида ҳеч кечирилмайдиган зўр жиноят қилган муттаҳамларгина тўдада қолганди.

Апрель ойининг бошларига келиб Фомин тўдасида саксонга яқин одам қолди, холос. Григорий ҳам қолди. Уйига қайтишга юраги бўлмади. Фоминнинг иши чиппакка чиққанига, эртами, кечми унинг шайкаси тор-мор қилинишига у сира шубҳаланмасди. Қизиль Армиянинг бирор мунтазам суворий қисмига дуч келиши биланоқ батамом қирилишини ҳам биларди. Шунга қарамай, у Фоминнинг дастёри бўлиб юраверди, аммо бир амаллаб ёзга чиқволиш, ўшанда тўданинг энг яхши отларидан иккитасини ўмариб, кечаси Татарскка бориш, Аксинъяни ёнига олиб у ердан жануб томон қочиши кўнглига туғиб қўйди. Дондаштлари бепоён, одам юрмаган йўллар, пастқам жойлар кўп... Бирон ерда отларни ташлаб, Аксинъя билан Кубанга, тоғ этакларига, ўз юртидан нарироққа бориб олишни ва бу нотинч замонни ўша ёқларда ўтказишни ўйларди. Шундан бошқа нажот йўқ деб тушунарди у.

Фомин Капариннинг маслаҳати билан, муз кўчмай туриб Доннинг чап томонига ўтиб олишга қарор қилди. Мабодо бир кори ҳол юз бериб қочишига мажбур бўлишса, Хопер округининг чегарасида, кенг ўрмонлар ичидаги яшириниб жон сақлашни кўзларди у.

Рибний қишлоғидан юқоририоқда бандитлар Дондан ўтишди. Дарёнинг баъзи бир тез оқар жойларида муз қолмаган эди. Чарақлаган апрель қуёши остида сув жимирлаб, кумушдай товланарди, бироқ муз устидан тушган бир газ баландликдаги қишки йўл атрофида ҳали ҳам Дон қўзғалмаган эди. Музи юпқалашган жойларга четан тўшадилар, отларни етаклаб биттадан олиб ўтдилар. Доннинг нариги қирғоғида ҳаммаси саф тортди, разведка юбориб, Елан станица-си томон жўнаши.

Орадан бир кун ўтгач, Григорий ўз ҳамкишлоди — бир кўзи йўқ Чумаков чолни кўриб қолди. У Грязнов қишлоғидаги қариндошиникига кетаётуб, қишлоқда яқинлашганда бандитларга йўлиқди. Григорий чолни йўлдан четроққа обориб:

— Болаларим қалай, бува, омон-эсон юришибдими? — деб сўради.

— Худо мөхрибон, Григорий Пантелеевич, соғ-са-ломат юришибди.

— Сенга каттакон бир илтимосим бор, буважон, болаларимга, синглим Евдокия Пантелеевнага ҳамда Прохор Зиковга мендан кўпдан-кўп салом де. Аксинья Астаховага айтингки, мени кутсин, яқинда бориб қоламан. Лекин шулардан бўлак ҳеч кимга мени кўрганингни айтма, тузукми?

— Хўп бўлади, ўғлим, бажараман. Сира шубҳа-ланма, худди айтганингдай қиласман.

— Қишлоқда нима янгиликлар бор?

— Янгилик йўқ, ҳаммаси илгаригидай.

— Кошевой ҳалиям раисми?

— Ҳалиям.

— Оиласми безовта қилишяпкани йўқми?

— Унисини эшиганим йўқ, демак тинч бўлса ке-рак. Бола-чақангни нима учун безовта қилишсин? Сен учун улар жавобгар эмас...

— Қишлоқда одамлар менинг орқамдан нима де-йишади?

Чол бурнини қоқиб, бўйнидаги рўмол билан мўй-лов ва соқолини шошмасдан артди-да, дудмал жавоб берди:

— Қим билсин уларни... Ҳар оғизда ҳар хил гап. Совет ҳукумати билан тезроқ ярашасизларми?

Бу саволга Григорий нима дея оларди? Узоқлашиб кетган отряд кетидан юлқинган отини жиловидан тортиб, кулимсиради:

— Билмадим, бува. Ҳозирчалик маълуммас.

— Ахир нимаси маълуммас! Черкасларминам урушганимиздаям, туркларминам урушганимиздаям, ахир ярашминам битган, энди ҳаммангиз бир одам бўла туриб, ўзаро келишолмайсиз... Бу яхшимас, Григорий Пантелеевич, рост айтаман, яхшимас! Худо меҳрибон, у ҳаммасини кўриб турибди, лекин бу ишларингни кечирмайди, шу гапим эсингдан чиқмасин! Бу қандай майнабозчилик: ҳаммаси рус, православ динида бўлса-ю, бир-бирига кушандалик қиласа. Бир оз урушгандан кейин бас қилиш керак-да, булар бўлса, тўрт йилдан бери муштлашгани муштлашган. Мендек бир қариянинг маслаҳати шу: эсларинг бўрида этакларингни ёпиб олинглар!

Григорий чол билан хайрлашиди, олислаб кетган ўз взводи кетидан от чоптириб кетди. Чумаков ҳассасига суюниб, ёшланган сўқир кўзини арта-арта, узоқ туриб қолди. Соғ қолган ёлғиз ва лекин ўткир кўзи билан у Григорийнинг кетидан тикилар, унинг отга ярашгани, чавандозларча эгарда ихчам ўтирганини завқланиб томоша қиласа, лабларини қимирлатиб пичирларди:

— Асл казак! Абжирлигиям, келишганлигиям, ҳамма нарсаси жойида, фақат дайдилиги бор, холос... Ўз йўлидан адашди! Черкасларминам жанг қиладиган йигиту, аттанг, аҳмоқона ишминам умри ўтяттида! Ҳукумат талашиб нима қиласа экан? Бу ёш казаклар нимани ўйлашади ўзи? Гришка-ку, майли-я, бутун авлоди шунаقا ҳовлиқма одамлар эди, бобоси Порфирийнам билардим... Тили заҳар, ўтакетган жоҳил эди... Лекин бошқа казаклар нимани ўйлаганини тушунсан, худо урсин!

* * *

Фомин ҳар қишлоқни эгаллаганда энди аҳолини мажлисга чақира бермас эди. У ташвиқотдан наф

йўқлигини тушунган эди. Янгидан одам олишни қўя туриб, аввало ўз жангчилари тарқалиб кетмаслигининг иложини қилиш керак эди. У дилтанг, қовоғи солиқ, камгап бўлиб қолди. Фақат самогон билан ўзини овута оларди. Қаерга қўйнисин ўша ерда ич-киликтозлик бошланарди. Атаманга эргашиб бошқалар ҳам ичишарди. Интизом барбод бўлди. Талон-торож, ўғрилик авжига минди. Бандитлар яқинлашганини эшишиб бекинган совет хизматчиларининг уйларига киришиб, отга ортиш мумкин бўлган жами буюмларини олиб кетишарди. Кўпчилигининг бўктар-маси қаппайиб кетганди. Бир куни Григорий ўз взводидаги йигитлардан бирида тикув машина кўриб қолди. У жиловни эгар қошига илиб қўйиб, машинани чап қўлтиғига олволганди. Григорий қамчини ишга солиб, казакни ўз ўлжасининг баҳридан ўтишга мажбур қилди. Уша куни кечқурун Фомин билан Григорий сану манга бориб қолишиди. Уйда икковидан бўлак ҳеч ким йўқ эди. Ичкиликдан қовоқлари шишиб кетган Фомин стол ёнида ўтирас, Григорий эса, катта-катта қадам ташлаб, уйнинг бу бошидан у бошига бориб келарди.

— Ўтирсанг-чи, ликкиллайверма,— деди Фомин, ғаши келиб.

Григорий унинг гапига эътибор бермасдан, торхона ичida у ёқдан-бу ёққа юраверарди, ниҳоят:

— Бу аҳвол жонимга тегди, Фомин! Талон-торожни, базмларингни йиғиштири!— деди.

— Бугун чап ёғинг билан турдингми?

— Ҳазилниям йиғиштири... Халқ норози бўлиб, бизларни ёмон отлиққа чиқаряпти!

— Ўзинг кўриб турибсан-ку, йигитларни тиёл-маяпман, қўлимдан ҳеч иш келмайди.

— Сен ҳеч қандай иш қилаётганинг йўқ.

— Ҳаддингдан ошма, сен менга хўжайин эмасан! Халқ, халқ дейсан, халқинг бир пулга қиммат. Шу абраҳларни деб, қон тўқяпмизу, улар бўлса... Мен ўзимни, ўз ғамимни ўйлайман, бошқасини қўявур.

— Ўз ғамингниам тузукроқ ўйлолмай қолдинг ҳозир. Мастликдан бошинг чиқмай, ўйлашга вақт

тополмаяпсан. Тўрт суткадан бери кўзингни очолмайсан, сени кўриб бошқалар ҳам ичишяпти. Ҳатто соқчиликда турганлар ҳам ичишяпти. Мақсадинг нима? Бирон қишлоқда бизни маст-аласт ҳолда таппа босишиб, ҳаммамизни бўғизлашса майлими?

— Сен нима, тирик қоламиз деб ўйлайсанми?— деб истеҳзоли кулди Фомин.— Бир кунмас бир кун ахийри ўласан. Тулкиям ахийри тумшуғидан илинганд экан... Эшитганмисан?

— Ундай бўлса, эртагаёқ ўзимиз Вешенскаяга бориб: мана, биз таслим бўлдик, деб қўл кўтара қолайлик.

— Йўқ, биз яна айш қиламиз ҳали...

Григорий оёқларини кериб стол рўпарасида тўхтади ва овозини пасайтириб:

— Агар сен тартиб ўрнатмасанг, талон-торож ва ароқхўрликни тугатмасанг, мен сендан ажраламан, йигитларнинг ярмини ўзимга эргаштириб кетаман,— деди.

— Қимирлагин-чи!— дўқ қилди Фомин.

— Қимирламаёқ кўрсатиб қўяман!

— Сен... сен менга кўп пўписа қилаверма!— Фомин қўлининаган филофига оборди.

— Филофга ёпишма, йўқса, мен сендан олдинроқ ўтирган жойингда жойлаб қўя қоламан!— деди Григорий ранги оқарган ҳолда қиличини ярмигача қинидан суфуриб.

Фомин қўлининаган столга қўйиб илжайди.

— Сен менга мунча тирғиласан, а? Бошим оғриб, ўзим зўрға турганимда, сенинг бемаъни гапларинг ошиб тушди-ку. Қилични солиб қўй! Сен билан ҳазиллашиш мумкин эмасми? Оббо, сира гап кўтармайдиган бўп кетибсану! Ўн олти яшар қиз болаем мунчалик бўлмас...

— Нима қилишимни ҳали сенга айтдим, бу гап доим қулоғингда бўлсин. Ҳамманиям ўзингга ўхшатверма, бошқачароқ ўйлайдиганлар ҳам бор.

— Биламан.

— Билсанг, шуни унутма! Эртагаёқ буюргин, ҳаммаси хуржунларини бўшатсан. Биз — суворий қисмиз, шара-бара ортган обозмасмиз. Хуржун тўлға-

зишга бира тўла барҳам беришинг керак! Шулар ҳам халқ жангчилари бўптими? Талаб олинган буюмларни отларига ортишиб, қишлоқма-қишлоқ савдогарчилик қилишади, қадимги «игна кетди, ип кетди» деб юрувчи латтафурушлардан сира фарқлари йўқ... Уялганимдан ерга кириб кетгим келади! Қандай фалокат босиб мен сизларга қўшилдим, а?— Григорий тупуринди-да, деразага ўгирилиб, азбаройи нафратлангани ва ғазабланганидан ранги оқариб кетганди.

Фомин кулиб юборди:

— Шу вақтгача бирон марта суворийлар калтагини еганимиз йўқ... Қорни тўйган бўри, кетидан отлиқлар қувлаганда, еган нарсасини йўл-йўлакай қусиб қочади. Агар бизни ҳам исканжага олишса, менинг олғирларим ҳамма юкини ташлаб енгил бўлволади. Зарари йўқ, Мелехов, хафа бўлма, ҳаммасини тўғрилайман! Бир оз руҳим тушиб, бошвоқларини қўйворгандим, энди маҳкам ушлайман! Лекин сен билан менинг ажралишимиз сира мумкинмас, бошга тушганини баравар кўраверайлик.

Уларнинг суҳбатига халақит беришди: бир товоқ қайноқ карам шўрва кўтариб уй бекаси кирди, унинг кетидан Чумаков бошлиқ бир гала казак кириб келди.

Фоминга Григорийнинг гаплари таъсир этганди. Эрталаб у, ҳамма хуржунларни бўшатилсин деб буйруқ берди, буйруқнинг бажарилишини ўзи текшириб чиқди. Хуржунларни текширилаётганда қаршилик кўрсатиб, олган буюмидан ажрагиси келмаган энг ашаддий талончини Фомин сафдаёқ .нагандан отиб ташлади. Үликни оёғи билан туртиб, пинагини бузмасдан:

— Манави тўнғизни кўзимдан йўқотинг!— дедида, сафга кўз ташлаб овозини баландлатиб гапира бошлади:— Сандиқ титишни бас қилинглар, итваччалар! Мен сизларни шу ниятда Совет ҳукуматига қарши қўзғатган эмасман! Үлдирилган душманни бошдан-оёқ шилиб олишларинг мумкин, агар ҳазар қилмасаларинг, ҳатто кир иштониниям ёчиб олсаларинг майли, лекин оиласаларига қўл теккизманглар! Биз

аёллар билан урушмаймиз. Кимки шунга бўйсун-
маса, жазоси шундай булади.

Сафда шивир-шивир кўтарилиди-ю, яна босилди...

Ҳарқалай, тартиб ўрнатилгандай бўлди. Уч кун-
гача бандитлар Ҷоннинг чап томснида изғиб, маҳал-
лий аҳоли томонидан тузилган майдадчуйда мудофаа
отрядларини тор-мор қилиш билан шуғулланди.

Шумилин станицасида Қапарин Воронеж губер-
ниясиға ўтишни таклиф этди. У бу таклифга асос
қилиб: — яқинда Совет ҳукуматига қарши қўзғолон
кўтарган ўша ёқнинг аҳолиси бизларни тўла равиш-
да қўллаб-қувватлайди,— деган фикрни ўртага сур-
ди. Фомин бу қарорни казакларга эълон қилганида
улар бир оғиздан: «Биз ўз округимиздан нари бор-
маймиз!» деб туриб олишди. Бандада митингбозлик
бошланди. Қарорни ўзгартиришга мажбур бўлдилар.
Тўрт кун сурункасига улар, нақ Казанск станицаси-
дан бери кетма-кет қувиб келаётган суворий группа
билан жанг қилишдан ўзларини обқочиб, шарққа
томон тўхтовсиз чекиндилар.

Суворий группани адаштириб кетиш осон эмасди,
чунки ҳамма ёқда дала ишлари авж олиб, ҳаттоқи
даштнинг энг пастқам жойларида ҳам қайнарди. Шу-
нинг учун улар кечаси йўл юришарди, лекин эрталаб
бирон ерда отларини хашаклатмоқчи бўлиб тўхташ-
лари биланоқ, яқин атрофда отлиқ разведка пайдо
бўлар, қўл пулемётдан ўт очишарди, фоминчилар шо-
ша-пиша отларига яна юган уриб, қочишга мажбур
бўлишарди. Вешенская станицасига қарашли Мельни-
ково қишлоғи ёнида Фомин қизил аскарларга панд
бериб, қочиб, қутулди. Ўз разведкачилари кел-
тирган маълумотга кўра Фомин, суворий группанинг
командири — Буказов станицалик ҳарбий ишни
яхши тушунган, балодан қайтмайдиган Егор Журав-
лев деган казак эканини биларди; сон жиҳатидан
суворий группа унинг шайкасига қараганда, икки
марта кўплигини, олтита қўл пулемёти борлигини,
отлари чарчамаганини ҳам биларди. Шунинг учун у
ҳозир юрак бетлаб жанг қилолмасди, олдин отларга,
одамларга дам беришни, ундан кейин пайтини топиб,
очиқ жангда эмас, балки қўққисдан бостириб бориб,

группани тўзитиб юборишни ва шундай қилиб, силласини қуригандан бу қувғиндан қутулишни кўзларди. Бундан ташқари, у душмандан пулемётлар ва милиционерларни ўйларди. Бироқ унинг ўйлагани бўлмади. Григорийни доим хавотир қилиб келган нарса 18 апрелда Слашевск ўрмони четида воқе бўлди. Шундан бир кун олдин Фомин ва аксарият оддий жангчилар Севастьяново қишлоғида ўлгидай маст бўлишиб, тонг отганда қишлоқдан жўнашган эди. Кечаси билан ҳеч ким мижжа қоқмагани учун кўпчилиги эгарда ухлаб қолганди. Эрталаб соат тўққизга яқин Ожогин қишлоғидан сал нарироқда отдан тушишди. Фомин атрофга соқчи қўйиб, отларга сули беришни буюрди.

Шарқдан кучли шамол турганди. Чангу қум ҳавога кўтарилиб, қўнғир булат сингари уфқни тўсиб олган, даштни қоронгилик босганди. Осмонга кўтарилиган чанг булути орасидан қуёш фира-шира кўринарди. Шамол шинель этакларини, отларнинг дум ва ёлларини тўзитарди. Отлар орқаларини шамолга тескари қилиб, онда-сонда ўсган дўлана буталари ёнида писиб туришарди. Қум аралаш чангдан кўзлар ачишиб ёшланар, ҳатто яқиндаги нарсанинг нималигини ажратиб бўлмасди.

Григорий ўз отининг тумшуғини ва кўз атрофларини яхшилаб артди, тўрвасини бошига илиб қўйида, отига этагида ем егизаётган Қапарин ёнига борди.

— Дам олишга топган жойини қара-ю! — деди Григорий қамчиси билан ўрмонни кўрсатиб.

Капарин кифтини қисди.

— Мен бу аҳмоққа айтувдим шуни, кошки гапга кира қолса!

— Даشتда ёинки қишлоқнинг четида тўхташ керак эди.

— Сиз, ўрмон ёқдан ҳужум бўлиши мумкин, деб ўйлайсизми?

— Ҳа.

— Душман олисада.

— Бирпасда етиб келиши мумкин, остида отибор, пиёда эмас.

— Үрмон шипшийдам, бир гап бўлса, ҳар ҳолда, кўрармиз.

— Кўрадиган одам қолмади, ҳаммаси ухляяпти. Соқчилар ҳам ухлаб қолмаса гўргайди.

— Кечаги базмдан кейин ҳаммасиям оёқда туролмай қолди, энди уйфотиб бўпмиз.— Капарин бир ери оғригандай юзини бужмайтирди, эшитилар-эшитилмас:— Бошлиғимиз шу бўлгандан кейин қирилишимиз турган гап,— деди.— Қовоқбош, ўлгудай аҳмоқ, шундай аҳмоқки, асти қўяверинг! Нега сиз командирликни ўз зиммангизга олишни истамайсиз! Казаклар сизни ҳурмат этишади. Сиз командир бўлсангиз, халқ бизга эргашарди.

— Менга амал керакмас, мен сизларда бирпаслик меҳмонман холос,— деб Григорий совуққина жавоб қайтарди-да, шу гап оғзидан чиқиб кетганига пушаймон еб, ўз оти ёнига кетди.

Капарин этагида қолган емни ерга тўкиб, Григорийнинг кетидан борди.

— Биласизми, Мелехов,— деб у, дўлана новдасини синдириб олди-да, бўртган куртакларини кўчира бошлади,— менинг фикримча, агар биз бирор каттакон антисовет ҳарбий қисмга, масалан, Маслак бригадасига қўшилмасак, узоқ бардош бера олмаймиз. У бригада ҳозир вилоятнинг жанубида, аллақайси жойларда санқиб юрибди. Ўша ёқقا ўтиб олишимиз керак, акс ҳолда бир кунмас бир кун бизларни бу ерда қириб ташлашади.

— Ҳозир сув тошган. Дондан ўтолмаймиз.

— Ҳозир деяпканим йўқ, лекин сув пасайиши биланоқ кетиш керак. Сиз қандай фикрдасиз!

Григорий бирпас ўйланиб туриб жавоб берди:

— Тўғри. Бу ердан кетиш керак. Бу ерда туришдан наф йўқ.

Капаринга жон кирди. У гапга тушиб кетиб, казаклар қўллаб-қувватлайди, деган умиднинг пучга чиққани, бу округда бекорга дайдиб вақт ўтказмасдан, кучлироқ тўдага қўшилишга Фоминни кўндириш зарурлиги тўғрисида узоқ сўзлади.

Григорий унинг вайсашига қулоқ сола-сола, охири зерикди. У отининг ем ейишига диққат қилиб тур-

ди, тўрвани бўшатган ҳамон бошидан олди-да, сувлигини солиб, айилини тортиб қўйди.

— Ҳали бери жўнамаймиз, бекорга шошяпсиз,— деди Қапарин.

— Яхиси, сиз ҳам бориб отингизни тайёрлаб қўйинг, кейин эгарлашга улгуролмай юрманг тағин,— деди Григорий.

Қапарин унга астайдил тикилиб қаради-да, обоз извоши ёнида турган ўз оти ёнига кетди.

Григорий отини етаклаб Фомин ёнига борди. У оёқларини кериб, ерга солинган кавказча чакмон устида ётар, пиширилган товуқ қанотини чайнарди. У сурилиб жой бўшатди-да, Григорийни имлаб ёнига таклиф этди.

— Ўтири, бирга овқатланамиз.

— Овқатни қўя тур, бу ердан жўнаб қолиш керак,— деди Григорий.

— Отларни тўйғизайлик, иннайкейин, жўнаймиз.

— Кейинроқ тўйғизсак ҳам бўлади.

— Мунча ҳовлиқиб қолдинг?— Фомин тозаланган устухонни ташлаб, қўлини чакманга артди.

— Жойимиз нобоп. Таппа босишлари мумкин.

— Қайси азамат босади, а? Ҳозир разведкачилар қайтиб келди; дўнгда ҳеч ким кўринмайди, дейди. Ҷемак, Журавлев бизни йўқотиб қўйди, йўқса кетимиизга тушиб кўз очирмасди. Буқаново томондан ҳеч қандай хавф йўқ. У ерда Михеј Павлов военком. Ўзи мард йигит бўлсаям, кучи кам, бизга рўпара бўлишига кўзим етмайди. Яхшилаб дам олайлик, манови шамол тўхтасин, иннайкейин, Слашевскаяга жўнаймиз. Ўтири, товуқ гўштидан егин, тепамда қаққайиб тураверасанми? Чумчуқ пир этса, юрагинг шир этадиган бўп қопти, Мелехов, яқинда қорайган нарсани кўрсанг, ҳув анавинақаси айланиб ўтадиган бўласан!— Фомин қўлини чўзиб атрофни кўрсади-да, хохолаб кулди.

Григорий ичиди сўқиниб четга чиқди, отини бутага боғлади-да, шамол тегмасин деб, шинель этагини юзига ёпиб ўша ерда ётди. У шамолнинг гувиллаши, боши устидаги қаққайган қуруқ ўтнинг шилдираши остида мудрай бошлади.

Сидиргасига тариллаган пулемёт товушидан сапчуб оёққа турди. Тариллаган товуш тугамаёқ Григорий отини ечиб бўлди. Фоминнинг: «Отлан!» деган ҳайқириғи жами овозларни босиб кетди. Ўнг томондан, ўрмон ёқдан яна иккитами-учта пулемёт ўт очди. Григорий эгарга ўтириши билан, кўз очиб юмгунча вазият қандайлигини билиб олди. Ўнг томондан, сийрак дараҳтлар орқасидан элликка яқин қизил аскар кенг ёйилган ҳолда дўнгга қочадиган йўлни кесиб ҳужумга ўтган эди; чанг булути орасидан уларнинг қораси зўрға кўринарди. Қуёш хира бўлганидан кўкиштоб тусда товланиб бош устида ялт-юлт қилган қиличлари кўзга таниш ва жуда хунук кўринар эди. Тўғри ўрмондан, бутазор бўлиб кетган тепалиқдан пулемётлар ўққа тутиб кўз очирмас, пайдарпай дискларини бўшатишарди. Чап томондан ярим эскадронга яқин қизил аскар қиличларини яланғочлаб, тобора қисиб қуршаб олмоқда; шовқин-суронсиз от чоптириб келмоқда эди. Ёлғиз биргина йўл қолганди: чап ёндан ҳужум қилиб келаётганларнинг сийрак сафини ёриб ўтиш ва ўшанақаси Дон томон қочиш. Григорий Фоминга: «Кетимдан қолма!» деб бақирди-ю, қиличини яланғочлаб отини ҳайдади.

Йигирма саржинча жойга боргач, кетига қаради. Фомин, Қапарин, Чумаков ва яна бир нечта жангчи қуюндей учиб ундан тахминан ўн саржин орқада келмоқда эдилар. Ўрмондаги пулемётларнинг овози ўчди, фақат ўнг томондагиси калта-калта ўқ узиб, обоз аравалари атрофида ўралашган фоминчиларни қирмоқда эди. Охири бу пулемётнинг овози ҳам ўчди, Григорий, қизил аскарлар қароргоҳга етиб келганини ва ҳаммани қиличдан ўтказа бошлаганини англади. Буни у жон ҳалпида чинқирган овозлардан, ўзини мудофаа қилмоқчи бўлиб отилган битта-яримта ўқ товушидан фаҳмлаган эди. Бироқ кетинга қарайдиган вақт эмасди. Қархисидан қуюндей ёпирлиб келаётган отлиқларга мислсиз тезликда яқинлашаркан, улардан биттасини кўз тагига олди. Ошланган калта пўстинли қизил аскар Григорийнинг рўпарасидан от қўйиб келаверди. Остидаги кўк оти

унчалик учқур эмасди. Худди чақмоқ чаққан пайтдаги каби, Григорий кўз очиб юмгунича, отининг ўмилдириғидаги юлдуз сурат тўқасини ҳам, унга сачраган кўпикларни ҳам, от устидаги юзи чўғдай қизарип кетган йигитни ҳам, унинг ортидаги Донга туташган фира-шира дашт манзарасини ҳам кўрди... Бир зумда қизил аскарнинг зарбига чап бериши ва ўзи қилич солиши керак эди. Оралари беш саржинча қолгандা Григорий лип этиб чапга энгашди, боши устида қилич дамининг визиллаган товушини эшитгач, иргиб эгарда ўнгланиб олди-да, ёнидан ўтиб кетган қизил аскарнинг бошига фақат қилич учини тегизиб олди. Григорийнинг қўли қилич зарбини унчали сезмади ҳам, бироқ кетига бурилиб қараши билан, қизил аскарнинг шалпайиб эгардан сирғилиб секин қулаётганини, пўстинининг орқасидан қоп-қора қон оқаётганини кўрди. Чопиб кетаётган кўк от энди гўё ўз соясидан ҳурккандай, бошини қаққайтириб олганича ёндамасига елиб борарди...

Григорий от бўйнига энгашди, чаққонлик билан қиличини пастга қаратиб олди. Унинг боши устидан ўқлар ҳуштак чалиб ўтарди. Отининг қапишиб қолган қулоқлари дириллар, учини мунчоқдай тер босган эди. Григорий фақат кетидан отилган ўқларнинг визиллашини-ю, отининг ҳарсиллаб нафас олишини эшитарди, холос. У яна бурилиб қаради, Фомин билан Чумаковни, улардан эллик саржинча орқада келаётган Капаринни кўрди; ундан ҳам нарида — иккинчи взводлик чўлоқ Стрелядников ўзига тармашган икки қизил аскарнинг ҳужумини йўл-йўлакай даф қилиб келмоқда эди. Шундан бошқаси — Фоминга эргашиб қочган тўққизтacha одамнинг ҳаммаси чопиб ташланганди. Эгасиз қолган отлар шамолда думтарини ҳурпайтириб ҳар ёққа тўзиб кетган, қизил аскарлар уларни тутиб олишарди.Faқат фоминчи Прибитковнинг бўйдор тўриқ отигина, қулаганда оёғи узангида қолган эгасини судраб, Капариннинг оти ёнида пишқириб чопарди.

Қум тепанинг орқасида Григорий отини тўхтатиб ерга тушди, қиличини филофига солди. Отини ётқизиш учун бир неча секунд вақт кифоя эди. Григорий

бир ҳафта овора бўлиб отни шунга ўргатган эди. Пана жойдан туриб бир обойма ўқни отиб тамомлади, бироқ мўлжалга олишда шошгани ва ҳовлиқанни учун фақат охирги ўқ билангина қизил аскарнинг отини қулата олди. Шундан сўнг бешинчи жангчи ҳам таъқибдан қутулди.

Фомин Григорийга етар-етмас:

— Отга мин! Ҳалок бўласан!— деб бақирди.

* * *

Фомин отряди тор-мор бўлган, фақат беш киши тирик қолганди. Қизил аскарлар уларни Антоновск қишлоғига довур қувиб боришиди, беш қочоқ қишлоқ атрофидаги ўрмонга бекинганларидан кейин, таъқиб этишни тўхтатишиди.

Қочиб кетаётган пайтларида беш кишининг биронтаси ҳам чурқ этган овоз чиқазмади.

Сой бўйида Қапариннинг оти йиқилди, уни ўрнидан турғизолмадилар. Бошқаларнинг остидаги отлар гандираклаб аранг оёқ қўяр, тумшуқларидан пағапаға оппоқ кўпик ерга тушарди.

Григорий отдан тушаётib:

— Сен отряд командирлигига эмас, қўй боқишга боп одам экансан!— деди Фоминнинг афтига қарамасдан.

У индамай отдан тушиб эгарни олмоқчи бўлди-ю, бироқ эгар қолиб, ўзи бир четга чиқди-да, қирққулоқ ўсган пуштага ўтириди.

— Илож ийӯқ, отларни қолдиришга тўғри келади,— деди-да, қўрқа-писа у ёқ-бу ёғига қараб қўйди.

— Иннайкейин-чи?— деб сўради Чумаков.

— Пиёда нарёққа ўтиш керак.

— Қаёққа?

— Қоронги тушгунча ўрмонда бўламиз, кечаси Дондан ўтиб, беш-тўрт кун Рубежнийда жон сақлайми! ерла менинг қариндошларим кўп.

— Яна бир аҳмоқчилик!— ғазабланиб бақирди Қапарин.— Сен нима, у ерда бизни қидиришмайди деб ўйлайсанми? Улар энди сени фақат ўз қишлоғингда күтиб олишади! Умуман сенда мия борми?

— Бўлмаса, қайга борайлик ахир?— довдираб сўради Фомин.

Григорий халтасидан патрон ва бир бурда нон олди.

— Машмашаларинг тезроқ тугайдими, йўқми? Қани, кетдик! Отларни боғланг, эгарларни олинг, тезроқ кетиш керак, йўқса, бу ергаям босиб келишлари мумкин.

Чумаков қамчисини ерга ташлади-да, оёқлари билан топтаб уни лойга тиқди, титроқ овоз билан:

— Ана, биз ҳам энди пиёда қолдик... Ўртоқларимиз бўлса, ҳаммаси қирилди...— деди.— Худоё тавба, дабдала қилишди-я, бизни! Тирик қолишдан умидимни узувдим...

Улар чурқ этмай отларнинг эгари ни олишди, тўрт отни бир дараҳтга боғлашди, эгарларни кўтариб, бир-бирининг кетидан юриб, бўри сингари чакалак-ма-чакалак Дон бўйига тушишди.

XIV

Ҳар йили баҳорда Дон тошиб, сойликдаги ўтлоқларни бутунлай сув босиб кетади, лекин Рубежний қишилогининг рўпарасидаги баланд чап қирғоқдан бир бўлаги қуруқ қолади.

Бу оролни бошдан-оёқ майдаги сандип, эман ва сербутоқ қоратол босиб кетган бўлиб, кўкламда сув тошқин кезлари олисдаги тоғдан уни бемалол кўриш мумкин.

Ёз пайти бу ердаги дараҳтларни то учигача ёввойи чирмовуқ ўраб олади, ер бетини босиб кетган сертикан маймумжоннинг қалинлигидан юриб бўлмайди, буталар устида оч-кўк рангли печак гул ўрмалаб, буралиб ўсади, ернинг серҳосиллигидан авж олган ўтлар баъзи жойларда одамни кўмиб кетади.

Ёзда ўрмон ичи ҳатто туш пайтларида ҳам жимжит, сояси қалин ва салқин бўлади. Фақат зарғалдоқларнинг биёв-биёвию, аллакимнинг яна неча йил умр кўришини санаётган каккуларнинг товушигина¹

¹ Батъзи одамлар бу қушнинг каккулаганини санаб, яна шунча йил яшарканман, деб гапиришади. (Тарж.)

చукунатни бузади, холос. Қишда эса, ўрмон бутунлай жимжит, шиншийдам, қабристон каби ҳувиллаб қолади. Дараҳт учлари қишки осмон фонида қорайиб, ниҳоятда хунук кўринади. Фақат бўри болалари йилдан-йилга кўпайиб, куни билан қор босган бурган тагидан чиқмай, чакалакзорда жон сақлашади.

Мана шу оролга Фомин, Григорий Мелехов ва бошқа тирик қолган фоминчилар ўрнашиб олишди. Улар амал-тақал кун кечиришар: Фоминнинг амакивачаси кечалари қайиқда келтирган ғози йўқ овқатга қоринлари тўймаса ҳам қаноат қилишарди, аммо лекин эгар кўрпачасини бошга қўйволиб истаганларича ухлашарди. Кечалари навбатма-навбат қоровул туришарди. Бирон киши турган жойларини пайқаб қолмасин учун ўт ёқишмасди.

Тошқин Дон орол четларини ювиб, жануб томонга шитоб билан оқарди. Йўлини тўсган каттакон тераклар орасидан шалдираб ўтар, сувга ботган буталарнинг учини лишиллатиб, гўё аллалагандай шувиллар эди.

Дарёнинг тўхтовсиз шовиллашига Григорий тезда ўрганиб қолди. У тиккасига ўйилиб тушган жар устидаги ётволиб, тошқин сувнинг кенг сатҳини, оч бинафша ранг туман орасидан ярқираб кўринган бўр тоғларининг чўққиларини томоша қиласарди. Туғилиб ўсан қишлоғи, болалари, Аксинья ўша ёқда... Фикри-зикри ўша ёқда. Уйдагилар эсига тушганда, азбаройи уларни соғинганидан юраги эзилиб ўтдай ёнар, Михайлга нисбатан ғазаби қайнаб-тошарди, лекин Григорий ўз ҳисларини босиб, тоқقا қарамасликка, ўтган воқеаларни яна эсга олмасликка ҳаракат қиласарди. Ўтган ишни қайта-қайта эслайверишдан наф йўқ. Усиз ҳам аҳволи ниҳоятда оғир, усиз ҳам кўкраги шу қадар оғрирдики, назариди, худди юраги тилимланиб ташланган, тўхтаб қолгандай, ичига қон кетаётгандай туюларди. Демак, неча марталаб ярадор бўлгани, терлама касали, уруш азблари — ҳаммаси қўшилиб қиласиганини қилган: Григорий дамба-дам юраги ўйнаганини, уриши бежолигини сеза бошлади. Баъзан чап эмчагининг ости шу қадар санчиб оғрирдики, бирпастда лаблари қақраб кетарди, додлаб юборишдан

ўзини зўрға тутиб қоларди. Охири у оғриқдан халос бўлиш чорасини ҳам топди: чап ёнини зах ерга бериб ётса ёки, кўйлагини совуқ сувга ҳўлласа, оғриғи секин-секин босилиб, жони ором оларди.

Шамол йўқ, ҳар куни ҳаво очиқ эди. Фақат аҳён-аҳёнда тип-тиниқ осмонда оппоқ барра булутлар пайдо бўлиб, уларнинг акси тошқин сувда оққувлар сингари сузиб ўтар ва олисдаги қирғоққа етганда ғойиб бўларди.

Қутурган дарёning қирғоқ яқинида кўпириб тўлқинланишини томоша қилишдан, унинг ҳайқирган, шовиллаган хилма-хил товушини эшитишдан яхши нарса борми? Қани энди ҳеч нарсани ўйламаса-ю, юракни эзадиган ҳамма нарсани унтишга ҳаракат этиб, сувнинг шовиллашини эшитиб томоша қилиб ўтираверса... Григорий сувнинг ғалати-ғалати бўлиб турланишини, гоҳ унақасига, гоҳ бунақасига буралиб оқишини соатлаб томоша қиласарди. Оқим дамба-дам шаклини ўзгартириб турарди: ҳалигина сув бетида синган қамиш, чириган барг ва кўкат илдизлари сузиб кетаётган текис жойда, бирпаста ғалати гирдоб пайдо бўлиб, ёнидан ўтган ҳамма нарсани дамига тортарди, салдан кейин гирдоб ўрнида сув бўтана бўлиб қайнар, гоҳ қорайган қиёқ илдизини, гоҳ эман баргини, гоҳ аллақайси ёқдан келиб қолган бир тутам похолни юзага чиқариб ташларди.

Оқшомлари гарб томонда уфқ тўқ-қизил рангда товланарди. Баланд теракнинг орқа томонидан ой кўтарилади. Унинг шуъласи садафдай жимир-жимир қилиб турган Дон узра узунасига ёйилар, лекин сув сатҳини шамол мавжлатган жойлар гоҳ йилтираб, гоҳ қорамтир тусга кириб парпирар эди. Кечалари бўлса, сувнинг шовиллаши орқасидан, шимолга учеб кетаётган беадад фоз галаларининг узлуксиз ғафиллагани эшитиларди. Ҳеч ким безовта қилмагани учун бу паррандалар кўпинча оролнинг нарёғига, шарқ томонидаги сувга қўнишарди. Шамол йўқ пайтларда сув босган ўрмон ёқдан эркак чурракларнинг ҳовлиқиб какиллагани, мода ўрдакларнинг ғиқиллагани, қаш-қалдоқ ва ғозларнинг секин-секин ғафиллагани эшитиларди. Бир куни Григорий оҳиста сув бўйига бо-

риб, оролнинг ёнгинасида сузиб юрган бир гала оққушни кўрди. Вақт эрта, ҳали қуёш чиқмаганди. Олисдаги бир туп дарахтлар ортида тонг эндигига яллиғланмоқда эди. Шафақнинг ёруғи сувда акс этгани учун сув қизариб кўринар, ҳаттоқи сувда сузиб юрган бу савлатли каттакон оққушлар ҳам пушти ранг бўлиб кўринарди; ҳаммаси мағрур бошини кун чиқар томонга бурган эди. Қирғоқ ёқда шитирлаган товушни эшитгач, улар карнай овозига ўхаш товуш чиқариб, ҳавога кўтарилишиди, ўрмондан ҳам баландроқ кўтарилигандан, қордан ҳам оппоқ, ажойиб патларининг йилтирашидан Григорийнинг кўзи қамашди.

Фомин ва унинг ҳамроҳлари ҳар қайсиси ўзича вақт ўтказарди: ишнинг кўзини биладиган Стерлядников, чўлоқ оёғини қулайроқ қўйиб олиб, эрталабдан кечгacha уст-бошини, этигини ямар, астойдил ҳафсала қилиб милтифини тозаларди; зах ерда ту nab ўрганмаган Капариннинг мазаси қочиб, куни билан офтобда ётар, пўстинини бошигача ўраб, ўҳҳўлаб ўйталарди; Фомин билан Чумаков қоғоздан карта қилволиб, ўйнidan бош кўтаришмасди; Григорий оролни айланар, сув бўйида узоқ ўтиришни яхши кўрарди. Улар кам гаплашишар (гаплашадиган гап ҳам қолмаган эди), фақат овқат маҳалида ва кечқурунлари Фоминнинг амакиваччаси келадиган вақтлардагина тўпланишарди. Ҳаммаси зерикib ўлиб бўлганди; оролга келгандаридан бери Григорий фақат бир мартағина Чумаков билан Стерлядниковнинг, негадир, чеҳралари очилиб курашаётганларини кўрди. Иккови анчагача бир жойда депсиниб, инқиллаб тўхтаб қолди, бир-бирига ҳазил-мутойиба гап отишди. Оёқлари тўпифигача оппоқ қумга ботиб кетганди. Чўлоқ Стерлядников Чумаковга қараганда кучлироқ бўлса ҳам, лекин Чумаковнинг ҳадиси зўр эди. Улар қалмоқчасига бел ушлашиб, кифт тирашиб курашар ва бир-бирининг оёғидан кўзларини олишмасди. Азбаройи зўриқанидан иккаласининг ҳам ранги оқариб, юзлари жиддийлашиб кетганди, энтикиб ва пишиллаб нафас олишарди. Григорий қизиқиб уларнинг курашини томоша қилди. Чумаков пайтини топиб бирданига ўзини чалқамчаси-

га ерга ташлади-ю, Стерлядниковни ҳам тортиб, бу-
килган оёқлари билан уни ўз устидан ошириб от-
ди. Кўз очиб юмгунча, кураш ҳадисини олган Чумаков
бургут каби Стерлядниковнинг устига чиқиб олди-да,
унинг елкасини қумга ниқтай бошлади. Стерлядников
нафаси қайтиб энтикар ва кулиб: «Оббо муғомбир-эй!
Бошдан ошириб отиш тўғрисида... келишганимиз йўқ
эди-ку!..» деб вағилларди.

— Жўжахўроздаги ўхшамай ўлинглар, бас энди, бе-
корга уришиб қолманлар тағин,— деди Фомин.

Бироқ улар уришишни хаёлларига ҳам келтириш-
масди. Иккиси апоқ-чапоқ бўлиб қўлтиқлашиб, қум
устига бориб ўтиришди, Чумаков хиргойи қилиб ёқим-
ли йўғон овоз билан шўх-шўх ашула бошлади.

Қаҳратон қиши совуғи,
Қамишзорда бўрини
Аямасдан тўнгдирдинг,
Кошонада бир қизни
Музлатдингу ўлдирдинг.

Стерлядников ингичка овоз билан унга жўр бўлди,
иккови баравар сайраб, қўшиқقا жон киргизиши:

Қора пўстин кўтариб
Бир қиз кела бошлади.
От минган ёш казакнинг
Елкасига ташлади.

Стерлядников қизишиб кетди: ўрнидан ирғиб тур-
ди-ю, чўлоқ оёғи билан қумни титиб, бармоқларини
қарсиллатганича ўйин тушиб кетди. Чумаков ашулани
тўхтатмасдан қиличини олди-да, қумни кавлай бош-
лади, чуқурча тайёр бўлгач:

— Шошма, чўлоқ ўлгур! Бир оёғинг калта экан,
текис жойда ўйин тушишга қийналяпсан...— деди.—
Сен ё ён бағирда ўйнашинг керак, ёйинки узун оёғинг
чуқурчада, калтаси сиртда туриши керак. Узун оёғинг-
ни чуқурчага тиқиб ўйнагин, қандай чиройли чиқиши-
ни кўрасан... Қани, бошла!

Стерлядников пешона терини артиб, соғ оёғини Чумаков қазиган чуқурчага қўйди.

— Ростданам яхши-ку, жудаям қулай бўларкан,— деди.

Чумаков кула-кула, чапак чалиб, ашулани тезлатиб юборди.

Стерлядников ҳам, ҳамма ўйинчилар сингари юзига жиддий тус бериб, балодай ўйнай бошлади, ҳатто-ки у чўккаalamоқчи бўлиб уриниб ҳам кўрди...

Кунлар бири бирига ўхшаб имиллаб ўтарди. Қоронғи тушиши билан ҳаммаси сабрсизланиб, Фоминнинг амакиваччасини кутишарди. Бешови сув бўйига тўпланиб, секин-аста гаплашар, шинель барларига пана қилиб папирос чекишарди. Улар яна бир ҳафта оролда туришга, ундан кейин кечаси Доннинг ўнг томонига ўтиб, ўзларига от топиб жануб сари йўл олишга қарор қилишганди. Эшитишларига қараганда жануб томонда аллақайси гўрдаям Маслакнинг шайкаси изғиб юрган бўлиши керак эди.

Фомин ўз қариндошларига, шу яқин орадаги қишлоқлардан қайси бирида минишга яроқли от борлигини билиб келишни топширди; бундан ташқари, округда бўлаётган ҳамма воқеалар тўғрисида кунига хабар бериб туришни тайинлади. Улар келтирган хабарлар ёмон эмасди: Фоминни Доннинг чап томонида қидириб юришгани, Рубежнийга қизил аскарлар келиб Фоминнинг уйини тинтишиб, ўша заҳотиёқ қайтиб кетишгани маълум бўлди.

— Бу ердан тезроқ йўқолишимиз керак. Бу ерда бизга пишириб қўйибдими? Эртагаёқ кета қолайлик, а!— таклиф этди Чумаков нонушта тепасида.

— Олдин қаерда от борлигини билишимиз керак,— деди Фомин.— Нимасига шошамиз? Овқатимиз жойида бўлганда-ю, қишигача қимирламай шу ерда ётаверардик. Уни қаранг, атрофимиз қандай гўзал! Олдин дам овлолайлик, кейин яна иш бошлаворамиз. Қўлларидан келса, қани, бизни тутиб олсин-чи, тириклиайн қўлга тушиб бўпмиз. Менинг аҳмоқлигимдан фойдаланишиб, бизларни тор-мор қилишди, ўзим ҳам пушаймонман, шундай алам қиладики, асти қўявер, бироқ масала унда эмас. Ҳали биз яна одам тўплаймиз!

Отга минамизу яқин орадаги қишлоқларни айланиб чиқамиз, бир ҳафтага қолмай, атрофимизга камида эллик одам тўпланади, элликка етгандан кейин юз бўлиши ҳеч гапмас. Қарабисизки, ҳамма ёқ одам!

— Бемаъни гап! Аҳмоқона умид!— қизишиб гапирди Қапарин.— Казаклар хиёнат қилишди, улар бизга эргашмади, энди ҳам эргашмайди. Шуни эркак-часига тан олиб ҳақиқатдан кўз юммаслик керак, аҳмоқона хаёлларга берилаверган билан фойда чиқмайди.

— Нима учун эргашмас экан?

— Шунинг учун: олдин эргашмадими, энди эргашиб бўлти.

— Йўқ, биз ҳали кўрсатиб қўямиз!— ўдағайлаб гапирди Фомин.— Мен таслим бўлмайман!

— Ҳаммаси қуруқ гап,— деди Қапарин бўшашиб.

— Бекор айтибсан, хомкалла!— деб бақириб юборди Фомин қизишиб.— Сен мунча ваҳима қиласан? Доим қарасам, минғиллаб кўз ёши қиласан, сур пашшаданам баттар жонимга тегдинг! Аҳволинг шу экан, нега олдин ўйламадинг? Қўзғолон кўтаришнинг нима кераги бор эди? Шу юрагинг билан нима қилардинг аралашиб? Қўзғолон кўтариш керак деб мени дастлаб сен йўлдан урганмасмидинг, энди ўзингни панага олмоқчимисан? Гапир, нега индамайсан?

— Сен билан гаплашадиган гапим йўқ, бетинг қурсин-эй, аҳмоқ!— деб Қапарин чинқириб юборди-да, бадани увишганидан пўстинга ўралиб, ёқасини кўтариб нарёқса кетди.

— Бу жанобларнинг ҳаммаси шунаقا, ўлгудай ноzik табиат. Сал нарсага қўлтиғидан тарвузи тушиб, сувга тушган нондек бўкиб қолади...— деди Фомин хўрсиниб.

Аллавақтгача улар чурқ этмасдаң, сувнинг бир меёрда шувиллашига қулоқ солиб ўтиришди. Уларнинг тепасидан иккита нар ўрдак қувлаган мода ўрдак ғафиллаб учиб ўтди. Бир гала қораялоқ чуғурлашиб сайҳонликка қўнмоқчи бўлиб пастланди-ю, бироқ одамларни кўриб, қоп-қора чилвир сингари эшилиб яна ҳавога кўтарилди.

Бирпастдан кейин Қапарин яна қайтиб келди.

— Мен бугун қишлоққа бормоқчиман,— деди у Фоминга қараб, кўзларини пирпиратиб.

— Нега?

— Ғалати савол! Қаттиқ шамоллаб, оёқда аранг турганимни кўрмаяпсанми ўзинг?

— Хўш, шамолласанг нима қипти? Қишлоқда тарқармиди?— деб сўради Фомин пинагини бузмасдан.

— Лоақал, уч-тўрт кеча иссиқроқ жойда ётмасам, аҳволим оғир.

— Ҳеч қаёққа бормайсан,—узил-кесил қилиб деди Фомин.

— Шу ерда ўлиб кетаверсам майлими?

— Ўзинг биласан.

— Нега энди бормас эканман? Ахир, ҳадеб совуқда турайверсам, бутунлай расво бўламан-ку!

— Қишлоқда қўлга тушсанг, нима бўлади? Унисини ҳеч ўйладингми? Ҳаммамиз қўлга тушамиз-ку. Кошки мен сени билмасам! Биринчи терговдаёқ сен бизни айтиб берасан, ҳа! Терговдан олдиноқ Вёшкига кетаётib йўлдаёқ айтасан.

Чумаков кулиб юборди-да, тўғри, дегандай бош қимирлатди. У Фоминнинг фикрига бутунлай қўшилганди. Бироқ Капарин ўжарлик қилиб:

— Йўқ, мен боришим керак. Бемаъни важларинг мени қаноатлантирмайди,— деди.

— Мен сенга айтдим-ку, ўтир қисиб...

— Ахир тушунсанг-чи, Яков Ефимович, мен ҳайвонлар сингари кун кечиришга ортиқ чидолмайман! Ўпкам яллиғланган, балки, зотилжам бошланган бўлсаем ажаб эмас!

— Тузалиб кетасан. Офтобда ётиб-ётиб, отдай бўп кетасан.

— Барибир мен бугун кетаман. Мени бу ерда обқолишга ҳеч қандай ҳақинг йўқ. Нима қилсанг ҳам кетаман, вассалом!— деди қатъий қилиб Капарин.

Фомин гумонсирагандай кўзларини сузив Капаринга қаради, Чумаковга кўз қисиб, ўрнидан турди.

— Сен, Капарин, ростданам касалга ўхшайсан... Иссиғинг баланд бўлса керак... Қани, бошингни ушлаб кўрай-чи, иссиғинг қалай экан? — у қўлини чўзиб, Капарин томон бир неча қадам қўйди.

Бироқ Қапарин унинг авзойидан нияти бузуқлигини фаҳмлаб, тисарилди-да:

— Яқинлашма!— деб чинқирди.

— Шовқин солма! Нега бақирасан? Мен иссиғингни кўрмоқчиман, холос. Мунча қўрқасан?— Фомин бир ҳамлада Қапариннинг гирибонидан ушлаб олди.— Таслим бўлмоқчимисан, аблаҳ?— деб ғудранди-да, Қапаринни ерга йиқитмоқчи бўлди.

Григорий бутун кучини ишга солиб, уларни зўрга ажратиб қўйди.

... Тушки овқатдан кейин Қапарин, ювган кирларини бута шохига илаётган Григорийнинг ёнига борди-да:

— Сиз билан овлоқда гаплашмоқчиман... Келинг, ўтирайлик,— деди.

Қапарин ўҳҳўлаб йўтала-йўтала, сўради:

— Анови аҳмоқнинг қилиғига нима баҳо берасиз? Бу даҳшат-ку! Ажратиб қўйганингиз учун чин кўнгилдан сиздан миннатдорман. Сиз олижаноблик қилдингиз, офицерга муносиб иш қилдингиз. Лекин мен ортиқ чидолмайман. Биз ҳайвон қаторига кирай деб қопдик... Иссик овқат емаганимизга қанча кун бўлди? Ҳаммасидан ҳам муздай зах ерда ётишни айтинг... Мен шамолладим, биқиним қаттиқ оғрияпти. Зотилжамга йўлиққан бўлсам керак. Олов ёнида ўтиргим, иссиқ уйда ётгим, ички кийимимни алмаштиргим келади... Тоза кўйлак, тоза чойшабни орзу қиласман денг... Йўқ, ортиқ чидай олмайман!

Григорий жилмайди:

— Сиз нима, урушдаям роҳатни кўзлайсизми?

— Менга қаранг, шуям урушми?!—деди, қизишиб Қапарин.— Бу уруш эмас, доимий кўчмәнчилик, айрим совет ходимларини ўлдириш, иннайкейин, яна қочқоч. Халқ бизни қўллаб-қувватласа, қўзғолон кўтарила, ана ўшандада уруш бўларди, бу уруш эмас, йўқ, мутлақо уруш эмас!

— Бошқа иложимиз йўқ! Таслим бўлишимиз сира мумкинмас, тўғрими?

— Тўғри, лекин нима қилиш керак?

Григорий кифтини қисди. Кўпинча шу оролда ён-

бошлаб ётган пайтларида миясига келадиган бир фикрни айтди:

— Турмадаги роҳатдан кўра, азоб чексанг ҳам озод юрган яхши. Биласизми халқдаги мақолни: турманинг иморати яхши-ю, лекин ҳеч бандани унга рўпара қилмасин, дейди халқ.

Капарин қўлига чўп олиб қумга аллақандай нарсаларнинг суратларини солди, анчагача индамай ўтириди-да, ахири гапга тушиб кетди:

— Таслим бўлиш шарт эмас, бошқа бирон йўл тошиш, большевикларга қарши курашнинг янги усулларини излаш керак. Бу пасткаш кишилар билан бир йўла хайрлашиш керак. Сиз — интеллигент кишисиз.

— Менинг интеллигентлигим қаёққа бораради,—деб кулди Григорий.— Бу сўзга тилим зўрға келади-ю!

— Сиз офицерсиз.

— Адашиб офицер бўпқолганман.

— Йўқ, ҳазиллашманг, сиз ахир офицерсиз, офицерлар орасида юриб, ҳақиқий одамларни кўргансиз, сиз ахир Фомин сингари совет тузини ичиб амалга минганд эмассиз, ана шунинг учун ҳам, бу ерда қолишимиздан ҳеч қандай наф йўқлигини тушунишингиз лозим. Жонида қасди бор одам бу ерда туриши мумкин. Фомин ўрмон ёқасида бир карра бизни балога йўлиқтирди, агар бундан бўён ҳам ўз тақдиримизни шунга боғлайдиган бўлсақ, яна бир балога рўпара қилади. Тўғрисини айтганда, у қутурган ҳайвон, бунинг устига, жиннилиги, овсанлиги ҳам бор! Ундан ажрамасак, қириламиз!

— Демак, таслим бўлиш эмас, Фоминдан қочиши керак, шундайми? Қайга борамиз? Маслак ёнигами?— деб сўради Григорий.

— Йўқ. У ҳам шунга ўхшаган бир авантюрист, фаякат у кенгроқ миқёсда иш кўради, холос. Ҳозир мен бу масалага бошқача қарайман. Маслак ёнига боришининг ҳожати йўқ...

— Хўш, қаерга бориш керак?

— Вешенскаяга.

Григорий энсаси қотганидан кифтини қисиб деди:

— Яна эски ҳаммом—эски тос денг, бу менга тўғри келмайди.

Капарин кўзларини аланг-жаланг қилиб унга тикилди:

— Сиз гапимга тушунмадингиз. Сизга ишонсам бўладими?

— Ҳа.

— Офицерчасига сўз берасизми?

— Казакчасига сўз бераман.

Капарин кетига бурилиб, Фомин билан Чумаков турган томонга қаради, улар билан оралари анча узоқлигига ва буларнинг галини эшитиши асло мумкин эмаслигига қарамай, овозини жуда пасайтириб гапира бошлади:

— Мен сизнинг Фомин ва бошқалар билан алоқанигиз қандайлигини биламан. Сиз ҳам мен каби улар орасида ноилож юрган одамсиз. Сизни Совет ҳукуматига қарши чиқишга мајбур этган сабаблар мени мутлақо қизиқтирумайди. Агар тўғри тушунсан, ўтмишдаги ишларингиз ва қамоқдан қўрққанингиз бунга сабаб бўлса керак, шундай эмасми?

— Ўзингиз ҳозир сабаби мени қизиқтирумайди, дедингиз-ку.

— Ҳа-я, тўғри айтасиз, энди ўз тўғримда икки оғиз гапириб берай. Мен илгари офицер бўлиб, социалист-революционерлар¹ партиясига аъзо эдим, кейинчалик мен ўз сиёсий маслагимни қайтадан кўриб чиқдим... Россияни фақат монархия қутқара олади.Faқат монархиягина! Парвардигор ватанимиз учун ўзи шу йўлни кўрсатмоқда. Совет ҳокимиятининг эмблемаси болға ва ўроқ, шундайми?— Капарин қумга ёзди: «Молот, серп», сўнгра у ўтдай чақнаган кўзлари билан Григорийнинг юзига қаттиқ тикилди:— Тескарисига ўқиб чиқинг-чи!² Ўқидингизми? Энди тушундингизми? Фақат тож-тахтнинг тикланиши билан гина революция ва большевиклар ҳокимиятига хотима берилади. Биласизми, шу нарсани билган заҳотим, бир-

¹ Эсерлар партияси.

² «Престлом»— яъни тахт билан, деган маъно чиқади.
(Тарж.)

данига мени тушуниб бўлмайдиган аллақандай мистик ваҳима босди! Дағ-дағ қалтирай бошладим, чунки бу, мен сизга айтсан, қудрат қалами билан ёзилган амр: мана шу йўл билангина сарсону саргардонликдан холос бўласиз, дейилган...

Капарин азбаройи ҳаяжонланганидан энтикиб, дами ичига тушиб кетди. Ўнинг ўткир телбанамо кўзлари Григорийга тикилганича қотиб қолганди. Бироқ Григорий бу кашфиётдан ларзага келмади ҳам, ҳеч қандай мистик ваҳима босганини сезмади ҳам. У доим ҳар бир нарсани ақл тарозисига солиб кўришга ўргангани учун шундай жавоб берди:

— Бу қудрат қалами эмас. Сиз герман уруши вақтида фронтда бўлганмисиз?

Саволдан довдираб қолган Капарин бирданига жавоб бермади.

— Кечирасиз, нима учун буни сўрадингиз? Йўқ, умуман бевосита фронтда бўлганмасман.

— Ахир уруш даврида қаерда яшагансиз? Мамлакат ичкарисидами?

— Ҳа.

— Доим, а?

— Ҳа, йўқ, кечирасиз, доим эмас, аммо лекин аксарият...

— Мен ўн тўртинчи йилдан тортиб то шу бугунгача фронтдаман. Энди сиз айтган қудрат қаламига келайлик... Ўзи йўқ худонинг қудрат қалами қандай бўлсин? Мен бундай аҳмоқона гапларга ишонишни аллақачон йиғиширганман. Ўн бешинчи йилда уруш фалокатларини кўра-кўра, худо йўқ деган қарорга келганман. Мутлақо йўқ! Агар худо бўлса, одамлар бошига шунчалик мусибат келтиришга нима ҳақи бор? Биз, фронтчилар худонинг паттасини қўлига бериб юборганимиз, уни қари-қартанг, хотин-халажларга топширганимиз. Шулар овина қолсин! Ҳеч қандай қудрат қалами ҳам йўқ, монархиянинг ҳам қайта тикланиши мумкинмас. Ҳалқ уни абадий йўқ қилди. Манови ҳарфларни тескарисича ўқиб, сиз кўрсатган нарсायем мени, кечирасиз, анчайин болалар ўйини, лўтибозликдан бошқа нарсамас. Лекин мен бир оз англолмаяпман, нима мақсадда буларни орага суқяпсиз?

Сиз менга солдатча, калта қилиб гапириңг. Мен юнкерлар мактабида ўқиганмасман, номим офицер бўлсаям, унчали саводхон эмасман. Саводим яхши бўлганда, балки, сизлар билан бу оролда, чор атрофини сув ўраб олган оролда бўри сингари шумшайиб ўтирамасдим,— деб, пушаймон бўлгандек гапини тамомлади Григорий.

— Бунинг аҳамияти йўқ,— деди Қапарин шошиб-пишиб.— Сиз худога ишонасизми, йўқми, гап унда эмас. Бу маслагингизга, виждонингизга боғлиқ нарса. Чинини айтганда, сиз монархистми, дума тарафдорими ёинки, ўз мўстақиллигини ёқловчи казакмисиз — бунинг ҳам ҳеч қандай аҳамияти йўқ. Биз учун муҳими шуки, икковимиз ҳам Совет ҳокимиятига нисбатан бир хил фикрдамиз. Бу гапимга қўшиларсиз?

— Гапираверинг.

— Биз казакларнинг ёппасига қўзғолон кўтаришидан умидвор бўлгандик, шундайми? Умидимиз пучга чиқди. Энди бу мушкул аҳволдан бир амаллаб чиқвотишмиз лозим. Большевикларга қарши кейинчалик ҳам курашавериш мумкин, бунинг учун аллақандай бетайнин Фоминнинг бизга бошлиқ бўлиши шарт эмас. Ҳозирги шароитда биз учун энг муҳим нарса — жон сақлаш; шу мақсадда мен сиз билан иттифоқ тузмоқчиман.

— Қанақа иттифоқ? Кимга қарши?

— Фоминга қарши.

— Гапингизга тушунмадим.

— Жудаям осон гап. Икковимиз тил биритириб шерик бўламиз...— Қапарин қаттиқ ҳаяжонлангани учун энтикиб нафас оларди.— Икковимиз анови уч кишини ўлдирамизу Вешенскаяга жўнаймиз. Тушундингизми? Шу иш бизни қутқазади. Совет ҳукуматига кўрсатган бу хизматимиз учун биз жазодан қутуламиз. Тирик қоламиз! Тушуняпсизми, тирик қоламиз!. Уз ҳаётимизни сақлаб қоламиз! У ёғи маълум: пайтини топиб келгусида яна большевикларга қарши чиқамиз. Лекин бу бадбаҳт Фоминникига ўхшаш авантюрадамас, чинакам ҳаракат бошланганда. Розимисиз? Шуни билиб қўйингки, ҳозирги мушкул аҳволдан қу-

тулишимиз учун бирдан-бир йўл — шу, лекин йўл бўлгандаям энг чиройлиги.

Григорий ичида нафратланиб, ғазаби қайнаб турган бўлса-да, ўзини аранг босиб сир бой бермасликка ҳаракат қиласади.

— Буни қандай бажариш мумкин? — деб сўради у.

— Мен ҳаммасини ўйлаб чиққанман: биз уларни кечаси тўғрилаймиз, ўқ узмасдан, қилич билан... Эртаси куни кечқурун анови казак овқат обкелиши билан, қайиқда Дондан ўтиб оламиз, вассалом. Ҳаммадан ҳам ўнғайлигини айтмайсизми, ҳеч қандай ҳийла-ю найранг керак бўлмайди.

Григорий содда муғомбирлик билан илжайиб гапирди:

— Жуда соз! Ростини айтинг, Капарин, эрталаб қишлоққа бориб исинаман, деганингизда... Вёшкига жўнамоқчимидингиз? Фоминнинг гумони тўғримиidi?

Капарин соддадиллик билан жилмайиб турган Григорийнинг юзига зеҳн солиб тикилди-да, бир оз хижолат тортгандай ғамгинлик билан ўзи ҳам жилмайди.

— Ростини айтсан — тўғри! Биласизми, қандай қилиб жон сақлаш масаласи кўндаланг турганда, киши ҳеч нарсадан ҳазар қилмайди.

— Бизларни айтиб берармидингиз?

— Ҳа,— деб иқорор бўлди Капарин.— Аммо лекин, сизни шу ерда, шу оролда қамоққа олишса, мен шахсан сизни оқлашга ҳаракат этардим.

— Бир ўзингиз ҳаммамизни нега ўлдириб қўя қолмадингиз? Кечаси буни осонгина қилиш мумкин эди.

— Қўрқдим. Биринчи ўқдан кейиноқ бошқалар...

— Қуролни ташла! — деди Григорий, овозини қаттиқ чиқармасдан, наганини суғуриб... — Ташла, йўқса ўтирган жойингда отиб ташлайман! Мен ҳозир ўрнимдан туриб, сени тўсиб тураман, Фомин кўрмасин, сен наганингни оёғим тагига ташлайсан. Қани? Отаман деб овора бўлма! Қимирласанг — ўласан.

Капарин мурдадай оқариб ўтиради.

— Мени ўлдирманг! — бўзарган лабларини қимирлатиб шивирларди у.

— Ўлдирмайман. Лекин қуролингни оламан.

— Сиримни ошкор қиласиз энди...

Капариннинг соқол босиб кетган икки бетидан тирқираб ёш оқарди. Григорий ҳам жирканиб, ҳам раҳми келиб, афтини бужмайтириди-да, баланд овоз билан буюрди:

— Ташла наганни! Айтишим керак эди-ю, лекин айтмайман, қўрқма! Шум экансан-ку! Вой, шайтон-эй.

Капарин тўппончасини Григорийнинг оёғи ёнига ташлади.

— Браунинг-чи? Браунингниам ол бу ёқقا. Френ-чингнинг кўкрак чўнтағида турибди.

Капарин ярқироқ никель браунингни чиқариб ерга ташлади-да, қўллари билан юзини тўсиб олди. У қалт-қалт қилиб, ҳиқиллаб йиғларди.

— Бас қилсанг-чи, аblaҳ! — деб ўшқирди Григорий. Қўли қичиб турса ҳам мушт солишдан ўзини аранг тийиб қолди.

— Ановларга айтасиз.. соб бўлдим.

— Айтмайман, дедим-ку сенга. Лекин оролдан нарёқса ўтиб олганимиздан кейин қорангни кўрсатмагин. Сендай одам ҳеч кимга керакмас. Ўз аравангни ўзинг торт.

Капарин қўлларини юзидан олди. Қип-қизил жиқ-қа ёш юзи, шишган кўзлари, қалтираган пастки жағи ва умуман башараси жуда хунук эди.

— Ундай бўлса... Нега мени қуролсизлантиридингиз? — дудуқланиб сўради у.

Григорий истар-истамас жавоб берди:

— Орқамдан отиб қўймасин деб шундай қилдим. Сендақа ўқимишли кишилардан ҳар нарсани кутиш мумкин... Боядан бери қудрат қалами, подшо, худо тўғрисида менга гап солганига ўлайми... ўзингам чала туғилган бузоққа ўхшайсан.

Григорий энди Капаринга қайрилиб ҳам қарамасдан, тупурина-тупурина, турар жойлари томон кетди.

Стерлядников ҳуштак чалиб, мумланган пишиқ ип билан эгар қайишини тикарди. Фомин билан Чумаков ҳар доимгида, тўқим устида карта ўйнашарди.

Фомин Григорийга бир қараб қўйди-да:

— Сенга нима деди у? Нима тўғрида гаплашдинглар? — деб сўради.

— Турмушдан нолиб ҳасрат қилди.. Валдирайды холос, гапининг тайини йўқ...

Григорий ваъдасида туриб Қапариннинг сирини очмади. Лекин кечқурун ҳеч кимга билдирамай унинг милтиғидан затворни олиб, яшириб қўйди. Ётишга ҳозирланаркан: «Ким билсин, кечаси бир балони бошлашдан ҳам тоймайди бу...» деган фикр миясига келганди.

Эрталаб уни Фомин уйғотди. У энгашиб секин сўради.

— Сен Қапариннинг қуролини олганмидинг?

— Нима? Қандай қурол?— Григорий ўрнидан туриб ўтириб, аранг кифтларини кериб қўйди. У тонготарга яқин уйқуга кетган ва эрталабки аёзда совқотиб қолган эди. Шинели, папоғи, этиклари — ҳаммаси эрталабги шудрингдан ҳўл бўлганди.

— Қуролини тополмаяпмиз. Сен олдингми? Кўзингни очсанг-чи, ахир, Мелехов!

— Ҳа, мен олдим. Ўзи нима гап?

Фомин индамай нари кетди. Григорий ўрнидан туриб, шинелини силкитди. Чумаков нарироқда нонушта тайёрламоқда эди: у биссотларида бўлган ёлғиз товоқни чайқади, бир буханка нонни кўксига қўйиб туриб, баб-баравар тўрт бўлак қилиб кесди, товоққа кўзадан сут солди-да, қотиб қолган сўк бўтқани қошиқ билан эзиб, Григорийга қаради:

— Бугун жудаям кўп ухладинг, Мелехов. Офтобга қара, қаерга келди!

— Виждони пок одам доим яхши ухлайди,— деди Стерлядников, ювилган ёғоч қошиқларни шинель этағига артаётиб.— Қапарин бўлса, туни билан ухлаёлмай, ёнбошдан ёнбошга афдарилиб чиқди...

Фомин кулимсираб Григорийга қаради.

— Ўтиринглар, қароқчилар, нонушта қиласиз!— таклиф этди Чумаков.

У ҳаммадан олдин овқатга қошиқ урди, бир тишламда бир тўғрам ноннинг ярмиси оғзига кетди. Григорий ўз қошигини олди, ҳаммага бир-бир қараб чиққач:

— Қапарин қани?— деб сўради.

Фомин билан Стерлядников овқатдан бошларини

кўтаришмас, Чумаков Григорийга қаттиқ тикилар, у ҳам чурқ этмасди.

Григорий кечаси нима ҳодиса рўй берганини тахминан англаб:

— Капаринни нима қилдинглар!— деб сўради.

— Капарин ҳозир узоқда,— пинагини бузмай кулиб жавоб берди Чумаков.— У Ростовга сузиг кетди. Ҳозир Усть-Хопер ёнида лопиллаб кетяпкан бўлса керак... Пўстини осиғлик турибди, ҳув ана.

— Ростдан ўлдирингларми??— деб сўради Григорий Капариннинг пўстинига кўз ташлаб.

Буни сўрамаса ҳам бўлар эди. Нима воқеа юз бергани аниқ кўриниб турса-да, у негадир савол берган эди. Тезда жавоб беришмагани учун у саволини таърорлади.

— Ҳа, ўлдирдик,— деди-да, Чумаков, қиз боланикдай чиройли кўкимтири кўзларини юмди.— Мен ўлдирдим. Қасбим — одам ўлдириш...

Григорий унга зеҳн қўйиб тикилди. Қорамағиздан келган тип-тиниқ, қирмизи юзи хотиржам, ҳаттоқи қувноқ кўринарди. Тилла каби товланган новвот ранг мўйлови қўёшда қорайган юзидан яққол кўзга ташланиб туар ва қора қошлири билан орқасига қарата тараган соchlарини янада қорароқ қилиб кўрсатарди. Фомин бандасида жаллодлик билан ном чиқарган бу йигит ҳақиқатан ҳам чиройли, сиртдан қараганда жуда камтар кўринар эди... У қошиқни брезент устига қўйди, кафтининг орқа томони билан мўйловини силаб:

— Яков Ефимовичга раҳмат дегин. Сенинг жонингга ўша оро кирди, йўқса, сен ҳам ҳозир Капарин билан Донда сузиг кетаётган бўлардинг...— деди.

— Нега энди?

Чумаков шошмасдан, доно-дона қилиб гапира бошлади:

— Авзойига қарасак, Капарин таслим бўлмоқчи, кеча алланима тўғрисида сен билан узоқ гаплашди... Шунинг учун Яков Ефимич иккимиз уни бир ёқлик қилмоқчи бўлдик. Бунга ҳамма гапни очиб гапираверсан бўладими?— Чумаков савол назари билан Фоминга қаради.

Фомин, ҳа мумкин, дегандай қилиб бош қимирлатди, шундан кейин Чумаков чала пишган сўкни тишлари билан қисирлатиб гапида давом этди:

— Кеча кечқурун мен эман сўйил тайёрлаб, Яков Ефимовичга: «Мен бугун кечаси икковиниям, Капариниям, Мелеховниям саранжом қиласман» дедим. Бироқ у: «Капаринни ўлдиравер, лекин Мелеховга тегма» деди. Шунга келишдик. Мен Қапариннинг ухлашини пойладим, мундоғ қулоқ солсам, сен ҳам хуррак отяпсан. Эмаклаб ёнига бордиму, бошига сўйилминам сопқолдим. Бечора штабс-капитан оёғиниям қимирлатмади. Бир керилди-ю, жон таслим қилди... Ёнларини тинтиб кўрдим, сўнгра, оёқ-қўлидан кўтариб, дарё бўйига обордик, этигини, френчини, калта пўстинини ечиб олдигу, ўзини сувга ташладик. Сен бўлсанг уйқуни уриб ётибсан, ҳеч нарсани сезмадинг ҳам... Мелехов, кечаси ажал тепангга келганди. Яков Ефимич, тегмагин, деб тайнинлаган бўлсаям, феълим айнади: «Иккови нимани гаплашган экан? Беш кишидан иккитаси четга чиқиб, пичир-пичир қилгандан кейин охири бахайр бўлмас...» дедиму биқиниб ёнингга бордим, энди урмоққа чоғланиб сўйилни кўтарганимда ўлланиб қолдим: уришга урарсану, лекин биттада саранжом қилолмасанг, бу бадбаҳт тўнғиздан кучли, иргиб туриб ўқ отушга бошлайди... Шу пайт Фомин тепамга келиб яна ишни бузди: «Бунга тегма, у ўз одамимиз, бёмалол ишониш мумкин»,— деб шивирлади. Шуниси қизиқки, Қапариннинг қуроли қайга кетганини тушунолмай ҳайрон бўлдик. Шундай қилиб, сендан нари кетдим. Ўзинг ҳам қаттиқ ухларкансан, ҳеч балони сезмадинг-а!

Григорий пинагина бузмай:

— Бекордан-бекорга бегуноҳ одамга зомин бўлардинг, тентак! Мен Қапарин билан тил биритирган эмасман,— деди.

— Ундай бўлса, нега унинг қуроли сенда?

Григорий кулди:

— Мен унинг тўплончаларини кундузиёқ обқўйган эдим, затворни кечқурун олиб, тўқим тагига яшириб қўйдим.

Григорий Капарин билан бўлган кечаги суҳбатни ва унинг қандай ниятда эканини гапириб берди.

— Нега шуни бизга кеча айтмадинг? — деди Фомин, хафа бўлиб.

— Раҳмим келди мишиқига,— деб ростини айтди Григорий.

— Эҳ, Мелехов, Мелехов! — чин кўнгилдан таас-суфланиб гапирди Чумаков.— Раҳмдилликни йиғишириб, ўша Капарин милтигининг затворини қўйган жойга — тўқим тагига қўйғин, йўқса, шу раҳмдиллигинг бошингга етади!

— Сен менга ўргатма! Сенчалик биламан,— деди Григорий совуққина қилиб.

— Ўргатишни менга ким қўйибди? Аммо лекин, ана шу раҳмдиллигинг сабаб бўлиб, борди-ю, кечаси сени бекордан-бекорга у дунёга юборганимда, нима бўларди?

— Нима бўларди, кетаверардим, — ўйланиб туриб оҳиста жавоб берди Григорий. Сўнгра у, бошқаларга эмас, ўзига ўзи гапиргандай қилиб: — Одамзод ўнгида ўлимдан қўрқади, лекин уйқуда ўлишдан осон нарса бўлмаса керак... — деди.

XV

Апрель ойининг охирларида улар қайиққа тушиб, Дондан ўтиб олишди. Рубежнийда уларни Нижне-Кривск қишлоғидан бўлган казак йигит — Александр Кошелев қирғоқда кутиб турарди

— Мен сизга қўшиламан, Яков Ефимич. Уйда ёта-вериш жонимга тегди,— деди у Фомин билан кўришаётib.

Фомин Григорийни тирсаги билан туртиб шивирлади:

— Кўрдингми? Айтувдим-ку... Оролдан бу ёққа ўтар-ўтмас халқ кела бошлади — мана! Бу йигит менинг танишим, ботир казак. Бу яхшилик аломати! Демак, ишимиз ўнгидан келади!

Фоминнинг хурсанд бўлиб илжаяётгани овозидаң билиниб турарди. Янги шерик топгани учун у ғоят мамнун эди. Дарёдан эсон-омон ўтилгани, ўша заҳотиёқ

яна бир одам келиб қўшилгани унга далда бериб, кўнглида янги-янги умидлар пайдо қилган эди.

— Ие, сенда милтиғу нагандан бошқа қилич билан дурбин ҳам борми дейман? — суюниб, деди Фомин, қоронғида Кошелевнинг қурол-яроғини пайпастлаб кўраркан.— Мана буни казак деса бўлади! Асл казаклиги, қони тозалиги кўриниб турибди.

Фоминнинг амакиваччаси кичкина от қўшилган аравани ҳайдаб, дарё бўйига келди.

— Эгарларни аравага ортинглар,— деди у овозини пасайтириб.— Тезроқ қимирланглар, вақт ҳам кетди, йўлимиз ҳам олис...

У ҳовлиқар, тез бўл деб қистарди, бироқ Фомин оролдан бу ёққа ўтгач, ўз қишлоғининг ҳидини сезиб, бирор соатга уйига боргиси, таниш ҳамқишлоқларини кўргиси келиб ўлиб турарди...

Тонготардан олдинроқ улар Ягодное қишлоғи ёнидаги уюрдан энг яхши отларни ажратиб олиб, эгарлашди. Йилқи боқиб юрган чолга Чумаков шундай деҳди:

— Отлар учун кўп қайғурма, буважон. Бир пулга арзимайдиган отлар экан, вақтинча миниб турамиз, тузукроғини топган заҳотиёқ биз буларни эгаларига қайтариб берамиз. Мабодо, отларни ким обкетди? — деб сўрашса, краснокутлик милиция обкетди, дегин. Эгалари ўша ерга боришин... Биз бандитлар кетидан қувлаб юрибмиз, шундай дегин!

Катта йўлга чиққанларидан кейин, Фоминнинг амакиваччаси билан хайрлашиб, чапга бурилишида, отларни йўрттириб, фарби-жанубий томонга кетишиди. Одамларнинг гапига қараганда, шу яқин кунларда Мешков станицаси теварагида Маслакнинг бандаси пайдо бўлганди. Фомин унинг тўдасига қўшилиш ниятида ўша томонга жўнади.

* * *

Улар уч сутка Маслак шайкасини излаб, катта қишлоқ ва станицаларга яқинлашолмай, чап қирғоқдаги дашт йўлларида изғиб юришди. Қаргин станицаси билан чегарадош тавричанлар посёлкасида ёмон отла-

рини тавричанларнинг семиз ва учқур арғумоқларига алишириб олишди.

Тўртинчи куни эрталаб Вежа қишлоғидан нарироқда, Григорий олисдаги давондан тушиб келаётган бир колонна суворийларни кўриб қолди. Йўлда икки эскадронча аскар келарди, олдинда ва икки ёнбошида майда-майда разъездлар бор эди.

— Ё Маслак, ё...—Фомин дурбинни кўзига қўйиб қаради.

— Ё қорни оч, ёки тўқ, ё келади, ёки йўқ,— деб кулади Чумаков.— Яхшироқ қарагин, Яков Ефимович, агар улар қизиллар бўлса, тезроқ қочиб олганимиз маъқул!

— Кимлигини бу ердан билиб бўладими?— деди хуноб бўлиб Фомин.

— Қаранглар! Улар бизни кўрди! Разъезддан чопиб келяпти!— деб бақирди Стерлядников.

Буларни ҳақиқатан ҳам пайқаб қолишганди. Унг ёқда келаётган разъезд отларини шартта буриб, шу томонга йўртиб келаверди. Фомин шоша-пиша дурбинни филофига солди, бироқ Григорий илжайиб энгашдида, Фомин отининг жиловидан ушлади:

— Шошмай тур! Яқинроқ келишсин. Улар фақат ўн икки киши экан. Олдин кимлигини билайлик, қизиллар бўлса, қочиб қутулиш осон. Отларимиз чарчамаган, нимасидан қўрқасан? Дурбинга қара!

Ўн икки отлиқ минут сайин яқинлашиб келар, тобора каттароқ кўринар эди. Ям-яшил ўт қоплаган дўнг ён бағрида уларнинг гавдаси аниқ кўрина бошлади.

Григорий ва бошқалар сабрсизлик билан Фоминга тикилишарди. Лекин унинг дурбин ушлаган қўли қалтқалт қилиб турарди. Зўр бериб дурбинга тикилаверганидан унинг офтобга ўгирилган бетидан ёш оқа бошлади.

— Қизиллар! Фуражкаларида юлдузи бор!..— деб бақирди ниҳоят Фомин ва дарҳол отини бурди.

Қоч-қоч бошланди. Уларнинг кетидан аҳён-аҳёнда ўқ узилгани эшитиларди. Тўрт чақирим жойгача Григорий ўқтин-ўқтин кетига бир қараб, Фомин билан ёнма-ён борарди.

— Ана Маслакка қўшилиш!..— деди у ачитиб.

Фомин фириңг дея олмай қолди. Чумаков от жиловини сал-пал тортиб бақирди:

— Қишлоқлар ёни билан қочиш керак. Вешенская ўрмонига бекинамиз, ўша ёқ яхши, қалин түқайзор.

Яна бир неча чақирим шу аҳволда тез чопиладиган бўлса, отларнинг таппа-таппа ташлаши муқаррар эди.

Чўзилган бўйинлари совундай кўпириб, терилари қатлам-қатлам бўлиб кетди.

— Секинроқ ҳайдаш керак! Жиловини тортиброқ јор! — деб команда берди Григорий.

Кетларидан қувган ўн икки отлиқдан фақат тўққиз киши қолди, учтаси орқада қолиб кетди. Григорий орадаги масофани кўз билан чамалаб кўриб:

— Тўхтанглар! Уларни ўққа тутамиз!.. — деб бақирди.

Бешови ҳам отларини елдириб кетаётиб эгардан тушишди, милтиқларини елкадан олишди.

— Жиловни қўйворма! Чап ёқдаги энг четки одамни доимий мўлжалга олиб... ўт оч!

Улар бир обоймадан ўқни отиб тамомлашди, қизил аскарлардан бирининг отини қулатиб яна қочишга тушишди. Таъқиб этувчиларнинг ҳафсаласи пир бўлиб, онда-сонда олисдан туриб ўқ узишарди, ниҳоят, бутунлай қолиб кетишиди.

Стерлядников қамчиси билан олисдан кўм-кўк бўлиб кўринган даштдаги ҳовузни кўрсатиб:

— Ҳув анови ҳовуздан отларни суғориб олиш керак, — деди.

Улар энди отларни секин юргизиб борар, йўлда учраган жару сойларни яхшилаб кўздан кечиришар, пастқам жойлардан писиб боришарди.

Ҳовузда отларини суғориб, яна йўлга тушишди, олдин секин-аста юриб, кейин йўрттириб кетишиди. Туш маҳалида улар, даштни ёндамасига кесиб ўтган кўм-кўк-сой бўйидаги ён бағирликка етгач, отларни ўтлатиб олмоқчи бўлишди. Фомин Кошелевга, ёнларидағи дўнгга чиқиб, ўша ердан атрофни кузатиб ётишни букурди. Даштнинг бирор ерида отлиқлар қораси кўриниши билан Кошелев сигнал бериши ва дарҳол отлар ёнига чопиб келиши лозим эди.

Григорий отини тушовлаб ўтга қўйворди-да, ўзи

тепа ён бағридан қуруқроқ жой топиб, ёнбошлаб олди.

Жарнинг кунгай томонидаги майса ўт ўсиқ ва қалироқ эди. Офтобда қизиган қора тупроқнинг иссиқ нафаси гуллаб бўлаёзган дашт бинафшаларининг ноzik ва муаттар ҳидини босиб кета олмасди. Улар ташландиқ бўз ерда, қуриган қашқабеда поялари орасидан, қадимги уватлар четидан ўсиб чиқиб, мунчоқдай сочилиб ётарди, ҳаттоки тошдай қўриқ ердаги сарғайган бултурги ўтлар орасидан ҳам бинафшаларнинг қиз боланикидай тип-тиниқ ҳаво ранг кўзлари мўралаб турарди. Бу бепоён кимсасиз даштда очилган бинафшаларнинг қисқа умри тугаб, жар бўйларидаги шўр тупроқда гуллайдиган ранг-баранг лолаларга навбат келганди; улар қирмизи, тарғил ва оппоқ қадаҳларини қуёшга тутиб салом қилишар, ўшанда шамол хилмаяхил гуллар бўйини даштнинг энг узоқ жойларига дувор учирив борарди.

Жар соясидаги қуёш тушмаган шимолий томондаги тик ён бағирликда эса остидан эрий бошлаган яхлит-яхлит қорлар ҳали ҳам ётарди. Ўша ёқдан қор соvuғи келарди, лекин шу совуқ туфайли гулини тўқа бошлаган бинафшаларнинг ноаниқ ва ҳазин бўйи янада муаттарроқ туюлар, гўё аллақандай бир азиз, қадимги хотирани эслатаётганга ўхшарди...

Григорий кўксини ерга бериб, оёқларини икки ёққа узатганича, қўлларини жағига тираб ётар, кўзларини гоҳ у ёққа, гоҳ бу ёққа югуртирап: қуёш нурига чўмган даштни, олисдаги чўққида кўринган кўкимтири қоровул тепаларни, ён бағирлик атрофида товланиб жимирлашган буғларни томоша қилиб тўймасди. Бирпас кўзини юмиб, олис ва яқинда сайраётган тўрғайларнинг ноласини тинглар, ўтлаб юрган отларнинг астаста қадам қўйгани, пишқиргани, сувлиқлари шилдирагани, ҳаттоки, майса кўкатлар орасида шабада эсгани ҳам қулоғига чалинарди... Григорий заранг ерга бағрини бериб ётаркан, дунё ташвишларини унутиб, кўнгли таскин топганини ҳис қиласди. Бу ҳолат унга таниш эди. Ҳар сафар бирон фалокатни бошдан кечиргандан кейин, албатта, шу ҳолатга тушар ва ўшанда теварагидаги ҳамма нарсани гўё, биринчи

марта кўраётгандай бўларди. Гўёки, қаттиқ ҳаяжондан кейин бутун вужуди кўзу қулоқса айлангандай, илгари эътибор берилмаган нарсалар энди унинг бутун диққатини ўзига жалб этарди. Мана ҳозир у аллақандай бир кичкиноти паррандани қувган қирғийнинг қияламасига шувиллаб учишини ҳам, икки тирсаги орасидаги масофани аранг босиб ўтаётган қора қўнғизнинг имиллашини ҳам, қиз боланинг ҳуснидай очилган қип-қизил лоланинг шамолда оҳиста тебрашишини ҳам қизиқсиниб томоша қиласарди. Лола унинг ёнгинасида, ўпирилган суғур иининг четида ўсган эди. Кўл узатса, узиб олиши мумкин эди, бироқ Григорий унга тегмас: гулнинг чиройини, қалин баргларини, барг орасида сақланиб қолган эрталабки шабнам дурдоналарини завқланиб жимгина томоша қиласарди! Шундан сўнг осмонга қарап, эгасиз қолган суғурлар макони устида, осмон-фалакда парвоз этиб юрган бургутга узоқ тикилар, ҳеч нарсани ўйлагиси келмасди...

Икки соатдан кейин улар яна отга минишиб, кечгача Елан станицасига қарашли таниш қишлоқлардан биронтасига етиб олиш мақсадида йўлга тушишди.

Қизил аскарлар буларнинг қайси томонга кетганини телефон орқали маълум қилган бўлсалар каракки, Каменка слободасига кираверишда сойнинг нариги ёғидан уларни ўққа тутиб қолишли. Ўқ визиллаганини эшитган ҳамон, Фомин отини бурди. Ўқлар товуши остида улар слободанинг чети билан қочишиб, сал вақтдан кейин Вешенскаяга қарашли йилқи боқиладиган яйловга етишди. Топкая Балка посёлкасининг нарёғида милиция отряди уларнинг йўлини тўсмоқчи бўлди.

— Чап ёндан айланиб ўта қолайлик,—деди Фомин.

— Ҳужум қиласиз,—деди Григорий қатъийлик билан.— Улар тўққиз киши, биз бештамиз. Ёриб ўтамиз!

Чумаков билан Стерлядников унинг гапини маъқуллади. Қиличларини яланғочлаб, чарчаган отларга қамчи босишди. Милиционерлар отдан тушмасдан устма-уст ўқ узиб кўришди-ю, бироқ ҳужумни қайтариш ўрнига, четга бурилишди.

— Жудаям заиф команда экан. Булар протокол ёзишга уста, жанг қилишга шудлари йўқ! — мазах қилиб кулди Кошелев.

Фомин билан шериклари, кетларига тушган милиционерлар яқинлашганда ўқ отишар ва шу аҳволда, қувфинга учраган бўрилар сингари, аҳён-аҳёнда бир човут солиб, тўхтовсиз шарққа томон кетишарди. Шундай отишмалардан бирида Стерлядников ярадор бўлди. Ўқ чап оёғининг болдирига кириб, илик сугига ҳам тегиб ўтди. Стерлядников оёғи зирқираганига чидолмай додлаб юборди-да, рангги оқарган ҳолда:

— Оёққа тегди... Яна чўлоқ оёғимга тегди... Оббо абраҳамлар-эй! — деди!

Чумаков ўзини орқага ташлаб, овози борича хоҳолаб кулиб юборди. Азбаройи кулгининг зўридан кўзларидан ёш чиқиб кетганди. Қўлига суюнган Стерлядниковни отга мингазаётуб ҳам кулгисини босмай қалтирас ва дерди:

— Оёғинг чўлоқлигини қаёқдан билишибди, а? Улар атайлаб чўлоқ оёғингни пойлаб отишган... Мундоқ қарасалар, аллақандай бир оқсоқ от чоптириб кетяпти, ке энди, ўша оёғини бутунлай синдириб қўяқолайлик, дейишиган-да... Эҳ, Стерлядников, Стерлядников! Вой шўргинанг қурсин!. Оёғинг яна бир қарич қисқарадиган бўлди... Энди қандай қилиб ўйин тушасан? Оёғингни қўйиб туриш учун мундан буёқ бир газлик чуқур кавлаб беришим керак...

— Овозингни ўчир, лақма! Сенсиз ҳам ўзим зўрга турибман! Худо ҳақи, жим бўлгин ахир! — деб оғриқ-нинг зўрлигидан юзини бужмайтириб ялинарди у.

Орадан ярим соатчадан кейин, сонсиз жарлар орасидаги йўллардан бирига чиқсанларида, Стерлядников илтимос қилиб:

— Шу ерда бирпас тўхтайлик... Ярамни боғласак бўлмайди, этигим қонга тўлди,— деди.

Ҳаммаси тўхташди. Григорий отларни ушлаб турди, Фомин билан Кошелев олисдан қораси кўринган милиционерларга қарата онда-сонда ўт очиб туришди. Чумаков Стерлядниковнинг этигини тортди.

— Ростдан ҳам қон кўп кетибди,— деди-да, у

юзини бужмайтириб, анчагина қип-қизил қонни этикдан ерга тўқди.

У шимнинг қонга бўялган бир почасини қиличи билан тилмоқчи эди, бироқ Стерлядников унамади.

— Шимим ҳали бус-бутун, бекорга нобуд қилишдан наф йўқ,— деди-ю, ярадор оёғини кўтариб, қўлларини ерга тираб олди.— Шимнинг почасидан торт, секинроқ торт.

— Бинтинг борми!— деб сўради Чумаков чўнтакларини ахтариб.

— Бинтингни бошимга ураманми? Бинтсиз ҳам иложини топамиз.

Стерлядников ўқ тешиб чиққан жойни синчиклаб кўздан кечирди, сўнgra патроннинг қўламини тиши билан олиб ташлади-да, дорисини кафтига солди, бир чимдим тупроқни тупуги билан ҳўллаб, анчагача дорини тупроққа қоришитирди. Ўқ тешиб ўтган жароҳатнинг икки оғзини ҳам ҳалиги малҳам билан чаплаб бўлгандан кейин кўнгли жойига тушиб:

— Буни кўп синаб кўрганмиз. Жароҳат қотгандан сўнг икки кунга етар-етмас тузалиб кетади,— деди.

Чир бўйига довур улар тўхтамай йўл юришди. Милиционерлар бўлса, яқинлашмасдан анча кейинда келишар, аҳён-аҳёнда ўша ёқдан битта-яримта ўқ отилгани эшитиларди. Фомин дам-бадам кетига қарап ва:

— Изимизга тушиб олишди энди... Ёинки, четдан мадад кутишётганмикин? Олисдан пойлаб келиши бежиз эмас,— дерди.

Вислогузово қишлоғида улар Чир дарёсини кечиб ўтиб, секин-аста ясси дўнгга чиқишиди. Отлар ниҳоятда чарчаган эди. Тепаликдан паства бир амаллаб елиб тушишар, бироқ тепага чиқилгандан отдан тушиб етаклашар, тақим ораларидаги ва сонларидаги кўникларни кафтлари билан сидириб ташлашарди.

Фоминнинг мўлжали тўғри чиқди: Вислогузовдан беш чақирим нарироқда етти отлиқ уларни қувлай бошлиди. Уларнинг отлари учқур ва чарчамаган эди.

— Агар улар бизни шу аҳволда қўлдан қўлга топшириб қувлашадиган бўлса, кунимиз битди деявер!— пўнғиллаб нолиди Кошелев.

Улар йўлни қўйиб, даштнинг йўл тушмаган жойларидан юришарди, иккитаси отдан тушарди-да, ўтлар орасига биқиниб, таъқиб этувчиларни ўқса тутиб турар, қолганлари икки юз саржин ерга етиб оларди, сўнгра, навбат уларга келар, ортда қолган икки киши тўрт юз саржин жойга бориб олиб отишга тайёрлангунча, милиционерларни ўқса тутишарди. Улар бир милиционерни ўлдиришди ё оғир ярадор қилишди, иккincinnisinинг остидаги отни ўлдиришди. Сал вақтдан кейин Чумаковнинг оти ҳам ўқ еб ўлди. У Кошелев отининг узангисига тармасиб чопа бошлиди.

Соялар узайди. Қуёш ҳам уфқа бош қўйди. Григорийнинг маслаҳатига кўра, тарқалишмасдан, ҳаммаси бирга жўнади. Чумаков улар ёнида пиёда келарди. Ниҳоят, дўнг тепасида келаётган қўш отлиқ аравага кўзлари тушиб, йўлга циқишиди. Ёши қайтган, серсоқол аравакаш казак дарҳол отларини ҳайдаб қолди, бироқ кетидан отилган ўқлар уни тўхташга мажбур этди.

— Аблаҳни ҳозир чопиб ташлайман! Қочиши қанақалигини билиб қўйсин...— Кошелев тишлари орасидан ўшқириб, отини қамчилаганича олға югурди.

— Сашка, унга тегма, уришга рухсат йўқ!— деб Фомин уни танбеҳлади-да, ўзи олисдан бақирди: — Отни чиқар, эшитдингми, бува? Ўлгинг келмаса, дарҳол отни чиқар!

Чолнинг кўз ёши қилиб ёлворганига қулоқ солмасдан ўзлари отларни чиқариб, бўйинча ва қуюшконларини олиб ташлаб, бирпасда эгарладилар.

— Ўрнига отларингдан лоақал биттасини қолдириб кетинглар!— йиғлаб илтимос қилди чол.

— Яна нималарни истайсан, қулоғинг тагида шовла қайнатайми?— деди Кошелев.— Отлар ўзимиздан ортмайди. Тирик қолганинг учун ҳалиям худога шукур қил...

Фомин ва Чумаков янги отларни миниб олишиди. Изма-из таъқиб этиб келаётган олти отлиққа сал орада яна уч киши қўшилди.

— Тезроқ юриш керак! Ҳайданглар, йигитлар!—

деди Фомин.— Кечгача Кривскдаги жарларга етиб ололсак, қутулиб кегамиз...

У отига қамчи босиб, олдинга тушиб олди. Унинг чап томонида жилови калта қилиб боғлаб қўйилган иккинчи от ёнма-ён борарди. От туёқлари тегиб каллалари узилган қип-қизил лолалар, лахта-лахта қон қаби, четга отилиб чиқарди. Фоминдан орқароқда келаётган Григорий қон доғини эслатувчи лолаларга бир қаради-ю кўзини юмиб олди. Нима учундир, унинг боши айланиб, кўксига ханжар санчилгандай, эски дарди қўзигандай бўлди...

Отлар мадори қуриганидан аранг юрарди. Одамлар ҳам оч-наҳор, тўхтовсиз йўл босиб, итдай чарчашган эди. Стерлядников эгарда чайқалиб борар, қон кўп кетгани учун ранги докадай оқариб, бир ҳолатда бўлиб қолганди. Унинг кўнгли айнир, ҳадеб сув ичгиси келарди. Бир бурда қаттиқ нон еган эди, ўша заҳотиёқ қайт қилди.

Қош қорайган маҳалда Кривск қишлоғининг ёнида улар даштдан қайтган уюр орасига кириб, охирги марта таъқиб этувчиларга қарата бир неча ўқ узишди ва уларнинг олисда қолиб кетганини кўриб ниҳоятда суюнишди. Тўққиз отлиқ бир ерга тўпланди, масла-ҳатлашгандай тўхтаб турди-да, отларини буриб кетиға қайтди.

* * *

Кривск қишлоғида улар Фоминга таниш бир казакнида икки кун турдилар. Хўжайнин ўзига тўқ эди, уларни яхши кутиб олди. Қоронғи ертўлага киртишиб қўйилган отлар олдиларидағи сулинин еб тамомлай олмасди; ўлгудай чарчаган отлар икки кун ичидаги яхши дам олди. Отлар ёнида казаклар навбатма-навбат туришар, ис босган салқин сомонхонада ағнашиб ётишар ва оролда оч қолганларининг ҳиссасини чиқариб, қоринларига сиққунча овқат ейишарди.

Улар эртаси куниёқ қишлоқдан жўнашлари мумкин эди-ю, бироқ Стерлядниковнинг аҳволи оғирлашиб қолди: жароҳати газак олиб, эрталабгача четлари қизариб кетди, кечга яқин оёғи шишиб, ҳушидан

кетди. Чанқоги босилмас, кечаси ҳушига келди дегунча сув сўрарди, сувни ҳам энтика-энтика, кўп ичарди. Кечаси билан у қарийб бир чеълак сувни ичиб тамомлади; бироқ ўзи тугул бировнинг ёрдами билан ҳам ўрнидан туролмас, қимирласа, яраси қаттиқ оғрирди. Ўтирган жойида ёзиларди, инграйвериб безор қиласарди. Инграганини эшитмаслик учун уни сомонхонанинг нариги бурчагига обориб ётқизиши, бироқ нафи бўлмади. Баъзан у жуда қаттиқ инграрди, ҳушидан кетган пайтлари алаҳсираб додлар, валдираб бақиришга тушарди.

Унинг ёнида ҳам навбатчилик қилишга мажбур бўлиши, Унга сув беришар, ловиллаб ёнган пешонасини дамба-дам ҳўллашарди, ҳаддан зиёда бақирадиган ёки алаҳсирайдиган бўлса, оғзини шапка ёки қўл билан ёпиб туришарди.

Иккинчи куни кечга томон у ўзига келиб, анча тузалиб қолганлигини айтди. Чумаковни бармоғи билан имлаб ёнига чақирди-да:

— Бу ердан қачон жўнамоқчисизлар?—деб сўради.
— Бугун кечаси.

— Мен ҳам жўнайман. Худо хайр берсин, мени бу ерга ташлаб кетманлгар!

— Сен ишдан чиқдинг!— деди Фомин овозини паст қилиб.— Лоақал қимирлай олмайсан-ку.

— Нега қимирлолмас эканман? Мана, кўр!— Стерлядников зўрға ўрнидан турди-да, ўша заҳоти яна ётди.

Унинг юзи ўтдай ёнар, пешонасини майдамайдатер босган эди.

— Обкетамиз,— деди Чумаков қатъий қилиб.— Сени қолдирмаймиз, қўрқма, оғайни! Кўз ёшингни арт, хотин эмассан-ку, ахир.

— Бу ёш эмас— тер,— деб шивирлади-да; Стерлядников шапкасини кўзигача бостириб қўйди...

— Сени шу ерда қолдиришнинг иложи бўлганда жон дердик-ку, лекин хўжайин унамаяпти. Қўрқма, Василий! Оёғинг тузалиб кетади. Ҳали икковимиз кўп курашамиз, казачёк ўйинига тушамиз. Мунча шалпаясан, хўш? Қўрқинчли жароҳат бўлгандаям бошқа гап эди, анчайин бир яра!

Ҳамиша бошқаларга қўпол муомала қилиб ўрганган бадқовоқ Чумаков бу гапни шу қадар меҳрибонлик ва майинлик билан чин юракдан чиқариб айтдики, Григорий унга таажжубланиб қаради.

Улар тонготарга яқин қишлоқдан жўнашди. Стерлядниковни аранг отга мингазиши; бироқ у ўзини эплай олмас, гоҳ у томонга, гоҳ бу томонга оғиб кетаверарди. Чумаков ўнг қўли билан суюб, унинг ёнидан силжимасди.

Фомин Григорийга яқин бориб, ғамгинлик билан бош қўмирлатди.

— Ана дардисар... Баҳридан ўтишга тўғри келади, — деди шивирлаб.

— Отиб ташламоқчимисан?

— Бўлмаса-чи! Токайгача қош-қовоғига қараймиз! У билан қайга бора оламиз ахир!

Улар анчагача отларни секин юргизиб бөравериши, ҳеч ким чурқ этмасди. Чумаков ўрнига Григорий ўтди, унинг ўрнини Кошелев олди.

Офтоб чиқди. Пастда, Дон устида ҳали ҳам пағапаға туман сузиб юрар, лекин дўнг усти тип-тиниқ, бепоён дашт манзараси аниқ кўринарди, қоқ тепада укпарга ўхшаш барра булут қотиб қолган, минут саёйин осмон равшанлашиб, тобора мовий тусга кириб борарди. Кўкатлар шабнамга чўмилиб, садафдай товланишар, от ўтган жойларда қорамтириз тушиб қоларди. Даشتни бошдан-оёқ қоплаган улуғвор ва роҳатбахш сукунатга фақатгина тўргайлар халақит берарди...

Отнинг қадам қўйишига монанд бош чайқатиб келаётган Стерлядников секингина инграб:

— Уҳ, жуда қийналдим! — деди.

— Дамингни чиқарма! — деб қўполлик билан жеркиб ташлади Фомин. — Сенинг касрингга биз ҳам қийналяпмиз!

Гетман йўлидан сал четроқда от түёғи остидан баз-ғалдоқ учиб, мушакдай ҳавога кўтарилиди. Қанотларининг шувиллаган товушидан Стерлядников кўзини очди:

— Мени отдан туширинглар, биродарлар, — деб илтимос қилди у.

Кошелев билан Чумаков уни оҳиста ерга олиб жиққа ҳўл кўйатга ётқизиши.

— Қани кўрайлик-чи, оёғингга нима қипти ўзи. Шимингни еч! — деди Чумаков чўнқайиб ўтираётуб.

Стерлядниковнинг оёғи ноғорадай шишиб кетган, таранглашиб кенг шимнинг почасига сифмай қолган эди. Териси то сонигача моматалоқ бўлиб, ушласа қўлга билинадиган қорамтири доғлар босиб кетганди. Ичиға тортиб кетган қорнида ҳам шундай доғлар пайдо бўлганди, фақат ранги очроқ эди. Унинг жароҳатидан ва шимида қотиб қолган қонлардан қўланса ҳид келгани учун Чумаков ўз дўстининг оёғини кўраркан, бурнини бармоқлари билан қисар ва кўнгли айнаганидан ижирғаниб аранг туради. Ниҳоят у, Стерлядниковнинг қўкарган қовоқларига яхшилаб тикилиб бўлгандан кейин, Фомин билан кўз уриштириб:

— Гангренага айланиб, чирий бошлаганга ўхшайди... — деди.

— Ҳе-е-е.. Иш чатоқ, Василий Стерлядников... Бутунлай расво!.. Эҳ Вася, Вася, келиб-келиб сенга текканини қара...

Стерлядников энтикиб тез-тез нафас олар, лекин чурқ этмасди. Фомин билан Григорий баб-баравар отдан тушиши, шамол уриб турган томондан ярадорнинг тепасига келишиди. Стерлядников бирпас ётгандан кейин қўлини тираб қаддини кўтариб ўтири, хирашган қўзлари билан дунёдан умидини узган одам сингари, ҳаммага жиддий қараб чиқди.

— Биродарлар! Отиб ташланглар... Мен энди одам бўлмайман... Жоним ҳалқумимга келди, ортиқ тоқат қилолмайман...

У яна chalқanчасига ётиб, қўзларини юмди. Фомин ҳам, бошқалар ҳам шундай илтимос бўлиши мұқаррарлигини билишган ва буни кутишган эди. Фомин Кошелевга кўз қисиб, четга чиқди. Кошелев ҳам бўйинтоблик қилмасдан милтигини елкасидан шартта олди. Ўзини четга олган Чумаковнинг овозини эшитмаса-да, лабларининг қимирлаганидан: «От!» деганини англади. Бироқ Стерлядников яна кўзини очиб, қатъий овоз билан:

— Мана шу еримдан от,— деб қўлини қўтарди ва бармоғи билан қаншарини кўрсатди.— Кўзларим дар-ров юмилсин... Қишлоғимга йўлларинг тушса, хотиним-га шундаю. шундай бўлди, денглар... Мени кутмасин.

Кошелев, ҳали ҳам имиллаб затворни ўйнар, негадир, сусткашлик қиласарди; Стерлядников кўзини юмидан гапини тамомлай олди:

— Дунёда ёлғиз хотиним бор холос... Болаларим йўқ... Биттагина бола туққан эди, у ҳам ўлик тушди... Шундан бошқа бола кўрмадик...

Кошелев икки марта мильтиқни кўксига олди-ю, пастга туширди... ранги мурдадай оқариб кетди. Чумаков кифти билан уни итариб юборди-да, қўлидан мильтиғини тортиб олди.

— Қўлингдан келмаса нега аралашасан, итвачча! — деб бақирди-да, шапкасини олиб сочини силади.

— Тезроқ!— деб талаб этди Фомин оёғини узангига қўяётуб.

Чумаков видошлиши учун сўз қидирар, шошмасдан, секин-секин чўзиб гапиравди:

— Василий! Хайр энди, дўстим, мени кечир, Исо ҳурмати, ҳаммамизни ҳам кечиргин! У дунёда юз кўришамиз, ўшанда ажрим қилишар... Сен айтган гапни хотинингга албатта етказамиз.— У бирпас жавоб кутиб турди, бироқ ажалини кутган Стерлядников, мурдадай оқариб кетди, индамади. Фақат унинг офтобда сарғайган киприклари, худди шамол ўйнаётгандай пириллар, чап қўли билан негадир, гимнастёркасининг кўкрагидаги синиқ тугмачани солмоқчи бўлар, бармоқлари оҳиста қимиirlарди.

Григорий умрида ўлимни кўп кўрган эди, лекин буни кўргиси келмади. У кучи борича отининг жиловини тортиб, шоша-шоша юриб кетди. Ўқ товушини у, худди ўзи икки курагининг ўртасидан ўқ ейдиган одамдай, қаттиқ ҳаяжон билан кутарди... Григорий ўқ товушини кутар, юраги дук-дук уриб, ҳар бир секундни санаб тургандек эди; бирданига орқадан қарс этиб ўқ чиқиши билан оёқлари бўшашиб кетди, ҳурканидан осмонга сапчиган отини аранг ушлаб қолди...

Улар икки соат чамаси чурқ этмай йўл босишиди. Фақат лам олиш учун тўхтаганларидан кейин Чумаков

Энг аввал жимликни бузди. У кафти билан кўзини тўсиб, пушаймон бўлиб гапирди:

— Менга нима зарил келувди уни отиб? Даштда қолдириб кетаверсам-ку, мунчалик гуноҳга ботмасдим. Кўз олдимдан сира кетмайди...

— Ҳалиям нозиклигинг қолмадими?— деб сўради Фомин.— Шунча одам ўлдириб, ҳалиям ўрганимдингми? Кошки сенда раҳм-шафқат бўлса, бағритош маҳлуксан...

Чумаков бўзариб кетди, Фоминга ғазаб билан тикилди:

— Шу тобда менга тегажаклик қилма, Яков Ефимич!— деди у секингина.— Кўнглимга ҳеч қандай гап сифмай турганда, фижинимга тегма, йўқса, шартта отиб қўйишим мумкин... Ҳа, бу жудаям осон!

— Сенга тегиб зарил кептими менга? Сенсиз ҳам ўз ташвишларим бошимдан ошибб ётиди,— деди, муросасозлик қилмоқчи бўлиб Фомин ва чалқанчасига чўзилиб ётди; у офтобдан кўзларини қисар ва роҳатланаб керишар эди.

X VI

Бир ярим ҳафта ичидагуларга қирқтача казак қўшилди, Григорий буни сира кутмаган эди. Булар ҳаммаси, жангда тор-мор бўлган майда-чуйда тўдалардан қолган-қутган одамлар эди. Улар, атаманларида ажраганларидан кейин округда дайдиб юришарди, шунинг учун ҳам жон деб Фомин атрофига тўпланишди. Улар учун кимга хизмат қилиш, кимни ўлдиришнинг мутлақо аҳамияти йўқ эди, фақат эркин ҳаёт кечиришса, дуч келган одами тунаб олишса бўлгани эди. Булар ҳаммаси ўтакетган каллакесарлар эди; Фомин уларга жирканиб қарап ва Григорийга дерди: «Эҳ, Мелехов, нуқул қаланғи-қасанғилар келяпти, одам эмас булар... Ҳаммаси дор тагидан қочганлар!» Фомин ўз кўнглида ҳали ҳам ўзини «меҳнаткаш ҳалқ жангчиси» деб ҳисоблар, ҳозир ҳам ора-сира: «Биз — казакларнинг ҳалоскоримиз...» дейишини қўймасди; ҳали ҳам аҳмоқона орзуладардан воз кечгиси келмасди... Ҳамроҳларининг таланчилик қилишларига Фомин яна панжа.

орасидан қарайдиган бўлди, бу фалокатларнинг ҳаммаси ноиложкорликдан келиб чиққан нарса, ҳозирча мурасо қилиш зарур, деб билар, вақти келганда босқинчилардан қутулиб, бир кунмас, бир кун кичкина шайканинг атамани эмас, балки, қўзғолончи армиянинг саркардаси бўлишни орзу қиласди...

Бироқ Чумаков ҳамма фоминчиларни дангалига «қароқчи» деб атар ва тап тортмасдан Фоминнинг анчайин йўл тўсувчи қароқчи эканини ўзига исботлаб бериш учун овози бўғилгунча у билан тортишарди. Иккени холи қолганда кўпинча қизғин баҳс бошланарди.

— Мен Совет ҳокимиятига қарши чиққан ғоявий жангчиман! — ғазабидан қизариб-бўзариб бақиради Фомин. — Сен бўлсанг мени нуқул ерга уриб, қароқчи, дейсан! Биласанми, аҳмоқ одам, мен ғоя учун курашяпман!

— Миямни кўп ачитаверма! — деб эътиroz билдиради Чумаков. — Мени лақиллатаман деб овораям бўлма. Мен сенга ёш боламасман! Сендақа ғоявийни қара-ю! Сен қароқчининг нақ ўзгинасисан. Бу сўзнинг нимасидан қўрқасан? Сира тушунолмадим!

— Нега мунча мени шарманда қиласан? Гапир, тилингга куйдирги чиққур! Мен Совет ҳукуматига қарши қурол кўтариб чиқдим, қурол билан жанг қиляпман. Нима учун мени қароқчи дейсан!..

— Ҳукуматга қарши чиққанинг учун сени қароқчи дейман. Қароқчилар қадим замонлардан бери ҳукуматга қарши бўлган. Совет ҳукумати, ҳар қалай, ўн еттинчи йилдан бери тепамизда турибди, кимики унга қарши чиқса, ўша қароқчи.

— Калла деб хом қовоқни кўтариб юрибсан! Генерал Краснов ёки Деникин ҳам қароқчимиidi?

— Бўлмаса ким? Фақат эполет таққан қароқчи... Лекин гап эполетда эмас. Сен билан мен ҳам тақиб олсак бўлаверади...

Фомин ерни муштлар, тупуринарди, бироқ гапини маъқуллаш учун далил келтиролмай, фойдасиз тортишувни тўхтатишга мажбур бўларди. Чумаковга гап уқдириш ўлимдан қийин эди.

Тўдага қўшилганларнинг кўпчилиги яхши қуролланган, бекам-кўст кийинганди. Деярли ҳаммасининг

оти учқур бўлиб, тўхтовсиз йўл юришга ўрганган эди, кунига юз чақиримлик йўлни бемалол босаверарди. Баъзиларида иккитадан от бор эди: бирини миниб олар, иккинчисини етаклаб кетаверарди. Қерак бўлса, бунисини қўйиб, унисини минишар, шундай қилиб, отлар навбатма-навбат дам оларди; икки отлик жангчи бир суткада икки юз чақиримга яқин йўлни кўрдим демасди.

Бир куни Фомин Григорийга шундай деди:

— Агар бошданоқ иккитадан отимиз бўлганда, ҳеч ким бизга етолмасди! Милиция ва қизил аскар қисмлари халқнинг отини тортиб ололмайди, улар учун бу мумкинмас, лекин бизга мумкин! Ҳар қайсимиз яна биттадан от топишимиз керак, иннайкейин, бизга етиб олишсин-чи! Мен қариялардан эшитганман: қадимги замонда татарлар урушга чиққанда иккитадан, баъзилари учтадан от олволишаркан. Ундайларга ким бас келсин? Биз ҳам шундай қилишимиз керак. Татарларнинг бу иши менга жуда ёқади.

От масаласи тезда ҳал қилинганилиги натижасида бир қанча вақтгача улар ҳақиқатан ҳам тутқич бермайдиган бўлиб олишди. Вешенскаяда янгидан тузилган суворий милиция группаси уларга етолмай, роса сарсон бўлди. Запас отлар Фоминнинг кичик тўдаси учун қулай имконият туғдираварди: таъқиб этувчиларни ортда қолдириб кетишга, хатарли тўқнашувлардан сақланаб қолишга ва бир неча манзил жойгача узоқлашиб олишга ёрдам берарди.

Шундайлигига қарамай, сон жиҳатидан тўдага қараганда қарийб тўрт марта кўп бўлган бир группа аскар, май ойининг ўрталарида, Усть-Хопер станицасига қараашли Бобров қишлоғи ёнида Фоминни Донга тақаб қўйишга муваффақ бўлди. Бироқ қисқача жангдан сўнг тўда, ўлганлар ва ярадорлар бўлиб, саккиз кишини қурбон бериб, қуршовни ёриб ўтди-да, Дон бўйлаб қочиб қутулди. Шундан кейин салгина вақт ўтар-ўтмас, Фомин Григорийга штаб бошлиғи вазифасини таклиф этди.

— Бизга саводли киши керак, энди план билан, картага қараб ҳаракат қиласақ бўлмайди, йўқса, бир кунмас, бир кун яна сиқувда қолиб, дабдала бўлиши-

миз мумкин. Шу ишни сен ўз қўлингга олгин, Григорий Пантелеевич.

— Милиционерларни тутиб калласини олиш учун штаб керак эмас,— деди қовоғини солиб Григорий.

— Ҳар бир отряднинг ўз штаби бўлиши лозим, бекорчи гапни қўй.

— Штабсиз кунинг ўтмай қолган бўлса, бу вазифага Чумаковни қўя қол.

— Сен нега хоҳламайсан?

— Штаб нималигини билсан ўлай.

— Чумаков биладими?

— Чумаков ҳам билмайди.

— Ундаи бўлса, нима учун уни менга рўпара қиласан? Сен офицерсан, билишинг шарт, тактика масаласига ва бошқа йўл-йўриқларга уста бўлишинг керак.

— Менинг офицерлигим худди сенинг ҳозирги командирлигингдай бир гап эди! Бизда биттагина тактика бор холос: даштма-дашт дайдиб юришу, дам-бадам орқага қараб қўйиш... — деб пичинг қилди Григорий.

Фомин Григорийга кўз қисиб, бармоғи билан таҳдид қилди:

— Ҳа, муғомбир, мақсадингни билиб турибман! Ўзингни четга оляпсанми ҳали? Панада жон сақламоқчимисан? Барибир, бу билан қутуломайсан! Взвод командири нима-ю, штаб бошлиғи нима — бари бир гўр. Қўлга тушсан шу ёғини инобатга олишади-ю, жазоси енгилроқ бўлади, деб ўйладингми? Инобатга олганини кўрарсан.

— Бу тўғрида мутлақо ўйлаганим йўқ, бекорга фолбинлик қилиб овора бўласан,— деди Григорий қиличининг тасмасига тикилиб. — Хуллас, қўлимдан келмайдиган ишни бўйнимга олишни истамайман...

— Истамасанг керак эмас, сенсиз ҳам бир амалини қилармиз, — деди Фомин ўпкалаб.

Округдаги вазият тубдан ўзгарганди: илгари Фоминни меҳмондўстлик билан кутиб олган бой казаклар, ҳозир дарвозаларига қулф солиб очишмасди, қишлоққа бандитлар келиши билан уй эгалари ёппасига қочиб, боғ ва чорбоғларга беркиниб олишарди. Вешенскаядан келган ревтрибунал сайёр сессияси, илгари Фоминни иззату икром билан қабул қилган кўп-

гина казакларни қаттиқ жазога тортди. Бу хабар ҳамма станицаларга тарқалиб ўз таъсирини кўрсатди. Натижада, ҳатто бандитларга очиқдан-очиқ хайрихоҳ бўлган кишиларнинг ҳам кўзлари мoshдай очилди.

Икки ҳафта мобайнида Фомин Дон юқорисидаги жами станицаларни гир айланиб чиқди. Тўдада ҳозир бир юз ўттизга яқин суворий бор эди; энди наридан бери тузилган отлиқ группалар эмас, балки, жанубдан келтирилган 13-суворий полкка қараашли бир неча эскадрон унинг пайига тушганди.

Сўнгги кунлари Фомин отрядига келиб қўшилганларнинг кўпчилиги узоқ жойларда туғилиб ўсган кишилар эди. Ҳаммаси ҳар хил йўл билан Донга келиб қолганди: баъзилари турмадан, лагердан, ёинки, ҳайдалиб кетаётганида йўлдан қочган кишилар эди, лекин тўданинг асосий қисмини — Маслакдан ажраб чиқсан ўттиз-қирқ кишилик группа билан тору мор этилган Курочкин бандасининг қолдиқлари ташкил этарди. Маслакчилар финг демасдан бўлинишди (ҳар бир взводда улардан бор эди), бироқ курочкинчилар, бир-биrimиздан ажрамаймиз деб туриб олишди. Улар бир-бирига иноқ алоҳида взводни ташкил этиб, бошқаларга унчалик аралашмасди. Жангда ҳам, дам олиш пайтида ҳам улар аҳиллигини қўймас, бир-биридан жонини аямасди; мабодо бирон жойда матлубот жамиятининг дўкони ёки складни босиша, ҳамма ўлжани ўртага ташлашар ва тенглик принципига риоя қилиб, ҳаммага баравар тақсимлашарди.

Фоминнинг одамлари орасида: эгнига черкасча эски камзул кийган кубанлик ва терсклик бир неча казак, Великокняжеская станицасидан келган икки қалмоқ, қўнжи сонигача чиқсан овчилар этиги кийган латиш, йўл-йўл ич кўйлагу офтобда ранги ўнгигб кетган эски бушлат кийган бешта анархист матрос бор эди, ўзи хилма-хил бўлган бандитлар тўдасини булар жудаям ғалати, ола-була қилиб кўрсатарди.

— Хўш, эндиям одамларим қароқчи эмас, деб кўрчи, манавилар ким, — ҳалиги... ғоявий жангчиларми? — деб сўради бир кун Чумаков,чуввалиб келаётган колоннани Фоминга кўрсатиб.— Фақатгина битта исқирт поп билан иштон кийган тўнғиз камлик қиляпти,

холос, шулар ҳам қўшилганда, тўла-тўкис бўлиб, армонимиз қолмаган бўларди.

Фомин индамади. Унинг бирдан-бир тилаги, атрофига умуман мумкин қадар кўпроқ одам тўплаш эди. У кўнгиллиларни тўдага қабул қиласкан, уларнинг кимлиги билан иши бўлмасди. Унинг қўл остида хизмат этмоқчи бўлган ҳар бир кишига ўзи савол берар ва:

— Хизматга ярайсан. Қабул қилдим. Менинг штаб бошлиғим Чумаковга учраш, қайси взводда бўлишинги ўша айтади, қўлингга қурол беради, — дерди.

Мигулин станицасига қарашли қишлоқлардан бирда, соchlари жингалак, қорамағиздан келган, яхши кийинган бир йигитчани Фоминнинг олдига бошлаб келишди. У шайкага қўшилиш ниятида келганини айтди. Фомин суриштириб қараса, бу йигит ростовлик экан, қурол билан ўғрилиқ қилгани учун яқинда қамоққа ҳукм этилган, сўнгра турмадан қочган ва Фоминнинг дарагини эшишиб, бу ерга келган экан.

— Асли зотинг ким ўзи? Арманмисан ё булформисан? — деб сўради Фомин.

— Йўқ, мен яҳудийман, — мижғовланиб жавоб берди йигит.

Буни эшишиб Фомин ҳанг-манг бўлиб, анчагача индамай қолди. Хаёлига ҳам келмаган бундай нозик масалага қандай муносабатда бўлишини билмай, ҳайрон эди. Ўйлаб-ўйлаб, хўрсиниб, шундай деди:

— Ҳа, майли, яҳудий бўлсанг ҳеч бокиси йўқ. Биз ҳеч қанақасидан ҳам ҳазар қилмаймиз... Ишқилиб, одам кўпайсин. От минишни биласанми? Йўқ? Үрганасан! Ҳозирчалик сенга биронта ювошроқ бия берамиз, миниб ўрганиб кетасан. Чумаков ёнига бор, бирон взводга тайинласин.

Орада бир неча минут ўтар-ўтмас, Чумаков тутикашиб, Фомин ёнига от чоптириб келди:

— Сен эсингни едингми ёки мени майна қиляпсанми! — деб бақирди отини таққа тўхтатиб. — Жуҳутни менинг олдимга нега юбординг? Қабул қилмайман! Тўрт томони катта кўча — истаган ёғига дап бўлсин!

— Ол, қабул қилиб ол, ишқилиб, сонимиз кўпайсин, — деди Фомин вазминлик билан.

Аммо Чумаков оғзидан кўпик сачратиб бақирди:

— Олмайман! Ўлдирсам ўлдираманки, лекин олмайман! Қазаклар қий-чув кўтаришяпти, ўзинг бориб муомала қил уларга!

Иккови бу ёқда баҳслашиб, айтишиб турган пайтда обоз тачанкаси ёнида казаклар яҳудий йигитнинг гул тикилган кўйлаги билан кенг почали мовут шими ни ечиб олишди. Қазаклардан бири кўйлакни ўзига ўлчаб кўриб йигитга деди:

— Ҳув анови қишлоқнинг нарёғидаги бултурги бурганин кўрдингми? Ўша ерга чопиб борасану, ўзингни ерга таппа ташлайсан. Токи биз бу ердан жўнаб кетгунимизча миқ этмай ётаверасан, биз кетгандан кейин, истаган томонингга кетавер, лекин яна қайтиб кўзимизга кўринсанг, ўлдирамиз, яхшиси Ростовингга жўна, онаизоринг олдига бор. Уруш яҳудийларнинг иши эмас. Ҳудованди карим сизларни савдо-сотиқса бичган, урушга эмас. Яҳудийлар аралашмаса ҳам ўзлик-ўзимиз бу машмащани бир ёқлик қиласмиз!

Яҳудийни тўдага олишмади, лекин ўша куниёқ, Вешенская станицасининг барча қишлоқларига маълум ва машҳур бўлган Пашка жинники, кула-кула, асқия қилишиб, иккинчи взводга қабул қилишди. Уни даштдан тутиб, қишлоққа обкелишди, ўлдирилган қизил аскарнинг уст-бошини тантанали суратда унга кийгизишли, сўнгра, милтиқ ушлашни ўргатишли, қиличбозликка ўргатмоқчи бўлиб анча уринишиди.

Григорий охур томонга—ўз отлари ёнига кетаётуб, бир тўп одамни кўриб қолди-да, ўша ёққа бурилди. Қаҳқаҳа товушини эшитиб қадамини тезлатди, кулги босилгандан кейин, таълим берётган аллақандай бир казакнинг овози қулоғига кирди.

— Ундан эмас, Пашка! Қилич деганиям шундай урадими? Ўтинни шундай ёриш мумкин, лекин одамни чополмайсан. Мана мундай қилиш керак, тушундингми? Душманни қўлга тушириб, дарров тиз чўктир, йўқса, тикка турган одамни сен эплаёлмайсан... Тиз чўккандан кейин сен мундоғ орқасидан келасану, бўйнига қилич соласан. Лекин тўғри урма, қиялаб сол, ўзингга қараб тортиб юбор, дами яхши кесади.

Атрофини бандитлар ўраб олган бечора овсар, қи-

лич дастасини маҳкам сиқимлаганича, таёқдай қотиб турарди. У казаклардан бирининг насиҳатига қулоқ солиб, бақрайган қўй кўзларини сузиб, дарвишона илжаярди. Лабларининг икки чети, худди отнинг оғзидай кўпикланиб кетганди, сўлаги қизғиши мalla соқолларидан оқиб кўксига томарди... У шилимшиқ лабларини ялаб, ши-шилаб, дудуқланиб гапиради.

— Ҳаммасини чушундим, акажон, ҳаммасини... Айтганингдай қиласман... олдин бир бандай муминни тиз чўқтираман, иннайкейин, бўйнига қилич солиб... бошини шартта оламан-қўяман! Сизлар менга шим, кўйлак, этик бердинглар... Энди менга биттагина пальто кепрак... Пальтониям топиб берганларингда, мен ҳам қўлимдан келганини аямасдим! Астойдил хизмат қилиб, иш кўрсатардим!

— Биронта комиссарни ўлдирсанг, пальтоси сенини-да! Энди бизга бултур сени қандай уйлантиришганини гапириб бер, — деди, казаклардан бири

Овсарнинг шира босган кўзлари ҳуркиб кетган бузоқницидай, ола-була бўлиб кетди. У узундан-узоқ қилиб сўқинди-да, кулги садолари остида алланималарни сўзлай бошлади. Григорий бу разолатга тоқат қилолмай, сесканиб тушди-да, дарҳол у ердан кетди. «Келиб-келиб, ўз тақдиримни шундай одамлар билан боғланман...» деб ўйлаб хуноб бўлар, фижинарди, шубезориларга аралашиб қолгани учун ўзини ўзи ғажиб ташлагиси келарди.

Григорий овсарнинг чийилдоқ овозини ва казакларнинг хохолашини эшитмасликка ҳаракат қилиб, отлар турган томонга бориб ётди. У хийла семириб қолган отларини томоша қиларкан: «Эртагаёқ жўнайман! Етар!» деб аҳд қилиб қўйди. Шайкадан кетиш учун у зимдан пухта тайёргарлик кўриб юрарди. Ўлдирилган милиционер чўнтагидан Ушаков номига ёзилган гувоҳномани олиб, шинелининг астарига тикиб қўйганди. Икки ҳафтадан бери отларини бир чопища яқин орадаги бекатга етиб оладиган қилиб пиширас: вақтида суғорар, зўр ҳафсала билан қашларди (аскарликда хизмат қилгандаям отига бунчалик парвариши қилмаганди), тунаган жойларида найранг ишлатиб, ёлғон-яшиқ гапириб ем топиб берарди; шунинг

учун ҳам унинг отлари бошқаларникига қараганда, айниқса, кўк чипори яхши семирган эди. Унинг бошидан туёғигача йилтирас, жунлари кавказнинг қора кумушига ўхшаб, қуёшда товланарди.

Бундай отлар билан ҳар қандай таъқибдан қочиб қутулиш осон эди. Григорий ўрнидан туриб, ёнбошдағи ҳовлига кирди. Омборхона зинапоясида ўтирган кампирдан одоб билан:

— Чалғи ўроғингиз борми, бувижон? — деб сўради.

— Аллақайдаям ётудви. Қаердалигини ким билади дейсан. Чалғини нима қиласан?

— Чорбоғингиздан бир оз ўт ўриб, отимга берсам-микун девдим. Майлими?

Кампир ўйланиб туриб, шундай деди:

— Сиз касофатлардан қачон қутуламиз, а? Доим уни бер, буни бердан бошқа гап йўқ... Бири келиб, ем бер дейди, иккинчиси бўлса, кўзига илинган нарсанни олиб кетади. Чалғи бермайман сенга! Билганингни қил, бермайман.

— Бу нимаси, чорбоғдаги ўтни қизғанасанми, художўй кампир?

— Сен нима, ўт ўз бошига ўсяпти, деб ўйладингми? Сенга берсам ўз сигиримга нима егизаман?

— Даштда ўт қуриб кетибдими?

— Ўша ердан ўриб кела қол, яхши йигит. Даштда ўт кўп.

Григорийнинг кўнгли ранжиди.

— Бувижон, яхшиликча чалғингизни беринг. Озгина ўриб оламан, қолгани ўзингизга қолади, йўқса. отларни қўйворамиз, иннайкейин, ҳаммаси расво бўлади,— деди.

— Ўзинг бориб ола қол, бостирма тагида осиғлиқ тургандир.

Григорий бостирма тагидан дарз кетган эски бир чалғи ўроқни қидириб топди, қайтишда, кампир ёнидан ўтаётганида қулоғига: «Ёмонга ўлим йўқ экан!» деб пўнғиллагани аниқ эшитилди.

Лекин бундай қарғишларга Григорий ўрганиб қолганди. Қишлоқ аҳолиси уларни қай хилда кутиб олганига у кўпдан бери разм солиб юрарди. Ў эҳтиёткорлик билан чалғи солар, чала қолдирмасдан тозалаб

ўришга ҳаракат қилас әкан ўйларди: «Дарвоңе, уларнинг гапи түғри. Улар бизни бошига урадими? Ҳеч кимга керагимиз йўқ, ҳаммани безор қилиб тинч яшагани, меҳнат қилгани халақит берамиз, холос. Бу юришни йиғишириш керак, етар энди!»

Григорий охур ёнида оғир хаёлга чўмиб, отларнинг қора духобага ўхшаш лаблари майса кўкатни пайдарпай ямлаётганини томоша қилиб туради. Бирданига аллақандай ўспириннинг ғўлдираган товуши эшитилиб, хаёли тарқалиб кетди.

— Жудаям яхши от әкан-да! Сулувлиги оққушдан қолишмайди.

Григорий овоз келган томонга қаради. Яқинда тўдага қўшилган Алексеев станицалик казак бола кўк отга тикилар, завқланиб бошини чайқарди. У мўлтираган кўзларини отдан олмай, уни бир неча марта айланаб кўрди, ҳаваси келганидан тилини такиллатди.

— Сеникими?

— Нима ишинг бор? — деди Григорий пўнғиллаб.

— Кел, алишайлик! Менинг тўриғим Дон наслидан тарқаган аслзод от, ҳар қандай тўсиқни кўрдим демайди, жуда учқур, ўқдай учиб кетади!

— Туёғингни шиқиллат!

Иигитча бирпас индамай қолди, сўнгра хўрсиндида, нарироқ бориб ўтириди. У кўк отга узоқ тикилиб у ёқ-бу ёғига разм солди, ниҳоят:

„ — Отинг зўриқибди, нафаси қисадиган иллати бор әкан,— деди.

Григорий индамай, чўп билан тишини кавларди. Туриб-туриб, бу лақма бола унга ёқа бошлади.

— Алишмайсанми, амаки? — деб сўради у жавдираган кўзларини Григорийга тикиб.

— Алишмайман. Отинг ёнига ўзингни қўшиб берсанг ҳам алишмайман.

— Бу отни қайдан олгансан?

— Қўлдан ясаб олганман.

— Йўқ, ростини айта қол!

— Бия туғиб берган, бия қандай туғишини ўзинг ҳам биласан.

— Тентак билан гаплашгандан кўра, калтак еган яхши,— деди-да бола, аразлаб четга чиқди.

Григорийнинг кўз ўнгидა қишлоқ қабристон сингари ҳувиллаб ётарди. Фоминчилардан бўлак биронта одам кўринмасди. Тор кўчада қолиб кетган арава, ҳовлидаги ўтин ёрадиган кундага тишлатиб қўйилган болта билан унинг ёнидаги чала йўнилган тахта, бўйнида бўйинтуруғи билан кўча ўртасида пастак қўкатни чимдиб юрган ҳўқизлар, қудуқ ёнида ағдарилиб ётган чеълак ва умуман ҳамма нарса қишлоқдаги тинч ҳаёт бирданига изидан чиққани, одамлар қилаётган ишларини ташлаб, қаердадир беркиниб юрганидан далолат берарди.

Григорий илгари шундай нарсани, аҳолиси қочиб қишлоқлар ҳувиллаб қолганини Шарқий Пруссияда кўрган эди. Энди шу аҳволни жонажон ўз юртида ҳам кўришга тўғри келди... Илгари немислар нафратга тўлган кўзлари билан ўқрайиб кутиб олишган бўлса, энди Юқори Дон казаклари ҳам уларни шундай кутиб оларди. Григорий кампирнинг гапини эслаб, ҳасрат билан атрофига қаради да, кўйлак ёқасини ечиб юборди. Дардисар оғриқ яна юрагини маҳкам чангллади...

Офтоб ерни мисдек қиздириб юборган эди. Тор кўча ёқдан чанг ва шўра ҳиди, от терининг бижиган иси келарди. Чорбоғлардаги баланд толлар учини уя бошиб кетган, зоғчалар чағиллашарди. Жар бошидаги аллақайси булоклардан чиққан чашма суви қишлоқни иккига ажратиб, ўртасидан имиллаб ўтарди. Сувнинг икки томонидаги нишобликка қаторасига кетган кенг-кенг қўралар тушган: уйлар соя-салқин боғлар билан қуршалган, деразалар ёнида олчалар, яшил барглари ва янги туккан мевалари билан қуёшга қарата шохлаб кетган каттакон олмалар ўсиб ётарди.

Григорий туманлашган кўзларини тикиб, ажриқ бошиб кетган ҳовлига, томига похол ёпилган уйга, сап-сариқ дераза қопқоқларига, қудуқнинг баланд ҳовозасига қаарди... Фарам ёнидаги эски четан девор қозиқларидан бирида ёмғирдан оқариб кетган, кўз косалири ўпирилган от калласи илиғлик турарди. Уша қозиқ-қа ям-яшил ошқовоқ палаги илондай ўралиб олган эди. Палак қозиқ учига етиб, калланинг қирраларига, тошдай қотиб қолган тишларга сертук мўйловлари билан чирмashiб олганди, осилиб тушган бир учи бўл-

са, ёнгинасидаги бир туп бодрезакнинг шохига чўзнилиб ета ёзган эди.

Қизиқ. Бу манзараги Григорий тушда кўрганмиди ё болалик ҷоғидами? Тўсатдан ҳислари хуруж қилиб, юрак-бағри ўртаниб кетган Григорий четан тагига мукка тушди-ю, юзини кафтлари билан тўсиб олди; фақат олисдан: «Отларни эгар-ла-а-а!»— деган овоз келгандан кейин у ўрнидан турди.

Кечаси йўлда кетаётганларида у, жўрттага отини қайтадан эгарлаш баҳонаси билан сафдан чиқиб тўхтади, сўнгра тобора узоқлашиб кетаётган отларнинг туёқ товушига қулоқ солиб турди, ниҳоят, отига ирғиб минди, йўлдан четга чиқиб олиб аямай ҳайдаб кетди.

Шу ҳайдаганича тўхтамасдан беш чақиримча йўл босди, сўнгра отларни секин юргизиб, «кетимдан қуввишмадимикин» деган хаёлда қулоқ солиб кўрди. Бироқ дашт жимжит. Фақат қумтепалар томонда чурраклар ноласи ҳамда жуда-жуда олисда акиллаган итларнинг товуши сал-пал эшитиларди.

Зимзиё осмонда лак-лак юлдуз гўё сочиликнинг олтин сингари йилт-йилт қиласди. Даёт жимжит, шабада аччиқ шувоқ ўт ҳидини келтиради, алланималарни эсга солади... Григорий узангига оёғини тираб, қаддини ростлайди, кўксини кериб эркин нафас олади...

XVII

Тонготар маҳалидан анча илгари Татарскнинг рўпарасидаги пичанзорга етиб келди. Қишлоқдан пастроқда, Дон бўйида қип-яланғоч бўлиб ечинди, кийими ни, этигини, қуролини отларнинг бошига боғлади, ўқдонини тишлаб олиб, дарёнинг саёз жойидан отлар ёнида сузиб кетди. Совуқ сув баданни кесиб кетарди. Григорий қизишиб олишга ҳаракат этиб, ўнг қўли билан тез-тез қулоч отар, чап қўлини, бир-бирига боғланган икки жиловдан олмас, инграб, пишқириб сузаётган отларга чу-чулаб далда берарди.

Қирғоққа чиқиб нари-бери кийинди, айилларни тортди ва отларни қизитиш учун тез чоптириб, қишлоқ томон кетди. Эгарнинг икки қаноти, шинели ва кўйлаги ивиб кетганидан баданига муздай тегарди. Тишлари такиллар, кифтлари совқотар, аъзойи бадани қалтиар-

ди; лекин тез чопгани учун сал орада қизишиб олди. қишлоққа яқинлашгач, юришни секинлатиб, дам-бадам у ёқ-бу ёғига қараниб, қулоқ сола бошлади. Отларни жарда қолдирмоқчи бўлиб, сершағал қияликдан жар тагига тушди. От туёқлари остида тошлар шиқрлар, тақалардан учқунлар чиқиб кетарди.

Григорий болалик чоғида кўрган қуруқ қайрағочга отларни боғлаб, қишлоққа кирди.

Ана, Мелеховларнинг ота-бобосидан қолган эски уй, қорайиб кўринган олма дарахтлари, Етти қароқчи юлдуз тагида қаққайиб турган қудуқ ҳавозаси... Григорий азбаройи ҳаяжонланганлигидан нафаси тиқилиб Дон томонга ўтди-да, Астаховлар қўрасининг четан деворидан оҳиста ошиб тушиб, қопқоғи очиқ дераза ёнига борди. У фақат юрагининг тез-тез дукиллаб уришини-ю, чаккасидаги қон томирларининг лўқиллашини эшитарди, холос. Дераза ромини секин тиқиллатди, шу қадар секин тиқиллатдики, ҳатто ўзи ҳам эшиitmай қолди. Аксинья дераза олдига келиб, индамай тикилиб қаради. Григорий унинг қўллари кўксига босилганини кўрди, алланияма деб инграганини ҳам эшиитди. Григорий имо-ю ишора билан деразани очишни сўради, милтиқни елкасидан олди. Аксинья деразани очди.

— Жим! Салом! Эшикни очма, деразадан тушман,— деб шивирлади Григорий.

У пойдеворга тақаб ясалган супа устига чиқди. Аксинъянинг яланғоч қўллари бўйнидан қучоқлаб олди. Бу азиз қўллар унинг кифтида шу қадар қаттиқ қалтирадики, бора-бора титроғи Григорийга ўтди.

— Қеюша... шошмагин... милтиқни ол,— тутила-тутила, шивирлаб ялинди у.

Григорий қиличини авайлаб, деразадан ошиб туди-да, ичкаридан ёпиб олди.

У Аксинъяни қучоқламоқчи бўлган эди, бироқ Аксинья тиз чўкиб унинг оёқларини қучоқлади, ҳўл шинелга юзини босиб, ўпкасини тутолмай, йиғлай бошлади. Григорий уни ўрнидан турғизиб, курсига ўтқазди. Аксинъя энгашиб, юзини унинг кўксига қўяр, гапиришга тили келмай, ҳиқиллар, ўпкаси тўлиб келган йиғини қайтариш учун шинель ёқасини тишлаб, болаларни ўғотиб юбормасликка ҳаракат қиласарди.

Шундай кучли аёлни ҳам қайғу-аламлар енгиб қўй-
гани кўриниб турарди. Шу ҳижрон ойлари ичидан за-
ҳар-заққум ютиб кун кечирганига шубҳаланмаса ҳам
бўларди... Григорий унинг тўзган соchlарини, тер ва
ёшдан ҳўлланган иссиқ манглайнин силади. Тўйгунча
йиғлаб олсин, деб индамай қўйиб берди, ниҳоят:

— Болалар эсон-омонми? — деб сўради.

— Ҳа.

— Дуняшка-чи?

— Дуняшкайам... Соғ-саломат.. юрибди...

— Михайл уйдами? Йиғини тугатсанг-чи, ахир! Кўз
ёшингдан кўйлагим жиққа ҳўл бўлди... Қсюша! Жон-
гинам, бас энди! Ҳозир йиғининг пайтимас, вақтимиз
оз... Михайл уйдами?

Аксинья юзини артди, ҳўл кафтлари билан Григо-
рийнинг икки бетини қисиб қўйди. Кўз ёшлари ораси-
дан жилмайиб боқиб, ошиқидан кўзини олмай:

— Бас қилдим... Энди йиғламайман... — деди.— Ми-
хаил йўқ, икки ойча бўлди Вёшкида — аллақайси
қисмда хизматда. Болаларни бориб кўр! Сени яна кў-
рармиз деб ўйлаганимиз ҳам, кутганимиз ҳам йўқ эди!..

Мишка билан Полюшка каравотда қўл-оёқларини
ёйиб ухлаб ётар эди. Григорий энгашиб, уларнинг те-
пасида бирпас турди-да, оёқ учida юриб, Аксинья ёни-
га келиб ўтириди.

— Қандай қилиб келдинг? — ҳовлиқиб, шивирлаб
сўради Аксинья. — Қаерларда юрувдинг? Тутиб олиш-
са нима бўлади?

— Тутиб олиб бўпти! Мен сени обкетгани келдим.
Кетасанми?

— Қаёққа?

— Мен билан кетасан. Бандадан кетдим мен. Фо-
мин тўдасида эдим. Эшитганмисан?

— Ҳа. Сен билан қаёққа бораман, айтсанг-чи?

— Жанубга. Кубанга ёки унданам нарига. Бир
амаллаб куннимиз ўтар, нима дединг? Қандай иш бўл-
саям қилавераман, ҳазар қилмайман. Бу қўллар билан
жанг қилиш эмас, ишлаш керак. Шу кейинги ойлар
ичидан юрагим эзилиб, жоним ҳалқумимга келди... Қе,
бу тўғрида кейин гаплашармиз...

— Болалар нима бўлади?

— Дуняшкага қолдирдик. У ёғини кейин кўрамиз. Кейинчалик уларни ҳам обкетдик. Хўш? Қетасанми?

— Гриша... Гришенька...

— Бўлди! Кўз ёши керакмас. Бас қил!. Қейинчалик қўлимиз бўшаганда икковимиз бирга йиғлардик... Тараддудингни қил, отларим жарда турибди. Хўш? Қетасанми ахир?

Аксинья тўсатдан овозини баланд чиқариб:

— Ҳали сен, кетмайди деб ўйловдингми! — деб юборди-да, болаларга қараб, қўрқа-писа оғзини қўли билан беркитди.— Нима деб ўйловдинг?— деб сўради у энди шивирлаб.— Ёлғиз қолиб заҳар ютиш... Қетаман, Гришенька, кетаман, ғамгузорим! Пиёда бўлсаям, кетингда судралиб бўлсаям кетаман, ёлғизликка ортиқ тоқат қилолмайман! Сенсиз менга олам қоронги!. Мени ўлдирсанг ўлдир, лекин яна ташлаб кетма!

Аксинья жон-жаҳди билан Григорийни бағрига тортди. Григорий уни ўпар ва дам-бадам деразага қарарди. Чунки, ёз тунлари калта, шошилиш керак.

— Бирпас ёнбошлаб оласанми?— сўради Аксинья,

— Йўғ-е!— деди юраги така-пука бўлиб Григорий.— Ҳадемай тонг отади, тезроқ жўнаш керак. Дарров кийиниб, Дуняшкани чақириб кел. Болалар тўғрисида гаплашдик. Биз қоронгида Қуруқ жарга етиб олишимиз керак. Куни билан ўша ердаги ўрмонда бўлиб, кечаси яна йўлга тушдик. Отда юра оласанми?

— Худоё тавба, бир амали бўлар ахир, от тугул балодан қўрқмасман шу тобда! Боядан бери қўзимга ишонгим келмайди — тушимми ё ўнгимми бу? Мен сени тушимда кўп кўраман... алоқ-чалоқ тушлар...— Аксинья шпилкаларни тишлаб олиб, шоша-писа сочини тарап ва ёўлдираб секин гапиради. Бирпасда кийиниб бўлди-да, эшик томон қадам қўйди.

— Болаларни уйғотдими? Қўрсанг яхши бўларди.

— Йўқ, керак эмас,— деди Григорий қатъий қилиб.

У шапкасидан халтачасини олиб, тамаки ўрай бошлиди, лекин Аксинья чиқиб кетиши биланоқ каравот ёнига югуриб борди-ю, болаларини туйгунича ўпди, сўнгра, Натальяни эслади ва серташвиш ҳаётидан кўпгина хотиралар эсига тушиб, йиғлаб юборди.

Дуняшка эшикдан кириши билан:

— Салом, aka! Қелдингми ахир? Қачонгача дашт-ма-дашт санғиб юрасан...— деб жавраб кетди.— Болалар сени кута-кута, сарғайиб сомон бўлишди... Отаси тирик туриб етим қолишди бечоралар...

Григорий уни бағрига босди:

— Секинроқ, болаларни уйғотиб юборасан! Бу гапларни қўй, синглим! Бу нағмани кўп эшигандан! Үз ғамим бошимдан ошиб ётибди... Сени кўз ёшига чақирганим йўқ. Болаларни олиб тарбиялайсанми?

— Сен қайга бормоқчисан?

— Мен кетаман, Аксинъяниям олакетаман. Болаларни ёнингга оласанми? Ишга жойлашганимдан ке-йин уларни олиб кетаман.

— Нега олмас эканман? Икковингиз кетадиган бўлсангиз, албатта оламан. Кўчада қолдира́мидим уларни! Бегонага ташлаб қўймасман ахир...

Григорий индамасдан Дуняшкани ўпди:

— Мингдан минг раҳмат, синглим! Йўқ демасли-гингни ўзим ҳам билувдим.

Дуняшка индамади, сандиқ устига ўтирди:

— Қачон кетмоқчисиз? Ҳозирми?— деб сўради.

— Ҳа.

— Уй-рўзғор нима бўлади?

Аксинъя мужмаллик билан жавоб берди:

— Үзинг қарайсан. Биронта одам қўярсан ёки бил-ганингни қиласан. Уйда қолган кийим-кечак; майдадуйдаларни ўзингникига обориб қўй...

— Одамларга нима дейман? Қаёқقا кетишди, деб суриштиришса, нима жавоб бераман? — деб сўради Дуняшка.

— Билмайман деб туравер, гапнинг қисқаси шу,— Григорий Аксинъяга бурилди.— Қсюша, тезроқ йифиши-тир. Қўп нарса олма. Йессиқ кофтанг билан иккитами-учта юбка, ички кийимларингни, бир-икки кунлик ов-қат олсанг бўлади, бошқаси керакмас.

Улар Дуняшка билан хайрлашиб, ҳалиям ухлаб ёт-ган болаларни ўпиб эшикка чиққанларида фира-шира тонг ёришган эди. Иккиси Донга тушиб, дарё бўйи билан жарга етишди.

— Бир вақтлар икковимиз худди шу хилда Ягод-

ноега кетган эдик,— деди Григорий.— Лекин унда ту-
гунинг каттароқ эди, ўзимиз ҳам ёшроқ эдик...

Аксинъя шоди хуррам бўлиб кўз қирида Григорий-
га қаради.

— Мен ҳалиям тушимми ё ўнгимми бу, деб хаво-
тирдаман. Қўлингни бер-чи, ушлаб кўрай, сира ишон-
гим келмайди.— У Григорийнинг пинжига тиқилиб
оҳиста кулиб қўйди.

Григорий унинг йиғидан шишган, шодликдан йил-
тираган кўзларини, фира-шира тонг ёруғида кўринган
бетини bemалол кўриб турарди. Майнингина жилмайиб:
«Нари-бери йиғиширинди-ю, кетаверди, худди меҳ-
мондорчиликка борадигандай...— деб кўнглидан ўт-
казди. — Ҳеч нарсадан қўрқмайди, азамат аёл!»

Аксинъя ҳам унинг кўнглидаги гапни сезгандай:

— Кўрдингми, мен шунақаман... «Хушт» дейишинг
билан итга ўхшаб, кетингдан эргашдим,— деди.— Иш-
қингда ўртаниб шу аҳволга тушганман... Фақат бо-
лаларга ачинаман, ўзимни заррачаям ўйламайман.
Ўлимга бошласанг ҳам ғинг демай кетингдан бораве-
раман!

Уларнинг оёқ товушларини эшитиб, отлар секин
кишнади. Тонг ёришиб қолганди. Осмоннинг шарқ то-
мони сал-пал қизариб келарди. Сувдан туман кўта-
рилиб Дон устини қоплай бошлади.

Григорий отларни ечди, Аксинъяни отга мингизиб
қўйди. Узанги тасмаси Аксинъянинг оёғига узунлик
қилди. Шу нарса олдин эсига келмагани учун ўзини
койиб, унинг узангисини калтароқ қилиб берди-да, ўзи
иккинчи отга минди.

— Кетимдан қолма, Қсюша! Жардан чиққандан
кейин чоптириб кетамиз. Лўқилламайди, сенга осон бў-
лади. Жиловини бўшатма. Остингдаги от жилов бўшат-
гани ёқтиромайди. Тиззангга эҳтиёт бўл. Тиззадан
тишлаб оладиган одати ҳам бор. Қани, ҳайдা!

Қуруқ жаргача саккиз чақирим келарди. Бу масо-
фани улар бирпастда босиб ўтиб, кун чиқар маҳалида
ўрмонга етиб олишди. Ўрмон четида Григорий отдан
тушди, Аксинъяни ерга тушириб қўйди.

— Қалай? Отда юриш қийин эканми?— кулиб сў-
ради у.

Тез чоғгани учун қизарыб кетган Аксинья қора кўзларини ялтиратиб кулди:

— Яхши! Пиёда юришга қараганда ўлса ўлиги ортиқ. Лекин оёғим...— У хижолатсиниб жилмайди:— Гриша, тескари қараб тургин, мен оёғимни кўрай. Териси ачишяпти... шилинган бўлса керак.

— Зарари йўқ, тузалиб кетади,— деб унга тасалли берди Григорий.— Оёқларинг увишиб қолибди, бир оз юргин, чигили ёзилади...— Кўзини қисиб эркалатиб ҳазиллашди:— Сени ким айтади казак хотини деб.

У жар этагидан кичкина сайҳон жой топиб деди:

— Шу ерда дам оламиз, жойлашавер, Ксюша,— деди.

Григорий отларнинг эгарини олиб, тушовлади, буталар остига қурол ва эгарларни қўйди. Кўкатлар устига қалин шабнам тушганлигидан оч-яшил тусда жилваланаарди, лекин ён бағирликдаги кўкатлар эса тонг қоронғисида кўкимтири бўлиб фира-шира кўринаарди. Чала очилган гуллар устида сап-сариқ қовоқарилар мудрашарди. Даشت узра тўрғайлар сайрашар, буғдойзор орасида, хушбўй ранг-баранг кўкатлар ичидан беданалар: «Ухлаш керак! Ухлаш керак! Ухлаш керак!» дегандай битпилдиқ отишарди. Григорий эман дарахти тагидаги кўкатни топтади, эгарга бошини қўйиб чўзила кетди. Беданаларнинг ҳовлиқиб битпилдиқ отиши ҳам, тўрғайларнинг аллаловчи нағмаси ҳам, Доннинг нарёғидаги туни билан совумаган қумзорлардан эслан илиқ шамол ҳам— ҳаммаси уйқу келтиради. Неча кундан бери мижжа қоқмаган Григорий учун ҳозир энг зарили уйқу эди. Беданалар ахири қўймади: уйқу ғалаба қилиб, у кўзини юмди. Аксинья унинг ёнида индамай ўтирас, хушбўй чучмоманинг бинафша ранг гулбаргларини лаби билан юлиб, хаёл сурарди.

У гулбанди билан Григорийнинг соқоли ўсган бетини қитиқлаб оҳиста сўради:

— Гриша, бу ерда биронтаси устимизга келиб қолмасмикин?

У аранг кўзини очиб, хириллаган овоз билан мудроқ аралаш жавоб берди:

— Даشتда ҳеч ким йўқ. Ҳозир иш маҳали эмас. Мен бирпас ухлаб олай, Ксюша, сен отларга қараб тур.

Кейин сен ухлайсан. Мени уйқу босди... Тўрт суткадан бери... Кейин гаплашамиз...

— Ухла, жонгинам, бемалол ухлайвер!

Аксинья энгашиб, Григорийнинг пешонасига тушиб турган бир тутам сочини қайтариб қўйди-да, лабларини бетига оҳиста тегизди.

— Жонажоним, Гришенька, соchlaringning оқи бирар кўпайиб кетибдики...— деди шивирлаб,— демак қарий бошлабсан-да, а? Яқиндагина ўспирин эдинг...— деди-да, маъюс жилмайиб унинг юзига тикилди.

Григорий лабларини чала юмганича пишиллаб ухлаб қолганди, бир меёрда текис нафас оларди. Учини сал-пал офтоб олган қоп-қора киприклари оҳиста пирпирап, устки лаби қимирлаб, оппоқ зич тишлари кўриниб кетарди. Аксинья унга астойдил тикилиб қарди ва бир неча ойлик ҳижрон даврида унинг қанчалик ўзгарганини эндигина пайқади. Ошиқининг икки қоши орасига кўндаланг тушган чуқур ажинларда, лабларининг бурчакларида буришиқларда, туртиб чиққан ёноқларида аллақандай қаҳр-азаб, бераҳмлик аломати пайдо бўлганди... Шундан кейингина у, Григорийнинг от устида қилич яланғочлаб жангга кирган чоқда нақадар даҳшатли бўлишини биринчи марта тасаввур эта олди. Аксинья бошини қўйи солиб, кўз қирида унинг сертугун ва каттакон қўлларига қарди-ю, негадир, хўрсинди.

Бирпасдан кейин Аксинья оҳиста ўрнидан турди, шабнам тушган кўкатга тегиб ҳўл бўлмасин учун этакларини сал кўтариб, сайҳонликдан ўтди. Яқин жойда тошдан тошга урилиб оқаётган чашма сувининг шилдираган товуши келарди. У кўкимтири бахмал ўт қоплаган харсанг тошлар ораси билан юриб жартагига тушди, муздай булоқ сувидан ичди, қизарип кетган юзини ювиб, рўмоли билан яхшилаб артди. Унинг лаблари ҳадеб жилмаяр, кўзлари шодликдан йилт-йилт қиласарди. Негаки, Григорий яна у билан бирга! Хаёлий бахтга тўлган номаълум келажак уни ўз бағрига чорларди... Аксинья сўнгги ойлар ичиди кўпинча қон йиғлаб уйқусиз тонг оттирган, ғам-ғуссадан боши чиқмаган эди. Қуни кеча полизда эканида ҳам, ёнида картошка чопаётган қўшниларнинг ғамгин қў-

шифига беихтиёр қулоқ солган эди, ингичка овозли бир хотин аёлларнинг пешонаси шўрлигидан ҳасрат қилиб қуидаги ашулани айтганди:

Уйга қайтинг, кул ранг ғозлар,
Кўл устида сузган ғозлар!
Мендек аёл ўз дардини
Кимга айтиб, кимга йиғлар?

Аксинья азбаройи юраги эзилганлигидан ўзини тутолмай, хунибийрон йиғлаган эди. У кўнглида уйғонган қайфу-аламларни унутмоқчи бўлиб, ишга жонжаҳди билан ёпишган эди, бунга қарамай, кўзларидан тирқираб ёш оқиб, мадори қуриган қўлларига, ям-яшил картошка палакларига томчилаган ва кўз ўнгти хиралашиб, ҳеч нарсани кўрмай қолган, ишлай олмаган эди. У кетмончани улоқтириб, ерга ётиб олган, юзини кафтлари билан тўсиб роса йиғлаганди.

Куни кечаёқ у ўз турмушига лаънат ўқиб, қарғанганди, ўшанда теварагидаги жами нарса кўзига ёқимсиз, булат қоплаган осмондай хунук кўринган бўлса. бугун олам шодликка тўлгандай, гўё ҳаётбахш ёз ём-ғиридан кейин барқ уриб яшнаётгандай кўринарди. Аксинья, энди кўтарилиб келаётган қуёшнинг қиялама шуъласида оловдай ялт этиб кетган эманинг жимжимадор баргларига хаёл аралаш тикиларкан: «Биз ҳам ўз баҳтимизни топамиз!» деб ўйланарди.

Дараҳтлар тагида, кунгай томонда ранг-баранг хушбўй гуллар очилиб ётарди. Аксинья гуллардан бир қучоқ териб олди-да, Григорийдан нарироққа келиб ўтириди, ёшлиги эсига тушиб, гулчамбар тўқиди. Гулчамбар ниҳоятда чиройли чиқди. Аксинья уни анчагача томоша қилди, сўнгра, пушти ранг наъматак гулидан бир нечтасини унга қадади-ю, Григорийнинг бош томонига қўйди.

Соат тўққизга яқин Григорий от қишинашидан чўчиб уйғонди-да, ўтирган жойида атрофни тимирскилаб, қуролини ахтариб қолди.

— Ҳеч ким йўқ,— деди Аксинья секингина.— Нега қўрқиб кетдинг?

Григорий кўзларини ишқалаб, жилмайди.

— Қуён сингари ухлашга ўрганиб қолибман. Уй-қумда ҳам бир кўзим очиқ, бир қулоғим динг: тиқ этган товушга чўчиб тушаман... Ҳей, азизим, бу нарса ҳали бери эсдан чиқмайди. Кўп ухладимми?

— Йўқ. Яна пича ухласанг бўларди, а?

— Уйқуга яхшилаб қониш учун сурункасига икки кун ухлашим керак. Яххиси, нонушта қилайлик. Нон билан пичноқ эгар халтасида, ўзинг топиб оларсан, мен отларни сугориб келаман.

Григорий ўрнидан туриб шинелини ечди, кифтларини қимирлатиб керишди. Офтоб жазиллатарди. Шамол дараҳт баргларини алғоқ-далғоқ қиласар, баргларнинг шитир-шитиридан булоқ сувининг шилдираган овози ҳам эшитилмасди.

Григорий сув бўйига тушди, тош ва шохлар билан бир жойдан сувни тўси, қиличи билан тупроқ қазиб тош ораларига босди. Тўғонча ёнида сув йиғилгандан кейин отларни етаклаб келиб сугорди, сўнгра, юганларини бошидан олиб, яна ўтлагани қўйиб юборди.

Нонушта устида Аксинья:

— Бу ердан жўнаб қаерга борамиз? — деб сўради.

— Морозовскаяга. Платовга етганимиздан кейин, ўёғига яёв кетамиз.

— Отлар-чи?

— Отларни ташлаб кетамиз.

— Шундай отларки, одамнинг кўзи қиймайди, Гриша! Айниқса, кўк от суқсурдай экан, қандай кўзинг қияди? Уни қаердан олгансан?

— Топганман-да... — Григорий маъюслик билан кулимсиради, — бир тавричанликдан тортиб олганман.

Бирпас ўйланиб туриб:

— Кўз қиймаса ҳам баҳридан ўтишга мажбурмиз... Асбжаллоблик бизга тўғри келмайди, — деди.

— Қуролингни нима учун олиб юрибсан? Бизга қурол нимага керак? Бирортаси кўриб қолса, балога қоламиз-ку.

— Кечаси бизни ким кўрарди? Мен буни эҳтиёт шарт обқолдим. Қуролсиз юрсам юрагим чўчиди... Отларни ташлаганда буни ҳам улоқтириб ураман. Үшанда ҳеч кераги бўлмайди.

Нонуштадан сўнг иккиси ерга солинган шинель устига чўзилишди. Григорий, мудроқ босиб, уйқу билан олишар, Аксинья тирсаги ерга тиralган ҳолда, усиз қандай кун кечирганини, жудоликда қандай қийналганини сўзларди. Григорий мудроқ аралаш унинг бир оҳангдаги овозини эшитар, бироқ қовоғи оғирлик қилаётгандай кўзини очолмасди. Баъзан у Аксинъянинг гапини бутунлай эшииласди. Овози тобора узоқлашаётгандай, хирароқ эшитилар, бора-бора бутунлай жимиб қоларди. Григорий чўчиб уйғонар, лекин бир неча минутдан кейин яна кўзини юмарди. Ҳорғинлик голиб келиб, бутун идроку иродасини сусайтирган эди.

— ...соғинишади, доим, дадам қани, деб сўрашади. Мен уларни алдаб-сулдайман, кўпинча эркалата-ман. Бора-бора, менга ўрганиб қолишди. Дуняшканинг олдига кам киришадиган бўлишди. Полюшка жудаям ювощ, камгап. Латта-путталардан қўғирчоқ қилиб бераман дeng, стол тагига кирволиб, шуни ўйнаб ўтираверади. Мишатка бўлса, бир куни кўчадан чопиб келди, дар-дағ титрайди... «Сенга нима бўлди?» деб сўрасам, йиғлаб юборди: «Болалар менминам ўйнамай қўйишди, даданг бандит, дейишади. Ойи, ростдан у бандитми? Бандитлар қанаقا бўлади?»— дейди. Мен унга: «Даданг ҳечам бандит эмас. У фақат... баҳтсиз бир одам», — дейишим билан: Нега баҳтсиз? Баҳтсиз дегани нима?—деб сўрай бериб роса мени қийнади. Ундей деб кўрдим, мундай деб кўрдим, сира тушунтиромадим... Ўзидан-ўзи улар мени «ойи» дейдиган бўлишди, Гриша, мен ўргатганим йўқ, тағин кўнглингга келмасин. Михайл ҳам уларни хафа қилгани йўқ, ишқилиб, ширин гапини аямайди. Лекин мен билан сўрашмайди, тескари қараб ўтиб кетаверади; станицадан болаларга икки марта қант келтириб берди. Прохор сенинг тўғрингда кўп қайғуради. Эсизгина одам, соб бўлди, дейди. Утган ҳафта уйга кириб, сендан гап очилганда йиғлаб юборди... Уйни тинтишди, фақат қурол қандиришди, бўғот тагларини, ертўлани, ҳамма ёқни тинтиб кўришди...

Аксинъянинг гапи тамом бўлмасданоқ Григорий ухлаб қолди. Унинг тепасидаги ёш қайроғочнинг баргла-

ри шамолда шитирларди. Юзига танга-танга офтоб тушиб ўйнаб турарди. Аксинья Григорийнинг юмиқ кўзларидан ўпди, сўнгра, унинг қўлларига бетини қўйиб, ўзи ҳам уйқуга кетди, уйқусида жилмая бошлади.

* * *

Ярим кечага яқин, ой чиққан маҳалда улар Қуруқ жардан жўнашди. Икки соат йўл юрилгандан кеинин дўнгдан Чир бўйига тушишди. Пичанзор ичидан қизилоёқлар чийиллашар, сув тўхтаб қолган қамишзорда қурбақалар вақиллашар, аллақайси томонда, олисдан ҳайқирган кўл буқасининг овози келарди.

Дарё бўйлаб чўзилиб кетган қатор боғлар туманда қорайиб кўзга хунук кўринарди.

Кўприкдан сал берида Григорий тўхтади. Қишлоқ тун сукунати оғушида эди. Григорий пошнаси билан ниқтаб, отини четга бурди. У кўприкдан ўтишни истамади. Бу жимжитликка ишонгиси келмас, қўрқарди. Қишлоқнинг чеккасидан улар отларни сувга солиб ўтишди-да, энди тор кўчага бурилмоқчи бўлганларида, бирданига зовурдан бир одам чиқди, унинг кетидан яна учтаси пайдо бўлди.

— Тўхта! Ким у?

Бақирган овоздан Григорий чўчиб кетди, жиловни торти. Дарҳол ўзига келиб: «Ошна!— деб жавоб берди-ю, шартта отни кетига буриб, Аксинъяга шивирлади:— Қайтар! Кетимдан қолма!»

Пистирмадан чиққан тўрт киши — ўша кечаси қишлоқда тунаган галла отрядининг одамлари бўлиб, улар томон шошмасдан келаверди. Биттаси тўхтаб, папирос чекиши учун гугурт чақди. Григорий кучи борича Аксинъянинг отига қамчи босди. От бир юлқиниб ўқдай учиб кетди. Григорий от бўйнига энгашиб олиб, унинг кетидан чоптириб борарди. Юракни ҳовлиқтирувчи сукунат бирпас давом этди-да, сўнгра, баравар отилган ўқлар садоси момақалдироқдай қарсиллаб кетди. Ёлқини чақмоқ сингари қоронгиликни ёритиб юборди. Григорий ўқларнинг визиллашини ва: «Милтиққа-а-а!» деган чўзиқ команда товушини эшилди.

Дарёдан юз саржин чамаси берироқда Григорий шаталоқ отиб кетаётган кўк отга етиб олди-да:

— Энгаш, Ксюша! Пастроқ энгаш! — деб бақирди.

Аксинья ўзини чалқамчасига ташлаб жиловни тортар, ёнига оғарди. Григорий уни ушлаб қолмаганда, отдан қулаб тушиши муқаррар эди.

— Ўқ тегдими? Қатингга тегди? Гапирсанг-чи ахир! — хириллаб сўради Григорий.

Лекин ў жавоб бермас, борган сари шалпайиб, унинг қўлига ўзини ташларди. От чоптириб кетаётган Григорий уни бафрига босар, ҳарсиллаб шивирларди:

— Гапир! Худо ҳақи, бир нима дегин! Сенга нима бўлди ўзи?!

Бироқ у Аксинъядан на бир оғиз сўз ва на инграган товуш эҳитмади.

Қишлоқдан икки чақирим чамаси узоқлашгач, отини йўлдан четга буриб, жарга тушди ва ўша ерда отдан тушиб, Аксинъяни оҳиста ерга олиб ётқизди.

У Аксинъянинг иссиқ кофтасини ечди, юпқа чит булузкаси билан кўйлагининг кўкрагини йиртди-да, қўли билан пайпаслаб жароҳатни топди. Ўқ унинг чап курагидан кириб, сүякни майдалаб юборган ва қиялаб бориб ўнг томондан—ўмров суюги остидан чиқкан эди. Григорий қонга бўялган қалтироқ қўллари-ла тоза ич кўйлагини, бинт солинган шахсий пакетни хуржундан олди. Аксинъяни белидан кўтариб, орқасига тиззасини қўйиб, ўмрови остидан отилиб чиқаётган қонни тўхтатиш учун жароҳатни боғлай бошлади. Бинт ҳам, йиртилган кўйлак ҳам бирпасда қоп-қора қонга бўялиб, бутунлай ивиб кетди. Аксинъянинг сал-пал очилиб қолган оғзидан қон келар, томоғига тиқилиб қултилларди. Ваҳим чангалида мурдага ўхшаб қолган Григорий, энди умид иплари узилгани ва рўй бериши мумкин бўлган энг мудҳиш мусибат бошига тушганини англади...

У Аксинъяни қўлида кўтариб қиямаликдан қўй қумалоги сочилиб ётган кўкатлар орасидаги сўқмоқ йўл билан жар тагига олиб тушди. Унинг шилқ этиб тушган боши Григорийнинг елкасида эди. Аксинъянинг эн-

тикиб нафас олишини, нафаси сизғириб чиққанини у эшитар, оғзидан келган илиқ қон ёқадан кўксига қўйи-лаётганини, жони узилишига яқин қолганини сезарди. Кетма-кет иккала от ҳам жарга тушди, пишқириб, сувлиқларини шилдиратиб, барра ўтга ёпишидилар.

Тонготарга яқин Аксинья Григорийнинг қўлида жон берди. Ўша ҳушидан кетганича яна қайтиб ўзига келмади. Григорий унинг қонга бўялган шўртанг, муздай лабларидан ўпди-ю, авайлаб кўкатга ётқизиб, ўрнидан турди. Номаълум бир куч кўксидан итариб ташлагандек бўлди, у кетига тисарилиб бориб чалқанчасига йиқилди, бироқ капалаги учиб, ўша заҳотиёқ яна оёққа турди, яна йиқилиб, бошини тошга қаттиқ уриб олди. Шундан кейин у чўккалаб олиб, қиличини филофидан суғурди-да, лаҳад қазий бошлади. Тупроқ нам ва юмшоқ эди. У ошиқиб тез-тез ер кавлар, бироқ нафаси қисиб, бўғиларди; эркин нафас олиш учун эгнидаги қўйлагини йиртиб ташлади. Субҳидам шабадаси терлаган кўксига муздай тегиб, енгил тортди, ишлаш осон бўлди. Бир минут ҳам дам олмасдан тупроқни гоҳ ҳовучлаб, гоҳ шапкасига солиб, чиқариб ташлайверди, шундай бўлса-ла, бел бўйи гўрни қазиб бўлгунича анча вақт кетди.

Григорий ўз Аксинъясини эрталаб кун ёйилиб кетганда дағн этди. Қабр ичида оқариб кетган жонсиз қўлларини бут шаклида қовуштириб жонсиз кўксига қўйди, осмонга қараганича қотиб қолган, чала юмиқ сўник кўзларига тупроқ кирмасин деб, рўмолини юзига ёпди. Григорий у билан видолашаркан, бу жудолик узоқ давом этмаслигига қаттиқ ишонган эди...

Қабр устидаги сариқ нам тупроқни астойдил кафтлари билан босиб уйди, сўнгра қабр ёнига тиз чўкиб, бошини эгиб оҳиста чайқалганича узоқ туриб қолди.

Энди шошишга ҳожат қолмаган эди. Бутун умидлар барбод бўлганди.

Гармсел кўтарган чанг-тўзон орасидан, жар устида қуёш кўтарилимоқда эди. Унинг нурлари Григорийнинг оппоқ соchlарини кумушдай йилтиратар, мурданикидай оқариб кетган, ваҳимали суратда қотиб қолган юзини ёритарди. Григорий оғир уйқудан уйғонгандек бошини

баланд кўтарди-ю, қоп-қора осмон билан кўз қамашти-
рувчи ёрқин қуёшнинг қора гардишини кўрди.

XVIII

Илк баҳор пайти, ердан қор кетиб, қиши бўйи эзилиб
ётган гиёҳлар қуриши билан даштда ўрт бошланади.
Шамолда қутурган аланга аждаҳодай яланиб, олов ти-
ли билан қувраган ясмиқни ямлаб ютади, гоҳ каррак-
нинг баланд пояларига тармашиб, гоҳ қизғиши юлғун
устидан яна пастга тушади... Шундан кейин, тарс-тарс
ёрилиб, куйиб кул бўлган ердан аччиқ куюнди иси кў-
тирилиб, даштни бошдан-оёқ босиб кетади, анча вақт-
гача тарқамайди. Теварак-атрофда ям-яшил майса ўт
барқ уриб ўсоверади, мовий осмон қўйинида сонсиз тўр-
ғайлар чулдирашади, барра кўкатлар орасида ёввойи
ғозлар ўтлашади, базғалдоқлар уя солишади. Лекин
ўрт кетган жойларда эса, қоракуяга айланган ўлик
тупроқ кўзга балою қазодек кўринади. Бу ерга парран-
да ин қўймайди, ҳатто ёввойи ҳайвон ҳам бу ердан
четлаб ўтади, фақат шамол, тез учар шамолгина бу
ерни тўзитиб ўтади-ю, кўкимтири кули билан аччиқ
қоракуясини олисларга учириб кетади.

Григорийнинг ҳаёти ўрт кетган дашт сингари қоп-
қоронғи зимиstonга айланди. У қалбининг ҳамдами
бўлган энг азиз кимсасидан айрилди. Бераҳм ажал
уни ҳамма нарсадан жудо қилди, барча умидини хок-
туроб этди. Ёлғиз болаларигина қолди. Бироқ у ҳали
ҳам дунёдан умидини узолмас, гўё, хазон бўлган энди-
ги умрининг ўзи учун ё бошқалар учун бирор аҳамия-
ти бордай, жон-жаҳди билан ҳаётга тармашарди...

Аксинъяни кўмгандан кейин у, уч суткагача дашт-
ма-дашт санғиб юрди, уйига ҳам қайтмади, тавба-та-
зарру билан Вешенскаяга ҳам бормади. Тўртинчи ку-
ни Усть-Хопер станицасига қарашли қишлоқлардан
бирида отларни қолдириди-да, Дондан ўтиб, Слашевск
ўрмонига,— апрелда Фомин тўдаси биринчи марта
қирғинга учраган жойга,—яёв жўнади. Уша вақтда у,
ўрмонда доимий истиқомат қилувчи дезертиrlар бор,
деб эшитганди. Григорий яна Фоминга қўшилишни ис-
тамай, шу дезертиrlар ёнига бормоқда эди.

Қаттакон ўрмон ичида у бир неча кунгача дайлиб юрди. У очликдан қийналар, бироқ шунга қарамай, бирон қишлоққа киришга юраги ботинмасди. Аксинья билан бирга у қадимги ақл-идрокини ҳам, қадимги жасурлигини ҳам йўқотган эди. Агар бирор шох-шабба қисирлаб синса, қалин ўрмонда бир нима шитирласа, ёки кечаси парранда чийилласа, у қўрқиб кетар, саросималикка тушарди. Григорий пишмаган ёввойи қулупнай, аллақандай майдা-майда қўзиқорин, ёнғоқ барглари билан кун кечирарди, шунинг учун чўпдай озиг кетганди. Бешинчи куни кечқурун дезертирлар йўлиқиб, уни ўз ертёлаларига олиб келдилар.

Улар етти киши эди. Ҳаммаси шу атрофдаги қишлоқлардан бўлиб, бултур куздан бери сафарбарликдан қочиб шу ўрмонга жойлашиб олган эдилар. Улар каттакон ертёлада бекам-кўст, рўзфорлари тахт, худди уйдагидай бемалол яшар эдилар. Кечалари тез-тез уйларига бориб туришар, қайтишда нон, сўк, ун, картошка келтиришарди. Бегона қишлоқлардан мол ўғирлаб, гўшт масаласини ҳам осонгина ҳал қиласар эдилар.

Бир вақтлар 12-нчи казак полкида хизмат этган бир дезертир Григорийни таниганлиги учун уни кўп суриштирмасдан қабул қилиб олдилар.

* * *

Григорий бора-бора, диққинафас кунларнинг ҳисобини йўқотиб қўйди. Октябргача бир амаллаб чидади, лекин кузги ёмғиргарчиллик бошланиб, кетидан совуқ тушиши билан болаларини, жонажон қишлоғини багтар соғина бошлади...

У бир амаллаб кунни кеч қилиш мақсадида, эрталабдан кечгача сўрида ўтириб олиб, ёғочдан қошиқ, товоқ қиласар, юмшоқ ёғочни моҳирлик билан йўниб, кичкина-кичкина одам ва ҳайвонлар шаклини ясарди. У ҳеч нарсани ўйламасликка, заҳарли қайғу-аламларни қалбига йўлатмасликка ҳаракат этарди. Кундузлари бунинг чорасини топа олса-да, лекин узундан узун қиши кечалари оғир хотиралар эсига тушавериб, ахийри

уни енгарди. Григорий сўрида ҳадеб у ёнбошидан бу ёнбошига ағдарилавергәр, кўзига уйқу келмасди. Ертўлода яшовчилар кундузлари унинг нолиганини сира эшиитмас, лекин кечалари у дам-бадам чўчиб уйғонар, титраб юзини арта бошларди: ўшанда икки бети билан ярим йилдан бери олинмай ўсиб кетган қалин соқоли кўз ёшидан жиққа ҳўл бўлганини сезарди.

У тушида болаларини, Аксиньяни, онасини, дунёдан ўтган барча қариндошларни тез-тез кўриб турарди. Григорийнинг бутун ҳаёти ўтмишда эди, лекин ўтмиш ҳам оғир тушдай кўз юмиб очгунча ўтди-кетди. «Яна бир марта туғилиб ўсган жойларимни кўрсам, болаларим билан дийдор кўришсам, иннайкейин, ўлсам армоним йўқ эди»,— деб ўйларди доим.

Эрта кўклам кези, бир куни тўсатдан Чумаков келиб қолди. У белигача ивиган бўлса ҳам, қадимгисидай тетик ва шошмашошоқ эди. Печь ёнида исиниб, уст-бошини қуритиб олганда сўнг Григорийнинг ёнига, сўрига бориб ўтиrdи.

— Ҳей, Мелехов, сен кетгандан кейин биз роса маза қилиб ўйнадик-да! Астрахандаям бўлдик, дашти қипчоқдаям... Оламни айланиб, роса томоша қилдик! Қанча одамнинг қонини тўқдик — ҳисоби йўқ. Яков Ефимовичнинг хотинини гаров тариқасида қамашди, мол-мулкини олиб кетиши, шундан кейин у тўнини тескари кийиб, Совет ҳукуматига хизмат қилган ҳар қандай одамни қиличдан ўтказилсин, деган буйруқ берди: биз ҳам муаллим борми, агроном ва фельдшер борми ёппасига қира бошладик... Қиличдан ўтказилмаган касб эгаси қолмади! Ахийри келиб бизниям тамом қилишди, бутунлай қириб ташлашди,— деди у хўрсаниб, ҳали ҳам бадани увишганидан жўнжикиб ўтиради.— Олдин улар Тишанская ёнида бизни тор-мор қилишди, бундан бир ҳафта илгари Солоний ёнида бутунлай қириб ташлашди. Кечаси улар бизни уч томондан қуршовга олиб, фақат дўнгга чиқадиган биттагина йўлни очиқ қолдиришди, лекин у ердаги қор отнинг қорнига чиқади... Тонг отиши билан бизни пулемётлардан ўқса тутишди, бошланди қиёмат... Ҳамма одам тутдай тўкилди. Мен билан Фоминнинг ўғли — фақат икки киши қочиб қутулдик. Фомин куздаёқ ўғлини ёни-

га олволган эди. Яков Ефимович ҳалок бўлди. Менинг кўз олдимда ўлди... Бир ўқ оёғига тегиб, тиззасининг кўзини ўпириб юборибди, иккинчи ўқ бошини ялаб кетиби. От устида туролмай, уч мартагача қулаб тушди. Тўхтамизу уни кўтариб яна эгарга ўтқазамиз, бирпас чопгандан кейин яна қулайди. Учинчи ўқ қоқ биқинига тегди... Шундан кейин биз уни ташлаб кетдик. Юз саржин чамаси узоқлашгандан кейин кетимга бурилиб қарасам, икки отлиқ уни ётган жойида қиймала-япти...

— Оқибат шу бўлиши аниқ эди,— деди Григорий бепарвонлик билан.

Чумаков уларнинг ертўласида бир кеча тунади-да, эрталаб хайрлаши.

— Қайга борасан?— деб сўради Григорий.

— Кун кечиришнинг осон йўлини қидираман,—кулиб жавоб берди Чумаков. — Сен ҳам мен билан юра қол!

— Йўқ, ўзинг боравер.

— Ҳа, сиз билан туриш менга тўғри келмайди... Сенинг касбинг — ёғочдан товоқ-қошиқ ясаш. Бу менга боп ишмас,— деб кулиб масхара қилди-да, Чумаков таъзим қилиб бошидан шапкасини олди:— Хайр, беозор қароқчилар, нон-туз ва жой берганларинг учун раҳмат, сизларни Исо ўз паноҳида асрасин. Жойларинг жудаям диққинафас экан, худойим ол қўлим деб сизларгаям қувноқлик ато қилсин. Йўқса, синган со-полга сиғиниб, ваҳшийлашиб кетибсиз—шумур турмуш бўлди-ю!

Чумаков кетгандан кейин Григорий яна бир ҳафта-ча ўрмонда турди-да, йўл тараддудига тушди.

— Уйгами?— деб сўради дезертилардан бири.

Григорий ўрмонга келганидан бери энди қовоғи очилиб, сал-пал жилмайди:

— Ҳа, уйга.

— Кўкламгача сабр қилсанг бўларди, биринчи майда амнистия берилади, ўшанда тарқалармиз.

— Йўқ, ортиқ сабр қилолмайман,— деди-да, Григорий улар билан хайрлаши.

Эртаси куни эрталаб у Дон бўйига — Татарск қишлоғининг рўпарасига келиб тўхтади. Қувониб ҳаяжон-

ланганидан ранги қув ўчиб, ўз уйига узоқ тикилиб қолди. Ниҳоят, милтигини ерга қўйди, халтасидан ипигнларини, нашапоядан қилинган лосни, кичкина шишадаги милтиқ мойини олди, негадир, ўқларини сабаб кўрди. Ҳаммаси бўлиб ўн икки обойма, ундан ташқари, йигирма олти дона ўқ бор эди.

Тик жар тагидаги муз қирғоқдан кўчган эди. Тип-тиниқ қўкимтири сув чайқалиб, ўзини кунгирадор юпқа муз четларига уриб синдиради. Григорий милтиқ билан, наганини сувга ташлади, сўнгра, ўқларни ҳам ташлади-да, қўлини шинель этагига яхшилаб артди.

Қишлоқдан пастроқда март қуёшида илма-тешик бўлиб кетган кўкиш муз усти билан юриб, Дондан ўтди-да, катта-катта қадам қўйиб уйига томон юрди. Пристанга тушаверишдаги қияликда турган Мишатка-ни олисданоқ таниб, унинг ёнига чопқиллаб боргиси келса-да, ўзини аранг тўхтатди.

Мишатка тошдан осилиб тушган сумалакларни синдириб олиб улоқтиради-да, қўкимтири муз парчаларининг тепадан пастга сирғаниб тушишини томоша қиласарди.

Григорий тепа остига келди, ҳарсиллаб, бўғиқ овоз билан ўғлини чақирди:

— Мишенька!.. Ўғлим!..

Мишатка чўчиб тушди, унга бир қаради-ю, бошини қўйи солди. Бу соқоли ўсган, важоҳати хунук одамни у таниган эди...

Григорий ўрмонда юрганида, кечалари болалари эсига тушганда хаёлан шивирлаб, ғойибона эркалатиб айтган ширин сўзлари ҳозир бутунлай хаёлидан кўтарилиганди. У чўкка тушиб, ўғлининг қизариб кетган муздай қўлларидан ўпар, ўпкаси тўлиб ёлғиз бир сўзнигина такрорлар:

— Ўғлим... ўғлим...— дерди холос.

Кейин Григорий ўғлини қўлига олди-да, ўтдай чақнаган кўзлари билан унинг юзига тикилиб сўради:

— Ҳамма тинчми?.. Амманг, Полюшка эсон-омон юришибдими?

Мишатка ҳали ҳам дадасининг юзига тик қарай олмасдан, секингина жавоб берди:

— Дуня аммам юрибди, Полюшка кузда бўғма ка-
салдан ўлди... Михаил поччам бўлса, хизматда...

Шундай қилиб, уйқусиз тунларда Григорийнинг ха-
ёлини банд этган орзу-умидлардан биттасигина рўёбга
чиқди. У туғилиб ўсган ўз уйининг дарвозаси олдида,
ўз фарзанди билан дийдор кўришиб, уни қўлида кў-
тариб турарди...

Унга шундан бўлак овунчоқ қолмаганди, ёлғиз шу
болани деб ер юзида, муздай қуёш нурига чўмган бе-
поён дунёда юришга мажбур эди.

МУНДАРИЖА	
Тўртинчи китоб	
Еттинчи қисм	5
Саккизинчи қисм	334

На узбекском языке

Михаил Александрович
ШОЛОХОВ

СОБРАНИЕ СОЧИНЕНИЙ
V ТОМ

Гослитиздат УзССР — Ташкент — 1963

Перевод с издания 8-томного собрания сочинений М. Шолохова,
выпущенного Гослитиздатом в 1956—1960 г. г.

Редактор *М. Осам*
Рассом *А. Ошайко*
Расмлар редактори *Г. Остапенко*
Техн. редактор *Н. Курилова*
Корректор *И. Кобилов*

* * *

Босмахонага берилди 7/VIII-62. Босишга руҳсат этилди
14/IX-62. Формати 84×1081/32. Босма л. 17,375. Шартли босма
л. 23,8. Нашр. л. 27,68. Индекс: б/а. Тиражи 15000.
ЎзССР давлат бадний адабиёт нашриёти.
Тошкент, Навоий кӯчаси, 30. Шартнома 71/61.

* * *

ЎзССР Маданият министрлиги Ўзглавиздатининг
Ихтиослаштирилган ҳарф терув фабрикасида терилиб ва
матрица қилиниб, 1-босмахонасида босилди. Тошкент,
Ҳамза к. 21, 1963 йил. Заказ № 807. Баҳоси 1 с. 3 т.

P2
Ш78

Шолохов Михаил.
Асарлар тўплами. 8 томлик. Т. 5. Т.,
Ўзабадийнашр, 1963.

Т. 5, Тинч Дон. 4-китоб. Таржимон А. Шарапов. 1963. 560 бет.

p2